

民国趣史

李定夷

文硕阁

wenshuoge.com

关于我们	8
◎总统寿辰祝嘏记	10
◎国史馆长介寿之小启	12
◎冯上将军双寿纪	13
◎长老赌寿之佳话	14
◎粤巡按署庆寿志	15
◎江西之三星献寿图	17
◎陶然亭雅集之俚启	18
◎章一山却聘记	19
◎叶德辉之文艺谈	20
◎辜鸿铭之愤慨	21
◎创议复辟之健将	22
◎王 序与谭贝勒齐名	23
◎斯文又弱一个	24
◎宋育仁轶事	26
◎三湘耆旧传	29
◎无独有偶之假官	30
◎戚扬遇疯记	31
◎愿作鸳鸯不羡官	32
◎刘文嘉第二	33
◎吴营长之威风	34
◎使君泪滴牡丹江	35
◎法曹不法	36
◎何苦陶气呢	37
◎张大帅晋京纪	38
◎孙总长流血	39
◎王湘绮与史馆	40
◎张彪重入鄂州城	43
◎呜呼王治馨	44
◎死矣刘鼎锡	47
◎试院现形	48
◎公府新式结婚记	52
◎梁令娴于归记	53
◎狱中韵事	55
◎敦谊会之西曲	56
◎妓界助赈之韵启	57

◎风冠霞帔之光荣	58
◎巡按夫人之威风	59
◎女杰艳史	60
◎潇湘风流案	62
◎女剧界唯一之人物	67
◎奇奇怪怪之纸人	68
◎法政学生之奇呈	69
◎异想天开之掘金谈	70
◎江西之斯巴达	71
◎妒杀趣闻	73
◎当年雄风何在	74
◎岳父之重婚罪	75
◎木偶结缡记	76
◎冷飞天之杀身祸	77
◎惊绝梅兰芳	78
◎割乳奇案	79
◎风雨话金陵	80
◎毛丫头殒命记	82
◎天然戏	83
◎****谋财	85
◎均是贼也	86
◎留学界之趣闻	87
◎奇怪之奸案	89
◎苦女儿	90
◎腊八粥	91
◎迷信坎哀悼坎	92
◎快婿变老夫	93
◎胎产志异	94
◎男女混杂之修道	95
◎旧新年之厂甸热	96
◎北京第一舞台开幕记	97
◎北京第一舞台遭劫记	99
◎民国之新讳辨	101
◎警犬	102
◎余杭琐记	103
◎封台戏之特色	107
◎东三省之马贼	108
◎特赦声中之捐客	110

◎日历新景	111
◎我佛无灵	112
◎新舞台重整旗鼓	113
◎依然歌舞升平	114
◎中学万年	115
◎赛会之惨剧	116
◎北京之真国庆	117
◎庆贺共和复活记	119
◎上海之真国庆	120
◎拥护共和纪念会	123
◎庆祝会之活剧（割下辫发十余箩）	124
◎黄上将之国葬仪	125
◎黄上将逝世记	126
◎黄上将开丧记	127
◎黄灵离沪记	128
◎蔡上将逝世记（蒋震方之通电）	130
◎蔡灵回国记	131
◎蔡灵离沪记	133
◎北京追悼黄蔡记（挽词难煞诸 大老祭台哭倒沈佩贞）	134
◎成都悼蔡记	136
◎长沙悼黄记	137
◎黄花岗上哭英雄（魂兮归来看取人间何世）	138
◎追悼海珠烈士记	139
◎记湘绮老人之丧	140
◎李军长之荣誉（崇德报功 当然如此）	141
◎东施效颦	142
◎有清遗民（人各为其主未可厚非也）	143
◎周公未路（男儿报国争先逃）	144
◎狂奴故态	145
◎官场真是戏场（第一出送盒子第二出打皂王）	146
◎重婚之法官	147
◎运动家之如夫人	148
◎知事施非刑	149
◎知事弃发妻	150
◎知事讨没趣	151
◎知事拿妖怪	152
◎知事袒小窃	153
◎知事闹新房	154

◎知事闹笑话	155
◎知事拍马屁	156
◎袁公子碰碑（故宫禾黍泣残阳）	157
◎省长困于群小	158
◎盛氏之阔绰	159
◎镇守使延师条件	160
◎洪宪遗臣（早应该侍先帝于地下）	161
◎稟牍笑柄	162
◎劳乃宣碰钉子	163
◎总长宴客趣闻	164
◎兔官僚	165
◎总统府闹鬼	166
◎雍和宫打鬼	167
◎信江中学之鬼	168
◎铁算盘	169
◎狎邪鬼	170
◎瓦石纷飞	171
◎肉金刚	172
◎东岳大帝之后	173
◎宅怪	174
◎浊水治病	175
◎旧人魂附新人体（但见新人笑那闻旧人哭怨气所郁当有此变）	176
◎活鬼	177
◎范郎屡赴天台约	178
◎谈狐一	179
◎谈狐二	180
◎谈狐三	181
◎死而复活	182
◎借尸还魂	183
◎留美学校闹鬼	184
◎地藏会	185
◎父入女胎	186
◎卢江烈妇（情之圣者）	187
◎马议员之艳史（名士风流）	188
◎孝姻缘	189
◎李郎妙计（居然入我彀中）	190
◎雀屏新例（视金莲五字何如）	191
◎宣南奸杀案	192

◎催妆诗（都是个听而不闻枉为了绝妙新词）	193
◎白发红妆（一树梨花压倒双海棠）	194
◎杀奸奇计	195
◎小学生宿娼	196
◎黑龙江之风流案	197
◎欢喜禅	199
◎自由结婚之稟	200
◎自由结婚之函	201
◎阍妓离婚案	202
◎多夫之奇论	203
◎手足几成伉俪	204
◎不嫁主义	205
◎惩罚术	206
◎教员恋爱自由	207
◎懦夫快举	208
◎不良之妇	209
◎经理与女工（双双捉将官里去）	211
◎淫妇自毙	212
◎刘玉凤之哀史（始乱之终弃之张生母乃不情）	213
◎金事韵事	214
◎牡丹花下风流鬼	215
◎小儿女之憨情	216
◎捉奸案之艳判	217
◎南海监狱之黑幕	218
◎王局赌之黑幕	219
◎和尚行医之黑幕	220
◎赌徒骗钱之黑幕	222
◎黄天党之黑幕	223
◎谋财害命之黑幕	224
◎抢匪之黑幕	226
◎拐犯之黑幕	227
◎恶家庭之黑幕	228
◎顽民械斗之黑幕	229
◎翻戏党之黑幕	230
◎讣闻大观	231
◎古墓中之宝玉	232
◎塔顶之宝	233
◎明代钞票	234

◎古窑	235
◎金香炉	236
◎三十万金之石棺	237
◎棺中小鱼	238
◎鲋鱼与苔菜	239
◎兽性人	240
◎公鸡生卵	241
◎腹中花蛇	242
◎金匱石室	243
◎袁帝之龙袍	244
◎洪宪家臣之墨宝	245
◎国旗绣鞋	246
◎大牡丹	247
◎男子之尾	248
◎人妖	249
◎造像石幢	250
◎古钱铜印	251
◎篆书墓砖	252
◎洪宪皇子之真迹	253
◎梅郎惨死之记载（一则曰呜呼梅郎再则曰呜呼梅郎）	254
◎名伶之寿险费	255
◎翰墨姻缘	256
◎圆光奇闻	257
◎新舞台之名角（一则曰板门模样再则曰其丑如鬼三则曰声如破锣四则曰终不开口）	258
◎议会门前新绷儿	259
◎泰伯之荣典（是岂足为泰伯荣哉）	260
◎女生之悲剧（约指一枚性命一条）	261
◎长醉不醒之学生	262
◎投海请愿之异闻	263
◎麻袋中之女尸	264
◎大风冻死新嫁娘	265
◎闻所未闻之死法（死得好快）	266
◎假疯子饱尝异味	267
◎林黛玉之劫运（以金刚不坏之身罚罗汉满堂之数）	268

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

◎总统寿辰祝嘏记

民国三年九月十六日为中华民国第一任正式大总统袁世凯寿辰。袁大总统自就任正式总统以来，此其第一次寿辰也。大总统本诞生于前清咸丰九年八月二十日。此次以九月十六日为寿辰，盖以清时用阴历，民国用阳历，月日时有参差。当六月间总统府礼官处，曾查阴阳历对照表，是年八月二十日适为阳历之九月十六日。又查英皇诞日，其国际觐见在六月三日，而家人庆贺则在六月二十二日。遂援外国分两期祝嘏之例，拟定阳历九月十六日为中外觐贺之期，阴历八月二十日为家庭庆祝之日。适东西列强兵戎相见，大总统以各国元首方枕戈待旦，岂可因寿辰过事铺张？谕令停止筵宴及觐贺与外交上之茶会，以为忧时勤政之表示。于是吾人欲纪其盛以伸庆祝之忱者，忽减少若干材料。然躬逢庆典，不能不搜罗各种事实，以为胪欢之助焉。

各国君主及总统之寿辰，多亲自出外举行阅兵礼。其初亦拟援例举行，阅兵地点拟在天安门外。其司令官将于段祺瑞、王士珍、雷震春三人中择其一。惟天安门外两旁均系前清所设朝房，日前市政公所将此朝房拆毁，成一空地，尘土堆积，颇不平坦。十五日，令兵士多人铲平，用轻便铁路搬运以免障碍。然为时太促，尽一日之力，仍不能平。统率办事处乃传知改为十月。一场热闹，徒令人望眼欲穿耳。

祝寿典礼虽已停止，并由外交部告知驻京各国公使，然恐外宾仍有情殷入觐者，若无人接待，未免酬酢有疏。特派内史二人在典谒室招待，并照料签名事宜。而英、比等国并送有祝贺国书，由外交部转呈至于清皇室。本与各国情形不同，仍派亲贵至总统府觐贺，并致骈四俚六之祝词。其手笔则出自前清南书房行走，至今犹戴假辫子之袁励准也。

一切礼仪虽均从简，然国民庆祝情殷，内外城之大街小巷无不高悬五色国旗，各衙署各学校均放假一日，以志庆祝。而出入总统府之新华门，亦扎青结彩以为点缀。十六日上午六时，军事顾问及侍从武官为一班入内觐贺，大总统仍衣便服出见。其后统率办事处各员为一班，国务卿左右丞各部总次长内史处及政事堂诸人又为一班，其入府觐贺者如是而已。此外简荐任各官，仅递名柬者居多。约法会议及各部中且有开一名单，派人送往挂号者。

政事堂接到各省来电，询问对于大总统祝贺公文，应用何种程式者不一而足。政事堂以此项公文体式未曾规定，复电以电贺为宜，以故所到贺电颇多。又有派员来京贡献方物者，贡献之物，内有织花夏布四匹者，疑系江西之长官所献；大理石屏风一座，疑系来自 南或 南人者。然大总统恐其踵事增华，多已辞却不受。

有人以大总统手创民国，其功绩在人耳目，不可不谱诸乐歌以垂不朽，而颂无疆。虽其所纂乐歌并不见佳，然歌功颂德之忱，亦自不可埋没。其歌曰：智周八表，惟

我公目明耳聰；德沾五族，惟我公嵩高岳崇。手挽狂瀾兮，障百川而之东；巍巍蕩蕩兮，不私天下于己躬。祝三多与九如兮，尧天舜民，民罔常怀。怀有仁，敬祝我大总统万万春。

◎国史馆长介寿之小启

湖南靖武将军汤芑铭以国史馆长王湘绮氏为一代儒宗，特援优礼三老之义，仿登堂介寿之仪，特具通启遍告同人，假定楠木厅为介寿地点。其启文曰：

“敬启者阴历十一月念九日为国史馆长王湘绮先生八秩晋四寿辰。北海清尊东溟景福辍兰台之史，简还通德之珂乡，遂驻 帷，更通宾客，评松颂柏，吐故纳新，望岳云而辉映冠裳，挹澧兰而芬生几席，茂叔见光风之度，魏公居昼锦之堂。千叟呼俦，九老在座。昔者虞夏宪言聿尊，齿德晚近冈陵称颂，共挈壶觞矧芑铭宦游郑公之乡，久濡经师之泽。蒲轮就道，钦聆德音，青兕度关，早迎紫气。谨援优老引年之义，并仿登堂介寿之仪，稟经致虔崇贤美，俗鹿鸣，{鹿吴}{鹿吴}乐，乡饮之。大宾兕觥油油侑公堂之春酒。夫惟大雅式，伸北斗之尊，敢告同人竞献南山之什，宾主辉乎三绝，贤俊萃于一堂，如翁苏斋为东坡作生辰，依袁沔□代南皮书，寿启传为盛事。佐此欢呼，统希公鉴。”

◎冯上将军双寿纪

朔风凛烈，寒气逼人，无衣无食之小民蹠躃于道。欻 盈耳，凄凉满目，冻饿而死者宁垣以内当以数十计，荒村野县不可得而知矣。兼以天时干旱，人心惶恐，米珠薪桂，百业凋零，欲述一二欢喜事，迄无可道者。恰值宣武冯上将军华甫与其夫人周女士道如百岁双寿，堂皇富丽，炫耀一时，视彼道路饿殍奚啻天上神仙也。

冯上将军年近六旬，其生辰为阴历十二月初四日，初十日乃周夫人四十大庆，巧合百岁双寿，为古来名臣大将罕有之盛事，故大开东阁，广宴来宾，以为一时佳话。惟礼节既隆重，职务遂繁多，特委将军府军需长张调臣、副官长何绍贤为承办正副主任，一切收礼会计指挥庶务由各课长、课员分配担任，招待外宾为交涉员冯国勋、军械所长高孔时，政界为金陵道尹王舍棠、财政厅长蒋懋熙，军界为宪兵司令陈调元、金陵镇守使王廷桢，商学两界为警察厅长王桂林、台营官地局长孔庆塘、将军府卫队司令马溶轩、江宁县知事樊溥霖，条理井然。

府门以外高扎松柏牌楼一座，中以电灯编成匾额一方，文曰：“共庆升平”。东辕门为“国恩家庆”，西辕门为“人寿年丰”，照壁墙上亦用电灯编成五色国旗两方。周围墙缘安设电灯千余盏，遥遥望之如火山银树，光照数里。由大门以至大堂亦沿屋设电灯彩棚，二门电灯匾额系“寿山福海”四字。大堂以内所悬大红缎子摹本寿幛约三百幅，二堂即为寿堂，中悬彩绣男女寿星，案上陈列之八仙献寿，蜡烛约三尺高，两边所挂之泥金寿屏光彩焕发，目为之迷，其他铺陈之华美，灯烛之辉煌，几疑非人间所有。笔难尽述矣。

府内由大堂以至大门，皆有卫队两行鹄立。大门以至辕门悉警察分班守卫，道中则车水马龙，往来如织，路人只可遥立而望，稍近辕门一步，辄遭驱逐。府内有职务办事之人，均挂红花一朵于胸前，以为符号，否则难近雷池一步也。

初十日（即阳历二十四号）清晨九点钟，由承办正副主任率领本府全体员司，着常礼服至寿堂前，向上行三鞠躬礼。冯上将军西向立，亦还三鞠躬礼，然后依次而退。外来本城文武各官与商学两界，均由各招待员率领至寿堂前行礼。设筵款待，山珍异味罗列满几，军乐新戏各奏其长。宾主欢呼，属僚钦仰，奢华富丽，为前代疆臣所未有。若非冯上将军功盖寰宇，名垂民国，盍克臻此？虽然若以今日之寿礼寿筵，移赈求一粥而不可得之哀鸿，则江苏省内不致有因冻饿而填沟壑者，上将军之功德更无量矣。

◎长老赌寿之佳话

美国社会学泰斗市俄古大学教授司达博士常游日本，与大隈伯交情甚密。一日，大隈语博士曰：“观君身体甚健，或当为长寿者。”博士曰：“然吾自信可活至百二十岁。”大隈大笑曰：“吾确自信能活至百二十五岁。”博士曰：“然则吾与阁下谁为长命，今尚在不可知之数，即以此事为赌，何如？”大隈快诺。中华民国之长老伍廷芳者，最近卫生之实行家，而司达博士之故交也。博士因遗书伍氏，劝其加入此赌寿之团体。伍氏复书博士云：“闻君与大隈伯共以长命为赌，实为雅人趣事，以阁下及大隈伯之身体健康，卫生得宜，当能各得高寿。然仆之健康远在两君之上，其寿命必较两君为尤长（按伍氏常自言能活至二百岁以外者），他日必能领取赌金于阁下及大隈伯子孙之手，请早准备遗嘱为幸。”此书一出，美日新闻均视此为一极有趣味之赌博。但未知最后之胜利终归何人耳。闻大隈伯今年七十八岁，伍廷芳今年七十二岁，司达博士年最少，才五十七岁云。

◎粤巡按署庆寿志

民国三年六月十一日，为粤巡按使李开仁先太夫人雷氏八秩寿辰，即于署内设筵称觞。自东西辕门起，均摆列生花盆景，满挂日本灯笼。入辕门百余步，即至头门，门前悬挂彩红，各柱绕以榕树叶，沿路有生花盆景点缀，并有用花砌成大“福”字五个。大堂口则有生花横额一面，题曰：“仁寿同登。”二门则有五色绉纱结成蝠鼠 卸一寿字，满布电灯，其寿帐寿屏等则触目皆是，极其金碧辉煌。是处左便为四司办公所，右便为巡按使住眷，各来宾到署道贺即在此处行礼。再进为新建洋花厅，正中高挂邓警厅之寿帐，精致绝伦。其右边寿帐则满绣嘉禾，系四司所送者，款式亦佳，又实业司办公厅之戏台，除装配种种景致外，棚面复以生花砌成各种故事，香气四溢，朴人鼻观。来宾观剧均登楼上，楼中罗列藤椅数百张，极为齐整。而巡按使以是日来宾均属重要人物，特令该署副营官马为骧加派济军巡逻，故两便回廊军队满布，并发出襟章，给与办公人员佩带，以便稽查。各文武官员之到署道贺者，车水马龙，尤极一时之盛。女宾之到署道喜者，亦络绎不绝也。

署中人员，是日并准给假一天，以志庆典。惟署前一带地方，恐有闲人溷迹，故正南街华宁里南头，及卫边街华宁里北头两处铁闸，均加派军士驻守。东西两辕门，不准闲人来往。署内则由警厅派拨一区警察廿名，二区警察廿名，并由金库拨来特务警察十六名到署服务。所有出入人等，均归警察盘诘，非佩带襟章者，不能闯进。国中兴戏班上场，搬入大小戏箱时，亦搜查一次，始行放进。旋指定二门内东便过路，为该班伶人往来之地。每人给以一票，俾作出入凭证。九日三时，戏经开演，先演《香山贺寿》，续演“男女加官”，闻因有人爱阅《小生聪拉车受辱》、《千里驹演说警夫》二剧，故特先演此二出也。

搭棚烧放之大串炮，系由东莞购回者，长共十二丈，因烟花棚吹跌，不能高挂，分为十二截，分次燃放，厥声甚响，纸色尤佳，满布地上，灿烂如堆锦。是日，巡按使委财政司长严梦繁、教育司长李守一在二堂充招待员。内务实业两司长则在戏台下招待一切来宾。女界招待员，则派某司长夫人为领袖。入夜后，万灯如雪，鼓乐齐鸣，尤为熟闹。据熟悉官场者言，谓在该署演戏祝寿者，除前清瑞麟及李翰章二人外，此实为第三次之盛会。

此次所用筵席除在广府前玉醪春酒楼及卫边街贵联升定制外，并在本署厨房预备寿筵，连夜添筑炉灶，俾临时得以烹饪。此次各官均有礼物馈送，巡按使最注重之品，则为屏幛，一时以此为太夫人寿者以千计。邓厅长所送之寿幛殊称贵重，价值六百余金，系以绉纱制成，绣出花草人物，其阔一丈六尺，高一丈三尺，其余纱罗绸绉不能枚举。由二门直至后堂，大有锦帐四十里之象云。

此次李太夫人庆寿，有一事颇为美中不足。九日未刻，老城地面遥望天际，忽起乌云，以为大雨将临，不料忽起狂风，继以细雨。顷刻，是时，公署照墙内新搭之烟

花棚尚未竣工，各棚匠正在支搭，致被旋风吹倒，各棚匠当场跌死四名，重伤四名。公署立电召消防队及救伤队，驰至，将竹木钩开伤者，舁送医院医治，尸身四具，立传卫边街某寿板店备棺收殓。查该棚厂系番禺直街黄财合所承接，由筑横沙灿记代搭，原定高度十二丈，因在署内洋楼可以观望烟花，故必如此之高方适于用，惟此等高棚原应掘深地脚，今只从地面起搭，两旁仅挖起一砖，故遇风即倒，酿出人命也。闻死者四人，系梁厚、黄灿、黄锦、梁苏，重伤者四人，曾七、倪忠、夏华、石华，内有一人因伤过重，抬至半路而死。事后李太夫人闻报，饬将死者每名给恤费二百元，伤者给医费数十元云。

◎江西之三星献寿图

江西豫章道尹何刚德，于民国四年一月三十一号，为六旬大庆。早由政务厅长陈嘉善、高等审判厅长朱献文及道署人员发起祝寿联屏，以致一般属僚，闻信纷往。签名附份者，颇不乏人。何以恐遭物议，不愿举动。是日黎明时，即乘肩舆赴南新两县粥厂巡视，借以躲避。似此以观，尚属廉吏也。

富绅邹汇川，经商起家，富至二百多万，毫无做官思想，现仍在吉安故里，行止举动，颇为朴实。其子邹日奎，系存记道尹，现奉财政部委充陕西清理官产处处长，尚未赴差，即在赣垣借用江南会馆，以为其父汇川七旬晋一其母罗氏六旬晋一庆双寿，请托某重要人物介绍李昌武将军戚巡按使及各官长致送寿屏寿联，为数颇多。自四年一月二十九日起，大开寿宇三天，召集梨园子弟，昼夜设席唱戏以娱来宾贺客，满堂极为热闹。闻邹子拟将此项重要人物所送联屏，不日寄回吉安，悬挂家厅，以光门楣云。

巨绅欧阳霖，现年八旬，其子欧阳熙，其婿李盛铎及各亲友均自己或派人来赣赠礼祝寿，召集梨园子弟设席唱戏，大开寿宇。李将军戚巡按使均登堂庆祝，贺客盈门，颇为热闹。事后，收拾寿场，检点物品，诂大厅内陈设之瓷器麻姑一尊忽然不见，此麻姑前在巴拿马赛会，有人出价数百元尚未允买。欧阳君殊叹可惜。函警察署及两县查缉，以期合浦珠还云。

◎陶然亭雅集之俚启

王壬秋为清末钦赐检讨，年逾八秩，精神矍铄，在吾国文学界素着英声。民国三年，由湘入京，就国史馆长之任。由袁励准发起，遍邀前清翰苑中人，萃集北京城南陶然亭，为文酒之会。王赋五古一篇，传观索和，韵押十灰，蝇头小字书成楷法。与会者计五十余人。陈 庵于在京翰林中，科分最老，而为清室师傅。日须入宫，至钟鸣三下始到。此次约集同人，先发出一公启。启云：“自顷风尘倾洞，盍簪漂歇，金闺秘闼，俱成天上。每寻仙蝶之衙，尚识栖息之树。虽故宫落叶，怅隔前朝而春苑烟花，宛然旧影，金銮深掩畴问残镫芸阁凄清，沦为废庑。槐半凋而未死，梦已全非，兰在纫而自芳，佩宁改度，摅凋旧之蓄念叹嘉会之难。常哀艳百重顽感。千垒幸兹城 清晏，花事方滋，正值湘绮先生翩其来游。轩车戾止，群方欢竦，吾党咏歌，先生以伏生九十之年丁逊国。百六之季未蹶鸿博之轨，而除目遥符耻为金马之待，而弓招屡赋近殊竹垞侣，屈宋于衙官，远轶兰陵理周秦之坠，学名山自荃 弥馨三馆。邈其清尘众芳，欹其岁晚，孤桐乍，御欣接瑶徽。万柳虽湮，聊寻故事，江亭隐树，南注之碧苇，初芽春甸覆花西山之白云在望， 迟巾屨来共，山樽召荡寇以监厨。呼步兵而具酒曲水。三月禊事，方阑山阴一觞。咏言靡歇，既续唐贤大罗之梦，且试海外写真之术，天涯接几明镜流年影事。成图诗歌盈路，庶几灵光伫景，长在人间，焦尾安弦，毋忘爨下。秀山李稷勋撰。”

◎章一山却聘记

章 一 不受礼聘，京华人士传为美谈。当时政事堂聘章书曰：

“一山先生道席五月二十七日奉大总统谕，章 一 由政事堂优礼函聘等因，伏维先生亮节夷冲，灵修醇粹，然龙烛以照，海云梦胸，吞建翠于以翳霄天风，背负在昔，提衡译学，陶育英髦，饮人以和，其心皆醉，说士不置，此肉尤甘变化。瘠 尤 材欣，呈骥铲阮，凡伪镜世照神，导古今治乱之渊源。目如流电，发文武张弛之枢要，口泻悬河，固已识赅三，微学贯，九变贵游。畏其折角，儒修重其昭朦矣。兹者元黄初奠，苍赤未苏。应破解纷披，艰 扌 带秽切，旁求于俊 一 ，应 候于贞元宏景山中。本殷怀于济物，邺侯架上储秘籍以医时，礼有重于元 一 漫拟到门凡鸟音实企夫金玉不徒空谷维驹贮ツ巾车敬饬馆驿元龙，非余子可及，论心无间，形骸孝章，有天下大名抵掌，自舒肝胆，宣风烈而调穆羽底于平成，滋云液而饫醴泉，起兹羸。诚斯世之大幸，亦千秋之嘉会也。谨肃敦聘只颂道绥，大总统府政事堂启。”

章氏答书曰：“政事堂钧鉴：日前浙江巡按使署寄来钧械，过采虚声，加以藻饰，优礼来聘，不胜惶愧。少习经史，长官京朝，颇亦历练当世之务，特自辛亥一病，至今从前所学都不记忆，顷惟杜门养息以终余年。敦聘之礼，万不敢承。敬谢敬谢，维祈亮察，只颂钧安，章 一 顿首。”

◎叶德辉之文艺谈

近有日人某君往访湖南名士叶德辉，谈及文学戏曲之事。叶君云：“说文为一种东汉人实学，不可以钟鼎铜器篆籀目之。研究此书，最要之门户，前清乾隆时儒者似犹未知，日本人亦罕有精造者，然其学甚难，鄙人于此，已研究三十年矣。顷如剧曲，亦极难学，恐不能输入日本。盖中国人情风俗，方言皆与日本不同，不能仅如诗文之同文也，王国维有曲考十得六七，然在日本人，则恐难洞晓其源流，现今戏曲之脚色，还不如二十年以前，此等歌舞之事，亦随文治为盛衰。近十年以来，政府不注重文学，故此等戏曲现时知音者甚稀也。目今第一唱工为谭鑫培，第二则刘鸿升。谭本老脚，喉音清转，尚有先正典型；刘则自作聪明，不知停顿、开合之妙。每听其音，辄为之心急生惧，以其唱时忽高忽长，恒恐其不能落韵合拍也。此种弊病，致使听者衷曲不畅。至于秦腔，则其音躁急，令人听之心烦矣。”

◎辜鸿铭之愤慨

辜鸿铭精通十数国文字，于西洋史学诗歌，尤研究不遗余力。在欧西各国，颇着文名，所译之四书，亦传诵一时。前为张文襄幕僚，以刚直为张所器重。所着《尊皇篇》一书，盛称慈禧太后之才能，可比英后维多利亚，见者无不奇之。前清宣统初年，南洋公学校长唐慰芝先生，聘为教务长。武昌起义时，尝着论刊登于《林报》，力诋革命，当时人皆非之，因受南洋学生之排挤，即于《林报》之记者，亦谓其读书太多，神志不免淆乱。前年入京为奥国使馆及五国银行团翻译，旋充英文《京报》记者，著作虽不多，觐而精美异常，读之殊为有味。其后因中国妇女问题，辜深以中国新流行之风俗为不佳，致与《京报》记者陈友琴大起辩论，尝见其刊登英文《北京日报》，诗中有“千古伤明妃，都因夏降夷，如何汉臣女，亦欲作胡姬”之句，亦足见其痛恨切齿于女界新人物之一斑矣。近闻清幼帝拟聘一英文教师，此项教师颇难得人，缘所定资格极严，必为中国人曾为前清官僚，富有旧思想，学问又深邃者，方为合格。辜有被聘之望，然彼虽精于各国语言，文字往往以旧脑筋发新议论，总觉不合时宜，而辫子至今未剪，亦为一般。学者所诧异，今民国极有名望之人未剪辫子者，大约不过上将张勋及国史馆长王 运耳。辜之不剪辫子与若辈大老同一观念，诚可异也。

◎创议复辟之健将

劳乃宣自青岛战事发生后，原拟前游曲阜，谒圣庙，拜孔林，再往泰山读书高隐。嗣以山居虽佳终嫌荒凉，漱石枕流之风言之似易，行之实难。况又身历宦途，饱尝繁华之滋味者乎！故不得已暂居济南，缘劳之快婿孔幼云氏，亦圣裔也，方由曲阜移家历下。其子孔祥柯亦崭然露头角者（前省议会议长，现财政部参事处行走），乃于公园之东南角，辟地鸠工，筑西式楼十余间，为劳读书之所。其地虽近尘市，而前临青山，北俯黄河，桃李成蹊，杨柳垂荫，每至天清气朗，园内游人来往如鲫，见红瓦鳞鳞，无不知为劳先生之高卧处也。劳之性情，尚崛强如故，除终日三餐外，即执笔作书，皆痛斥时局，恭颂先皇圣明之文字也。所著有《正续》、《共和解》二书，其后即根本此书，谬议而倡复辟之说也。

◎王 序与谭贝勒齐名

王爵生，莱阳人，清法部侍郎。虽非清流，而颇奉公守法。任京曹十余年，无所表见而以善书之名洋溢于京城之中。凡银号、钱庄、酒楼、茶馆、绸缎布店、洋广杂货之牌匾、对联几无一非王之笔迹。有滑稽者为作一对语云：“有匾皆书 序，无腔不学谭”。序即王名，谭谓谭鑫培，即大名鼎鼎之小叫天也。语虽近谑，亦系实录。然考王之书法，骨格低下，实无可取，力摹翁覃溪，亦仅得其迹象而失其精神。其同乡徐仁甫太史尝谓之曰：“子非善书，乃好写耳。”又云：“爵生之字好似街头岗警植立，如木偶神笔索然矣。”曹竹铭殿撰亦谓之云：“汝终日在绸缎里头作生涯。”盖谓王善写绸缎、银钱福禄喜寿等字样，且日与商贾来往也。闻者皆传为笑柄，足以代表王之生平。光复后，王移家天津，旋至青岛居焉。年余以来，更大写而特写。前之牌匾大字仅见于京城者，今则流传于青岛矣。性极顽固，于时事不甚通悉。其所亲有劝以入仕途者，王漫应之曰：“今尚可为国乎？直骗局耳！”黄县淳于君与王有戚谊，其子肄业法政学校。一日谒王，王瞿然曰：“尔亦至此乎？”谓其剪发也。其顽腐如此。日德战事发生，王携眷到济南，寓于城内葛贝巷。日军到济，王又将眷属送至天津，己则留于济南，栖栖遑遑徒自苦耳。

◎斯文又弱一个

参议院参政杨惺吾先生守敬于民国三年逝世，兹特将先生事迹详志之。先生湖北宜都县人，同治壬戌科举人，曾任黄冈县学及黄冈府学教授，选授安徽霍山县知县，由张文襄改保内阁中书，历充礼部礼学馆顾问、出使日本大臣随员、湖北勤成学堂、存古学堂、总教两湖书院、分教通志局编纂等职。民国成立，充参议院参政。卒后，追赠少卿。生于道光乙亥年，卒于旧历乙卯年，享年七十有六。

先生二十三岁即举于乡，往来南北，所与游皆当代名人。生平著述甚富，经其考订刻行及题跋之碑帖不下数百十种，就中如《日本访书志》、《续补寰宇访碑录》、《隋书·地理志》，考证《水经注》，考证诸书，尤为精心之作。此外就所见宋元板本，古书刻有留真谱若干卷，题跋碑板考证文字及诗文杂稿有晦明轩稿若干卷。而尤以《水经注》疏稿本数百卷，补正全谢山戴东原诸家之纠误，为先生生平用力最勤考证极精之书，徒以卷帙繁多，无力刊刻。新会梁先生任司法总长，时曾将先生著述数种代呈总统，总统许以由公家出资刻布。先生亦自言，若亲见此书出版，即死亦瞑目也。

先生于光绪初元随侍读学士何如璋出使日本，使事之暇，搜求旧籍。凡彼都所藏古代先秦佚书，靡所不访，《日本访书志》之作盖成于是时。及遵义黎庶昌莼斋，代为出使大臣，尤重先生。黎氏搜刻古佚丛书，所收旧本二十六种，均足以裨益多闻。顾先生自言谓所收之书不尽如原意，因黎氏自负通识，好自主张也。日本诗人如森槐南，经学家竹添进一，书家中村不折等均与先生往复论学。中村善画兼喜作书，亦尝问执笔法于先生。故日人至今言彼中六朝书派，自先生倡之也。

先生知名甚早，少时刻苦独学，家贫授徒自给，中岁授霍山知县，亦未到官。书名重于海内，富商海贾或奉币请书，先生亦颇资之以自养。所见碑帖甚富。康有为着《广艺舟双》、《楫评书》、《论字士》多宗之先生，在上海见之即席为纠正数十条，见者服其精博。张文襄兴学两湖以先生为鄂中老宿，甚礼重之。端忠敏尤服其碑板之学，举所藏古今名人字画、碑帖尽委先生考正题跋。与长沙王益吾、阁学先谦为同年至好，论学之书往来不绝。先生卒后一日，阁学犹以书抵先生京寓，考论《水经注》凡数百言，盖不知先生已易箴也。卒时孙光 随侍在侧，长君道存已前卒，次君只仲、三君秋浦闻讣后，均由湖北上海先后来京。先生家中食指众多，常忧贫乏，惟藏书甚富，分存于上海北京者尚有数十万卷。诸子亦颇能世其家学，总统恤令谓其学术湛深，著述甚富，硕德耆献，海内知名，总括平生庶几尽之。盖自先生逝后，不独湖北少一老辈，即东南耆旧亦凋零略尽矣。先生晚年，自号邻苏老人。

先生之病，实系中风。盖与前此督办浦口商埠事宜之沈秉 同一病症。沈病终之前一夕，犹与友人宴谈甚欢，翌日，乃不起。杨则于夜间出室便溺，溺已入室，遽尔

长逝，亦可异也。按前清光宣之际，大臣寿终，多以中风。当时都中某报有插画一幅，其图状已不可想像，第忆其所题字为“古大臣风”四字，以风字解，作中风之风，亦殊俊妙。今以沈杨两公观之，则此风犹被于民国也。

◎宋育仁轶事

宋育仁因主张复辟谬议，由江统领会同京兆尹，派人监护出京，直回四川本籍，兹有京师人士述宋育仁历史者，词颇右宋。然于老悖身世颇详，兹特录之，以质诸海内外之留心公是公非者。自复辟发生以来，外间知为劳乃宣刘廷琛所主张，劳有各种函件，新近发见，并有呈送国务卿请转呈大总统之事。刘则于数月前辞谢礼制馆时，曾洋洋洒洒，倡为复辟之先声。至近日则此两人者，皆不知其踪迹所在，时适有大名鼎鼎之宋育仁，以嫌疑之风说，被逮于步军统领衙门。以致全国人士，将此惊天动地之复辟案，移其眼光于宋氏，初则疑其与该案不无关系，继则知其因事论事，不过因劳而发，初无何等之关系也，然于宋之为人，尚不得而悉，兹经详细调查，分述如下：

幼年时代 宋育仁，四川富顺县人。少孤，育于伯叔，性沉静，强记诵，终日手不释卷。然于世俗人情及生产事业，殊不经意，以故人多以书笥目之。

科举时代 宋既通籍得翰林，文名鹊起，值清光绪帝大婚，西太后还政，宋作《三大礼赋》，皇典贍，比于《三都》、《两京》，见者叹为有清二百余年，得未曾有。其时潘翁诸名流，皆以王佐期之，清相李鸿章见之曰：“后生可畏。”因自指其座曰：“虚此待子矣。”然宋少年气盛，凡有誉之者，皆无谢词，以故人皆爱其才而又恶其傲也。

出洋时代 宋以国家办理外交，辄不得端倪。自请于李鸿章，愿为副使，得充英法义比大使驻英参赞。出都过津，李谓之曰：“子当得出使大臣，何苦屈就参赞耶？”既驻英，会中日甲午之役，中师大衄，清廷电驻英钦使购船于英，久不成，适宋与驻俄大使王之春遇于伦敦，宋商之王，立订英师船若干，而以英宿将琅威尔统之。嗣以和议成，购船不用，借兵议亦遂罢。而宋已与王及二三同志剪辮入船。至是乃叹曰：“清必亡矣。”乃径弃使职，归既至京师，时贤谋为强学会，浼宋为章程。强学会者，即后之大学堂所自发轫，而今所称戊戌清流所自出也。

商矿时代 宋既归国，以所着《采风记》及《时务论》，凡数万言上之清德宗，力言变法自强，德宗甚激赏之。然夺于廷议，以宋言为夸诞不用，旋有旨令宋赴四川办理商矿事宜。宋叹曰：“我策时数万言，折衷于西，可以救贫起弱，而以商矿委我，是远我也，岂知我适得所欲，正可借此振兴吾乡实业，开未有之利源也。”遂回蜀，以商本商办，而官为之提倡，号于实业界中。当是时海内言实业者，皆迂其言，然所经营实开风气之先。当宋之未回蜀也，适清廷有寇宫人者，名连材，曾上书西后，言及国事，并谏后勿徒事奢侈。太后初悦之，嗣为人所谗，遂交刑部，未鞫而杀之。宋偶赴同人招饮于司坊，闻耗大哭曰：“清亡无日矣，余不忍见铜驼卧荆棘中也。”遂决计回蜀，云在蜀时兼主蜀之尊经书院创为蜀学，会为各省学会之先声，并为蜀学报倡复古维新之说。海内多惊疑其言。方宋之出都回蜀也，于时京师

有作者七人之叹。盖是时与宋同时弃官者，有某君等皆素号清流也。

拳乱时代 宋在蜀办商矿既有端倪，会广东巡抚谭继洵保使才，以宋入荐，清廷有旨令来京召见。宋不欲再出仕，值廷旨已令蜀绅李征庸代宋，宋门生故旧多劝北行。甫入都，值拳乱起，诸京秩皆逃，清两宫西狩。宋曰：“吾既来，不可以弃去。”乃趋行。在条陈圉法四策，其施行者仅鼓铸铜元一事而已。宋既召见，以忤旨，卒郁郁改道员而出。每语及亲贵误国，辄大骂不已。

外官时代 宋之改外官也，以道员用。湖北总督张之洞素器之，调往督办宜昌土税局。盖往时道员之所谓优差也，得是差者，皆升官发财而去。而宋尽提中饱入官，又改良税法，令后继者不得从中舞弊。以故鄂官场尽愚骏目之，且谗于张督而媒蘖之。张乃以经济特科保之入都，比就试，得第三名。今税务处长梁士诒君为第一名，然卒以所言触忌讳，遂与梁俱匿去，不敢出覆试也。

旅沪时代 宋既弃官，为江南南菁学堂监督兼总教习，始为分科教授之法。会清廷派五大臣出洋考查宪政，委以编译事宜，并许其以译局自随。南菁故在江阴，宋乃以高足兼教授，而自寓沪上。博稽各国宪法，成《宪法比例征》一卷，书中兼及三代，善法以实，其复古即维新之说。又别着《经世政学》，《经术公理学》，洋洋数百万言，力辟革命改革之危险恐至亡国，于时清议多赧之。当道亦以保存国粹为意，而留学海外言革命者，则视宋如仇讎矣。

旅赣时代 宋又尝应江西巡抚吴重熹之征，为铜元局总办。清厘弊窦，得赢余百余万，而历届皆亏累，闻以此赣当道（藩台沈瑜庆前届之总办也），忌宋尤甚，宋遂辞吴而行。

礼馆时代 清廷立宪，欲兼采舆论，并保存先代之法，特开礼学馆于礼部，召缪荃孙、宋育仁等为纂修。宋常倡古圣明，王维持人伦教。以明尊卑长幼之义，及男女之防、父子之道也。

归农时代 宋在礼馆以当道因循，不能卒用其言，尝为京师大学教授以自给。革命军起，乃就金坛之茅山营农业（宋在沪时曾于茅山置有荒地数百顷，为垦牧计）。方返京，拟挈眷南归，而道阻不可行。民国元年，眷甫欲南下，而门人施愚，受大总统之意，致词挽留。因宋眷属先已首途，施意亦未置可否，宋遂南归，为茅山道士。

史馆时代 宋在茅山为道士装，绝口不谈时事。会二次革命事起，以宋在前清时曾着书主张君主立宪，民党痛恶之，宋殊自危，适张上将勋奉命南下，闻宋名，遣人存问并给贍其家，宋乃往依张，实隐图自保也。比事定，茅山已为兵燹瓦砾之场，牲畜桑麻，悉付焚如，宋尤狼狈迁于常州府学。旧署依门人某以居比国史馆王馆长既

就职，以师生之谊，寓书于宋曰：吾为史馆长，子不自给，曷来为我作抄书佣耶？子苟愿之，吾当为子言于总统，仍以史官官子矣。宋得书报王曰：“佣不敢辞命官，则精力销耗殆尽，且习于野不任复作也。”王复书谐笑之曰：“佣吾弟，吾不忍也，吾当敬礼而聘之。为我帮忙耳，可速来，可速来。”宋迫于困滞，门人知交，多以为言，遂至京为国史馆顾问。

协修时代 宋之初至京师也，甫下车，适有史馆协修之命。宋谒王，谢其意，且言：先生果荐我为协修耶？王惊曰：“吾固允聘子，恶得为协修哉？”宋以有总统之新命对，王初不知也，乃呼秘书至，始知秘书某因王招致诸人均已位置，疑宋来必予以协修，遂径呈总统，请以宋为协修，得准。王至是殊自忸怩，因对宋笑曰：“协修太小，不如仍为纂修。”宋因力辞，言本为自给，任先生分以一差，即书佣亦可耳。王曰：“子姑暂屈，吾自当优以位置。”遂以宋为顾问，由馆长聘请云。

◎三湘耆旧传

湘中老辈雕零略尽，文儒则湘潭王先生，武将则邵阳魏午庄，最为耆宿湘绮游京师。魏公已闭门不出矣，王葵园阁学先谦，于国变以来，避居平江乡中，汤督到后，曾一入城省视葵园故宅。仍携书迁居东乡山中，着述不辍，此老年逾七十，精力不衰，生平纂集之作，除《续皇清经解》，《续古文辞类纂》及《十朝东华录》诸书久已流布艺林外，十年近着则有《庄子集解》、《五洲地理志》，《日本源流考骈文类纂》并校刻《虚受堂诗文集》。诸书惟自革命以后，曾文正祠内思贤书局所存，书板多为兵卒所毁乱，后无人修补，葵园又老谢，令人有风流销歇之感。湘潭叶焕彬德辉，原籍吴中，校刻书籍甚伙，近方锐意搜集汾湖家集，并拟择尤刻布艺林。叶氏好容接少年，门下诸流并进，日本汉学家盐谷时敏（盐谷岩阴之子，为古文效文正颇有义法，现充东京第一高等学校汉文教授，讲授《左传》，尤善击剑）遣其子从学《说文》，然叶氏自京师归后，于时事颇有感触，现亦拟拥书入山，不问世事云。汤督到任以后，以旧提督学院衙门为官书报局，意在礼罗湘中文儒耆老，兴起教化，用意甚善。惟因湘绮老人既已入京领国史馆事，该局总办曾重伯来充秘书，其余程子大易由甫（实甫之弟）诸人，或以事他去，因之局中事务现甚散漫，汤督对于诸老先生，虽敬礼不衰，然续编《沅湘耆旧集》之举，现尚未见进行云。

◎无独有偶之假官

近来世风日下，侦探敲诈之不已，于是有伪侦探；官吏受贿之不已，于是有假官吏。最近江西天福栈之借官招摇案，又其术之弥工者，卜潮润。浙江人，曾充钱幕，侨寓饶州，其子名萱庭，年方弱冠，衣服丽都，大似阔少，寓居西大街天福栈，自称其舅父俞省三，现充考试知事阅卷委员，凡分发来省之新知事，彼多认识。适有住居德胜门外之熊某，南昌人，曾在鄱阳县署充过传达吏，认识潮润父子，现因赋闲家居，生计甚窘，因屡闻萱庭吹牛，遂托其为介绍。萱庭答以此事不难，有新知事徐某将署鄱阳县，不日即可发表，惟旅费告罄，如能先借百金，到任时必位置优差。熊闻之，怦怦欲动，惟仍未敢坚信，答以筹款不甚难，须请先见徐知事一面。萱庭似有难色，后请出上饶人黄菊圃为保。黄因事寓带子巷汇源客栈，熊常与之往来，故信而不疑。初次付萱庭洋二十五元，二次付票钱四十千，三次二十四千，共计付过百二十千。熊以款已交足，满望即日到差，詎事与愿违。巡按使牌示悬出，则任鄱阳者为陈宗楷，而非徐姓。熊大诧异，始知被骗，急向黄菊圃索还原款。黄谓我虽为保，然亦不知此中有异，且钱系你亲手交付卜氏父子，我安能负责？嗣熊昌言要禀官，卜氏父子始允交还。熊因既受卜骗，不肯稍缓，遂由黄请出汇源栈主人作保，限日交清，事已了矣。詎次日，忽有多数巡警至汇源客栈传黄，索阅传票，知此案发觉，有黄本家黄发来、黄友生两人代黄缓颊巡警告，以须将卜父子交出对质。二黄即往外寻找，行至西大街适遇卜潮润，诈以黄菊圃有事相商，请速同去，卜知有异，形色仓惶，乃曰：“我现就新任鄱阳知事陈宗楷之聘，即须动身，不暇前往。”两人无如之何，迨回栈而菊圃已拘赴警厅矣。于是二黄愈急，乃于次晨在广外煤炭坡饶州李某船上将卜润潮扭送第四区，解送警厅，讯供不讳，其子已先闻风远扬。此案之发觉，有谓新知事徐某确有其人，与卜同寓天福栈，因闻卜在外招摇，函请警厅拿办者；有谓系熊不甘受骗，禀请追究者，盖当日熊索还钱后曾言尔等须迁栈房，似预知有人来捕者。惟就警厅之传票观之，其上又有熊之名姓，且同被拘押，似以前说为确耳。

虽然若此事者，仅施骗术耳，更有饰盗为官者，尤可詫也。数日前济宁州某镇忽有驺从疾趋过市，一时见者虽奇，然亦寻常之事，从者十八人，悉御戎服，拥一罪犯，已受桎梏，似经凌践，状极困惫，官轿即殿其后。其地驻兵立加盘诘并劝略行税，驾以尽东道之谊。此辈婉词却之，谓须将要犯解赴莱州。语次匆匆，前行驻军将校以该员行色匆促，深致疑讶，遂遣人阴尾其后，一覘虚实，寻见罪犯中道遽释，更衣执枪，宛然一兵，杂入队中，进向济宁州西北二十里之王坊子市。逻者驰报济宁官署，即时遣众出城，潜往该地，及抵市门，盗探弃械脱走。官兵察知其奸，随将伪官等之寓所包围，盖实系饰盗为官，方其抵市已捕得一富户，勒赎二千元，富者仅能办及四分之一，官兵即乘彼辈议价时，忽入掩捕，盗众抵拒，立毙二盗并三盗探余众就缚，悉送济宁，明正典刑矣。

◎戚扬遇疯记

江西巡按使戚扬，当代理江西民政长时，每日规定见客两班。其经验及才学优长者，择要笔记，以备择用。某号早晨，见客八人，内有陆军小学堂学生刘九荣，派在末座，当即分别延至内厅，按照排定次序坐定。戚省长即由第一座之高姓者发言，询问出身履历，以及办事经验，高方りり陈述，即有末座之刘九荣（萍乡县人）以手击省长衣袖者再，省长方除眼镜回顾，正欲斥其轻妄，不料刘即以拳向戚省长迎面击来，戚省长大怒，立飭警备队将刘拿下，遍搜衣袖，并无夹带违禁物品，并传新委彭泽县知事刘洪澜至署，询问刘某是否向有神经病。该知事答以仅止同县同姓，并不认识。戚省长当对众宣言：刘某之对于长官荒谬若此，本应立处重刑，本代民政长，向以忠厚待人于心，实有未忍，遂命发交警察厅薄惩云。事后戚代省长通函各机关云：“行政公署为全省民政总汇之机关，簿书鳞集，本代民政长鸡鸣而起，披载案牍，日昃弗遑，愧无穆之对客批答之才，窃慕中郎倒屣迎宾之雅，诸君子投刺晋谒，有怀欲陈，自非地方要公，苦难随时接见，前曾启告属候序传，本代民政长于每晨依次延请，博询咨周，藉觐才识。乃今晨见客之际，有前陆军小学堂学长刘九荣者，位次第八，本代民政长甫与首座接谈，该员遽揜言骂坐，振袖奋拳，类灌夫之使酒，似淮安之攘臂。以其狂妄，本拟重惩，同坐者佥称其夙有神经病，姑发警厅察讯，果心疾顿作。则情尚可原，若有意肆横，当按律拟办云云。”

前清江西实缺广信知府关榕柞（翰林出身），于光复时卸篆晋省，赋闲多时，嗣因陈镇守使廷训在警视总监任内，委其充当秘书。为时不久，解职赴浔。现关君不知因为何事，晋赣谒见戚省长，当经戚氏延见同座者十人中，多新委知事，关坐第八。戚氏挨次问语。关亦侃侃而谈，迨关谈毕，戚氏乃与第九座者接谈，关忽勃然曰：“吾尚有言。”戚氏以声口异常，遂回顾叩以何事，关大声曰：“此次汝等是怎样来的？”戚氏唯唯。关又曰：“江西打仗时汝等在那里，今日太平了就一个一个做省长、做知事，都来摆这臭架子，所有从前在省城维持地方的，反贬退闲居，岂不可恨？”戚氏曰：“足下想是打仗有功，可自向都督府陈说。”关作哼声曰：“若要向都督府陈说，那待今日言已。”拂袖而出，戚氏照例送诸门首。

◎愿作鸳鸯不羡官

财政部佥事刘文嘉，因妓女小翠喜与有婚约，曾屡次托人与鸨母议身价。鸨母一意作梗，并闻有某君者，亦与小翠喜有密切关系，从中大生阻力。刘见事已决裂，乃以叫局为名，叫至香炉营本宅，并柬约至友十余人，大张筵席，以资贺喜。及鸨母知事不妙，闻风奔至，刘已坚嘱仆人挥之门外。鸨母无法可施，哭骂大作，并声言必须拚命，当由岗警劝令回去，依法控诉。鸨于次日即至检察厅控刘霸占伊女，检察厅即依法飭令司法巡警往传。刘以现任财政部佥事，公事甚忙，无暇到堂对质，竟未前往。检察厅以刘恃势抵抗，乃用公函致财政部总次长，言刘现被人控诉霸占妇女之案，刘自称部中荐任佥事并系科长，是否实有其事。财政总长以为部员被人控告，已失体统，复关系于娼妓，尤属不成事体，当已据情呈明总统，将刘免去本官，并奉总统批令，归案讯办。闻刘因此事已成骑虎，官职已奉令免去，殊无可恋，乃携小翠喜出京。翠喜，河间人，李其姓，小名小申儿，又名兰芳，唱戏于京津一带，颇负盛名，擅长二簧须生，有时反唱旦花武生，无不妙肖。幼时由其母质于贾仲三学戏，原定期限八年，逾期已二稔。近日两造在天津地方审判厅涉讼，回复自由之身。其时翠喜虽脱离羁绊，而犹负有一种条件，只准择配不许唱戏。故翠喜在京辍演且三阅月，顾歌舞场中事既罢。一时无所归，因与刘订婚约。其母亦曾在刘宅居住数月，刘娶小翠喜为妾，本得其母同意，后不知故何，其母竟反悔也。

检察厅查刘执有字据，非属私诱行为，在刑法上不成罪，而小翠喜之母必欲将女领回，刑事上既经解决，又提起民事诉讼。

地方厅为此案，在民事第二庭开言词辩论。李王氏以秃头翳眼，而戴一绒编花帽，往来于厅廊之下，肆口谩骂，一种悍妇行动，豁然曝露。至其女兰芳之言论风度，毫无瑕疵可议，述其意见，声情俱烈，在旁听者无不赞美有加。几经审讯，判决刘文嘉、小翠喜俱无罪，李王氏当面谢过。有情人居然成眷属矣。

◎刘文嘉第二

蒙藏院佥事马为珑，江苏人，向在京八大胡同逛游，因与春艳院小班妓女陈桂卿相识，时常过往，一夕无间。陈桂卿闻马为珑当蒙藏院差，每月薪俸有数百洋之多，家中亦系豪富，乃于去年春间随马为珑过度。言妻则未立有婚书，言妾则未立有契约。伊母彭氏，住居天津，并不知情，每月得伊女月钱以济家用，仍以为系班内所分之帐头也。而陈桂卿随马为珑过度，淫荡性成，仍与各小班花姊妹往来。马为珑为爱情所系，不加约束，且挥金如土，入不敷出，负债如山，而陈桂卿亦绝不顾也。马母在籍闻知此事，星夜奔至京中，勒令其子将陈桂卿退出。马为珑不但不履行，并听陈桂卿教唆，不认其母。其母因之大为愤懑，向地方检察厅告诉。地方检察厅当派司法巡警拿办，不料马为珑弃官而挟陈桂卿潜逃。陈桂卿之母彭氏，知伊女与马为珑姘识，异常愤懑，欲赴京向检察厅控马为珑诱拐。事与财政部佥事刘文嘉适成一正比例也。

◎吴营长之威风

四年二月初四夜，广东石龙警卫军八十六营兵士李葵、卢浩、黄有、蔡昌四人，偕同该处涌笃妓院咏仙楼妓女王杏娇、何桂好挖开墙壁逃走。次日为石龙行营访闻，飭令该营长吴貔泰查拿送办。吴营长当将截回逃兵李葵、卢浩二名并妓女二口枪毙，旋具呈都督，略谓访闻本营兵士李葵、卢浩、黄有、蔡昌等串同石龙涌笃咏仙楼妓女杏娇、桂好私逃，除黄有、蔡昌在逃外，已将该犯兵李葵、卢浩二名及妓女杏娇、桂好一并枪毙云云。都督批令云查兵士犯案，该管官长固应予以惩办，以肃军律，惟遽加枪毙，办理实属乖方，至妓女杏娇、桂好二名，应送交地方官吏惩治，方为正当办法，乃忽一并枪毙，办理尤为荒谬，合行令仰该管长遵照。此后办事务宜谨慎审度，毋再颺颺，致干议处云。

◎使君泪滴牡丹江

吉林牡丹江，以上游大雨，一日间竟陡涨五六尺，缠绵数日，仍不退潮。经该管警察率领人民，以麻袋囊沙，御之。那知愈御愈涨。忽然涨越江坝，泛滥街市。一时通衢小巷，水流成河。据该处父老云，为数十年来所不经见也。江水泛滥时，各界人等皆争先搬运高阜，一时人心惶惶，莫知所归。依兰县知事杨锡九拟修西南隅未毕，而水势益急不可遏，乃亲先奔往该处，率领人士掘土御防，而水势仍涨。不得已，藉神树庙地点祭江，向水鞠躬，并许重修龙王庙，然水涨仍不已，又遣兵丁将三江龙江吉兰等处轮船留下，不准他往，以备载民避灾。杨知事不啻亲演戏剧中《孙夫人祭江》一出也。

◎法曹不法

司法部技正马某，系留美学生，近在天津与某道尹之女公子结婚。闻马于结婚前，择偶定有二条件：（一）晰白，（二）丰腴。此外均所不计。道尹女公子貌不扬，且适与马所期者相反，马知为媒妁所给，结婚后，即不与新人同衾席，逼女归去，否则将向法庭为离婚之起诉。女不得已，即归某道尹署，气愤交集，当即服毒自尽。某道尹谓系马逼毙，拟向地方厅控诉也。

◎何苦淘气呢

当参议院未开议以前，有一绝大笑话，即为约法会议之厨头与政治会议之厨头冲突，至激怒李议长不作搬家之想，遂牵掣约法会议不能迅速腾出参议院，而参议院乃无地开会。吾人初闻此事，即疑厨头一小鳅，不能兴若大风浪，即李议长亦未必即轻信一厨头之言。黑幕中必尚含有其他离奇古怪之人物，为傀儡牵丝者果也，又发生一某秘书长事，某秘书长者，历掌各种重要立法机关事务，此次本拟并参议院之秘书长，归其一手包办。乃忽来一前国务院之秘书长张国淦，张氏辞职，又来一历充参议院众议院秘书长之林长民。某秘书长大为愤懑，暗中作梗，于是前有厨子，后有秘书，政治会议既不肯让团城与约法会议，约法会议即不肯让参议院于参议院，双方相持，煞是好看。参议院未开议而先演剧矣。

◎张大帅晋京纪

民国三年，张上将应大总统之召，入京觐见。有人途中与之相见，值彼俨然坐于马车之中，垂辫之护兵，各挟毛瑟枪，攀附于两旁足踏之上，高声吆喝，风驰电掣而过，奔走喘汗之人力车夫，瑟缩道周。若有不敢仰视之势。兵士之辫子，奇妙已极，较之去年在南京杀人不眨眼之行动，尤足惹人注意。中华民国之军人，戴此虬结如猬之装饰品者，久已绝迹于首都。今复睹此清朝之纪念物，在见者直不啻浏览小说，别辟一蹊径。闻人言张氏入宫叩谒清帝，拜跪间，发辫向两旁披拂。清帝左右之人，语以辫子与时世不适，尤与民国之尊严相戾，似以去之为便。张氏大恚，遂起而为辫子之辩护。其词曰：我之兵士，皆有辫子者也。兵之所以应有辫子于军事上关系綦重。一切兵皆应有辫子，有辫子则可识为兵，而无奸宄可混入其间，奸宄苟欲混入，非自有辫子不可。若今日之乱党奸徒，大概皆无辫子者也。闻其言者，无不大声拍掌以欢迎之，遂无复有劝其作时髦装束者矣。张现在是否自视为满人之救主，不能断言。然料彼参列革命纪念日之阅兵仪式时，暗中必为满人发无数同情之誓词也。

◎孙总长流血

近者梁士诒于华石桥本宅，延请诸要人筵宴，一时冠盖盈门，极形热闹。外交部孙宝琦适因部中有要事，至七钟后始到梁宅。其时天雨已久，梁士诒宴客地点，为其东偏院之花园，园内花木纷披，山石夹道，曲径迂回，宽不及尺半。雨后青石如镜，滑不留步。孙总长因晚到，匆促入园，一时不慎，滑跌于地。侍从者急趋相扶，乃孙总长之鼻尖，已为尖形之山石所伤，血流满面。座客均惊起相视，遍施手法，血流不止，痛极而晕。当即以电话延西医诊视敷药，梁士诒并以汽车送其回宅，并用电话询其安否，终宵为之不眠。座客亦因此不能尽欢而散。说者谓孙总长因外交棘手，精神步履，已逊常时。此次梁士诒之招饮，雅不欲有拂盛意，下车后不觉以匆遽之状，代表其抱歉之忱，以致演成此流血之惨剧云。

◎王湘绮与史馆

湘潭王壬秋先生，耆年宿学，久为当道所佩仰。民国二年，奉大总统电召赴京担任国史馆馆长。因病未能启程。三年，又奉大总统电。其文曰：王壬秋先生鉴：前以史职奉屈高贤。企望来仪为日久矣。安蒲稽程，遂经寒暑。顷闻旌从颇快，遨游所望，翩然准践前约，敬当虚席以俟。勿令拥彗为劳，并盼速复。袁世凯叩。王君当即复电，其文曰：“北京大总统钧鉴，承谕敬悉，即日首途，运叩皓。”先生奉电后，即日乘轮赴长沙，所带行李，仅小箱一口，唯书籍古玩字画等件共约二百数十箱。连日划船挑夫辗转驳运，竭数日之力，尚未竣事。其长公子代懿、三公子代功，均随侍，此外尚有男仆一人、女仆一人。抵省时，汤督即派员迎接，暂住府内，先生不允，乃改寓官书报局。日与汤跛公易豫程颂万诸人作诗钟为戏，往谒者不见，亦不复答。

次日，先生乘竹椅小轿至都督府，汤督出迎于门外。先生着开汽袍大袖对衿马褂，方领马蹄袖，缎靴荷包俱全，脑后垂小辫一条，长约一尺余。先生本系秃顶，其发辫早已无复存在，此次所垂之辫，乃用红绳拈成两股，形式与绳无异。有人戏问其故，先生笑曰：“我之装束，亦西装也，难道他人可以着西装，我独不能着西装乎？”其诙谐有如此者。

汤督设宴于府内，为先生饯别，嘉宾满座，多至四十余人。每桌酒席，费用约需银一百五十余两，系仿西餐办法。凡中外嘉珍，如白燕、熊掌、鹿筋、玉面狸、鲟、鳊山之类，凡属著名珍贵之品，靡不罗列。是日，觥筹交错，宾主尽欢，军乐迭奏，竟日不辍，可谓极一时之盛云。

先生旋起程，同行者为约法会议议员舒礼鉴、夏寿田。是日绝早，城外河干一带，军乐之声，不绝于耳。汤督暨各界送行者络绎于道，汤督特派华盛轮船为之护送，行至岳州，又奉大总统电令，派第三师长曹琨酌带军队，亲自护送到京，俾沿途一带妥为照料，先生于是安抵京中。

居京数月。一日，参议院开大会，湘绮亦出席，人疑其以是日行闭会礼。故惠然肯来，有以之询诸湘绮者，湘绮曰：“我今天到会，乃是为与诸君话别而来。”闻之者亦初不介意，旋与其媳之兄遇，告以须回湘。其媳之兄为谁？授勋四位之杨度也。杨即询以几时动身，王答以明日早车。杨曰：“届时我到车站送行。”当时彼此固无他话也。

迨次日杨到车站，王忽曰：“我有一件事托你。”杨问何事。王曰：“国史馆的印，拟请你替我收存，我已办了咨文，送到你公馆里去。”杨愕然曰：“别的事还可，印信我怎么能够收存？”王曰：“某某要我将印交与他们，我不放心，故尔托你。”杨见王说不明白，而车又将开，无可奈何，只得承认。及回至寓所，果然见有

公文一角，私函一通，及国史馆印信一颗，置在几上。杨以此事岂能私相授受，踌躇久之，乃想到呈明大总统请示办法。其最有趣者，王之咨文中，有咨请贵京堂右咨杨京堂之语，盖杨在前清末年曾赏过候补四品京堂，而王但知其前清之官衔，而忘其民国之官衔也。

杨请示总统之呈文，除首尾加一二例语外，中间即照抄王之原咨，一字不易。呈上后，总统批令亦不好怎样着笔，只令杨代理国史馆长。杨奉批后，以为此明是叫我代王看守印信而已，馆中诸事，遂亦毫不过问。未几有某事发生须用印，杨不肯负责，乃特添一副馆长，而杨遂以代理国史馆长一变而为国史馆副馆长矣。此关于湘绮弃印潜归之趣谈也。然而湘绮在国史馆之趣谈，犹不止此。

王所下之馆饬，与各官署不同。无论有几件事，皆接连写去，并不分开，其对于馆员之馆饬，动曰：“某事请曾老前辈办理，某事请宋老前辈办理。”盖前清翰林院旧制，科分在后者，对于在前者均称老前辈。而湘绮之得钦赐翰林科分最晚，故国史馆员几无一非王之前辈。馆饬如此称呼可谓恭敬至极，亦荒谬之极，时人咸传为笑柄。

王之文学，虽世不多觐，然公牍体例，则所未谙。然又喜亲动笔墨，前因财政部库款支绌，国史馆经费，未能按期照发，曾由该馆向财政部催发一二次，财政部仍未照给。湘绮文兴勃发，乃亲拟一咨文，前述欠发经费若干，及叠次催领情形，固不足为奇。惟中有“有类索逋，殊伤雅道”二语，人多传诵。在湘绮是否以近日公文书中多用骈体，因特揣摩风气，冀合时流，则非余之所敢知也。

先生之南下，外间传闻谓因北方干燥，回乡避暑。据史馆中人云，王先生此行，实有不得已之苦衷，因馆中某君与王先生之女侍周妈少有冲突，王先生左右为难，故携周南下，以为解铃之计。盖史馆内外之纲纪，皆王先生从龙旧臣，视秘书协纂诸君，直若无物。而某君每欲以太史公之资格，驱策王先生，奔走疏附之人，积不相能。一日，因微故，馆役与某君破口对骂。某君盛怒之下，爰呼巡士繫之而去。诎该役为周之亲眷，当事亟时，老婆径奔至先生前，气恨恨指王曰：“汝尚为国史馆长乎？何物巡士，竟敢繫汝之仆，汝之颜面何存？”先生矍然而起，以名刺索某仆回，以谢周妈。馆中人闻之大哗，群欲兴晋阳之甲。先生内服阃威，外惭清议，于是中涂南下。

先生素负海内名宿之目，以学问论，淹贯经术，以能力论，文章资格，殆与曾左相颉颃。此次奉令来京，其事业之成就者，只民国之国史馆总裁而已。卒之放纵磊落，仍不脱名士风流，书生臭味，飘然返去。舆论界议论纷纭，兹汇录之如下：《日知报》云：“王湘绮自膺特聘纂修国史到京，开馆以后，老趣颓唐，全持玩世主义，对于史事，搁置脑后。正如为混沌画眉，不知何时始有端绪。”各报所传王氏对于国史，主张采用通史体裁，及杨子条陈各节，均属风影之谈，并无其事。馆中

一切庶务，湘绮懵不顾问，悉操于周妈之手。视史馆之公共机关，无异其家政。馆中仆御人等，多系周妈所推荐，恃有奥援，遇事懒散。馆员某见此情形，大为愤恚，因驱逐某劣仆事，与周妈冲突。湘绮老人内迫阃威，外惭清议，一时调停无术，遂托避暑为名踉跄出京。名士风流，不能办事，于此可见一斑。《黄钟报》云：“壬秋先生天真烂漫，不衫不履，脱然形骸，不受职事上之拘策，自是一种特性。去年议及史馆，曾有将国史馆移入湖南之说。近日到馆，又复雪中白鹤。去留自如，潇洒出尘，不当以寻常规模拘之。”尤令人捧腹者，前日抵鄂，携带其晚年多情之周妈，泛舟武昌，谒段都督。至督辕，则以王 运刺夹周妈刺授阍者，阍者以达，段曰：“余闻王先生之名久矣，彼周妈何人斯？”阍者曰：“客与一村姬来。”段曰其周妈矣。延客东序，执役惟谨，阍者唯唯。老人则挟周妈姗姗来迟，既相见，乃为周妈介绍于段曰：“此吾之侍者，周其姓，彼欲望见都督颜色也。”段唯唯，不知所云，既命之坐，王语周妈曰：“都督待汝不薄，汝其勿违都督雅意。”是日，尽欢而罢。《国华报》云：“当王先生未来京之先，大总统亲贤礼士，延聘之典，异常隆重，及先生来京，第一件事则与财政部较量薪俸之发给期限，第二件事制造概算书向财政部领款（每年十二万有余），第三件事则呈请任命总纂协修，第四件事则颁布馆令派办事员。政府公报所载国史馆令由第二号至第十四号，皆关于派人支薪之事，第五件事则王先生返乡矣。至于一部“廿一史”，从何处说起，至今未尝议及，只见派人用钱而已。曾闻某政界人曰，前日晤湘绮老人，询以国史馆近状，王先生曰：“无事可办，吃饭而已。”吃饭而已！呜呼！今日之政界，皆吃饭问题耳。特无人敢说出，王先生可谓一语破的矣。

◎张彪重入鄂州城

前清湖北提督兼第八镇统制张彪，自共和后，即避居天津。其在武汉所置财产，约值百余万，均为民国没收。其后黎黄陂为张已呈恳大总统，批准发还。因特南下清理，以便按册收回。抵汉住于金台旅馆，渡江入城。鄂军界之旧属，至江干欢迎者甚伙。张着常服缎靴，盘辫于顶，戴小草帽，乘马至都督府拜会。衔帖为前清湖北军门张彪字样。段督原与有旧，极为优待，留宴早餐，旋同帮办军务王占元师长并辔至二师司令部（即两湖书院），与鄂军北军诸将校茶会，又赴蛇山抱冰堂旧日部属之欢迎会，即在該处晚宴。至夕阳西下，始整归鞭，闻旧部将校到会者有二百余人，现在罢职退伍闲居者，约十之八九。张含泪周视毕，言曰：“彪弃诸君三年，于兹矣！诸君子改造新国，功业莫与比伦。今日得复聚首一堂，几若大梦，何幸如之！”仅此数语，已不胜欷歔。旧将校中由曾广大少将代表致欢迎词，大致在称颂其教练鄂军之功，且谓鄂军起义，建立民国，皆由张平日培植人才之力。措词极为阿谀，惟各欢迎者，闻张功业之言，自以今日之闲散，实有无穷感触。有一人竟问张曰：“军门要是那日从了我们，于今未必在黎副总统之下呢。”张瞪目视之，不作一语。

◎呜呼王治馨

呜呼！纳贿贪赃之王治馨，由大理院开庭判决，竟宣告死刑。判决之死刑犯，从未有不过二十四点钟者，此次办理之迅速，殊令人大吃一惊，而近日贪赃枉法者，实不止王治馨。余不知见大总统对于旧部之王治馨犯法不赦，其亦不寒而栗否耶。兹将王治馨伏诛前后各种之消息，汇志之。

王治馨为赵秉钧一手提拔之人，假使赵秉钧不死，王或犹可幸免，又使王上年在国民党演说时，不说宋教仁之被刺，赵秉钧实知其情，则王之换帖弟兄中，必努力为王设法解免也。王平日既无刎颈之交，一旦遇患难，虽有为之援手者，亦不肯为出死力矣。

日前王之夫人曾泣求张某向总统求情，张以王与之换帖，曾面谒大总统，迨有人告张，王已伏诛。张虽愀然伤之，然使果同心腹，张就请注销勋位，以赎其一死，以观其后效，亦无不可。无奈不过因曾有拜把子的一回事，仅为之一尽心而已。

然而王之运动力，不可谓不大也。赵秉钧之夫人，并亲自为入府求请。段乏贵亦有电同乡某君，托其代向大总统说情。段与王亦系换帖弟兄，惟某君平日守正不阿，以王向非好人，且此次案情重大，不肯冒险去碰钉子，而王最后之手段，遂竟不能达其目的。

当大理院开庭判决时，王系坐马车前往，人皆语王曰：“你不过处一徒刑。”然王一入门，即已面无人色，庭中设有两木柜，高约三尺，审判长入席后，其在左边之木柜，令王立其中。在右者则令潘毓桂岳魁立其内，各围以巡警四名，庭丁二名。看护律师赶到，一看情形，便知不妙，邓熔律师与王素有交情，其时一种恻隐之心，遂流露于不觉，但将小手巾纽在手中，审判长宣告潘毓桂诈欺取财，应处徒刑十二年，褫夺公权全部终身，岳魁行求贿赂，处徒刑五年零六个月，褫夺公权全部八年。此时审判长声浪不甚高，然注意倾听，犹可得其仿佛。惟判决王治馨处死刑，审判长起立，手持判决文读，其声低小，不但傍听人无人听得明白，即王治馨亦未听清。闭庭后，王犹问邓熔曰：“到底我是处的九年徒刑，还是七年？”邓不忍以实告，但云我未听清，大约是个样子。出庭后，仍乘马车回步军衙门，人问如何判决，王犹曰：“九年徒刑。”不知生命已在旦夕之间，噫可恨也，亦可怜也。

。

判决后，司法部即赶办呈文。当日下午五点钟即送到总统府，八点多钟就批下来，送到司法部。章总长已回公馆，又随即往章总长之私寓，章总长拆阅一看，不待办公文行知总检察厅，遂打电话告知总检察长罗文干。罗以为时不早，检察官无处可觅，遂亲往步军统领衙门，会同江朝宗将王提出，验明正身。其时王已睡着，乃从被中拖起来。王此时乃魂飞天外，亲在堂上写下遗嘱，后即绑赴德胜门外行刑场枪

毙，始将其行李送还安定门肃宁府胡同王之宅中。斯时，王之妻孥乃闻凶耗，而江朝宗袁得亮等以与王有旧交，监视行刑后，亦赶至其家慰其妻孥。其家人遂往收殓，暂停于德胜门外极乐林庙中。民国之惩办大员，尸诸市曹，遂自王治馨开其端矣。

或谓从前秋审处决之案，固无如此迅速者，即民国法庭判决之死刑犯，其执行亦向无如此之速。霸县知事刘鼎锡因贪赃枪毙，亦俟大总统之批令公布后，方始执行，王治馨已于公布之前枪毙。其所以必如此者，因欲以迅雷不及掩耳之手段，免生他种枝节也。盖王治馨若不拼命运动，或犹可多活几天。乃每日皆有人向总统说情，总统以赏罚不明，官方何由整饬。一面对于说情者，答以俟判决后再斟酌核办，一面谕司法总长转飭大理院从速判决。既判决矣，若不赶快执行，则说情者必接踵而至，且今日贪赃之大吏不止王治馨一人，大总统对于旧部王治馨之不赦者，亦惩一儆百之办法也。然大总统一方为国执法，不能不置王于死地，一方乃又顾念私情，仿诸葛孔明斩马谡之成法，特赏王犯治丧银一千两，并赏食副都统全俸，以抚恤其遗族，其亦可谓恩威并用矣。

王本一卤莽贪鄙之人，籍隶山东莱阳县。当袁总统巡抚山东时，曾派王赴东三省办理某事，王即有不法举动。事竣返济南为袁公所知，立即吩咐捆绑出去斫了。当有人为之缓颊，始免做无头之鬼，其后攀附赵秉钧，为赵所信用。其时袁公督北洋，锐意举行新政，命赵创办巡警，王因得投身警界，与杨以德同事而成为今日老警务之人物。其得袁公之信用者，实赵一手提拔之力也。故有人谓王治馨那能够得上做袁总统的儿子，不过做做孙子而已，语虽近于滑稽，却不远于事情也。

此次被肃政史弹劾，人人皆知其任顺天府府尹时，该府所辖二十四县，除袁知事系袁励准之本家，有最有力之奥援，王无如之何，其余二十三县无一非纳贿者，其赃款达五万以上。而在辇毂之下，敢于如此贪赃，前清二百余年中之，顺天府尹，至少亦易数十人实未之闻也。王独敢于为之者，彼盖自以为有所恃也，而不知上年由巡警总监升内务次长旋转顺天府尹即暗夺警察权也。迨由顺天府府尹迁转为正蓝旗汉军副都统，照前清官制府尹三品，副都统二品，虽属升官，实即为官运不见佳妙之朕兆也。

王君老同盟会会员，宋教仁被刺后，王于国民党开会时，在会场上证明系赵所主使。其时即有人因其以怨报德，谓王只知有党而不知有人，然因王方为总监，莫敢公然宣布，逢彼之怒，王之去总监之任，而今日更受此奇辱者，此为原因之一。又王为总监时，二次革命事起，曾发护照两张，运送军火，接济民党，政府已得其证据。此事最为袁总统所疾首痛心。此次拿问，其真因实在于是。

当看管命令未发出之前，因王曾久任巡警厅长官，而警厅中籍隶国民党者不少，恐其平日有所勾结，若先发命令，不但不能看管，且难保有意外之事发生，故先密令

步军统领江朝宗将其看管，迨江派张乐斌等传提到该衙门，押在司法科后，方发表命令。是晚警备颇为严密，步军统领衙门所管辖之军队，且一一发给子弹。王被步军统领拘押之后，其初犹能馈送食物，后忽禁止。王素有阿芙蓉之嗜好，馈送饭物时，秘密中即可馈送黑米饭，既禁送食物，烟瘾发作时，涕泪交流，不堪其苦。自作孽不可活，其王氏之谓欤！

◎死矣刘鼎锡

前霸县知事刘鼎锡，因贪赃枉法俱发案，经大理院判决执行死刑，依官吏犯赃条例枪毙矣。闻枪毙之前数日，刘氏囚于地方看守所，自知不免，屡图自杀，频以首触壁不死，更仰攀电灯之线，又不死，事为典狱者所知，乃进而佯慰之曰：“君罪状虽判决，仍可请求再审，但得良律师辩护，似亦未尽绝望也。”先是刘氏受鞠法庭，本指定律师邓熔代为辩护，而刘氏不可，必欲自延之刘东汉出庭，而辩护理由，甚不充分，故典狱者云尔。刘氏乃不果死，日作书寄家，促其叔名荫棠者，速聘著名律师，金多无吝，而不知人之给己也。及正法之命下，狱中亦未有以语之者。迨执行前之一小时，始唤之出狱，诳云检察官尚须问话。既出，遂以命令示之。刘氏已面无人色，尚哀乞曰：“今既无上诉希望，乃并不容要求再审耶！”遂拥之出，置于车中，押赴行刑场，至宣武门，始大哭骂。谓当日此缺固以重金向王治馨市得者，今但求向王一面诘耳，遂呼冤以至于死。

言者多谓刘氏出身微贱，或云系贸易中人，因利心太重，故弃贾而仕云。实则不然，刘氏固德州望族，祖系拔贡，父亦诸生，伯叔之名开榜者，曾举进士，名荫棠者，亦以武举人仕至都司，昆弟在庠序者且二十人。刘氏十九岁入泮，二十一岁出外就幕主于前浙江提督吕文元者最久。初时仅月致十二金，其仆杨福（即杨华甫，现亦经大理院判决于启鸿恩王玉珍等案内帮助枉法得赃逾贯之所为处无期徒刑，褫夺公权全部），时年尚幼，即为之服役。刘氏甚倚任之，因代其娶妇，刘氏中间历史不可考，但知其曾充芦沟桥税局委员，及某师范学堂教习，又任门头沟巡检。其谋干霸县知事缺，确系出银六千元，有五人合资，推刘氏为率，及到任，余四人亦各踞重要位置，朋比为奸，以罹于法。闻刘氏身后仅余一子，甫三龄。妻马氏（案内在逃之马树亭即刘氏妻党亦股东之一）甚贤，闻耗誓以身殉，家人以其有身防护甚至，亦可惨矣。又闻开榜当日以知县办理黄河工程，亦以吞款甚巨，即在工上正法者，故德州人羞道之。

◎试院现形

县知事试验为中华民国考试士子之第一事前已举行三次，旧僚新进，聚集一堂，所演笑柄，不一而足，兹琐述之，足供茶余酒后之一粲。当亦读者所许也。

口试一场，照知事试验章程，原系询问地方之人情风俗习惯，乃据应考者之传述。询问之时，颇多趣语，足以供为谈助。某君履历纸上原注供职礼部，及询问之时，乃曰：“汝曾供职学部么？”或者故错乱其词，防其有假冒也。其人答曰：“非学部，乃礼部也。”有某君系宜兴人，委员特问曰：“宜兴出好陶器，近来陶器销路如何？”某君乃历举陶器情形以对。又有某君系常熟人，委员特问曰：“翁常熟之后人如何？”某君乃历举翁叔平之家世及其后裔之状况以对。此其所谓地方之人情风俗习惯乎！然亦太近滑稽矣。

有某君言县知事甄录试云，揭晓之后，有落第某甲，向亲知诵其作艺，全用八股体裁。第一艺信赏必罚为行政之大本论云，有大勋位也，嘉禾章也，优给年金也。此赏之所谓信乎？然何解于疯子之章太炎，枪毙也有期徒刑也，褫夺公权也，此罚之所谓必乎？然何解于表老爷之张镇芳。第二艺安静之吏悃悃无华日计不足月计有余论有云：“余自信生平未穿西装，不坐马车，不打麻雀，不吃花酒，殆所谓悃悃

无华者非欤。余苟能侥幸，则考取县知事之后，更能不奔走政党，不结纳伟人，不提倡民权，不侵吞国税，殆所谓安静之吏者非欤。”做到日计不足月计有余之两大股，更高据题巅，指陈宪法，出股结语曰：“此总统连任所以一次二次三次而犹未足也。”对股结语曰：“此总统任期所以十年二十年三十年而不嫌多也。”并自谓按切时事以立言，无一字之空泛云。

知事试验受试者，以着蓝色长袍、天青马褂、青缎官靴、瓜皮小帽者为多，举动言谈，均各能极力模仿旧时官僚之态度，以期必售者也。尤有惹人注目者，众人均系新理之发，新刮之脸，大似彩楼配预备接彩时光景，殊可笑也。有某君者，亦试士也。一日，赴试场绝早，以朝曦未出，行人稀少，马路上犹为严霜所敷，白如宿雪，车行其上，碾碾有声，至议院门前，人已麇集。此时红日升矣，其光照于议院楼头之上，光华璀璨，类罗马皇帝之王冠。然议院铁门外，则有重笨之车数辆，满载寝具什物等类，若人家之将乔迁者。询诸守卫巡警，始知该院本日办交代，院中旧有人员即于此日搬出云。噫，幸此数日有知事试验之举，大足为该院一壮声色。不然者，其冷落之现象，尚堪入目耶？揭示原定七时点名，然此点名时间，殊难盼到，应试者均各寻相识评论前日之试验问题。有易之者，有难之者，窃观各人之面，则忧喜不同。带喜色者，则盼速速点名，有愁容者，则冀略延晷刻，可以翻阅小抄，以为备敌之用。忽第一牌引入矣，将近十一时。呼点始毕，题纸久不至，众皆现无聊之状，且呵欠连天作倦容，足见皆用功之人也。十一时后，题纸始下，方题纸未下时，有一警官持一白纸揭示至，上书“严搜夹袋”四字，字大如斗，盖试验委员长之命令也。迨题纸发竟，又有一委员闯然而对众演说曰：“昨日以搜出夹袋，

被扣考至十七人之多，诸君皆为有用之人材，千万不可再有此等情事，自误功名。如有夹袋，一经搜出，定行扣考，千万留神。”语毕，冒然而去，此时众始伏案构思。忽监场委员大呼曰：“此人有夹袋，速扣其卷，逐出之！”众皆抬头愕顾，则一南方老先生，方拣视小抄，不防却被监场一眼丁上。此老先生初犹微笑，若不解监场所云为何，嗣经警官将其卷子夹袋扣留，掖彼出场，始含泪而去。此后众有所警畏，遂无再犯者。某君完卷时将近三钟，出场时已困惫不可支，头复大晕，以久不作楷书，写字一行，较作文十篇，苦有万倍也。某场试验时，点名已毕，题纸犹未发下，先入者已候至数钟，不免枯坐难耐，因以闲谈解闷，人声庞杂，中有大声发言者，意态激昂，聆其言，则致怨报馆也，其言曰：“各报连日骂县知事太挖苦，我们考县知事，即不值钱，亦不至如各报所言之甚，因此我们考县知事者，不免大受影响。”方欲言究，题纸已下，人声忽寂，忽又有数人大出怨言曰：“三道题目，一道比一道难，已可恨，策问中偏说我们考县知事的经济素裕，真不可解。莫非要叫我们捐官么，须知我们因无钱才考县知事，若有钱，还愿来自讨苦吃耶？”喃喃不已。

某次知事口试，应试人入场后，照章均须先谒见主试委员长（即内务总长朱启铃）。当有众议员某君应试，其报名履历并未书明议员官衔，乃委员长一见即曰：“你是议员罢？”某君答曰：“然。”又问：“你是众议员，抑系参议员？”某君答曰：“众议员。”又问：“你办过行政事务否？”某君答曰：“没有。”即以笔挥之使去，及到光字号试验场，有委员三人，高坐堂皇，先由首席某委员问曰：“你做过议员罢？”某君曰：“然。”诸委员均摇摇头，又问：“你从前没有做过官么？”某君答曰：“没有。”诸委员又摇摇头，又问：“你系何时由东洋毕业，及何时回国的？”某君答曰：“我系宣统三年毕业，当年七月回国的。”又问：“你在东洋共有几年？”某君答曰：“六年。”又问：“你毕业回来，曾做些甚么事？”某君答曰：“曾在南京做过参议员。”诸委员等均熟视久之，大摇头而特摇头曰：“问完了，请去罢。”某君乃掩鼻而退。

有士子某，届口试期日，赴试甚早，晨十钟即至众议院守候，徘徊门外，闲观墙上布告，见有数人于卷内，因自署其名均已被摈不录，盖试场规则，系用糊名式。暗中摸索，苟于卷内称名，则疑预通关节，春光泄漏，自贻伊戚，亦可谓弄巧成拙矣。徘徊场外，久不得入。天气既渐和煦，正午太阳，炙人甚热，乃询警吏可入内休息否。警吏以为可，并索卷票为证，乃入，入后有警吏前导，延至休息室。又坐一时许，有招待委员翩然入室，有识之者，多起脱帽为礼。某询于众，知为内务部长张长植，其人盖一蔼然儒者也。未几一钟已过，坐中人三五闲谈，几忘有考试之事。忽闻铃声琅琅，处长吴笈孙一手握铃，一面高声禁止众人喧哗，众人肃然起立，遂即按牌唱名，鱼贯入场。当未入场时，众人互言谓口试系学识经验器宇三者并重。一般揣摩风气之流，似早预闻此语，故有年过七十，须发斑白，此次均效唐绍仪岑春暄故事，草无余。有年未三十，恐以不及格被摈者，则均预留寸许短髯，作流行洋式，以冀投机。不料试验资格中三十岁以上五字，竟有如是奇效，是亦民国考

试一种趣闻。第一牌点名既毕，众人均按次入座，朱委员长自外入，应试者听候唱名，以次至台前，预备问话。其时间长者约五分钟，其时间短者约一二分钟。大约曾任县知事及办过地方公务者，问话较多，若仅有学堂毕业或曾在中央为某官者，则问话甚为寥寥。问话毕，入休息室。约一二分钟，再由警吏延入试场，场中有试验委员数人，问话较多，然亦不甚穷究底蕴也。

考试知事政府注重老成一派，不料某届二场考试将毕，竟查出党人二人。迨往逮捕，早已闻风远扬。有此事发生，委员长朱启钤益为注意，场内加添警兵侦探，严为访察。第一次口试，凡身着华丽衣服，虽答对如流，公事娴熟，皆不取中。后试者有鉴于斯，均易以宽袍大袖之布衣，做出老成态度，以迎合主试委员之心理，故众议院门前，又觉生出一种寒酸气象矣。

第一届知事试验之总榜揭晓后，毕业生落第者颇多。有学生六百人，上书朱总长，语甚愤懑，录其原呈，以见梗概，为呈请删改应试资格以恤下情事。窃读民国二年十二月二日，以大总统命令国务员全体副署颁布之知事试验暂行条例第二条所定应试资格，以三年法政毕业者列诸第一项，皇皇明令，在人耳目，议者均谓政府诚心求才，刷新政治，故学生来应试者独多。迨经第一试、第二试揭晓，又居然多列前茅，方谓政府未始无诚。孰意一经口试，大反前案，凡录取者尽是有经验之老人，学生等均以未曾做过前清十年亡国大夫，年龄未达五十岁，离死期尚远，竟不能邀口试委员之青睐，而概遭摈斥，或侪于丙等之列，实非意料所及也。政府须知学生等远道来京，大非易易。其中寒苦之士，十居八九，多系典衣卖地，始得凑集川资，来京应试，詎料尽受其骗。夫政府既抱定人惟求旧力排新进之方针，即不应规定毕业资格，今条例若彼，而考试若此，果何以见信于天下？在政府只图开玩笑行诈术，而不知天下之士，莫堪其苦矣！为此请求政府大发慈悲，即将第一项资格删去，以免后来者再受其骗，则寒士幸甚！全国学生幸甚！谨呈。

某届甄录试，场规颇不严密。试士往往于文思艰窘之际，辄从袖口或大衣内扯出史论及乡会试闱墨等书，以助灵机。甄录题目既极普通，而又有种种夹带以便抄胥，故获取者甚多。大众以为上次既如此，下次不妨放胆，及至正试，希望愈切，夹带亦不得不略为增添，免致枯肠失润。孰知监试者恶作剧，场中巡视偏又加严，因夹带扣考者二十余人，内有现任知事二人，即时勒令出场，不得与试。闻有一人当题纸接到后，从腰间取出巨纸一束，细字斜行，密写殆遍。不知所抄何书，方一展览，为监场者窥见，遂来搜取，其人始尚强辩，以为并非夹带，且以两手按纸，不听攫去，继见不免，乃改变颜色，向监试者乞怜，复连连作揖，求其饶恕一次，正当长揖未竟之时，而门外乃有一身着警察制服者入曰：“先生今且去，下次再来罢。”此公乃灵魂若失，身不自主，随之出院门矣。又曾有一人在厕所阅文稿，被巡警搜获扣考，可谓憨不畏法矣。

试院门外，所贴招领牌甚多。有遗失墨盒者，有遗失水笔者，有遗失手巾者，弃甲

曳兵，仓皇出走，此均不足为奇。而最奇者，则在遗失卷票，如此者且不止一二人。无卷票则不能入场，不知应考诸先生，何以荒唐至此。

入场后，大家坐定。有人冷眼旁观，细为鉴别。见有半倨半恭者，望而知为前清府县，以其曾执手版，且尝临民也；有尚带寒酸气习者，望而知为前清京官，以其尚未纯粹沾染官僚派也；有举止轻脱得意疾书者，望而知为新毕业之学生，以其未知考试之艰难也；有鹰瞵鹗瞬顾盼自豪者，望而知为两院议员，以其犹有掷墨盒打议长之流风余韵也；有顰蹙构思袖底露出败絮者，望而知为新闻记者，以其日作数千言，伏案功深，即衣饰间亦不能自掩也。其余色色形形，疑彼间非试验场，乃博物院也。

第三届知事甄录试第一场，派定者为顺天直隶奉天吉林、黑龙江、山东、山西、陕西、甘肃、广东、广西、南、贵州、河南、安徽旗籍计十六处。晨五钟余，考员陆续而来，率乘人力车，至则年岁老少不一，衣服华朴不一，虽南腔北调并为一场，然颇现一种稳健气象，较诸上二届则迥别矣。考员等率皆提皮包或皮夹子，忆及前此考先生背考篮颈卷袋者，气象迥别。六钟余入场，八钟余封门，题纸下，为刘晏喜用士人论一题，申刻交卷，不准给烛，题目极为明显。于是抽笔，书题于卷，大家构思，而哼哼嗡嗡，令人思薛大哥蚊子苍蝇，不禁欲吃吃作鹭鸶笑，声粗声细，入耳洋洋，亡何突然中止，则十一钟余面包之给也。面包半夹以糖，半夹以肉，面包制法颇干净，夹糖者亦甜美，夹肉者则肉仅一片，如纸之薄，较诸饭馆冷荤碟中物尤为玲珑漂亮。不知郢人运斤垤尽而鼻不伤手段，此厨司可与争奇否耶。食毕，饮茶颇热，可无腹疾之虞，场中温度亦合，有大小解者，随以老警，剑佩、然，惟仅许一人落后者内急情形，杂以言喻。须臾吟声又作，及放头牌二牌，均鱼贯而出，至三牌放场，于是皆提包出，至门，有警士收券。此届阅书者未能尽免，监场者则温然其容，怡然其词，绝无前次强硬态度，至考员则所见率皆长衫马褂似人人皆具有知事资格者也。

三届试验第二次甄录试时，有一士子甫出场，便大嚷曰：“真真苦恼子，坐处也弗宽；面包也弗够吃；要喝茶哉，叶子末弗好；要小解哉，偏偏有个巡警跟倪。”旁人闻之，莫不粲然。是场题纸为汉通、西域、宋弃、西夏若得若失论，有年岁略大鬓已颁白而剃面熏衣犹作惨绿少年态者，相与言曰：“是题恰是绝好两扇格，前分后总，作来颇不费力，兄弟誊写亦能字字入格，不似新少年之尽作草卷，一字占数格。”当此维新时代，即主试者尚未知见过字学举隅没有。吾辈自问颇不弱。其一曰：“俗语云，场中莫论文。吾辈逢场作戏，作得过去便是，何必认真？况且大日本平假片假作字先不能画一，我们就说看过字学举隅，也止可得失寸心知罢了。今晚且与兄弟到北林房灌点外国米汤，也省的如此沾滞。”且行且谈，直走出宣武门去。

◎公府新式结婚记

三年冬，大总统之四公子，举行结婚礼。其礼堂礼节，早经拟定，惟总统以欧洲战事之影响，谕令停止觐贺，由庶务司发出通告，黎副总统、徐相国、各部总次长、平政院长、清史馆长、政事堂左右丞、各局长参议参事、参议院参政、约法会议议员，皆前往觐贺，有二百人左右。女宾如孙宝琦、周自齐、章宗祥等之夫人，常出外应酬者，亦有数十人入府觐贺。总统以嘉宾既已莅止，只好出来答礼。所有礼节，悉如预定之仪，怀仁堂之上面为礼堂，其下为食堂。用立食式，新郎系服西装，另披红绸，新妇则穿粉红色之裙衫。上午九时，新郎由府乘礼车至女家行迎亲礼。十时，新人乘彩舆入总统府。所经路线，系由东华门大街，经过东长安街，进东长安门，过天安门新华门，至西单牌楼，北行进西安门，入中海之福华门，遂至总统府。其所用一切之仪仗，系新旧合用。沿途有军乐前导，彩舆前后有军队，扈从所过之地，观者如堵，至彩舆入福华门后，燃放百子喜鞭，盖循旧俗也。惟新华至丰泽园之胶皮车，皆到福华门迎送宾客。所有自福华门进府者，均乘船只云。

◎梁令娴于归记

梁任公女公子令娴女士，素有文名。前与西洋留学生周希哲君订婚，现因梁女士随父在京，周君亦学成归国，爰在细瓦厂梁任公寓所行结婚礼。一时在京与任公有旧者，皆备有联幛等物以为祝贺。是日，任公于宅内预备茶话会款待来宾。

周君隶籍粤省，负篋美洲，随康南海先生周游十一国，采风问俗，精研西文西语，旁通条贯，言之成章，南海纪游之洋洋大文，周君与有力焉，因此深受知于南海。辛亥随南海至日本，由南海介绍与梁任公长女令娴女士订婚。去年任《庸言报》编辑之事，肆力于国学者一年，业益大成。至令娴女士家学渊源，少时由任公亲授以经史，继又从麦孟华潘博二君习诗古文词、汤浚君习政治经济学，《艺蘅馆词选》一篇，即女士十七岁时所手集也。名士名媛，天作之合，信一时佳话也。

周子怡总长为男家主婚，梁任公为女家主婚，马湘伯为主礼，孙慕韩总理与前总理熊秉三为大宾。礼堂桌上有大副总统赠品，主礼居中，大宾左右立，女宾分立于左右，男宾立于对面，熊秉三夫人代表女宾致词，马主礼首先演说，孙大宾次之。熊大宾因其夫人出台演说，不得不退避三舍，朱总长及其夫人均到，孙总理夫人与周总长夫人亦到，赞礼者为前众议院副议长陈国祥，延宾者为蔡都督松坡。

是日结婚仪式，新旧参半，由任公手定，亦吾国婚姻史中一段佳话也。节录如左，良时已至，云 敖三鸣，执事者各执其事，奏乐有间，辟门候客者导客入门，以次就席，奏乐有间，赞者云：

“盖闻三百三千，曲礼戒其不敬，天秩天序，旧典训以协恭，是以男婚女嫁，人纲于业权舆，天神地祇灵盟于兹凭式，冠裳既集，坛坫有光，嘉礼聿修，无仪有禁，为此肃坛，敢告执事。”

执事者屏息正色悚立，赞者云：

“盖闻歌桃宜室，灼灼者及时，嫁杏当春，郁郁者应节，是以溯观型之典，辟贰室以馆甥，赋束楚之章，望三星而在户，式维既夕，礼曰孔嘉，祇敬有加，严恭将事。”

执事者各敬其事，奏乐有间，执事者肃主礼入席。奏乐有间，肃大宾莅坛，北面立，致敬，有间，肃大宾就位，奏乐有间，乃肃主婚入席。赞者云：

“盖闻天地始辟，而乾坤以定，水火交感，而阴阳以生，是以二物之经，为道所自起，一齐之义，由礼而后成，大德主盟，有家相爱，遭此良辰，举兹令典。”

奏乐有间，执事相婚者面坛东西立，致敬，嘉乐初合，主礼致辞，婚者俯伏，敬听受命，次请大宾致辞，婚者俯伏，敬听受命毕，嘉乐亚合，婚者东序西面立，西序东面立，执事相婚者交拜，大宾传换约指，嘉乐三合。赞者云：

“盖闻秦晋有匹，无舛于泾渭，潘杨之睦，重申以婚姻，是以夫妻匹敌，钟鼓乐其好逑。男女居室，山河颂其偕老，二合已兆，百两斯成，龟勉同心人天。”齐庆

执事者相婚者向主体致敬，次向大宾致敬（鞠躬），次向男家主婚致敬（三鞠躬），次向女家主婚致敬（三鞠躬），次相男女宾及主赞协赞致敬（鞠躬），男女宾致颂词。嘉礼既成，嘉乐终合，执事者相婚者退，次肃主婚退，次肃主礼大宾离席。

洞房分东西二屋，西屋中书籍最多，中有艺蘅馆令娴日记两部，约有二三千页之多，有康南海之题词，曾记其末句云：大家风范更能文。礼毕，令娴偕新婿循例踏红毯入房。入房后，吃交杯酒，吃面，吃糖，多系我国旧习惯。惟行礼于礼堂则鞠躬。入房后，新夫妇向寝床仍行拜跪礼，盖系粤俗，其镜台左右，则有红染花生及红枣等，与平常家无异。新房男女杂沓，谑戏太甚，新郎遂逃，梁任公夫人老气横秋，毅然下逐客令，奈吴宫教战大有不受其指挥之势。

梁令娴女士与周君未结婚以前，周君留学美国，英文程度甚佳，惟苦于不识汉字，前此由康南海介绍任公，贻书云：尽心指导三月，汉文必能通晓。任公颇难之，嗣遂为之主婚，介绍任公女公子为耦，任公欣然从之。说者论此段美满婚姻，蜜月之中必有无限韵事也。

◎狱中韵事

赣垣警察厅，拘禁党人吴木兰女士，正患经闭之症，以致肚腹膨胀，医药无效。有赣南大狱案内黄邦直，系前清拔贡，失偶多年，妙想天开，欲以文字勾引吴木兰，而冀将来配为夫妇，订约白头。詎料警厅管狱极严，男女分禁，墙垣叠叠，难通消息，黄氏乃贿托厨役传书递简，致被查获，兹录黄邦直致吴木兰书于下。其一曰：

近日因妹贵恙未愈，抑郁忧伤，寝食俱废，凄凉景况，正不减妹五更人静时也。第仆与妹以患难相逢，儿女英雄，两情爱慕，结为知己。地隔咫尺，而竟无一面缘，真是奇人奇事。但人生遇合，原难预料，今虽不得亲近芳泽，使天假我缘，则异日未必无见面时也。奉读口供，清辩滔滔，允推女中豪杰。仆愚劝妹下次对待问官，只论法理，不必以激烈言词对付，为各问官略存颜面，妹以为如何？仆出时必有耽搁，如有行止，必设法递消息与妹。倘妹递信与仆，凡有关系之事，切勿写，第写个人私交，盖现今侦探四布，到处皆危机也。现李贼廷玉革职拿问，系仆前曾密致函肃政史，牒列罪状，请其弹核之效果。当道现时对仆，十分注意，此事妹当代守秘密，闻府上来人看妹甚慰。仆在此间，无须钱用，小儿在外，一切多由外送来。妹可不必锦念，近日心绪烦乱，如醉如痴。

其二云：

作书将竟，闻妹呼痛声，心肠寸断矣。一夜捣枕捶床，不能成睡。十二句钟，闻易狗说，妹胸部积一血块，月经不行，因妹喜服用冷水所致。仆切劝妹，再勿用冷水，尤不要抑郁过甚，或者心地稍舒，而病体自愈。仆在此屡欲作详细书与妹，以表衷曲。因同人过多，每一握笔，即蜂拥而来，诚讨厌也。惟妹知我以心可矣。

闻吴曾赠黄以诗曰：“薄命如花不自由，春来春去更增愁。抛荒学业如山积，紧蹙双眉懒不修。”今黄案已获昭雪，开释出狱。吴尚待罪囹圄，有情人不知果能成眷属否耶。

◎敦谊会之西曲

前者孙总理夫人与华南圭夫人等，以吾国妇女向鲜家庭教育，特行发起办一女子敦谊会，俾得不时聚集讨论进行。该会成立之期，特假外交部新公所开一茶会，中西妇女到者数百人。午后三时开会，六时散会，会场秩序，异常整饬。除由帛黎福开森等诸女士与波洛山拉嘉甘锡侯等诸夫人迭奏西乐，及勃恩夫人、索洛上校为俄国跳舞外，马良君之演说，异常动人，而德国医学博士窦浦氏并演说病之原因及预防方法，演毕由吾国唐夫人（即裕朗西之女公子）译成华语，意极透澈，闻者无不拍掌。再该会所奏歌曲等，其原本俱属西文，然译成汉文，亦殊耐人寻味。一曲曰《梦》，其辞为：金发蓬蓬，情种爱依梦中，绿树阴浓，春暖云封，秀葩初茁，泉泠泠然，穿林而出入无尘之境，晴漪含笑前迎。余等围绕于此锦褥，余等游泳于此艳福，此梦境也。而予所遇之真境，有胜于此者，绿树阴浓，春暖云封，秀葩初茁，泉泠泠然，穿林而出入无尘之境。晴漪含笑前迎，予握汝手，予不释汝手。予誓不与汝分手。唯唯唯唯，予誓不与汝分手。春青林隐，我生有幸；汝生有幸，非梦境。焉得有此佳境，此佳境，焉得遇之于真境。然而此乃予之梦境，然而此乃予之真境。此真境恍如梦境，此梦境洵是真境。二曲曰《情》，其辞为：悠然而至，忽然而逝，魂王情网，毒饧个 吴几许苍生，苦剂滴无涯酸泪，魂王来自何方，情网来自何方。汝来自何方，光明传语破天荒，真耶、伪耶、喜耶、愁耶、抑又梦耶。幸福幸福希望殷，悲怨生。命为艳所积。命不灭艳不灭，魂王情网。汝来自何方，喜耶、愁耶、抑又梦耶。三曲曰《飞燕》，其辞为：天朗气清，燕飞冥冥，唤日旅行予目逆而送之，予魂驰而系之。顾盼自雄，横截太空，予焉得为其仆从，吁吁！此神秘之奥区，予焉得循其途而一游，天朗气清，燕飞冥冥，唤日旅行。四曲曰《播种》，其辞为：播种播种，天不阻功，地不择农，在汝之自营。祖国土地非不毛，手足非畏劳，心无所怯，血无所耗，有施必有报。施者人工，报者天工，青青在田野中，赖此藐躬，佳种不多。人寿几何，汝具此智锄，一掬新禾秋获富，谁谓无结果。前行猛进，前行猛进，播此公道播此善道，功元妙。

◎妓界助賑之韵后

香港石塘咀各妓，对于賑灾事，极抱热心。有秀云等六校书，特捐助局賑一月，并相约当筵演说，力为灾民请命，募集尤多。兹将其劝捐小引录下：

“落花有恨，流水无情。春雨残红，谁家血泪。莲方烁火，问洒露以何人。蕉纵有心，已御风而无力，同忧溺已，敢说援人，无如洪水汤汤，怀山荡荡，天阴鬼哭，伤心遍地之啼痕；夜冷鸿哀，忍睹载途之枯殍；当筵谱曲，都成变征之声；添酒携灯，怕听溢江之句。秀云不敏，无巽酒救民之术。有献瓊参佛之心，用率同志六人，先捐局賑一月，裙拖湘水，悔谈琴操之禅，袜妙凌波，忍作灵妃之步。博红绡于一曲，莫制长裘唱河满之三声，更添泪热，所愿热心君子，共发慈悲，纵杯水之无裨，亦移山之有志。但使饰花调粉，少节香奁，更期买笑缠头，旁纾急难。秀云一身沦落，殊惭棉絮之微劳。诸君万贯累缠，何惜杨枝之余沥。三呼麦麴，似闻腹疾之声；百拜梅花，敢作发棠之请。是为引，香港石塘咀咏触院秀云琼妹新得桂喜小姚奇乐院雪梅天一院十妹谨订。

◎凤冠霞帔之光荣

彰武上将军段香岩之夫人，感受暑热，偶沾小恙，请医诊治，迄无灵效，日益沉重，竟以逝世。夫人当弥留时，自知不起，执段之手而谓之曰：“儿女俱幼，设予不幸。君其善视之。”后唤其男女公子至前，勉之以自立成人。未逾时，遂含笑而逝。段以丧事须人料理，特委陈君（系将军署某某科员）主持，谕以一切皆从俭朴，惟棺材须用楠木。价洋三百伍十元，其余衣服皆如仪。晚间入殓，仍用凤冠霞帔。因夫人平时信佛，特请龙华寺风神庙八蜡庙之僧人五十七名，府城隍庙道士十八名，本坊道士十六名，入府诵经开路。殓时，齐奏军乐，升炮十九响。同城文武官员，先后至府吊唁。段将军以府内办公之地，不便举行丧礼，将夫人之灵柩移入小朝街安徽会馆，行开吊礼，并电禀天津段太公，报告一切情形云。

◎巡按夫人之威风

某巡按使卸篆后，移眷寄寓汉口英租界一码头太平街，而自回皖扫墓。其二姨太太王氏，系浙西良家女，前在豫南道任内所纳。宠擅专房，与正夫人极不相能。夫人乘某远离，竟乘隙将王氏大加鞭挞，且与其公子硬作主张，将王氏嫁作商人妇（初因为巡按宠妾，人皆不敢娶夫人，乃以若干金为媵，遂有在洋行执事者领去）。事成之次日，某自皖归汉，将赴他省履新。宾客如云，酬应大忙。终夕无暇顾及，迨次日犹不见王氏踪影，始为动疑，遍询跟随婢媼，皆支吾其词，不敢以实对。某怒询于夫人，夫人曰：“贱婢已为我遣去，尔其奈我何？”某至是怒不可遏，即与夫人大起口角，拍桌打椅，互决雌雄。无何，夫人中拳伤鼻，血流如注。公子亦大受鞭扑，衔恨甚深，遂为不及黄泉毋相见也之誓。比夜，夫人公子检点行装，乘江宽轮船回原籍，随员人等皆不便劝留。某以宠姬已成覆水，不可收回，颇自叹岑寂，随员仰承意旨，当夜特召散生路三分四成各里诸妓，赴寓大开花筵，吹弹歌舞，以资慰藉，并拟选一佳丽为王氏替。某俨然有除却巫山不是云之概，饱览众花枝，无一当意者。次晨启节，虽随从如云，而亲属仅前已失宠之大姨太某氏偕行而已。

◎女杰艳史

自称女子参政同盟，会干事沈佩贞之女友傅文郁者，曾携三五女伴，及其男伴赵显华（赵亦为沈佩贞之男友）到汴，艳帜高张，趋者若鹜，假筹款组织女子参政同盟会支部为名，与一般蝇营狗苟之徒，日相往来。某女校之教员及学生，或直接，或间接，被其吸引者，不一而足。最可骇者，第四巷为开封明妓暗娼荟萃之处，傅竟时时微服往游，有人侦知傅常入一公馆。公馆者，即秘密卖淫所也。内有暗娼三数人，与傅等为莫逆之交，汴人传为异事。夫男女界限，原不必过于拘守，然狂荡已甚，逾越范围，实为道德之贼，况值女学萌芽之际，诿可使社会败类混迹其间以横肆破坏耶？余对于傅文郁在汴之行为，不厌苛求，详加探访，而得其种种艳史如下。

傅文郁于一月九日到汴，与赵显华等同栖鼓楼街金台旅馆，即有署名为新剧团演说团救蒙会救国团及女界同志者，于省城通衢，遍贴极大广告，谓定十二日假李大王庙开欢迎会。届时到者约二千余人，座位不敷，甬路上下人为之满。于是会场之视线，遂生高低远近之区别。钟鸣二句，摇铃开会。首由与傅同来之赵女士，报告傅文郁来汴之原因。俄而有头作鹑尾年可二九淡妆轻抹之美少女，珊珊登坛，盖即所谓傅先生文郁者是也。其声微细，坛低人众益以会场之种种阶级，多恨不能聆彼娇音，饱己眼福。斯时，遂稍见拥挤矣。招待员睹此情状，急为整顿，卒以人数太多，终归无效。傅乃退席，次有戴蓝眼镜之魏女士者，年与傅等，而姿容过之，兀立坛上，良久吐“今天”两字而止。群为发噱，魏亦两颊俱赤，其羞惭之状，莫可形容。傅乃急为掩饰，出席演说曰：“魏先生学问甚好，今非不能言，特以河南人程度低浅，嗜色成性，实不欲与此等野蛮人讲话也。”言次，肆口骂，词多不堪入耳。座众听至忍不可忍处，遂有悍桀者，厉声叫嚣，哄然而散。无何，秩序渐复，重行开会，乃不转瞬而人丛内又有大呼者曰：“掷炸弹！掷炸弹！”座众俱仓惶失色，不知所措，而女席尤不堪其拥挤，遂至多被压倒。一时秩序又大乱，傅文郁惊怖之下，欲脱身遁去，为众所阻，窘甚。寻有巡警十余名，赶来救护，傅始得出重围。退至庙之后院，而一般色中饿鬼，仍徘徊弗忍遽去，或逾墙垣，或钻壁隙，争以一睹颜色为快，久之始鸟兽散。傅俟风波平静，乃怏然返金台旅馆。傅文郁与赵显华之关系，人尽知之。两人在金台旅馆，住第九第十两号房屋。赵显华者，即混名赵小狗，担粪赵五之子也。曾为汴垣体育专修学校夫役，被逐后，与其姊在麦娘娘胡同作卖淫事业，旋又在山货店街路东暗娼刘青湘，即绰号小黑驴，在林黛玉之家为拉皮条者。青湘之女小景，与某银号刘某有终身约。刘欲引小景私逃，事泄。于是赵遂偕刘青湘小景等赴保定开妓馆，旋又至北京米市胡同际会店充当野鸡。庚戌腊月，被外城总厅侦知，飭右二区巡警前往捕拿，漏网潜逃。民国成立，又到京售小景于韩家潭妓院，得银三百元，赵竟冒充学界，在京师内城城隍庙街设一女子法政学校，名为“兴办女学”，实则勾引良家妇女，尽为丑业。又借该校名义，在外撞骗，种种劣迹，不胜枚举。又后同沈佩贞到汴，假开会之名，售票渔利，直以待刘青湘母女之手段待沈佩贞。常对人言，彼为沈之顾问，且已与沈结婚，其名刺

上大书女子参政同盟会会长、民权党干事员女子维持会会长等头衔。闻在京骗人银洋达万余元之多。此次又携刘青湘傅文郁及陆魏诸女子到汴，下榻旅馆，惟赵与刘为旧交，较傅尤为密切，傅则妒心顿起，遂至大翻醋瓮。某日率其女伴，在该旅馆与赵刘大为厮斗，旋更登报声明，与赵显华断绝关系，质言之，即拆姘之变相而已。诿刘青湘刁狡成性，复以种种手段，牢笼傅文郁，腥风蛄雨，播遍太梁，适京师被赵骗之某洋货店，侦得赵之踪迹，提起控诉。都督乃飭巡警将赵显华拿获。翌日，由南区巡警捕得刘青湘，送交警务公所。于是傅文郁之丑行，尽人皆知矣。有前为某报经理之某君，闻之大愤，致傅一函痛骂之。傅接函后，不待终日，即出旅馆。于是，大好金台，遂不见傅氏之艳帜，而该旅馆门前游娼浪子之踪影，亦不似前此之翩翩矣。

傅文郁既演艳史于金台旅馆，即从事迁居矣（汴垣秘密卖淫者必月余或一两旬迁居一次，盖恐被巡警察破及遭流氓之欺凌也）。以傅之年少英资，若洗心革面，致力于学，尚不为晚，乃傅尚不悟，于迁出旅馆后，竟在《河声报》登一广告，大书特书曰：“傅文郁启事，鄙人已于十六号移至砖桥街东路南，凡我同志，可临该处为盼，故此声明。”此广告出现之后，傅氏所住之地，其繁盛虽远逊金台，而生涯亦颇不寂寞。国民党王某、陈某、凌某、胡某等皆极与之接近。傅特邀其男女同志十余人，假砖桥街之密室，开谈话会，预备组织女子参政同盟会支部，履舄交错，毫无秩序。最可笑者，傅等以经费无着，拟借新剧团演剧，以所获看资，作参政会之基金，且必求王某等作赞成人。王等欣然允诺。夫既提倡女权要求参政，固当独立自主，坚忍不拔而后有济，何必仰仗此辈男子为耶？然则此中况味，亦不言而可知矣。

傅文郁拟排编新剧与新剧团合演之意见发表后，新剧团之少年，皆欣喜欲狂。然河南剧场向无女伶，且中州为文明最古之邦，男女合演之事，伤风败俗，当然不能发现。今突以自诩为女子参政同盟会之人物，而与一般浮荡之新剧家者沆瀣一气，则争风之事，在所难免。李大王庙、金台旅馆，其前车也。故此议一兴，汴中各界，咸反对之，而傅文郁与新剧团串演新剧之议，遂被打消，乃傅文郁异想天开，更发起一女子新剧团。某女校教员段某、陆某及诸女生等皆出而赞成，而卑鄙齷齪、善敲竹杠之某报，竟亦随声附和。河南女子教育界之前途，从此将生莫大之障碍。有某某诸君特致书于傅文郁，谓如再任意妄为，定下逐客之令，免使中州一片干净土，留此污点。傅畏不能容足，乃寝其议。

◎潇湘风流案

郑师道者，素患神经病，前在参议院，以锡箔裹鸡卵为炸弹，恐吓参议员，即其人也。在京时，与唐群英有结婚之说，唐继以其疯狂，不愿与为偶。及唐到湘，郑殊无聊，适得湖南调查盐务委员。抵湘后，即百计谋与唐结婚。唐坚拒之，又托多人与之说合，俱不遂。有醴陵张某者，常与《长沙日报》馆来往，素与唐善。郑在该馆见之，即托为媒。张不之诺。郑遂时常追随，冀达目的。后及《长沙日报》登一插画曰：“新人物之面谱，一男面，一女面，女面上题多情学士；男面上题无耻委员。”画之命意，原无一定之所指。郑见之，遂谓讥讽彼与唐者。一日，郑追随张至长沙日报，八门即至发行处登广告，盖欲以此泄其怨也。其广告署郑与唐名，发行处谓此应负责任，又谓现仅汝一人，唐未来，殊不便登。郑遂谓唐偕来，已入编辑室，发行处不之疑，遂付印。其实指张为唐也。唐见报后，怒不可遏，遂至该馆诘问。数语后，以手擎茶杯掷玻璃窗上，大肆狂闹。该馆不得已，允其更正，始勉强了事。出馆后，忿犹未泄，有素与该报宗旨不合者又怂动之，谓该报以公款而办党报，理应取消，遂于晚间倡率男女三十余人，乘其不备，直入印刷室，捣毁一空。该馆遂请警员踏看，又请警监逮捕登广告之郑师道，当将郑拘留警厅。该馆即在长郡地方审判厅提起诉讼。

另一说曰，《长沙日报》告白部登载郑师道与唐群英结婚广告一条。其文云：“道英在京因道义感情，成婚姻之爱，已凭族友一再订盟于便宜坊。二月四号结婚于天津日本白屋旅馆，为国步艰难，故俭礼从事。今偕来湘省，拟重登花烛，以乐慈帏，因误会而生家人之变动，致启无人道不根法律插画之诽议。殊不知儿女英雄，凡事皆出人一等，同志亮诸。”唐见报后，忽至该馆大肆咆哮，不由分说，打碎玻璃窗、茶碗、椅子等件，经同坐多人排解，以广告系营业性质，不归编辑部经手，自有郑师道负责，允由该馆登报更正。当将更正稿拟出，并由唐群英亲笔改稿，毫无异词。詎是晚唐群英忽统率男女三十余人到馆，将门首招牌二块取去，直入排字房将已排成之版，及一切架上铅字铅件盆灯玻璃窗等，尽行捣碎，不听劝阻。比报知警署，派遣长警到馆，将唐群英等讯明，并将捣碎各件踏勘。该馆乃提起诉讼，以待法庭公判。预审之日，唐群英抗传不到，有询之者，则曰：“余并未提起诉讼，故不到案。且谓《长沙日报》系都督府机关报，只须向都督理论，不愿与该报在法庭诉讼，偕其同志姊妹七八人，在都督府要求，定要取消该报。”谭都督以一笑置之。唐乃在外声言，谓该报如再出版，必须再往打毁，非达取消之目的不止。该报闻之，恐其真来打闹，曾请调警察多人，在馆守卫数日，以无动静而去。然以外间谣言犹未止也，乃令木工制短棍多根，绳索数件，待唐来时与之决一死战。而于该报出《号外》之前一晚，防卫尤严，头门未晚即落锁，大有风声鹤唳、草木皆兵之势。至该报被群英捣毁字房什物，其损失之数目已抄单呈报各机，关要求赔偿。计第一次碎毁客厅玻璃窗茶碗椅子各件，值洋四元；第二次取去《长沙日报》馆招牌一件，值洋十元；碎毁排字房铅字及字架等件，值洋八千元；大盆灯五盏，值洋二十元；玻璃窗一处，值洋十元；排字房铅件用具，值洋一千元，共计损失洋九千零

四十四元，又耽搁出版，每日实属损失洋二百三十元。其实字架不过推翻两三架，原物尚存，仅费手工而已，八千元之数，亦太相悬殊矣。事出之后，唐群英曾请各报馆主笔。及政学界多人吃酒，乞为调处，旋经议定条件五项，如双方承认即可解释。其大要系令唐群英送招牌于《长沙日报》，并致书道歉，一面由《长沙日报》登报声明取消告白，以全唐群英名誉。至其损失，须经确实调查，如为数无多，由调解人担任，可谓平正之至。乃唐群英反不遵行，必欲由该馆先行赔偿名誉损失，始肯赔偿该报之损失，其送招牌道歉一事尤不承认，调解人遂中止。

唐群英具呈都督，谓郑为浙江一无赖之人，顷称调查盐政来湘，屡来群英处求见未遂，遂捏造同启，意图污蔑，请予通飭各署将郑严拿究办，而郑则到处为唐辩护。前预审时，即向法官为唐置辩，旋以《湖南公报》持正论责唐，又致函该报为唐辩护。历数其革命之功绩，宗旨之宏大亦云怪矣。并闻郑寓金台旅馆，有询之该馆主人者，谓于此事未发现之先，有唐先生者，曾与郑在该馆共宿数宵。彼二人之情事，究竟如何，非外人所能知。惟外人对于此事，其评论分两派。一责唐群英者；一诋《长沙日报》者。责唐群英者，谓广告系营业性质，报馆不负责任，况该馆已允更正，即为格外通融，又从而捣毁之，野蛮极矣；诋《长沙日报》者，谓广告既有唐群英之名，应得唐群英之允许，或信札图章以征信，况郑之疯狂，尽人皆知，该馆不应听其污蔑女界，且该报告白，皆用四号字，独此条告白用二号字，显系有意污蔑。大概为是说者，以该馆不应以公款办政党机关报，且平日趾高气扬，不与各报相联络，以致结怨于人，故有此种言论云。

然唐群英与郑师道确在北京订有结婚条约，于辛亥岁十二月四日，合欢于天津日本白屋旅馆。旋因两人遇于汉口，大相龃龉。唐遂另有他约，此次郑至长沙，屡次谒唐，皆拒绝未见。郑氏情急，故托《长沙日报》为登广告，意谓一经宣布，则唐必无可推诿，而结婚之约，自不难继续有效也。乃唐一见广告，即迁怒《长沙日报》，致有肆行捣毁之事，盖亦不过欲借此以掩饰其丑行，而预为与他人结婚之地步耳。旋又遍发传单，谓郑为无赖而郑殊无怒容且四处为唐说项，并谓唐之捣毁《长沙日报》，实系酒醉误事，又告人云：“余与唐结婚之证据甚多。”因于皮包内取出唐之亲笔书信及诗词等类，不下数十起，语极秽褻，不堪入目。说者谓唐之不敢与郑提起诉讼者，职是之故，又谓郑与唐结婚之事如不遂，则郑将以唐之各种证据，呈诸法庭，届时丑声四播，必较现时为尤甚。而《长沙日报》总理文斐又遍发歌谣，直指为奸夫淫妇。故女界开全体大会时，唐群英直言此事将以三手枪了之，盖一以对付郑师道，一以对付文斐，一则将以自击。其必先击郑者，盖恐将来证据发现，益将无以自解，故欲先杀之以为灭口计耳。吁可畏哉！

又一说云：唐群英在京，颇利用郑师道为记室，因是往来至为密切。每至通宵达旦，与郑同室。郑因求唐订婚约，唐允之。据郑自言曾经请客多人在座证实，事在北京便宜坊。已而唐招郑至天津日本白屋旅馆，一住数宵，双宿双飞，俨然夫妇。此元年十二月四日事，而郑师道即认为婚姻成立之始，特未得唐之母与兄承认耳。初

唐在湘省，曾骗取湘督万金，仅出《亚东丛报》一期。此次唐之回湘，一为再索款项，二为备办与郑结婚事，方出京时，郑欲同行，唐不可，约以待电。及唐至汉，一再电京招郑至湘，匿之小西门外金台旅馆。唐自居城内，以母与兄之监督也。乃日午坐轿往郑处，日昃乃还，此中妙蕴，盖不可殚究矣。唐之招郑来也，同时并招其女友张汉英自南京回湘，以为母与兄虽严得张之解说，则婚事必成无疑。无如张行甚迟，至湘时，事已决裂矣。先是郑同寓诸客，颇穷究其事，郑谓系夫妇，而客皆嗤之。郑赧甚，促婚益急。一日，郑以庚帖诣唐宅，求见唐之兄，适兄送客出，接置案头，几忘之。郑去，始启帖，大怒，呼群英痛责，且欲自缢。唐母年七旬，亦欲寻死。唐见事变，力辩其诬，且捏称郑为疯子。然母与兄之怒犹未息也，唐既受此大挫，乃令张汉英诣郑所送白金二十元，嘱其回京稍待，不必太急。郑疑其中变，乃将与唐在京津成婚及来湘一切，拟成广告，送往《长沙日报》登载，以为唐欲赖婚，则将藉此起诉而证明之，而不图唐之迁怒报馆也。唐见广告，益无以自解于母与兄，又惧益宣其秘密，遂有凶毁《长沙日报》馆之事。

地方检察厅举行第二次豫审时，唐群英仍托病未到，请丁云龙为代理人。郑师道被唐群英呈控都督府，飭军警拿办已先行逃避，亦未到案。丁云龙所诉之要旨，一则唐群英只毁二版，推翻字架一架；一则广告中既连署唐名，何以不问而径登；一则谓该报馆系公费所办，何以不告知都督对付，而竟直接起诉；一则谓打报馆时，只有周恩绶廖根云唐群英三人，并无三十余人；一则谓赔偿损失一节，誓不承认。其最重要之事，则前十八日之豫讯，文斐不应在庭詈郑唐为奸夫淫妇，所提数事，俱经厅长一一辩驳，并由《长沙日报》告白经理人文敞及印刷人唐绶证明。文斐亦极力驳诘，丁乃无辞以对，惟奸夫淫妇四字，《湖南公报》已经登载，文斐知此语本可授人口实，坚称当日并无是言。厅长遂谓此系另一问题，不在唐群英捣毁报馆范围之内。审讯至两点钟之久，厅长乃宣告此事决定认为诉讼成立，将来开庭审讯，唐群英、张汉英为案中重要人，须亲行到案，否则当照法律作为缺席裁判，遂宣告闭庭。厅长之所以如此主持者，以湘省女界，近日势力异常澎湃。唐群英、张汉英、周恩绶辈遇事干涉，肆行无忌，不挫其锋，殆有不可收拾之势。此次之事，唐群英本为无理取闹，故欲乘此以惩创之，并语人云：“吾愿以百五十元一月之厅长，与唐群英一战。”其痛恨唐氏，亦可见矣。不日《湖南公报》登出文斐请更正奸夫淫妇四字之广告，盖深恐唐氏自知理屈，不能致胜，将借此四字，以寻文斐之隙，故先以一更正了之也。

唐群英不自愧悔，反听信湘中恶少及周恩绶廖根云丁步兰等之教唆，捏用女界全体名色，遍发传单，开会对付。乃湘中各女校，如第一师范周南衡粹作德广育等俱以唐群英辱人贱行，耻与为伍，外间并有将唐劣迹，印刷宣布者，郑师道又将其与群英结合之事实，逢人说项。唐乃大窘，几无自全之术，至郑师道则已于抵岳州后，遍发书函，致长沙之相知者，略谓自家人变卦，愧愤交集。日昨英妻下令使张蕙姊等将来请谒，既闻渠有欲弟暂避，仍许结婚，否则挑战之说，弟恐扰害社会治安。故作三舍之让，最不可解者，行政机关皆畏其锋，无敢过问，是以请由商埠警士护

避，乘太古商船萍发下驶之便为趋吉地步。故匆匆首涂，未克走别，殊深怏然。临上船时，英妻留有话言，约次午十一打钟会晤。其辞婉而有味，奈光阴不再，始决此行。此时万分焦闷，如坐黑暗云云。又其致谭督一函，尤饶趣味，函云：“组庵先生有道，觐面长沙，情深湘水，不意满庭佳话，几酿悲观。杰妻唐群英素深韬略，惯作风云，公竟畏其狮威，被逼批呈，不惜人言，枉屈同志，曷胜嗤拂，若为知己泄怒。总须双方回护，不应只顾一面，逢长其愆，致添日月之食，或谓风流笑史。虽羊杜亦不过诗酒弹棋，宋闻借他人妇。故屈其夫，作为消遣，或君羡慕伊人，弟不妨拱以相让，忝为同志，抑又何妨。如以彼一时郁怒，信口栽诬，岂非弟为奸夫。彼为荡妇，吾党至性儿女，岂甘蹈此？道德之谓何人兽关头又何在，其思之，其再思之。我将去矣！军事、行政、司法、社会、治安，望好维持。一方之幸，即一国之福也。此请伟安，郑师道顿首，汉元先生希致意为我调停。两全其美。”

此案出后有人作《竹枝词》二章，其词如下：

结婚何事太荒唐，海誓山盟枉一场。省识销魂滋味苦，从今怕过便宜坊（唐与郑凭族友订盟于北京便宜坊）。

天津倭馆认双栖，珍重还将密约题。留得鸳鸯红印在，任他化水与沾泥（元年十二月四日唐招郑同宿天津日本白屋旅馆，郑至今携有唐盖印婚约，不虞反悔也）。

又有人为新诗经，题曰《将郑子兮三章》，序曰：将郑子者，唐群英赠郑师道作也。一曰淫奔者语其所私之辞。其文如下：

将郑子兮，无逾我婚，无逼我早成，岂敢悔之。畏我老兄，郑可怀也。老兄之言，亦可畏也（言唐招郑来湘，郑急求重行结婚式，唐之兄欲自缢也）。

将郑子兮，无丢我耻，无登我报纸。岂敢悔之，畏我寡母，郑可怀也。寡母之言，亦可畏也（言唐之母亦欲寻死也）。

将郑子兮，无言我盐，无露我姻缘。岂敢悔之，畏报之多言，郑可怀也。报之多言，亦可畏也（言唐嘱郑勿扬于外也）。

唐群英结婚事发生后，王昌国女士因京沪各报载彼与谭人凤结婚事，大为愤怒，乃遍登广告，谓与谭人凤并无关系，并四处告人云：“余誓抱柏舟主义，决不再醮。”盖王本为寡妇，“柏舟”二字义固有取。乃唐群英亦告人云：“余亦抱柏舟主义。”闻者为之捧腹。于是湘中女界，以为“柏舟”二字为最近之新名词，竞相率以为口头禅语，一时传为笑柄者，到处皆是。近日好事者，有男道（郑师道）女昌（王昌国）、“柏舟主义”之新笑谈，流传各处，以为酒后茶余之谈助。

郑师道此次出省，并非由谭都督一纸公文，乃系唐群英喉令张汉英持手枪亲至金台旅馆郑师道寓所，迫令立刻出省，否则即以手枪相对。郑请俟检点行装，明晨即行。张不许，坐逼即行。郑乃匆匆搭萍发小轮赴岳州。张直候轮船已开，始返唐处报告。盖郑去则证人与证据悉皆消灭，此案自可和平了结。郑抵岳州后，即函寄唐群英，有云：“我最亲爱之妻唐女士，汝不过因醉后暴动，我二人两方面爱情，决不因此而稍减也。”

省城女界此时发现一种《女权日报》，并无机器，系附在新湘印刷公司代印。每日仅出两百份，专为唐群英个人之机关。一般恶少，趋之若鹜，其附张内故意刺取不雅驯之文字，以悦人目，如女子生殖器之字样。一日凡五见，至令人不堪卒读，其所以如此者，纯欲借此以利用男界，使男子对此一喜一惧，而赞成女子参政权者必多，否则必横遭谩骂也。湘省报界联合会，皆不公认为报章，但目之为风流印刷物云。

唐群英既以误用“柏舟”故事，贻笑于人，乃改称永抱独立主义。而郑师道一面，则恐人疑婚姻之不实，故郑在湘时，屡言及唐之阴私，并呈出唐氏种种确据，意欲付诸石印，以供众览。唐闻之愤甚，故以手枪逼令他去。更有欲枪击《长沙日报》总理文斐之说，《长沙日报》恐唐再赴该馆引凶，特请军事厅派兵弹压，《长沙日报》控案，经地方审判厅两次预审，认为诉讼成立。至唐郑有无婚姻关系，不在此案范围内也。

◎女剧界唯一之人物

民国四年，北京天气严寒。无业人民，冻馁相望。政界诸大老，如朱总长汪参政及京兆尹吴总监诸公，提倡恢复北京各处粥厂，藉苏穷黎，所惜经费无多，绅商各界均欲募捐以继其后。然终少大宗收入，不克展厥宏愿，诂意散花天女，大发慈悲，欲以舞榭之缠头，作杨枝之遍洒。如刘喜奎者，固今日女剧界唯一之人物，乃有此热心毅力之举动，嗷嗷哀鸿，当亦对女菩萨而倾心膜拜矣。兹将其致京中各报馆乞代宣布之函，录之如左：

伶人自年前到京，在三庆园登台，至今不足两月，实蒙各界欢迎，伶人感谢之至，刻因几日无戏，周天阅报，见有设立粥厂一举，伶人惜之，偌大京城首都，仍有众多贫民，愁思叹惜。今伶人捐发热心，劝募同伴，并前后台老板商定，自阴历正月起，每月可尽粥厂义务三天。此三天内，除实在用费开销，下余之钱，全数助捐。为此上陈贵报，美言赞助，速登栏内声明。一面通知京师各粥厂青白绅董，来园面商手续。刘喜奎鞠躬。

◎奇奇怪怪之纸人

北京天坛夹道，忽发现一纸糊妇女，细研究之，确为一种之玩物，由京师警察厅通函云：本月十四日，永定门外发见一纸糊妇女，身高约有五尺，向城内东北腾空飞来，及至天坛夹道，突然坠落于地，查此事甚属离奇，恐有讹传，当经分飭区队派员切实调查。兹据复称，查得该纸人确系一种玩物。制造方法，系用细铁丝与竹板扎成，一类似人之骨格，再加以肚腹及头脑，糊以蜡纸，取其质轻不透空气，暂不封口，再用颜色指画四肢。男女随便，将头或腹内细铁丝上所扎之蜡烛或油制棉花燃点后，即用蜡纸糊封其口。俟内部火气充满，复用针在已点着蜡纸外皮上刺一小孔，气随孔出，即能飞腾空中，随风飘荡。何时火气息尽，即渐渐落下，迨及地时，火烬无存，即有亦不多。惟大风时，不能施放。当时该纸人坠落东后街地方，被人检拾烧毁，并未看见有何危险物质等情。并据该巷住户孟玉珍言，前在俄使署佣工，曾听外国人言有此玩物等语，具复到厅，查该纸人确系一种玩物，并无研究之价值。惟内贮火物，外糊蜡纸，万一落地时余烬未泯，接触引火之物，危险堪虞。除飭各区队随时禁止施放外，诚恐传闻失实，以讹传讹，转滋附会。用特通知各报馆登载，以释群疑。

◎法政学生之奇呈

江西新建县有法政毕业生胡大谦，请祀雷神，将原呈及批示录下：

法政毕业生胡大谦，为昔讹今正，呈请鉴核立案，布告颁行事。聪明正直为神，岂灵爽无所式凭乎？即迅雷风烈，鲁论特志。素王犹崇敬畏，况下此士庶敢存褻渎耶？此雷神所以自古及今省城乡镇，莫不坛庙祀之也。书遭秦焚，亥豕鱼鲁颇多，《雷经》秦不敢焚，焚则雷乃发声，故天有显道，惟雷神最着，显报无论矣。但不识夫妇之诚字，乃谐字之讹。坊间以讹传讹，相沿日久，若不更正，恳请鉴定布告颁行，不足扶风易俗，以昭诚敬，而臻祀礼，畀文明之进步也。生诵《雷经》多年，惟愿国泰民安，时和岁稔，心始慰矣。兹奉大总统令，上下各有祀典等因，特与一二同胞，再三析疑。今以诚讹正谐，犹不敢冒昧厘订，聊抒管见，不知刍言可采否？为此上呈台前，鉴核立案。布告颁行，磨玷白圭，琢成完璧，昌文明以期进化，全祀典而倍庄严，深为德便。

县知事批云：尔为法政毕业生，不闻摧灭司法之霹雳，而惟雷神之灵爽是言。尔既畏雷，着即掩耳避匿，终身勿与闻国家之政治法律可也。否则国家今日之雷霆正多，恐并尔所持诵之《雷经》，亦将焚却矣。慎之毋忽！

◎异想天开之掘金谈

京师有某甲者，称驻京英国使馆地点，向为某亲王府第。某甲曾瘞白镪二十四万两于地下，窖藏深固。今其地皮为使馆所占据，其地下窖藏，尚完全为其所有权，要求英使许其在使馆中指定地点，自行掘出。英使以其言近荒唐，断不能即行允准，刻转饬警察厅派警士偕同某甲赴使馆指定地点，必令指出证据，方准发掘云。

◎江西之斯巴达

江西械斗之风，以赣南之赣州、南安宁都及赣北之饶州、南康各属为最盛。值此鼎新之时，尊重人道，此种恶习，万不可不剔除之。凡械斗之原因，初不过鼠牙雀角之争，无如官多漠视，民隐壅蔽。诉讼一起，往往断结无期，而人民恒性，以为与其屈抑难堪，不若寻殴为快。衅端既开，则死者流血被野，掳者惨毒备极。每一次之斗死伤恒数十百人，而仇讎相寻尚未有艾其结仇最深。战局最烈者，尤以赣北乐平之南东乡王叶两姓为着。故其尚勇之风，亦颇不减于当日之斯巴达。此篇即专述乐平械斗之状况。

王叶两姓之械斗，由来已久。其仇已不止九世，几如不共戴天，祸机永伏，一触即发，往往不数年即有一次大血战。斗局既成，虽侨居他邑之人，亦皆黑夜驰归赴战。余尝问之乐人：“既不在家，何必强与危险？”则咸谓：“祖若父为某次阵亡，或谓兄若弟为某次死难，今日斗局已成，是吾报仇机会，安肯失之耶？”其敌忾之壮，可想见矣。

王叶两姓仇讎既深，已无联姻之事，其习尚亦颇注重勇武。观其学习拳术，锻炼青年，从不稍忽。遇有诞子之家，族人皆以该户得添一刀之语为最上贺词。盖男子满十五岁，即有荷戈之义务，该户即当添置一刀，甚至有釭铁以为贺仪者。苟欲调查该处人口，入门而数其刀，即可得最确之数。以衅端之开，从无一定，即无一日不在戒严之中，不得不时时戒备之。

军器除刀矛外，亦有旧式大炮，以备抵御冲锋。每次临阵，必有一二舍身劫炮之人，于两军相近之时，冲入敌阵，以移动其射击之方向。该阵陡失抵御之力，而冲锋掩至，安得不败耶？故其战时，往往借一二之生命，以制全胜也。得胜之后，对于败北者，不徒待之如俘虏，尤必袭入该村，杀其妇孺，毁其庐舍，填塞其井，铲尽其苗。偶或败北，则全村为墟，故械斗之先，非将妇孺子女及动产预迁邻村不可，其惨无人理，可谓极矣。

战斗终局，县官例应下乡检验，勒交真凶。村人则待判定论抵几人，乃至祠中招人替罪，替罪人之抚恤，例定三百元。村中无业之人，无不争先投报，往往限于定额，不克遂愿。而扼腕不置者，盖该乡勇武既相习成风，自然轻视生命，谓慷慨替死荣名也。三百元之抚恤，厚利也。泰山坎，鸿毛坎，彼固自有轩輊矣。

历来战斗，往往王胜叶败，而乡音读王如羊，以叶为植物之叶。羊当以叶为食，故叶恒不能胜王，不知王姓实处最险之地。王村周围，除叶姓人，其他各姓，亦多与王不睦。王姓适居各村之中央，一朝失败，势必楚歌四面，适成众矢之的。不如叶姓地处边陲，事后尚可行动自由，不假他村为门户，又可徐图恢复。故王姓实以必败之势，作沉舟之计。胜败之机，安得谓非天择耶？

对于阵亡之人，除享有家祠之祀外，尤必谋取各人战时血衣书记名号及死亡之时日，藏之祠中，俟其遗族或子若孙稍长，于伏腊之际指示之，并说明其致死之惨状，以鼓励其报仇之心，故其杀敌之思想，已养之有素，自然一发不能遏抑也。

自光绪三十年间一战之后，叶村被毁，至今犹结茅为居，元气大伤，已失反动之能力，故王姓至今亦未能一逞其凶锋。年内忽遇风灾，叶姓茅屋，多被吹坍，触景伤情，痛定思痛，恨不能背城一雪之。王姓又因大雨屋漏，军器战衣，均已潮湿，取曝于晒场。斯时适有徐姓，因窃斫王柴，被获二人，徐乃间谍于叶，谓王姓战器，均已排出，以从来战争，从未休歇如此其久，故急欲一试之。叶正以倒屋之痛恨未雪，战志遂决，幸为县知事所知，即行邀集各乡正绅驰赴两姓再四开导，一面电请军队来乡弹压，始克和平了结。否则一场恶战，又不知死亡几许矣。

◎妒杀趣闻

江苏兴化县东乡丁家庄，有某甲者，农人子也。邻有少女，颇具姿首。甲艳之，相与目成，渐通情好，卿卿我我，互以白首为期。两姓高堂，莫喻其旨。二人又赧于自达，然以两心倾许之故，背人私誓，宁死勿渝，如是者非一日矣。近甲为母命所逼，婚于他姓，虽知邻女不可负，而亲命难违，姑曲徇之。受室以来，伉俪甚得。邻女乃大疏，女爱极生愤，使人传语于甲，谓苟得最后一面，罄此衷曲，虽死无憾。甲悯其诚，乘间诣女室。女昵与语，缠绵如故。甲乃大惑，更乞为欢。女亦弗拒，方登阳台，女忽乘甲不意，从枕旁潜出快剪，向甲胯下猛割。甲方觉痛而势已落，乃知为女所赚，负痛奔归，仆卧榻上。妻见其状，大惊，趋问所苦。甲乃泣曰：“邻女杀我，汝必为我复仇。”妻不解所谓。甲解裆示之，血满衣裤，妻乃大骇而呼。甲母闻之，疑子与新妇反目，亟趋视之。甲已急不能语，妇亦呐呐不出口，但指甲下体以示姑。姑意其子为妇所害，遽反身入庖厨，觅得厨刀，向妇猛斫。妇方欲辩，而颈间已受重创，俄而喉断气绝。两尸横陈于室，血迹濡染殆遍。母亦不知所措，出告邻舍，谓妇杀吾子，吾已手刃妇矣。邻舍骇绝，群来探视，金谓新妇柔顺，何遽凶暴至此？方啧啧疑诧间，而邻女挺身至，排众入室，径告甲母曰：“杀汝子者我也，奈何殃及新妇？我本办一死而为此，故来自首，请即捉我官里去。”众闻女言，骇怪莫知所云。然女终留弗去。众意稍定，乃劝甲母縶女诣官，母从之，立逮女至县城，投请法庭讯鞫。女直认不讳。甲母以误会而杀其妇，亦于庭中慷慨自承。审讯之日，观者甚众，咸谓此女风貌佳绝，固不类农家产，亦不似能操刀杀人者。床头一剪之威，非恋爱之魔力不至此，爱极而愤，愤极而杀。佛氏之所谓冤孽者，即此类欤。

◎当年雄风何在

北京某旗人夫妇二人，有子女三人，生计极艰，时常断炊。童子无知，日夜啼哭，父母不能耐，遂萌短见。向肆中售得毒药，先受幼子幼女食，食顷果中毒死，复与长子食，子见弟妹已死，泣告曰：“儿已勿饥，不愿服。”父母不许，强灌之，不久亦死。于是夫妇二人乃双悬梁自尽。一家五口俱死非命，事极可惨。吾以是知满清入关之初厚待旗人者，正所以害旗人也，不然何至于斯？

◎岳父之重婚罪

某邑某甲之女，初嫁于乙，旋再嫁于丙。乙控于审判厅，推事竟判甲以重婚罪，已呈报大理院。现为总检察厅所发觉，以该推事不解法文，妄事判决，玷辱司法，莫此为甚。若不平反，何以服人心？已向大理院提起非常上诉矣。

◎木偶结缡记

浦东高桥乡董孙某，世居王间桥宅之西，左近有土地庙。相传其夫人因赌，输于镇东之土地神。去春有边家宅徐姓女，因病身故。地保朱某者，向为孙佣，偶患病失音，服药无效，因召巫求祷。该巫诳说须为土地神聘娶徐女为妻，其病可愈。朱以告孙，孙遂嘱朱使巫致意该女父母，诳称夜梦神告，请伊玉成其事。女父母初则正言拒却，继闻孙一片热诚，却之恐遭孙憾，勉为允从。孙首送贺仪二十元为倡，附近愚民相继送贺，且为土地神装饰，卧房床帐，焕然一新，杀猪宰羊，掌灯结彩，行亲迎之礼，人山人海，途为之塞。噫！异矣。

◎冷飞天之杀身祸

汉口燕喜戏园武小生冷武，亦名冷飞天，技艺颇佳，其力能敌数人。因某侦探带湖北征兵多名入园观剧，不给戏资，且争坐撕打，殴伤园丁。冷愤怒不服，卸装与斗，各兵多被击伤而去，并有一名因伤重，越日毙命。冷惧潜逃，嗣因案已隐消，复至汉卖艺，忽被军警捕去，指为党人，抄搜其宅，并无所获。经陆军审判处审讯，竟判死罪，呈奉都督指令。以冷在汉恃强，屡行不法，着押解渡汉处决，遂在汉口后城马路行刑，观者极为拥挤。冷时犹着狐裘，昏昏如醉，其妻妾皆临场痛哭。霎时钢刀一举，头已落地，妻妾争抱而哭。从此汉调班中少一名角矣。

◎惊绝梅兰芳

张上将军之入都，江西同乡在顺治门外大街新建筑之江西会馆演剧欢迎。张顾而乐之，酒半，亲至后台觅梅兰芳等名伶闲话，且看化妆。谈次，出纸烟欲吸，而未带火柴。王蕙芳从身旁摸出一物，豁然一声，而火发荧荧。张之侍从，拔刀猛斫，蕙芳倒地，惊定大哭，盖误会也。

◎割乳奇案

北京内左四区某巡警，拾得割下妇人大乳，血色甚鲜。警厅以为奇案，通飭各区一体严查。后悉此案真相，系手帕胡同内小药王庙地方住户王木匠（深州人）之妻，与其徒有染。王木匠颇爱其徒，佯为不知者已久。未几其妻又与隔壁铁匠店某掌柜姘识，王木匠以该妇逢人便姘，将来醋海风波，必闹大事，不如先发制人，遂将徒弟唤往秘密之处，明言：“你与师母情形，我已全然知道，你如不将直言相告，即要你的命。”其徒骇甚，跪地求饶。王木匠云：“你能将师母乳割下，我便饶你。”其徒应允，旋即直入师母房，出其不意，将一乳割去，抛弃门外而去。该妇痛极，不久毙命。迨王木匠回家，知系其徒所为，即随便收殮了事。现因警厅切实调查此案，王木匠只得向警厅据实陈明，并云其徒已往他处，请从宽免究。惟该妇人之母家，仍请严拿凶犯耳。

◎风雨话金陵

秦淮妓女，当年繁盛时，至多不满三百人，近来已有五百七八十人。从前多属扬妓，间有苏帮。近来则大多数为本地人，下关妓女最多时百数十人，近来亦满四百人。其情形与秦淮同，向来妓女以歌曲擅长，近则以曾在女校肄业稍有程度者为占优胜。现在下关英商和记洋行鸡鹑鸭厂招收女工四百人，城内利柞民绸工厂招收女工五百人。说者谓已入火坑之妓女，虽未必尽能将其拔出，而未入火坑者，未始不可博取工资，聊作糊口之计。今日土着新妓女，皆宁乱后迫于饥寒之所致，偶入花丛一询家世，有不忍闻者。

都督府府门前，禁止行人车马，民政府则严查出入。下关车站，由警厅特分设男女检查所，各城门则稽查搜检。在官府为保卫商民起见，而作此严密防备之举市面，因此影响愈形冷落。据南京日行报纸所载，下关检查所于旅客行囊中检得临时政府之伟人现已为党人者之像片，因即拘其有此像片之人。又西门某妇购猪肉，向人曾作有钱不如食肉，未知时事如何之语，而遂为警察拘执。又造币厂工人，因放工午膳，闻上工汽笛声，急行入厂，途中为警察干涉，以其趋行于市，有惑人心。此外有因见枪毙乱党而谓从前曾识此人致为拘捕者，有住房从前曾租与宁乱前党人住宅致被嫌疑者。沪宁火车往来旅客中，妇女经女检查所之官媒婆满身摸索，流氓从旁调笑者不一而足。人民日处危疑之境，无不痛恨造谣者，致良民无安居乐业之一日。

自创办公典以来，逐日典质之人，不下数千。其中以能质钱一角之衣物为多，能质一元以上之户，百不得一。现因拥挤不开，特另分设数柜，并另择地开分典。无日无时，无人满之患。一贷济处仅有资本四万元，哀求借款者，不下万人。上次赈抚局借出之款，现届还期，无从追款。社会生计艰苦，已达极点。街市中之人力车夫，逐逐途人，强求乘坐，小本贸易者，提篮兜揽生意，寓一种依恋恳切之情，于急迫之中。当年繁盛街市，今则行人寥落，无复有毂击肩摩之象。商店无本进货，应有货物，多不齐备，咸具有尽卖底货之景况。高大屋宇，多已锁闭。军府各级军官警察厅全体警官巡士，初来自北省，眷属均未南迁。省公署自省长、司长、科长以至各项人员，俱未移家南京，而宁人中之巨绅富户，迁出他埠，仍未来归，以至华屋皆空，市面冷落。元气既伤，商业难复，加以匪徒煽惑，军警戒严，风声鹤唳，尤于谋生计之贫民加增困难。阴历新年时，忽然增设髦儿戏电影戏书寓茶园多家，不一月，全行闭歇，只剩庆乐一家。该园虽演戏如故，逐日收入不敷开销，支持匪易。酒馆生意甚旺，盖军警政界人员，家不在宁者多，是以假酒馆以作宦游之酬应。茶馆座亦常满，因赋闲人多，家居岑寂，致征逐于茶寮，亦无聊已极。旅馆亦甚兴旺，惟一阅其住客日簿，无非政界人物，见都督者，见省长者，见某厅某局某所长者，或图事，或访友，比比皆是。而欲求一行商坐贾为贸易而来者，竟不可得。惟有一事为宁乱前所未见，每日下午三时后，沪报入城，各分馆门前蜂聚数百人，途为之塞，皆贩卖报纸者。一经夺得报纸到手，狂奔于市，高呼当日某报，以图争

先出售，而博取余利，以资贍养。不但白叟黄童恃此为生活，且有妇人焉。查询分馆，每日贩报者，合计在三百人以上。以一家三口计之，则南京一隅借以养活者，不下千人也。以上所述，皆二次革命后南京状况。

◎毛丫头殒命记

苏垣盘门外苏经丝厂，剥茧女工孔氏，有螟蛉女名毛丫头者，在车间打盆。毛丫头素性贪懒，时常不肯上工。故孔氏平日素不满意，时加殴打，逼令到厂。一日，毛丫头又不肯做工，三次下楼，被其母孔氏殴打三次，并拖其上工。岂知毛丫头素来身体薄弱，内部本已成病，今又被母殴打数次，天气又正酷热，致上楼后，忽发痧症，热闭神昏。管车人叶姓见之，即时唤同其母多方施治。毛丫头虽渐苏醒，而尚不能行动。孔氏见此情形，顿生异念，不肯将毛丫头领回，希图讹为叶殴所致，其痧症则指为重伤，借端吵闹，当即报警局将毛丫头送至阊门回春医院医治。警局因该家属吵扰不已，当即转移吴县知事，判将叶姓管押，听候查明核办。乃该家属又将毛丫头抬至丝厂，当由二区巡官派警勒令抬回家中，由叶姓管车家属请成西医诊治，又请回春医院顾许各医士逐日诊治。无如毛丫头发痧后，又复误食冰水，至热入心胞，难以透出，虽多方医治，终难见效，竟以身死。其母孔氏，强横异常，到厂不问情由，将厂中厅上陈设桌椅等物，捣毁不少。当由巡警劝阻，旋报经吴县知事派司法官翟君莅验，由检验吏验毕喝报，委系发痧，热入心胞身死，尸属人等坚执有伤，要求复验。人多声杂，势甚汹汹，翟司法官当场开导一番而散。

◎天然戏

北京提倡内国公债会，特约通俗教育会诸君，在前门外东珠市口三里河织云公所开演内国公债天然戏。志之于下：

（一）会场之盛况 会场一切陈设布置，均经先期逐细设备。午间十二时以前，来宾到场者，已甚为踊跃，络绎不绝。开幕后，来者益众，会场至不能容，约计二千人之谱。各界重要人物，到者甚伙，不胜列举，并有西洋男女来宾各数人。戏台上所悬之幕（系《京津时报》《民视报》《国华报》《黄钟日报》四社所赠），绘画工致，大书特书“通俗教育会天然戏开幕”、“民国三年内国公债纪念”等字样。男宾席设于楼下，女宾席设于楼上。来宾到会由招待员分别招待，男招待员佩蓝花，女招待员佩红花，以为标识。沿楼栏杆之下，除揭示此戏各幕标题外，并悬挂内国公债票（罩于玻璃镜内）。每种数张，以唤起众人之注意，并分赠来宾以此戏说明书，人手一册，以资考镜。演戏时，每一幕毕，辄奏军乐，甚为铿锵悦耳（此项军乐系步军统领衙门军乐队到场担任）。此戏将演毕时，并先用镁光摄一影云。

（二）开幕之报告 将开幕时，先奏乐歌，继由提倡内国公债会代表康君登台报告演戏之主要旨趣，曰：“今日本会约议北京通俗教育会诸君演内国公债天然戏。此种戏剧，在东西各国，最为流行，实为开通社会唯一之利器。比较演说会及其他方法，皆易于感动。此次提倡内国公债，承通俗教育会诸君，不惜牺牲色相，排演此剧，劝导社会，使尽人皆知内债之利，以期踊跃乐输。不独此次发行一千六百万元之内债，可望指日告成，即将来国家亦可有脱离借债生活之一日，故此种天然戏之作用，虽在开通社会，而其影响所及国家前途，亦蒙其福。况演戏诸君，皆北京教育界知名之士，效生公之说法，冀顽石之点头。吾辈来观此剧，须知此剧之特色。今当开幕以前，鄙人先为诸君一言。第一须知此剧之精神，在一方面唤醒人民之爱国心，一方面更引起人民之储蓄心，使普通社会，皆知内债一事，不但有利于国家，抑且有利于个人；第二须知此种戏剧，与寻常新戏旧戏皆大不相同，乃社会上一种公共之教师。吾辈今日来此，谓之为观剧亦可，谓之为听讲，亦无不可，万不可以寻常戏曲等观也。今日开演此剧，因限于地势，人数不能太多，故预备之入场券，于数日以前，即行分散殆尽。各界诸君，未能领到入场券者，实繁有徒，本会十分抱歉。尚拟约请通俗教育会诸君，订期择一宽阔之地，续演一次，临时再行布告。今日男女来宾到会者甚多，其热心亦至可感佩。本应将本会进行事件略为报告，因时间不早，天然戏已将开幕，故不多赘。”康君报告毕，由刘葆初君演说。其大意系借北京社会上之朋友会以喻内国公债，发挥亦甚为透澈，情辩滔滔，闻者动容。刘君演说藏事，此人人注意之内国公债天然戏，于是开幕矣。

（三）此戏之特色 天然戏感人于微，入人最深，实为社会教育一重要部份，为效甚大。通俗教育会诸君，热心内债，应提倡内国公债会之请，而组织此内国公债天然戏，惨淡经营，煞费苦心，尤非寻常天然戏可比。前次在庆升茶园试演时，已声誉

藉甚，脍炙人口，兹复经一星期之加意研究，精益求精，实属已臻尽美尽善之地步。演来一幕有一幕之精神，一幕有一幕之特色，其优点甚多，非简单数语所能尽综之。绘声绘影、惟妙惟肖八字，登场诸君洵可当之无愧。戏中凡指陈劝导处，皆曲折详尽，深切着明，其讽刺处，则言者无罪，闻者足戒，可以发人深省，使恍然于是非利害之辨；至于戏中之穿插点缀，亦属聚精会神，一丝不苟。每遇重要关目，来宾席上辄掌声四起，有如雷鸣。演至第八幕（湖广会馆大开演说会）时，除幕中人物外，特请大演说家于子贞君登场演说，以殷勤诚恳之容，发痛快淋漓之词，闻者均极感动。第十幕（国民争购公债票）将终时，台上人群起高呼万岁，台下人亦群起和之，诚盛况也。十幕演毕，各来宾赞叹之声，不绝于耳云。

◎****谋财

去年苏垣阊门外吊桥东慎源小钱庄，有****谋财事。警厅将置药菜中之烧饭司刘贵，及通同买药之张淦泉、王小和尚、小黑子、周学海五人一起拿获，后又续获前充吴县差役陶骏之子陶土福及小胡小耿等。刘王周三犯，皆供认同谋，用药迷人希图窃盗财物不讳。询以究用何药，是何药名，王小和尚供称，药名盐松苦利（译音），系从上海西药房买来，食之令人昏迷，以萝卜汁解之即愈，并闻可以戒烟等语。质诸张淦泉，据云，前曾在侦探队充当探长，因与慎源店主朱松筠一向认识，该饭司确由其保荐进店，至彼等****一事，实不知情。经问官驳诘再三，一味狡赖不承。孙警厅长以此事关系重大，乃将各供录详殷道尹核办。闻刘王等均须重办，惟张淦泉可望宽免。金阊市民公社及慎源附近各邻店，以此风断不可长，特联名具呈警厅请予严办，以儆效尤而保治安。并闻该店各伙友初醒时，四肢均疲弱乏力，无异大病方愈。经店主延医调养数天，方始全痊。其****之味甚苦，该饭司初置于他菜中，知不能食，后乃重置于盐齏菜炒肉丝中，多加糖酱。各伙友竟欣然大嚼，不辨苦辣，如猪八戒之吃人参果，可谓馋矣。该药据天赐庄柏医生验化，则云：“并非泰西药品，实即中国之闹杨花等数味合成。故幸而有救，否则虽不死，亦将癲癩终身矣。”险哉！或谓慎源钱庄，向以专贩馐边银元着，故与侦探队之张淦泉等，皆有密切关系，即其所荐饭司刘贵，亦自有故。不意刘涎其多金，变生肘腋，洵如谚所谓恶人自有恶人磨矣。

◎均是贼也

苏属各乡镇，近来时有一种江北流氓，混杂退伍兵，十百成群，专事强讨硬取，或剥伐榆树皮（无论合抱大榆树，一经剥皮即自枯萎。现四乡榆树几将断种，其剥下之皮，据云买与上海假土店，可煎熬料子），或挖掘坟墓，所到之处，骚扰异常。阊门外虎邱背后白杨湾地方，又到有形似江北难民数十人，任意掘坟伐树，无恶不为。该处乡民恨如齿骨，纠众兜拿，当被捕获流氓七人，捆解进城，送至吴县公署。诘该流氓等经此痛创，怀报复之心。越日，侦知该地乡民新偷到耕牛二十二只（虎邱背后及响港白马涧野味山一带乡民素以偷牛为业，卖与苏地之所谓宰牛公司，朋比为奸，由来已久），正在议价出售。该流氓等乃突出拦截，将各牛尽数夺回，逐一送回失主。每牛得酬洋五元。该流氓得此巨贐，遂悉以置备斧棒等物，拟与乡民乘间决斗，以雪夙忿。某晚该流氓等又在砍伐树木，众乡民闻丁丁之声，立即邀集大众追踪而往。当在野鸡墩附近（即俗名广东坟），两造会面，互相激战，血飞肉薄，喊声连天。该地为城警阊胥盘区辖境之外，适与木渎陆墓两乡警区交界之所，故无警察到场弹压。某警区误为盗警，第鸣枪遥应以示威，该流氓闻系枪声，疑有官兵到来，心乱意慌，无志恋斗，遂败北而奔，致被乡民拿住多人，即将其推入河中淹毙，复有失足自行落水溺死者。次日河内浮起尸身，竟有一二十人之多。有一浮尸，竟余至阊门普安桥河面，由地保报官相验，代为收殓。惟闻该流氓是日出斗者，共有一百四十余名，事后检点人数，只剩九十余名，究不知是否尽死，抑逃匿他处。附郭之乡，竟有如此之大激斗，不知地方官，将何以善其后哉！

◎留学界之趣闻

留东学生人品之杂，志不胜志，而其不用功之程度，乃亦愈进而愈高。东京某旅馆有某省之官费生六人，同住于一走廊。六双之拖鞋，每日殆无一刻分散。盖彼六人者，非同在乙房，即同在甲房，个人之无时间可以用功，吾人一望而知之矣。其终日所营事业，最重要不可少者如左。

某旅馆使女甚多，皆带有鬼面孔，然娇声滴滴，苟不见之，几被骗为绝世美妹也。某省之六位官费生，便亦各献其娇滴滴之北方口音，苟鬼面孔之使女而对之一笑者，则便如纶音之降，欢喜之态，几从三层楼上跳跃到地，而歪缠乃不休矣。然虽讨厌之，嘲骂之，却亦大度包容。总之使女的行为，无论如何，不以为怪，此每天大课程之一。

某省官费生知其费出于官，即出于民，于是饮食一端，必用国货以示爱国，惟皮酒每吃不过十余瓶，至多不过十余元，不妨用日本制者。大鱼大肉一到，便猜拳行令起来。北方之强，轻轻说话，已是可怕，况复狂叫大呼，外面听到，几疑打架，日日如是。因其运动活泼，身体亦颇健康，足见中国菜外国酒之补中益气也。

玩笑吃酒以外，再嫌无事，便大家关起门来，摸摸纸牌。说他是赌，又不是赌，说他不赌，同赌也有些相像。总言之，用功之结果，吃酒调情以外，自然要到纸牌儿了。

这几位大官费学生，还有一种特色，都能唱一句半的《空城计》。虽然音调不谐，然发喉之响，上海恐怕都可以听得见。戏虽不多，但精神团结。有一句半《空城计》，也就够我们受用，饱我们的耳福了。记者有一夜十二点钟以后，已睡熟了，忽闻：“我本是卧龙岗……”（下底没有了）为之猛然惊醒，然此时脑筋犹在梦境，乃自语曰：“吾其已入蜀乎？是何诸葛孔明之多也。”醒后自思，不禁大笑。吾料阅者至此，亦必作掩口葫芦矣。

如上所述如是，设有不知日人拒绝留学生之人。偶一不慎，误觅贷间，入门之后，彼贷间主者见之，望而知为留学先生，则彼必熟虑审计曰：“是中国人也，是好喧闹与污秽者也。”其较为平和者，则必答曰：“是间已贷人。”或曰：“有种种不方便处，请另觅别家。”若遇粗暴者，则怒目横眉，必受奇辱乃已，盖彼昂头大声曰：“吾家不住中国人也。”凡此皆实在情事，即如区区不才，亦曾经碰过此种钉子者，故言之亲切有味如此。似此情形，在稍有人心者，必自加兢惕，即不言顾顾国家的面子，便自己人格，亦觉高贵，乃殊不然。某日余往吾友许所居之贷间，于对面之贷间中，见其楼上有一嫩而且白之少年，穿西服，架金丝镜，梳滑倒苍蝇之头，凭栏扯胡琴，外此则为一赤膊微髯之人，尚有余不伦不类者三四人，酒肉薰天。二黄高唱，其旁之日本人家，与过路之日本人，则无不轻轻丑诮，詈为酒肉动

物。时余对此，亦觉无颜，然此凭栏少年，则非常得意，时时下视行人，其意盖藉此可以勾引妇女之抬头一盼也。吾友谓吾：“此诸人者，常常如是。吾以其有碍吾之潜修，屡呼吾间主人，令其往加干涉。主人乃言力量做不到。我又奈何？主人问吾此究何等样人，吾曰：是乃戏子，彼辈唱戏有钱，故来此作玩，汝毋错认做留学生也。吾主人亦摇头蹙额。”余闻吾友滑稽之言，乃笑不可仰。然此等人笑骂由他，彼方唱至《金沙滩》《双龙会》最得意时也，此辈先生之血，真不知到摄氏马以拉斯若干度矣。

去今未久，余一夜又过此町小巷中，时颇暗黑，顾隐约中见一贷间门首，有一妇人，似在与人争吵者，口角唧 杂，余即留心焉，至次日，乃得之其傍一中国人言矣，其人曰：“昨夜是间，乃一留学先生向夜市中引得一淫卖偕来（淫卖日本又名奔淫女，顾奔女不必要钱，此则当面论价者至日本夜市中男女引者最盛，然大率淫卖也），引者乃转介绍与其同住之人，而女殊不悦是人，既尽言不得合。是人乃私将女着之格达（即日人所着履，日人入屋皆脱履而登）藏之，逮女不合告去，觅格达不得，而是人徐言，胡须匆遽，即格达不见，明日吾购而偿汝。其言外之意，即今夜何不留宿于此。女愤然曰：“凡事亦须看人家的愿意，须知吾日本女人，非能受人强迫者，岂因近日谣传吾日本兵士在汝国山东****妇女，故汝辈乃欲在吾日本女人头上欺凌践踏，以相报复耶？”以下尚唠唠叨叨，出无数不堪入耳之言，而此男子终不还其格达。女遂赤足而去。此所以有余昨夜所见之争吵也。

以上叙留学界中少数败类之怪状，可谓秦镜禹鼎，靡形弗具，穷丑极秽，或将骇诧，斥为不经之谈，实则此等之事伙矣，即秃吾笔，犹将弗罄，尚安有余力打谎语者。余至恨其害全体，故略写之，非好为刻毒也。大抵如此类之留学生，率以习法政之自费生居多，习法政则多暇，自费则多钱也。闻最初来留学时，留学界人数既少，分子皆极纯粹，人人自爱，故名誉尚好。逮来者渐多，不名誉事亦渐萌。当时彼国报纸，遇有留学生不名誉之事件发生，尚时为登出借以鉴戒，积至今日，愈趋愈下，报纸亦不复登。盖妆之不好，与彼无涉，何登为？然至有犯其国法者，则固又在不赦之例。如去岁见报载高等师范留学生某，以赌博拘禁三月；又今春在上所言之町中，有留学生亦以赌博，拘去禁三日乃出是也。似此岂我所能臆造者乎？而谈及赌博，余在留学界，每每发现麻雀一物，或贷间，或住家，或栈舍，盖留学界中，固已有麻雀过海之谣，即上所言被禁三日之四人，亦即因是物也。呜呼！是真无可如何也已。

◎奇怪之奸案

北京内左二区马市住户张姓某甲，以经商为生计，早年娶妻某氏，貌颇美，妇德尤嘉，寄寓于马市者有年矣。里巷均无间言，伉俪之情亦笃。除妻而外别无亲属，又未雇仆役。某偶出外，托其妻于同寓（寓前进）之邱振升。邱固与张有戚谊，以医为业，因张某之妻貌美早已垂涎。自甲去后，邱尤无忌，时以言挑之，某氏佯为不知者已久，邱复以数十金，购得妆饰品相赠。某氏严词拒绝。邱愤甚，且闻甲将返京。某夕，直入某氏卧室，明言来意。某氏即恶言骂之，并呼救者屡，以僻处后院，街邻无知者。邱老羞成怒而出，某氏旋即闭门将睡。邱忽持短刀斩关直入，强迫执行。某氏以徒死无益，忍辱从命。时刀仍在邱手也。事毕邱困甚，以为某氏身已被污，必无他虞，对某氏直言商害某甲及己妻之计。某氏因故作媚态以乞舌邱曰：“妾身已属君，听君所为，惟刻已更深，君复惫极，盍将刀交妾而安睡乎？”邱如其言，而嗷呦之声、恨骂之声、刺事刃之声同时大作。邱家中人前往探视，则邱与某氏均赤身在床，邱胸腹际已成莲蓬之式。于是又杂以号哭声，为该段巡警所闻，急入查问。某氏乃徐徐穿衣，向该警等历历陈述，并云杀人是我，我即到案。呜呼！烈矣！

◎苦女儿

《字林报》载巴黎通信云，近有人以奇秘之法，输运中国女童及少妇二三百人至巴黎，其为状极形贫窶。每日城守营及巴尔铁巴街附近，辄有此类苦人，衣服褴褛，中且有纤足者数人，彳亍道旁兜售纸花玩物，其生活当全以面包冷水是赖。此曹不解法语，惟能言特沙二孟，特沙者，两枚法钱之谓也。今尚未觅得通译，询其来历，此曹必为浮荡之徒。运入博利者，殆可无疑。然以此多人涉重洋抵此，其先必需巨费，所获之利，安能抵之？此殊令人难解。中国使署各员，对于此事，其昧昧似同大众。惟警察现已从事调查，想能查明此可怜众生，究为何人运至巴黎也。犹忆一年之前，有中国幼童多人，出现于巴黎之市，散布咖啡店前，以走绳及浅近之戏法博钱糊口。其出辄为两人，一奏技，一守望警察。今于市中不常见之，盖已纷赴地底铁路及赛马场公共聚集之处奏技矣。吾人向以文明自诩，今乃有此不幸之人一群，由世界之他端流落，欧洲繁华之都，餍一无名御奴者之欲。此诚欢乐界中之惨闻，而足为文明累者也。

◎腊八粥

阴历十二月初八日，为阴历一大节，俗所谓腊八是也。在前清时代，皇室极尊重此节。雍和宫熬腊八粥，且派王公大臣监视，而大官员有拜腊八粥之赐者，又必须以清晨觐见，碰响头谢恩。凡此朝廷跪拜趋跄之节，虽为微故，亦足见一代风尚。据德菱公主所着《清宫年记》，谓腊八乃释迦牟尼行乞之日，烧粥以拯之，故曰腊八粥，而宫廷对于此事，遂亦异常注意云，则尊重腊八与端五节搏角黍以济屈大夫，同一理由也。民国成立以来，此事久已不行，惟街巷间，犹见邻坊妇孺互以腊八粥相赠，时时络绎于途耳。

◎迷信坎哀悼坎

去岁法源寺，曾开水陆道场追悼清隆裕太后及辛亥先烈，北京佛教会僧众，又发起追悼癸丑战士道场。原启节录如下：

盖闻台号悯忠，法源之道场传自古，搜宝忏，金山之遗事称于今。稽古梁唐之际，开国之时，凡忠臣义士，健儿武夫，效命疆场，有功社稷者，国家靡不飭司铎拜经礼忏，拔滞超幽。一则以酿天地之和，一则以作忠义之气。由是观之，盖佛法可以补国法之缺，而道场可以慰战场之灵，诚盛典也。遐思国家之宏仁，佛祖之大愿，泽及枯骨，光被泉台，超梦幻泡影以皆空。贯生死幽冥而不遗者，固已茂矣美矣，至矣尽矣，蔑以加矣。客岁赣浔倡乱，宁沪负隅（中略），既而湖口效顺，金陵投诚，浔阳沪上，先后归服。成都广州，次第削平。于是生还者齐奏凯歌，同受勋章奖章之荣典。阵亡者分别恤赏，亦颁年金抚金之特恩。其上以表国家褒崇忠义之意，下以动军人观感愤发之心者，固已意美法良，仁至义尽矣。住持职居方外，恩托，愧无力以捍卫社稷，实有心以崇拜英雄。伏念我佛祖位居三教，化普十方，救苦救难，无量无边。以众生普度为心，以世界大同为念，凡三乘五眼、四圣六凡、七宝八德、千因万果，靡不有愿必行，无苦不济，舍身救世，开烈士之先声。敬节表忠，亦沙门之素愿（中略）。于是发赦申文，广辟还乡之路，竖牌设位，大开方便之门。敝寺护法先生，檀越善士，或籍隶军界，或情深同胞，或属乡邻之仰望，或协周亲之戚谊。凡欲入道场同深追悼者，伏祈驾临本院，报名登记，住持当另缮芳名，别设莲座（下略）。

◎快婿变老夫

苏州有住居驳岸上之薛某，曾生一女，爱若拱璧，夫家系郑姓。初定婚约时，新郎曾由冰人带领与岳父母晤面，固翩然一美少年也。迨正式完姻日，新郎乘舆至坤宅迎娶，向岳父母登堂行礼。詎昔日之美少年忽变作半百之老年人，其发半已斑白，与前所认者，固二人也。愤怒不堪，欲与冰人交涉。新娘闻悉后，亦放声号哭，不肯上轿。斯时新郎愧疚无似，如一只木鸡，独立不动，亦无人接待。嗣由众戚友劝其父母，谓事已成就，无可奈何，只得令其上轿于归。此可谓婚事中的一趣谈矣。

◎胎产志异

广西上思县属罗乌村妇黄李氏，于阴历去年二月，丧其所天。李向无生育，仅一夫弟，年二十余，与李同居。夫弟因家贫未娶，故叔嫂之外，别无第三人同室。不意李忽于去年四五月间，肢体疲惫，形容消瘦，继复腹部骤硕，俨如孕妇，亲属见之，咸相诧异。群疑其与夫弟苟合，其与李相厚者，则暗地询其颠末。拟为之急图处置，而李坚不承认。久之疑谤益甚。稍重名节者，至不与齿，而其夫弟亦大受亲族友朋之唾骂。虽百端剖白，而陈平盗嫂之恶名，终于不能洗刷矣。惟彼叔嫂二人，自信有余，亦惟置之不理。徐观其异而已，屈指年余，未见诞生。人言亦遂稍息。一晚，李就寝之后腹骤作痛，大似临盆，急呼叔起，央请代招素相亲密之女友来。至则腹部下陷，俄顷产出蠢然一物，非人非畜，蠕蠕微动，状类老芭蕉之结实，色作绿黄。自此群疑始释，质诸各医学家，皆莫能为明确之答覆也。

◎男女混杂之修道

安徽桐城县西乡道有严姓者，年方不惑，家资颇饶，亦尚稍识文字，向来游荡成性，不事生产，惟受周某以光天道邪说蛊惑，吃斋修道，迄今数年。并引其妻其子，并及家人亲戚，一同潜修。现其妻已死，其子已亡，犹复大张旗鼓，以为道将修成，升天有日，且异想天开，谓凡人在世，难免情欲，不斩情根，不足以见修道工夫。爰是邀其侄女弟妇，并亲妹四人，赤身露体，同居一室，严某独坐席上，妇女围坐四旁，并将房门紧闭，非七日不开，以试验其情欲之果已斩除与否。此种谬举，实天理人道所不容也。

◎旧新年之厂甸热

北京有一最不可解之事，即所谓逛庙逛会是也。夫所谓庙会者，并非有特殊之风景，可以娱目骋怀，亦不过人逛人而已，即如照例旧年新正。有所谓厂甸香厂，为都中人士游观之所。今年香厂已经停止开放，所开放者，仅一厂甸。其实厂甸一处，自经优级师范学校及电话局建筑之后，其地势已不似从前之宽敞。所余者，仅土地祠前之一片空场耳。此一片空场之中，并无新奇之景物。茶桌玩物摊之外，别无所有，其可为新春点缀者。惟一般之红男绿女，此往彼来，鬓影衣香，相为辉映耳。然较之数年以前之厂甸香厂，其盛衰已不胜今昔之感矣。旧例新正，琉璃厂、火神庙最为闹热。其中陈列古玩字画甚多，所有琉璃厂各骨董店，一年之生意，全恃此十数日。其骨董摊最受欢迎外国人，每遇碧眼紫髯者，招待分外殷勤，盖商人嗜利亦所宜然。字画店则罗列满壁，尽是名家。然其中以赝鼎居多，真迹绝少，而价目则异常昂贵。照例非初十以后，各字画店不减价出售也。各肆中亦间有可珍贵之字画，大抵多系借自人家者，其索价恒逾原值数倍，使人望而却走。此外之字画摊，沿街皆是，然更无足观矣。惟土地祠中尚较胜一筹。北京社会之风尚，于此可以窥见其大凡矣。

◎北京第一舞台开幕记

第一舞台于三年开幕，即于开幕日失慎，全台尽付一炬。兹记其未炬前内容之组织与艺员之分配及开幕前之情形：

（一）剧场之形式 该舞台虽不及东西洋各新式剧场之完美，求之于北京，已为不可多觐之大剧场矣。其舞台之组织，纯取西洋转台法。所谓转台者，其台面作磨盘形，下有旋转机关，可以任意旋转，以便于布景。故曰转台。舞台以前，为池子坐位，取前低后高之法，再后则为厢楼，凡四级，其形式亦作半圆之势，无论坐于何位，均能面向舞台，此则较旧式戏园大不相同之点也。

（二）开幕之波折 第一台内幕，颇有暗潮，正风育化会之干涉及各园主之反动，均与该舞台以莫大之阻碍。当其暗潮最烈时，其经理杨小楼君，志丧心灰，已萌出世之想。小楼好禅学，时作道装，乘此旋涡未定之时，竟逃至西山碧云寺欲为僧，后因暗潮稍平，又经多人劝驾，始允回京，仍充经理云。

（三）角色之分配 据该台经理杨小楼之意见，开幕之始，暂不请鑫培等老手出演。今所聘者，白天为王又宸、龚云甫、李连仲等，夜戏则聘王凤卿、王瑶卿、路三宝等，至谭鑫培须一月后始能出演。刘鸿升本拟在该台串演，闻聘金尚未磋商就绪，故刘亦不能一时出演。杨小楼现正患病，想出台日期，亦当在半月之后也。

（四）同业之影响 自该舞台将次落成，京师原有各戏园，莫不凛凛自危。后因该台开幕有期，各园中路角色，均被该台所吸收，而各园遂大受影响，如天乐一处则路三宝、贾洪林、李连仲三健将，均入该台，所仰以为衣食之源者，惟赖梅兰芳一人。闻第一台尚有约兰芳消息，天乐园主闻之，竟造梅之邸宅，叩头哭诉，请其赐碗饭吃，如不肯留，将以性命诉之于法庭云。呜呼！梅以一青年优伶，竟有如此之伟力，使我大有儒冠误人之感。广和楼则失去刘鸿升、龚云甫、萧长华诸人。所余者惟沈华轩、朱幼芬二人。刘去后该园定一跌不起，可断言也。吉祥园则王氏弟兄一去，终亦必败而已矣。

北京近有四大戏园，均能各树一帜，他处不能与之争，尤不能与以绝大之恶影响，则中和园、三庆园、广德楼及民乐园是也。中和三庆为纯粹女班，而北京又有男女合演之禁。虽第一台声势如此，于二园毫不能吸收一人，此其一，再则北京专有一班重女轻男之顾曲家，即使该舞台角全戏好，亦不能夺此辈之嗜好，以此之故该二园且乐得作壁上观也。他如广德民乐为纯粹小学生科班，童伶去留，不能自主，且戏好而价廉，大得普通顾客之欢迎，以此之故，该二园亦不能受如何之影响也。

（五）舞台之价值 据以上所述，该台似有绝大之价值，实则所谓价值者，特其建筑物少出头地耳。至于所演之戏，仍是平日各园所演之普通戏，绝无可欢迎之处。矧

其艺员中路角为最多，好角也不过凤卿、瑶卿、云甫、又宸数人而已。若求其真价值，当在半年以后，或能演新派戏，则庶不愧有此转台，有此建筑也。然以北京人旧式脑筋之健忘及旧派艺员之充斥，虽有此舞台，亦徒有其表面而已。

◎北京第一舞台遭劫记

京师为名伶荟萃之地，文武角色，唱工做工，色色俱备，非他处所及。而剧场狭小，座位迫隘，与上海各舞台相较，判若天渊，因此游人率多裹足。杨小楼辈于西珠市口给孤寺旁创设第一舞台，集资募股，倡立公司，鸠工庀材，经营累月，形式之壮丽，结构之辉煌，大有压倒一切之概。开幕之期，喧传已久，据杨伶小楼意，尚欲俟场中布置更加整备，搜罗名角，配置完全，乃行开演。嗣因同班中人均欲早日开市，工程方始告竣，遂于九日居然开幕。都人士女因斯举，实为北京首创，不愧第一舞台之名，争购票入座，钧天广乐，方欲一洗尘俗之耳，詎一曲甫终，而惨剧已现耶。

（一）起火之原因 第一舞台起火之原因，外间传说不一。好事者至谓该舞台之兆焚如，实系有人放火。其故因京师某报戏评栏内，载有第一舞台经过之风潮一节。阅者误会，遂谓火与舞台经过风潮，颇有关系。实则此次之火，与经过风潮绝无关系，殆由于电线之走电耳。查第一台于举行开幕礼日，为装演门面计，依照北京普通开张习惯，于门前搭一彩棚，宽广十余丈，至将马路之一段全行占据，以金色装成之“第一舞台”四字为门额，四处张以各亲友铺户所赠之红呢幛，彩色灿然，光芒夺目。凡听戏者，皆经此棚出入，棚附近门楼新装电灯，工事未十分竣，以当晚须用，赶催电灯公司派工安置。不意电线装置未妥，竟行走电，其电落于彩棚，登时火起，遂延烧及于门楼。

（二）失火之情形 第一舞台全体建筑，约分二进，前为门楼，后为舞台及客座。前后二进，中间小有隔断，门楼西为稻香村，东为万家春。一南货铺，一饭馆，其余重要部分，则为舞台之售票处。戏价收入，皆于此存储也。彩棚火既起，如将棚即行拆去，与门楼加以一层之隔绝，门楼或可保存。惟救火水龙不得力，且又甚少，只同善等四具，为力量极薄弱之注射而已，继警厅消防队闻警至，至即奋力将焚烧正烈之彩棚架木四散搬折，以期保存门楼，顾已不及。而门楼且继彩棚以焚矣。是日起火于一点钟时，其焚熄乃在三钟许，前后约二小时。而所谓稻香村者、万家春者，以及售票处重要部分，皆付之一炬，而票款之遗失者约千余元云。

（三）避火之态度 彩棚门楼继续焚烧，火势连天，救火者、旁观者以及巡警弹压者，手忙脚乱，人声嘈杂，几有不可了结之势。火起于下午一时，而戏则始于十二钟后。火起时，则第一出已经毕幕，第二出之战澶州且将开台，而第三出之嫁妹，则装钟馗之某名角，正在妆头抹脸，持镜自对，忽闻火起，座客戏角，皆魂不附体，急往外奔，欲夺门出。而舞台中人忽传命，将舞台至门楼之门紧闭，使座客无一人得出者，其意在防座客之自投火中，以丧生命。盖尔时外间火势正烈，使座客一拥而出，火固无由救济，而外门已为火所断，仍无出路，又舞台客座旁楼左右，皆分上下二层，每层有一保险梯，系在楼外面。座客本可由此出，无如下梯后，其出路仍在门楼之旁，亦为火势所断，此外则无复一门可为逃生路者。座客至此，万无生

理，继救火队将舞台两旁各辟大穴，以为临时出路，乃人多穴狭，争先恐后，拥塞既甚，出入愈难。舞台后方，有邻居某者，急极智生，以长广之木板，置于屋顶，以其一端接于舞台之窗槛作浮桥形。座客之由是免者甚多，而仓促中失足负伤，以及倾跌折毁亦复不少。有某女客见火急，由窗跃下，竟至折足。吁亦惨矣。

（四）缺点之追溯 第一舞台之失慎，外间或以为无关紧要，实则戏剧之于社会风俗，关系颇大。其在东西各国，无不亟亟注意。北京之有第一舞台，戏出虽未改良，而建筑固已创新，自不能不表相当婉惜之意。然该舞台亦有不能辞其咎者，以舞台既取最新式之开幕礼，何必固守北京之旧习搭棚挂彩，以兆焚如？又该舞台平时不多辟出路，如沪上各舞台之所谓太平门者，至临时始仓皇穴隙以出座客，此以座客生命为儿戏者，且于此二端外，尚欲有所揭出，以期社会之共行注意者，即（一）救火准备之未周，火虽由于舞台之不慎，然使救火得法，未尝不可即时扑灭。先以彩棚，继以门楼，盖方张之火势，岂一二破烂水龙所能遏止？北京自最近数年来，其建筑物之较大而终毁于火者约四：（一）第一楼、（二）商品陈列所、（三）东安市场、（四）宾宴楼，其被焚各有原因，而救火准备之未周，以致火焚，建筑物先后遭劫，实无可辩之余地。（二）建筑监督之未施行。各国都市建筑，类由警察颁布建筑章程，俾市民遵守。其对于火警，于建筑法式中，寓以相当之预防。私家房屋如是，即公众场所亦无不如是。今北京警察厅之于第一舞台，事前既未为严重之申告，事后又或不思所以救补之则，此祸恐将复见于异日。（三）电灯公司之不慎。此次之火，实以走电，为其起因，故电公司万不能辞其咎。至于是日火起时，警备分布，如临大敌，数十丈内之交通，为之断绝。有往观者，辄以指挥刀乱挥相拒，此则论者方叹其临事之慎，而未敢置议矣。

◎民国之新讳辨

邱文彬具呈教育部，请转呈明令。邱字依旧避讳，当经教育部咨行内务部查照。内务部咨复，以政体改建。公讳之典，不必沿袭，所请一节应毋庸议，其文如下：

为咨行事，准贵部咨开据两广方言学校毕业生邱文彬呈请转呈大总统明今天下，邱字依旧避讳，以示尊孔等情。查崇圣典例，事关贵部职掌，相应咨请查核办理等因，到部查古无讳名之礼，周人以讳事神，于是乎始讳。讳名与谥典同出于周，讳者敬避而不名，谥者易名而称行，其为用不同，而其昭诚致敬之意则一也。故为亲者讳，谓之私讳；为尊者讳，为之公讳。为特表尊崇之典，孔子道高德厚，历代尊崇，典礼相因，各有损益。迨有清雍正三年，始定圣讳为公讳，盖以四海臣民，既以讳名为礼，竭诚尽敬于人君，则不避圣讳，实非所以昭示尊孔之道。持之有故，文献足征，现在政体改建，谥法已不适用，则公讳之典，自不必更相沿袭。无其典而强用之，恐不足以昭崇圣之诚，且尼山道德，中外同钦。就习惯上言之，固已无直呼孔子之名者，所请转呈明令依旧敬避之处，应毋庸议。至邱氏本以太公之后，食采谢丘得姓。清雍正时，乃加邱为邱，相沿已久，其愿仍从习惯者，不妨仍听其便，相应咨复贵部查照饬知可也。此批。

◎警犬

警犬一项，本为西洋各国之所通用，而尤以德国为最精，其功用不仅可以防卫身体，且可以补警察侦探之所不逮。钱君锡霖有见于此，特在北京创办警犬研究所，征求各种良犬，专门训练，以备将来警察署之用。有汪建斋、康甲丞两君，因钱君之约，特至城东赵堂子胡同内雅宝胡同警犬研究所参观一切。兹将其大致情形，略志如左：

（一）建筑之内容 该所之建筑，与其他建筑，皆不相同。正面三间，为该所执事人办公之处，前面廊下有平台，训练时可于平台上看操；平台下即为操场，地势甚宽敞；两旁为狗房，每一警犬，占小房一间，铺以极洁之干草，并覆以棉褥，以为警犬休息之所。此种建筑，据闻系参照德国之成式，即其一切用具，亦均系定制，与普通者多有不同。

（二）训练之方法 该所既名为研究所，自必有教授之方法。后观其教科书，始知训练之方法，实有种种精微奥妙之处。如列举言之，难以缕数。其大要则不外“循循善诱”四字，务使其服从命令，勤谨耐劳，训练既久，自成习惯。其教科书皆系译自洋文，共有八十三课之多，由浅及深，由近及远。每一课中，标明一口令，下列教授之目的及教授之方法，非常精密。此外尚有各种参考书及关于警犬之著作，大抵皆译自西文。并闻西洋尚有《警犬杂志》一种，专研究警犬之技术，亦可见警犬一事，为西人之所注重矣。

（三）警犬之技术 警犬之技术，大要为补助警察侦探之所不及，听警吏之指挥，以勤公务。其普通之技术，则为寻取物件，看守要隘，传递消息。其重要者则为拿捕罪犯，侦察案件，输送军械等事。每一警犬，训练毕业，须在一年以上，而其功能则在嗅觉灵敏，能听主人之命令，忠于其事。

（四）现有之警犬 钱君现得良狗甚多，其中有一德国狗，曾在德国受有教育，凡一切技术，该犬悉能为之，此犬为该所群犬之最。此外狗类甚多，并有一狼种之犬，貌甚狞恶，然无主人之命令，则不噬人，此亦可见训练之有方矣。该所除钱君每日自行训练外，并特聘一西洋人为教师，每日须操练六小时也。

◎余杭琐记

西子湖之西，旧旗营地，自光复后，拆除建屋，几成一片榛芜。过其地者，大有黍离麦秀之慨。前有辟作商场之议，及赣事发生，因而中辍。后经杭县周知事筹集款项，竭力进行，破瓦颓垣之中，遂现一番新景象矣。

西湖新筑马路，阔有至二十丈左右者，最狭亦至八丈十丈，以视城中街道，相去至五六倍。故入其地者，眼界为之一拓，且工程坚实，与城站近旁之路相等，以视蒲场巷清泰门浙路，偶乎远矣。

西湖娱乐事业，最先创举者，为西湖歌舞台，命名之意，取宋人诗语，具有深意。相传南渡时，君臣荒嬉，有人题诗曰：“山外青山楼外楼，西湖歌舞几时休。暖风熏得游人醉，直把杭州作汴州。”今者国民遭兵燹之余，横征暴敛，实业凋残，而剧场营业，大形发达，诵昔人之诗句不禁感慨系之矣。

继剧场之后者，为影戏园，亦娱乐事业之一也。其近傍又有茶馆，虽草创之时，多未特建房舍，仅搭竹篷以蔽烈日。然座上客常满，壶中茶不空，其生涯亦不恶。每至晚膳之后，游人至该处纳凉者，鱼贯不绝，裙屐联翩，大有上海四马路景象焉。

沿湖一带，辟有公园，南北约数百丈，以城墙旧砖筑一高二尺之小墙，铺以绿草，细软如毡。游人于此步月纳凉，坐卧皆宜。白居易诗所谓“月点波心万颗珠”情景宛然。西望灵隐龙井诸山，南北高峰，若隐若现，惜园旁树木，均系败旧，不甚美观耳。

自周知事颁布建筑公娼房屋条例，将以杭城私娼及拱宸桥妓女，移置其间。一股机关报，颇怂恿之，谓斯政策实足以振兴市面。嗣由省教育会、青年会各业团体等起而抗议。自道德、风俗、卫生、经济种种方面立言，当局者始悟其非计，且经旅浙西人婉告朱将军，遂有致巡按使公文废止前议。大好湖山，不致因之被污，山灵湖神，实呵护之。

西湖原定地价既昂，又工程未进行，资本家相率观望。嗣经布告减价，而剧场马路适已开始，且闻公娼将兴，投标者随如云而起。自一等至三等地，几至买尽，惟特等地问津者寥寥。自此次公娼废止后，购地者扫兴不少，地价或因之而跌。然杭路国有后，沪宁有接轨之计划，而钱塘江桥成，绍甬交通尤便，金衢严诸府又以此为必经之路，该处擅湖山之胜，便于交通，其地价之贵，可预计也。

沪杭火车之查票者，制服绝瑰丽，衣帽悉为墨绿之呢所制，缘以黄边，缀以铜钮，钮肥甚，澄澄作黄金色，镂花绝精，光亦殊闪烁，袖口及身后腰际衣衩间钮尤多，约略计之，不下三十枚，望之极光艳夺目。初向人索票检查，人几疑其为上海办喜

事人家所雇来之军乐队，盖从其衣饰上观察之所含“美”的臭味甚重。吾意彼浙路公司之规定制服者，必为一绝佳之美术家也。

沪宁车中之随车营业者，有常州之卜顺恒卖梳篦，杭沪车中之随车营业者，有枫泾之丁义兴卖红烧猪蹄，可谓遥遥相对。丁义兴所制之猪蹄，自谓独具新法，且得有褒奖。不曰“酱蹄”，乃径名之曰“丁蹄”。盖丁蹄二字，已成为一种专有之名词矣。偶忆杭州闸口有一制火腿者曰“蒋腿”，取以对丁蹄，可谓奇妙。

近年杭州居民，以生计日艰，堕落而业秘密卖淫者极伙。杭人谓之为“私门头”，上等者约五六百家，中等约千余家，下等者约三千余家。当议设公娼时，一时报名注册，呈请给照营业者达二千余人，可以知矣。

公娼之香巢，本于钱塘门外西子湖滨拓地，其建筑之式一仿上海之迎春坊小花园清和坊之格局，望衡对宇，鳞次栉比，为屋可数百幢，状固宏敞，而背山面湖，风景尤佳绝。及收回成命后，遂令广厦万间，阒其无人，游客过此，殊有此地空余黄鹤楼之慨。而官吏一番提倡风月培植群芳之婆心，未免孤负。此多情人所不能不深为惋惜者也。

杭州近亦有橡皮轮之人力车，其式一如上海之黄包车。特拉车者，必手持一铃，且行且摇，其声铿然。盖一以警告行人，知所趋避，一以便雇车者得闻声而呼。此亦浙中警厅独出心裁之一种特别法令也。

乘杭州之人力车，有一绝苦事，即过桥必下车。盖杭州城内之桥，多为旧式，叠石作阶，为级多二三十层，其状如楼梯。来车过桥，若仍安坐不下，必有颠覆之虞，故人力车之过桥，无异昔日民船之过坝，亦一大苦事也。近已有数桥，改筑平桥矣。

西湖风景，与昔无殊，特其间陡增无数之烈士祠、纪功表、侠女坟、阵亡将士墓而已。就中形势最壮丽者，厥为浙军攻克南京阵亡将士墓，占地固广，工程亦巨，四围绕以红墙，界以铁扉，墓道悉叠石为路，墓门以内悉筑以水泥。丰碑巨碣，纵横无数，大书深刻，照眼欲眩，殊有昭示百世冀之象。统计此一墓道中，为冢约十余，每冢瘞六先烈，顾有一事辄有所不解者，冢皆作折扇形，不知果何取义，或别有所本。亦未可知也。

浙军攻克南京阵亡将士墓北侧，有一翹然独出之小冢，构造与诸烈士坟一律，特占地略小耳。趋而视之，乃马冢也。读其碣，始知冢中之马，生前为今兴武将军朱瑞之坐骑，于攻克南京后而倒毙者，亦一积劳病故之千里驹也。朱将军悯之，于其死也，乃取而瘞诸阵亡将士墓侧，且亲书巨碣，树之墓前。将军之恩，不为不厚。此马有知，度亦无憾。亦他日西湖新志之佳材也。特辛亥秣陵一役，浙军之马，死者

当不只此一匹，今得高坟大碣，埋首西湖，供人凭吊者，仅此朱大将军之一马。嗟乎！马亦有幸有不幸也。

攻克南京阵亡将士之墓门前，有杨学洛所题一额曰：“侠骨英魂”，字殊遒劲可喜，不知谁何无赖子，别以笔注四字于此额上曰：“狎骨淫魂”，此人亦真可谓不畏先烈者矣。

西湖之公园，即为旧日之行宫所改建，地擅全湖之胜，湖山佳处，无出其右。窃叹当日****时代，臣下之曲媚君主，无微不至。公园门前东首有浙军攻克南京纪念表，矗立湖堤，宏丽无匹。行人摩挲铜表，徘徊其下，多油然起崇德报功之想，流连而不忍去。某滑稽者曰：“此间风物清佳，唯不堪令一人见耳”。人叩为谁。曰：“上将军张少轩耳。”此语可谓冷隽绝伦。

去秋瑾墓不数武，有秋社者，度即昔日吴芝瑛徐寄尘诸君为秋烈士冤死事所组织之秋社也。门首镌一联曰：“秋菊有佳色，社会惜斯人。”嵌“秋社”两字，似形斧凿痕，与南货店中之春联，硬嵌其店号者相似矣。

杭州公共交通事业，如电话，如电灯，俱已组织成立，惟自来水未成耳。惜电话以机械上之不良，就筒听话时，筒中嘈杂，几如千军万马，以致传话不能清朗，用者殊以为苦。电灯尚明朗，不致如上海闸北电灯之时灭时明。然有一奇例，则装置电灯之家，必须用电灯公司中之电泡，方允接火。用户于接火以后，另易他项电泡，公司亦不之禁。盖公司之目的，则在售泡得钱而已。燃灯之家，用其泡与否，在所不必问也。

城站之酒家，以聚丰园为最大。该园金制之席面什家具，铸有十二份之伙，皆制以备巨宦豪绅宴享嘉宾之需。此种魄力，求之海上，亦不多觐也。

梅花碑昔为杭人第一娱乐场。每值新年令节，尤为繁盛，百戏杂陈，金鼓喧哄，游人如蚁，途为之塞，无异京师之厂甸香厂，苏州之元妙观，上海之城隍庙也。今以其地邻近将军府，沿途终岁戒严，搜索行人甚密，人咸视为畏途，走避不敢往。于是茶寮酒肆，相继闭门，坐此失业者不下千人。一极闹之市场，以大将军之故，乃一变而为冷巷闲街，虚无人烟，几等鬼境矣。嗟乎！此皆拜大将军之赐也。

杭州女学校虽多，规制俱极整肃，学风亦殊勤朴。就中以女子师范为尤醇穆，成绩亦极佳，其故以该校校长郑岱生先生处理校务，一以严肃为主义，收效乃能如是。昔张季直先生谓军队无共和，学校无共和，时流叹为名言。今观郑先生之成绩而益信。海上女校颇有取放任为主义者，以致女学生三字，往往为人诟病，安得如郑君者来一整肃之耶。

杭州女儿店，近来最发达。城站一隅，已有四五家。闻大半俱不甚获利，就中惟咸萃恒独利市三倍，其故因得老七掌柜，顾客多乐就之老七者，盖一富有美术性之商业家也。

地塘巷之纬成公司者，浙人朱某所立之织缎厂也。朱君曾肄业日本工科，尽得其秘，归而组织此厂。织成之缎，即名纬成缎，其提花新颖，选料坚纯，染色光艳，直超过舶来品。近年海上所流行之外国花缎，大半皆纬成缎也。故该公司前年出货至八十万吨，利金达三分以上。厂内外工人，统计约二千余，日夜工作不辍，犹不足以供市场之需要，诚一极大之实业也。居今日而能抵制外货，挽回权利，尤实业中之佳者，殊令人生极端之乐观也。

纬成缎之能如此发达，良以主持其事之朱君，精敏果练为不可及，渠每月必至沪三次，与各大绸庄接洽。若大纶，若天成，向其调查社会之心理，市上最流行者，果为何种之颜色，何项之花式，归即调制，而督匠染织，复能不惜资本，制一新花样织若干匹，即弃去不复用，另易新者，日新月异，不相重复，故纬成缎无陈腐之品，自无滞销之货。非若从前旧式之缎局，制一花式，往往织至三五年而不变动，必致取憎于社会，唾弃弗顾自败而后已。（如瓦当文之类）可见一业之成，得投时好，雅非易易也。闻纬成公司之织法，亦别有奥妙，故不轻许人参观，盖恐泄其技术上之秘密也。

◎封台戏之特色

北京于年底，凡各戏园皆有封台之举，封台前一日的戏，谓之封台戏，封台戏无有不佳者，此稍有北京常识者，类能详之。甲寅年底封台戏，最足以耸动一时者，为三庆园之《新茶花》饰新茶花者，为刘喜奎，有倾国倾城之貌者也。是日卖座，每位大洋一元，为北京从来所未有之戏价。而三庆园客座之盛，亦非老谭与梅郎演剧时所可比拟。《亚细亚报》剧谈谓以谭迷传染之多，梅毒蔓延之速，而不能与一刘喜奎敌，刘喜奎之《新茶花》，可以为北京剧界辟一新纪元，其繁缛自可想见。近龙阳才子易哭庵，又作《刘喜奎歌》，辟头即列举毛惜惜、邵飞飞、陈圆圆、关盼盼、苏小小、李师师、赵闲闲、王保保等美人为之陪衬，新颖超妙得未曾有，一时都下传诵焉，易自得印铸局参事后，关于歌咏女伶之作，绝不多觐。厥后代理局长，鞅掌之余，尤不肯轻易为女伶作诗（如曩日小香水歌数斗血歌之类），近为帮办，忽有《刘喜奎歌》之佳什，脍炙人口，则刘之色艺动人，使此老亦忍俊不禁矣。

◎东三省之马贼

东三省为马贼出没之区，而又当日俄之冲，往往有马贼与外人勾结情事，扰害边圉，良非浅鲜。兹将其著名悍匪头目，调查如左：

头目名 出没地方

延度 奉天西南约八十里邵尔台附近

万老 通江口之南雄子附近

马老疙 本在清河沟附近，今移尽石县

温振邦 长春附近

于德海 哈尔滨附近

徐德胜 海参威之北哈蜚糖附近

李廷山 一面坡附近

徐祥山 哈尔滨西部地方

王银年 农安街烟台山地方

段海廷 前出入于四平街附近，今在陶酒昭一带

干丸江 密山附近

赵光合 大房身地方

双老四 北山庙附近一带

杨十阎王 通肯城附近行掠

粳米客 海伦附近

丁德禄 东山里附近

强国固 长春附近

干海亭 奉化县及农安县地方

陈尔新 新民统附近

牛清山 镇安县之南马一带

◎特赦声中之捐客

自党人特赦令颁布后，第一邀特赦之人物，洪承点也。然洪之所以能特赦者，黑幕内大有人在，且为之出力者，既非与洪有何感情，为之保证者，与洪亦无渊源，质言之，无非金钱之能力而已。自民国光复以来，金钱之能力，大为增加，可以收卖军队，可以收卖议员。如去年国会选举议长时，购卖议员投票，明目张胆，居然每日有行市，营此捐客职业者，实繁有徒。曾忆某政客因用钱未到手，向法庭起诉，以买卖议员之行用，与猪羊行用作为比例，见诸公牒，传为笑柄。不料议院解散，此项政客穷极无聊，又发明一捐客之新事业，即所谓特赦之捐客是也。洪承点实为此业之第一批货物也。

洪之捐客，系前江苏议员张某。张之家乡，乃盐商之产地。民国光复，改革盐务风潮甚烈。张遂利用此机，宣言余得议员，当能保全盐引，盐商遂为之代出运动费。居然不出一钱，而得议员。到京后，每月享盐商数千金之津贴，藉口运动，以为花酒赌博之资。自议院解散，盐商补助亦停止，适值特赦令颁布，彼自知发财之机会到矣，乃赴上海，适值洪承点要求特赦，而又不肯自首。张索五万元为之包办，首向江苏政界运动，未达目的，乃至京日日请客，其同乡朱某等，因议员解散，政党衰落，流落京华，穷无聊赖，彼遂助以金钱，然数不甚大，或一二百元，或数十元，迨至受惠既多，彼乃出一公禀，请朱某等签字具名。而朱等明知受欺，亦已无可如何，禀上政府飭江苏查办，而江苏查复，又系含糊其词，并不加考语，政府乃暂取销通缉，令其来京自首。洪闻信之下大不为然，几与张起交涉。因张允许包办，不必自首也。张不得已，乃再令朱某等进一公禀，谓洪实因有病不能亲来，绅等可以力保其无他，于是遂得邀准。闻朱某系领衔之人，不过向张借得洋七百元，其余不过一二百元，统计张所出之运动费，不满万元，干没者实有四万余元，此等营业，不得不谓之一桩绝好买卖。最怪者，此项公禀，张不列名，其中所有责任，皆系他人代负，而已享其厚利，虽欲名之非捐客不可也。自张某此事开端，于是一般政客，皆生艳羡，争头觅缝，以求货色矣。

◎日历新景

吾国改用阳历，为期尚浅，故北京市面，表面上虽已于新历新年时，遍糊春帖，悬挂国旗，以志庆贺，而一切实际上过年之事，则阴历年底方纷纷准备。戏园则封台矣，澡堂则涨价矣，即至以开通风气自任之报馆，亦且因工人之照例休息，为之牵率，而有四日之停刊，此固无可如何之事，过渡时代必然之现象，不足骇怪者也。政府知旧习之不能猝革，又定一变通之法，于旧历元旦，定为春节，于是乎各衙署之放假，揆之名实，均可不背。甲寅年小除夕，适为南北统一之纪念日，于是中华门之彩棚，适可为旧历新年之点缀。此则天时人事，适相凑合，足以增北京多大之色彩。乙卯元旦日，适为星期日，放假与不放假等，终岁在公之贤劳诸君子，遂暗中折去一日之消遣时间矣。

◎我佛无灵

上海南京路（即英大马路）保安司徒庙（即虹庙），乙卯元旦，天未破晓时，因香客争烧头香，拥挤之间，被流氓及匪混杂其中，乘间攫取饰物，以致人声鼎沸，警笛乱鸣。甚有疑系火警，争先逃避，因此屋小人众，挤倒棋盘街某土栈主妇徐陈氏及所偕五十八岁之佣妇某氏，该佣妇当场即因伤身死。捕房将陈氏车送仁济医院疗治外，并将该佣妇尸身舁送斐伦路验尸所。谘员英领乘坐马车，同莅验尸所验明，委系践伤要害致命，飭令尸属自行棺殓。惟闻当时惊扰之际，妇女之被攫饰物者甚多。该庙正在市廛繁盛之区，匪徒胆敢乘间攫物，致肇挤伤人命巨祸，洵骇闻也。

◎新舞台重整旗鼓

上海九亩地开辟商场，经开明公司广营房屋，建造戏园，各项商业，渐趋发达。自甲寅新年，新舞台遭劫之后，复经该公司经理姚君招集新旧股本十余万元，重建舞台，暨门面市房等数十幢，计洋四万余元，又舞台一切行头、布景、装修、聘角约近八万余元，得以恢复旧观，重整旗鼓，于乙卯元旦开幕。预由经理姚紫若、伶人潘月樵二君，柬邀在沪官绅商学各界蒞临，以资提倡，而兴商业。故是日上海镇守使郑汝成君，沪海道尹杨小川君，均携眷偕临，绅界姚子让、丁赓尧、穆杼斋等诸君，共计有三千余人之多，上下座为之满。演剧至半，即由姚紫若、穆杼斋、毛子坚等三君登台，相继演说，大旨谓振兴商场，全赖戏园为要素，上年新舞台遭灾以来，现添集新旧股本十余万元，得以重行恢复，非惟振兴九亩地一方，即全城华界市面，盖亦均倚赖引起，日臻发达。闻者咸鼓掌如雷。继重又演剧，郑杨二君，先后兴尽而返，戏剧演尽，时已垂暮，来宾始行散归。

◎依然歌舞升平

武汉社会，于民国元年阴历岁首，因时局纷扰，谨遵国制，并未举行过年。二年阴历元旦，大局已形镇静，商民遂仍旧过年。然各店铺不过停贸二三日，大商店多于阴历初二开门，各机关则照常办事，并不休息。至三年阴历新正，中央已有一年分为四节之规定，于是商民过年，较为热闹，官厅亦有一日之休假，惟至初四日，市面已照常营业。乃四年阴历新岁，商民竟沿其旧习，一律关门，停业寻乐。至初四日开门交易者，仅有食物各店，其余商家，初六日犹多未开市。官厅为顺从民意起见，并不干涉。新年乐景可谓一年较胜一年。第闻商界去年因欧战影响，百业受亏，不能支持者，不可缕数也。向来新年之点缀市景者，为儿童之花灯，妇女之香市，痞徒之赌局，文人之灯谜，乡民之龙灯花鼓。其中如局赌、玩灯、演花鼓戏，均干例禁，即妇女之烧香敬神，亦为共和时代所应厉禁，庶可以破迷信而正风俗，乃是年鄂省一概放纵。元日至初三，竟有人当街聚赌，初三以后，各街巷之居民赌声喧嚷，警察亦不之禁。城外玩龙灯演花鼓者，亦不闻禁阻，各庙妇女之烧香，且派警队为保护焉。幸北军第二师长王子春军纪严肃，以北军无室家在此，严禁请假出游，并派卫队宪兵等，在外查街，遇有本师兵士私出者，即拘送师部责罚，故汉口之戏园，武昌之庙宇，均无军民冲突之事。即酌酒闹娼者，亦无所闻也。

省垣之灯市，限定巡按署及府学宫前二处，争妍斗巧，花样翻新，其盛况为光复后所未睹。巡署前有人持一大乌龟灯求售者，尤为灯市别开生面。该龟灯围径四尺许，头尾翘然，腹中燃烛，惟妙惟肖，而龟嘴衔纸卷烟一支，下窍亦插一支，背上之龟纹，则画出各种纸烟包之商标图式，见者莫不捧腹。而一般口衔纸烟招摇过市之徒睹之，则大难为情，逆亿是必不吸纸烟会之恶作剧也。

◎中学万年

四年三月九号省立第三中学校（即松江中学）开十周年纪念大会。校前操场，遍悬旗帜，藻彩纷披，校门结成彩楼。颜曰我武维扬，旁悬长联云：放开眼界，正六七强虎攫龙拿。想袖手旁观时，都道丈夫当如是，唤起国魂，有数千年英雄豪杰，只今朝一席地，大家莫谓秦无人。座中厅事，陈列各级肄业生成绩，如手工图画之类。是日晨，镇守使派代表金秘书长济时翻译官敖君莅会，周县长暨学务职员列届毕业生均至，遂在里课堂列坐。杨校长升坛，报告开会宗旨，周县长演说训词，金君演说曾在学界任淮安中校长。对于学生，深望其不以中学为限，随由县视学倪伯英演说，追述十年中先后办事人辛苦艰难，得有今日盛况。次学务科长顾稼轩演说，就现在而对未来，有种种希望，毕业生代表姚雄伯谓学业随世界之趋势，日进无已，即以此为同学颂。袁玉雨缅述经验，谓第一届开运动会时，同学小逞意气，遂惹外界议论，致召长官干涉，后来举办毕业时，致受种种困难。杨校长复升坛谓今日辱各界临观，发表演词，不外“奖励劝诫”四字，深感厚爱，袁君数语，更可借镜。想我同学断不虑蹈前辙，惟鄙人今日对于同学，一堂济济，专心学业，循守校规，有欣慰心，特中校系过渡阶级，若毕业后画然中止，则不免有危险之虑。目今处强食弱肉时代，非仗众擎几于不国，希望同学于毕业后，或攻实业、或肄师范、或入专门，蔚为全材，国无游惰，则富强自可操券云云。是日为第七届学生二十人毕业之期，由校长唱名面授证书毕，全体起立，鼓琴唱十周年纪念歌，遂奏乐退出。下午就校前开运动会，男女宾分东西进校纵观，录其运动会顺序如次：（一）开会；（二）奏乐；（三）唱歌全体；（四）二百二十码赛跑（各级选手）；（五）普通体操徒手（一年级）；（六）跳远（各级选手）；（七）拳术岳家拳捷行虎（选手）；（八）衔蛋竞走（各级选手）；（九）普通操棍棒（一年级）；（十）撑篙跳高（各级选手）；（十一）武器松花棍（各级选手）；（十二）数学竞走（各级选手）；（十三）拳术潭腿三路小七洪（二一年级）；（十四）劈刀术（选手）；（十五）掷铁球（各级选手）；（十六）兵式操一排教练（四三二年级）；（十七）跳高（各级选手）；（十八）唱歌（全体）；（十九）奏乐；（二十）开会。

◎赛会之惨剧

广东顺德陈村，向例每十年举行大醮会一次。前三届未举行，四年适值会期，好事者竭力提倡，遂又规复古制，阳历二月廿六廿七廿八三日为会期。当事者因经费难筹，亦已力从节俭，外间不察，谓此会已不举行四十年，布置定佳，遂如蚁之附膻。联群结队，踊跃赴会，争以一睹此中景物为快。计新墟附近，共有梨园五班，花楼花塔，高插霄汉。入夜并有鱼灯夜色，省垣各大光灯店，为之租赁一空。墟内谷埠及大小商店，多有因此辍业，款待来宾者。二月廿六号（即阴历十三日），远近各乡士女多欲睹此繁华景象，不惜舟车浩费，向午有电轮由顺属市桥乡启轮。船名宝中，驶至顺属半埔河面（即土名三桂海口）遇险。该宝中轮船，平日非走该处，不过因陈村醮会，开行数日。二十六早，该轮载客二百七十八名，由番属市桥解缆往陈村，詎因载客过多，甫出大海，船即摇动不已，兼之座位已满，人多企立，驶至是处，适有大浪汹涌而来，企立之客，立足不牢，互相排挤，船遂欹侧，渐渐入水。此时，各皆争欲逃生，船益不支，遂尔沉下，尚幸附近船户，因闻哭声震天，靡不奋力往救，当场救起约共二百人。陈村广东善堂等，亦即驰往分别捞救，极形热心。二十七日，经已捞获尸身三十八具，当即摄照棺殓，查溺毙之人，多属市桥乡民，次为陈村人，各该尸亲已多到场认领。二十七日午，只有八具尚未认领。省城方便医院闻耗后，二十七日午，经已派出医生二役，携带药物棺物，分两帮乘坐专轮赶往施救。其余各商团亦有赴会者，据土人言，是役惨灾。溺毙者之确数，实难预料。因当时潮流湍急，或有漂往别处，总之毙者约有四十余人耳。

◎北京之真国庆

共和成立，六稔于兹。十月十日，为武昌起义纪念，定为国庆，礼也。顾元年国庆草创不备，二年变作国庆之日，正袁氏穷兵黩武之时，卒不举行。三四年间，袁氏包藏祸心，视国庆纪念蔑如也。至五年双十节，今大总统黎公在位，日月重光，乃有国庆可言。国庆前数日，都中满城风雨，恰是重阳天气。及国庆日则天朗气清，惠风和畅，旭日当空，浮云尽扫。清晨六七钟时，正阳门大街，马路两傍，军警森立。各界人士拥于店肆之前，万头攒动，争看黎总统颜色。只见白纓紫纓，蓝衣黄衣，马队步队，佩剑荷枪，陆续前行，绵亘十数里，约计五六千人（是日北京各军齐往与操数共三万余已于前两夜间开往南苑）。兵队过后，又见各高级军官孙武、蓝天蔚、荫昌江朝宗等过去。旋有汽车一辆，其大可容二十余人。黎段二公，并肩而坐，且行且语，宛如戏剧所谓你我挽手而行者，态度殊为亲密。前例阅兵式，系在天安门举行，黎总统则在南苑举行，为实事求是也。惟国会中几因此发生问题。因总统府曾送两院入场券，各数十张。两院议长，因议员人数甚多，仅数十张，无法分配。于是不得已，由议长主张，议长副议长全院委员长、各股委员长、秘书长、警卫长等人，各给一张，其余则缴回总统府。是日开宪法审议会，各议员中彼此研究此事，谓两院议长系代表议员全体，应享特别权利，犹可言也。至各委员长等，亦享特别权利，未免于议员中显分阶级。议长如此办法，实属不妥。况国会以议员为主体，今秘书长警卫长均有权利，而议员独无，岂非荒谬尤甚者乎？再查阅兵参观规则，凡入场券上，未另印准入演武厅字样者，概不得入演武厅。考各国阅兵仪式，议会议院均与国务院平等。所以重外人之观瞻，重立法之机关，不得不如是也。今发交议会之入场券，皆系未印准入演武厅字样者，是一种普通之入场券。将来蒞场时，是否如礼招待，殊未可知。因此种种关系，众议院某某数议员，于散会后，往晤汤议长。询其原因，汤云：“此次阅兵之入场券，政府所请者只两院议长，其副议长及议员均未束请。至两院议长之入场券上，另有准入演武厅之戳记。所发交各委员长之入场券，在政府之意，并非请各议员，乃系将券送交本院，听各议员之便。愿参观者即持券前往，故皆系一种普通券也。送到院后，因入场券仅有数十张，又不知谁人愿去参观，不得已，筹一种标准办法。故正副议长委员等有入场券，而各议员无入场券，并非故分阶级也。各议员等既悉此事之内容，遂彼此相约不往参观。是日阅兵礼节如下。

（一）大总统蒞场时，奏军乐，全场官兵行敬礼（官长行撇刀礼，徒步兵双手举枪，乘马兵行马上举刀礼）。总指挥官前进奉迎，报告编入阅兵之部队数目。报告毕，各官兵停止敬礼。（二）引导官在大总统前左引，各指挥官在总统右侧随行，由队头递次巡阅。（三）大总统到离队头二十步（或十五步）时，在队头之营长，下双手举枪口令，并奏号音。俟大总统去本营队，而其次之营长已下敬礼口令时，停止敬礼与号音。以下各营均同。（四）大总统到离队头二十步时，师长应前进奉迎，行撇刀礼，报告本师到场营数。报告毕，在指挥官之右侧后随行。俟本师部队巡阅完竣后，向大总统行礼，即回原地。（五）旅长马炮团长工兵机关枪营长，于大

总统到该旅（团或营）队头十步时，前进行撇刀礼，报告本旅或本团营到场人数。报告毕，其动作与师长同。（六）大总统阅兵毕。回演武厅后，由总指挥官下稍息命令，用号音即时变换队形，准备演排。附参观规则：（一）各参观员上午十点半钟到场。自十一点钟起，前往南苑之马车及小火车，一律暂止交通。（二）南苑火车准于十日上午八点九点，分两次由永定门外车站开赴南苑。凡持有入场券者，均可乘坐，不取车资。（三）各参观员无论乘火车乘车马，下车下马后，均应按一定路线，步入操场彩门。所乘汽车马车马匹或人力车，均应驶入指定之停车厂内（下车马处及停车马处均有标识）。（四）在场内参观地点，树有标识，各有一定范围，幸勿任意移动，免致哨兵干涉。惟特任官及陪观员，于演排时得入演武厅陪视（入场券盖有准入演武厅戳记）。由陆军部派员在演武厅各道口招待。（五）场内餐棚，备有茶点。在大总统阅兵或休息时，及大总统离去操场后，各参观员得随便入棚息食。（六）餐棚后设有厕所，不得任意在外便溺。（七）参观员之仆从，一概在停车厂静候，不得随便移动及喧哗。（八）其余各项规则，均载在入场券内。

是日总统实做阅操二字，极为认真。莅场以后先偕总指挥陈光远步行巡阅各行列间一周，始就座开操。操毕，即由航空校长秦君导观校中机厂，并演习飞行。由南苑飞至北京，在先农坛绕阅数周，距地甚近。先农殿改悬忠烈祠立额，金字蓝地，颇觉辉煌。由庄蕴宽主祭，城内中央公园古物陈列所，西直门外农事试验场，均开放一日。中央园并有农商部林务处美国学生凌道扬，用种种影片模型演讲森林利益水灾状况，聚而听者尤伙。红男绿女，画毂朱轮，驰骤连翩于长安道上，往来如织。回视去年帝制声中之国庆日阴雨竟日，满目凄凉，路绝行人。民无生气，殊觉气象一新也。

◎庆贺共和复活记

五年十二月二十四日，中央公园举行起义纪念大会。连日大雪，忽焉开霁，苍苍者若有意成此典礼。然而朔风凛烈，透体欲僵。是日，公园门口彩坊，书“南起义拥护共和第一次纪念大会”等字。大殿设演说场，中悬黎大总统、冯副总统肖像，左右列段祺瑞、唐继尧、岑春暄、陆荣廷、梁启超、蔡锷、罗佩金、李根源、刘显世、吕公望、戴戡、李烈钧、刘存厚等像。自唐以下，皆书军务院及都督头衔，下书政学会制。此次大会，固该会所筹备，入场券亦该会所发。殿前悬联甚多，大抵皆来日大难无忘今日之意。段总理一联云：“运会亦寻常，剥复相环，一着错安成劫子。河山重整顿，智能交尽，几人垂念到民生。”意境颇超脱。许景升联有“横争意见政府议会有何面目见老袁”语，质直亦足傲也。首由李述膺述开会辞，由张耀曾中座主席会务。演说者伍廷芳、谷钟秀等，黄毓成、缪嘉树、李根源等以次报告起义真相及战事经过，词语甚长，李根源尤沉痛，于报告唐继尧沉着勇毅种种美德外，更谓此次起义，西南各省物力已尽，生命财产损失无算，而用之于对内战争，乃可痛之事，非可庆之事。虽前此系因野心家自私天下，激起义愤，然此后再不愿见此等事，大家都用精神财力对外。是时拍掌声如雷震耳，与张季直所谓蔡松坡恢复共和，而仍不能出民水火，隐痛积心，不免于死之语，意相同也。李君说毕，即由张蓉西介绍段总理代表丁某演说。段合肥身处危地反对帝制事实，演时亦多拍掌者。场中既以军务院官衔书诸起义诸人像片，到者又多南人，所演说者皆西南之事，而于北方之赞成倒袁，未免冷落。此段演说，盖不可少也。庭中有办事处，散放小旗，上书“民国万岁”，由政学会散放。《中华新报》上有无数小像，亦有分布邮片者。另一处，专散唐继尧对于纪念之来电，中以“兵事频繁，则国脉凋丧。破坏犹易，建设良难。一年来损失消耗，虽数年不能恢复。窃抱私忧，遑云欢庆。庆祝典礼，筹诸在莒之戒过庭之警，愿惩前毖后，协力图治”数语，尤为警策。

◎上海之真国庆

五年之双十节，乃共和后第一之真国庆。各界对于此次祝典，极为热闹。兹将所见所闻，汇录于左。

护军使署就大厅陈设礼堂，中供今大总统肖像，分列海陆军旗。所有署门以至礼堂，均悬灯结彩，满扎松柏鲜花，扎成“国庆纪念”字样，并用五色彩棚，装设电灯，极称灿烂。上午七时，在龙华操场排列军队，举行典礼式。是日并用师部军旗。

道尹公署特于门前高搭彩棚，署内陈设礼堂，大厅上供五色国旗两面，并今大总统肖像。礼堂中分悬万国小方国旗，且缀有乍明乍灭五色电灯，并备有上等西式茶点。来宾席次，其余署内外，亦悬灯结彩。淞沪警厅特派长警四人荷枪保护云。

江苏交涉公署因须招待外宾，设备极为精致。门前均用彩圈，满扎冬青，遍插鲜花，并用五色电灯，缀成“共和万岁”“国庆纪念”等字样。礼堂陈设，尤为华丽。上有五色彩棚，下铺极美地毯。招待室特设西餐台，备有上等细致西式茶点、贵重西烟啤酒等品，以备今日招待外宾。且于大厅装有乍明乍熄五色电灯，尤极辉煌夺目。

上海地方审检两厅袁林两厅，特雇匠在厅前以冬青柏札成彩牌楼一座，中间缀以黄色鲜菊花，嵌成“民国万岁”四字，四面挂扯万国小旗及国庆纪念纸灯。上海县公署门前，亦以红绿绸缎高搭牌楼一座，内中什以人物玻璃各灯。署内外各悬灯笼，以伸庆祝。地方厅袁林两厅除在厅内外布置种种庆贺典礼外，特邀齐推检各官，在厅内备筵欢饮，颇为热闹。

上海学界提灯会，各学校到者有寰球中国学生会，有中国体操学校，江苏省立第一商业学校，约翰大学及青年会复旦公学之童子军等。寰球中国学生会又在该会会所开庆祝大会，门首遍扎松柏鲜花，悬挂五色国旗，并备茶点，邀集会内外同志，共祝中华民国亿万斯年。车水马龙，臻极盛之观。九亩地市立万竹学校学生，适足千人，先期发出通告，于国庆日举行祝典。以人数过多，不能加入市校团体。扎灯彩极多，大门联语为“当回忆去年景象，愿毋忘此日艰难”，颇足玩味。开会时女子部节目：国庆歌、演讲、改良家庭、顽童感化、掷球竞争、舞蹈、游戏、校歌。男子部节目：行礼、唱歌、灯会（由校出新北门经民国路入尚文门，由虹桥大街返校，与会者五百人）。七时晚餐。七时半继续开会，其节目为：演说、运动、游艺、十时半散会。自门首至校园，晚间遍悬红灯，间以汽油灯数盏。花香树影中，灯火辉煌，别饶雅趣也。

南商会因国庆纪念，在毛家弄东西两面，各搭彩牌楼一座。遍缀松柏鲜花，其门首用松柏等扎成匾额二方，文曰“国庆纪念”，“共和万岁”，缀以五色纸灯。又税

务所烟酒公卖分局、棉纱认税所、洋布认税所、工巡捐总局并其所属各认税所，亦皆悬灯升旗。木商钱业两公所、潮惠会馆、商船会馆、第一区警察署，及各分驻所等，均一律悬灯扎彩，高扬国旗。

小东门内务商号发起集资，在城门起至长生桥止，共搭冬青牌楼三座。何恒昌绸缎庄前，以缎彩扎成“共和复活”四字。新北门大街并邑庙前，以及西门大街，亦各有彩牌楼一座，杂以旗灯。其余九亩地城厢内外各商号，一体结彩，悬灯升旗，较往年大为热闹。

上海救火联合会，举行水龙灯会，自第一区至第七区，共七区。所属各火会会员，率皮带车并洋龙火龙以及各色灯彩，先后齐集小南门救火联合会。至钟鸣七下，奉命出发。由该会往东，过董家渡，往北老马路，出毛家弄，进大马头，至十六铺，由民国路往西，入小西门、尚文路、银河路、蓬莱路，迤迤由庙前街进中华路，然后往南到该会原处，始各分散。该会出赛时，前导有淞沪警厅骑巡队并保安队士五十余名，各执枪械。复有警厅文武军乐全部两班，继以救火会之马队二十余骑。第二区附属之新舞台之火会所驾之皮带车，上悬有所得奖牌一方。比赛得奖之六会员，均肩挂彩绸一方。其余该台会员，咸乘脚踏车随会跟随。钱业救火会所扎之台阁，为六君子。其余各台阁，为辛亥年火烧上海道台衙门，并猿台阁一只又警钟灯一只，则扎在皮带车上。尚有台阁一座，乃身穿御服，头戴御帽，谅指袁世凯梦想做皇帝不成之形状。此外有御袜灯一只，上有计洋八十元字样。又洪宪元年铜钱灯一盏，中孔有一身着礼服之人钻入其中，手持劝进表一道，观者无不拍掌称快。又有洪宪通宝铜钱灯一只，亦有一人穿在铜钲眼中。并有摩托卡救火车数辆，上面均扎有大虎一只，又龙一条。余如“共和复活”、“国庆纪念”等字灯，不计其数。外尚有虎豹狮象飞禽走兽及玲珑灯彩，亦不计其数。殿后为救火联合会各会员，各执灯球火把，口中高唱《国庆歌》云：“十月廿三 南城，蔡唐起义兵，讨袁旗高擎。连天火炮鬼神惊，推倒逆袁，恢复共和，全国庆更生。今日国庆辰，滇池健儿血流成。恢复共和兮诸先烈，享幸福兮我国民。同胞同胞，中华民国毋忘于厥心。”经过南商会，并工巡捐局以及各区火会门首，皆鸣炮欢迎。所过之处，红男绿女，结伴观赛者，人山人海。各处警区均派警分投照料，尚无肇衅情事。

闸北救火联合会一二三段救火会及各团体，于国庆日举行提灯会，制成“共和纪念”、“民国万岁”等牌灯，及八仙十二花神灯之外，另制猴灯一盏，猴之后足站于鳌鱼背上，其两前足，一持皇冕，一执命令，昂昂然有目空一世之概。猴灯之后，继以鹤灯，白鹤一头，立于大炮之上，口衔五色国旗，旗上一面书“复我共和”，一面书“民国万岁”。识者谓猴灯系指项城，鹤灯系指蔡公。二三段救火会门前，亦各搭牌楼一座，遍缀冬青松柏各种鲜花及五色电灯，此外更备有各色灯彩。

灯队经行之路由，自宝山路公立医院出发向南，由沪宁车站向西，走北浙江路，朝西经过华兴路新民路，至大统路朝北，转湾走共和路，至恒丰路，折回至大统路慈

善团为止。先期由联合会致函英美两界各段救火会，邀请各会员来会参观云。

麦伦书院全体师生，举行庆祝会。院内外遍悬色灯，缀以鲜明旗帜。七时半入座，先由教员陈述 致开会词，龙华孤儿院军乐班奏乐。次唱纪念歌并校歌，继由教员李香卓、学生张霆湖、邵学翰先后演说毕，全体起立，向国旗行礼，并三呼万岁。奏军乐，再由院中公益会会员秦焦竹、教员张 刃庵讲滑稽谈，学生赵拯华演拳术，学生张霆湖、沈肇渊演双簧，最后演双出侦探案新剧。招待一切，院中童子军担任。来宾座不能容，鼓掌声不绝于耳。散会后，复于操场上大放鞭炮，佐以军乐。

南市华商电车公司各电车，均编缀苍松翠柏，高扬五色国旗，以故搭车者甚形拥挤。其二号车装扎花车，于午后两时，由公司前迤迤往北，由外滩马路至十六铺，绕行中华路及高昌庙，上用五色电灯、鲜花扎成“共和复活”“普天同庆”“国庆纪念”“民国万岁”等字样，迨傍晚时车上电灯通明，五光十色，颇为壮观。从高昌庙至十六铺中华路民国路，并函请法捕房，于花车经达华法交界时，派中西捕沿途弹压。

中国救济妇孺总会，留养被拐妇孺四百余人。选择幼孩一百六十名，整队来沪。由董事徐乾麟、周岷源暨教员徐次祝、范德孚、顾雪生、西乐教员朱醒亚女教员四人为之引导，首用国庆纪念大旗，次中华民国万岁、大总统万岁、大善士万岁旗各一对，次由西乐学生队三十二名，次男女幼孩各执国旗，先诣上海道尹公署，以伸庆祝。旋至纱业公所休息，由闻兰亭、田资民、毕云程招待，款以茶点，并分赠国旗。继至商务总会广肇公所宁波同乡会，经会长张让三欢迎后，至洋货九业公会，亦承款以茶点。休息片时，即至审察两厅，未至出口公会洋货会集所绍兴同乡会休息回院。经过华租各界，一路步伐齐整，国旗飘扬，无不拍掌赞许。而英法各捕房并派捕逐段照料，人数虽众，并不拥挤，颇极一时之盛云。

致祭民国先烈，其一切礼节，由县公署学务科遵照齐省长通电，按照内务部规定，预为缮印，分发与祭各员知照。所有祭品猪羊筍豆，亦由县署承办，派员协同公款公产经理处先行布置。清晨九时许，本埠官场沪海道尹徐鹤仙、代理上海县知事景毓华、上海地方审判厅厅长袁麟伯、道视学余芷江、县视学朱伯、华县公署学务科科长李颂唐、科员钱绅斋、学务委员贾栗香等，先后莅止。在休憩室少待，于十时致祭。主祭官为道尹徐鹤仙，陪祀官审判厅长袁麟伯、道视学余芷江、县视学朱伯华、纠仪官景毓华，通赞曹浣亭，读祝贾栗香，司帛爵曹干臣、王桐孙、李颂唐、丁赓尧、钱绅斋、瞿少兰、徐泉孙等。祭毕，各分道而回。祭文云：“惟中华民国五年十月十日，沪海道尹徐元诰敬祭于民国诸忠烈诸神曰，神声灵赫濯，气节刚方。荡****之余威，作共和之先觉。发扬蹈厉，洒碧血而长埋。慷慨激昂，与黄花而并耀。植碑铭之纪念，气壮河山。际国庆之良辰，礼隆俎豆。惟祈歆祀，克鉴精诚，尚飨。”

◎拥护共和纪念会

十二月二十三日起至二十五日止，为滇省首先起义拥护共和周年之纪念日。南各界人士，追维诸将士之遗烈，诸志士之辛劳，迄今倏届岁周。痛定思痛，特发起斯会，俾国人晓然于再造共和之艰难。是日通衢夹道，均扎彩棚，各铺户一律张灯结彩，五光十色，灿烂夺目。值此岁晚务闲之时，四乡父老子弟，来省参观者，为数尤多。熙熙，俨入长春之圃。师师济济，同游不夜之天。往来虽极流连，秩序绝不紊乱。而丝竹管弦之声，与欢呼颂祷之声，纷至沓来，洋洋盈耳，诚滇中空前绝后之盛举也。

二十三日为祭忠烈祠之期，军界自少校以上，政界自科长署长以上，均在与祭之列。祠前车水马龙，肃肃雍雍，颇极一时之盛。祠内外点缀齐整，彩棚漫天。祠之中间，供设拥护共和阵亡将士香位，两旁则设蔡松坡、黄克强两先生灵牌，金字辉煌，耀人眼目。瞻望之余，尤觉凛凛然有生气。上午十时，唐督军着军常服，乘马而至。稍息片刻，即由唐督军主祭。先奏国乐，后读祭文，最后向牌位行三鞠躬礼。祭毕，复至南城外援黔忠烈祠致祭，礼仪同前。古人云死有重于泰山，轻于鸿毛。如滇军者，可以流芳百世矣。

二十四日上午九时，行阅兵礼。先由总指挥官张子贞君率领全师至北校场集合，九时前后，各界来宾及外宾均先后蒞止。十时许，唐督军亦到。当入校场时，全师官长撒刀，士兵举枪，军乐队则奏军乐以欢迎之。唐督军乘紫色骏马，着大礼服，胸悬大绶勋章，腰佩九狮宝刀。前后左右，共有护卫军三十二骑。其左右之十六骑，则负短枪大戟，其前后之十六骑，则手持陆军旗帜。唐督军英武非常，而护卫军士，亦复雄壮绝伦。各外宾皆用望远镜遥看，喝采者有之，拍掌者有之，并有某领事施展摄影快照以摄其影。无何，唐督军下马，徐登将台，旋举行阅兵，及分列式讫。各外宾争与唐督握手为礼，并称赞滇军之精神不置。且有某领事谓唐公曰：“阁下精锐之兵，早已出川出粤，而新征之兵，现又如此整齐强壮。阁下真神于练兵哉！”外宾之崇拜唐公，有若此者。是夜各学校各团体均举行提灯会，五光十色，目炫神怡，亦极一时之盛也。

二十五日午前十二时，军政绅学各界人员，齐集督军公署礼堂前，由督军兼省长唐公率行庆贺典礼。礼成后，旋在俱乐部宴会。座中人员，一时献酬交错，无不各尽其欢。而踴踴济济，揖让雍谷，毫无矜持之色。滇人之轻利让功，洵足风矣。

◎庆祝会之活剧（割下辫发十余箩）

南起义纪念日，汕头镇守使莫擎宇，由港返汕。对于此事，兴致极豪。特备堂戏烟火，在署大宴宾僚，尽民入署纵观。时在酉初，本埠及四乡商民联翩赴署参观，已如人山人海，肩踵相摩，颇极一时之盛。不意人丛中豚尾垂垂，触目皆是。莫使时当酒酣兴浓之际，闻署员相与笑说其事，当即亲督卫弁十余人，分守东西辕门，持剪以待。迨烟火放毕，人争挤出，当被卫弁兵士截拦，以两木间成一路，仅容一人进出。各弁遂将商民之未经翦辫者，一一代为翦去，始令放行。各人陡不及防，一时狼奔豕突，竟有多人以双手抱头痛哭呼冤者。莫使大笑，亲为割除，抚之令去。综计数千人，无一可免，亦快事也。闻割下之辫发，除给还原人外，其飞遁不取回者，足凑合有十三四箩云。

◎黄上将之国葬仪

民国六年四月十五日，为国葬黄克强上将之期，葬地在湖南长沙。是日因天气业已晴霁，故较蔡公出殡之时，尤为热闹。先是营葬事务所，以本所僻在城南，各界前来会葬者，不免有跋涉之劳，且人数过多，本所殊难容纳。遂定各界送葬预先分立办法，以次加入，庶免拥挤错杂。故灵柩出事务所时，仅有军乐队半连，军队两连，及少数军官，并遗族而已（其公子辈均着玄青色礼服，所用绋布亦系青色）。直至军署以后，各界始完全加入。路线之延长，约及二里。谭省长及各高级军官、各机关主脑、中央各部院，各省军民长官代表，均依次步行。灵柩抵军署时，谭督军特设路祭。然后由小东街福星街西长街由大西门出城，走中华汽船公司码头渡河，鸣炮一十七响，各要人均渡河恭送上山。按照中央颁布礼节，祭葬如仪。

黄公出殡情形，与蔡公不同之点，大约有二，（一）蔡公遗族，均着白色孝服，其他如绋布围拦等，亦均白色。黄公则概用青色。（二）蔡公灵柩，系用红缎绣花围幔。黄公灵柩，则用红黄蓝白黑五色布包裹。此外各项，均无出入。

此次会葬人员，除谭人凤、覃振、刘揆一诸君外，新到者尚有郭人漳、章士钊、陆咏霓等。会葬代表，亦续到多人。闻筹安六君子中之胡瑛，亦回湘会葬云。省会警察厅林厅长于黄公出殡时，特派职员分任职务，大致如下：（一）路线前班巡视人员，于灵柩而将发之际，先赴所经路线巡查，指导一切，随宜处理。灵柩而来时，仍随入警界送葬班内，同往送葬。（二）路线后班巡视人员，于灵柩而已过之后，游观人众拥挤，应督率沿途长警，竭力弹压，保持秩序。

◎黄上将逝世记

黄克强先生自东归国后，咯血疾发，缠绵病榻。初甚危险，与前年在美国发时相同。医治旬日，渐即告痊，医生再三戒以屏绝一切，应静养稍久。先生系念时局，每于病榻寂静之时，诘侍疾者以国事，且函电常亲过目，甚或裁答。遂突觉肝部浮胀，历三日而愈剧，即私告唐少川，恐病不起，唐慰之。肝疾既作，夜睡不酣。十月三十日午后五时，因肝部增剧，医下一针，稍好。不意至夜一时，肝胀益甚，下四针无效。全身皮肤，陡发黄色，或以为即胆液流入血管所致。二时，胃管复破，失血不止。三时，更剧。至四时转静，遂正容示家人以不能起，端卧而逝。年四十有四，即三十一日黎明也。所歿之处，为上海徐家汇福开森路新宅。遗容颜色坚毅，和蔼如其生时。闻黄太夫人及其夫人皆在日本，得先生病耗，早拟回华，是时尚未到。老人凭棺之痛，其惨自不待言也。

◎黄上将开丧记

五年十二月二十一日，为前南京留守陆军上将黄公克强开吊之第一日。上海行政司法军警商学等界之前往黄宅致祭者，素车白马，颇有如水如龙之盛。黄宅在福开森路三百九十三号，门首用电灯横缀“气壮山河”四字，系黎大总统所赠挽额。复将黎总统所挽“成功却爱身萧散，大勇那知世险夷”一联，用黄花缀成字句，分悬两旁，大门内两旁，为来宾签名处。二门内甬道，有复旦公学童子军二十余名，排班站立左右，招待来宾。甬道尽处为军乐亭，再进则为大厅。灵座中供黄氏半身洋装遗像，又三尺高白石肖像。像前供祭席，座前为大总统所赠大花圈一对。此外有日本侯爵大隈重信、伯爵寺内正毅、日商三菱公司久我贞二郎、日本有志同人政法学校各一对，均以绒绢制成，五色缤纷，鲜艳夺目，则分列左右。灵座左边为主丧人，右边为女宾。

清晨，上海军队行政司法等界，相继而至。沪海道尹徐元诰为黎大总统致祭代表，到时独早。徐道尹到后，即致祭，并宣读大总统电传祭文。此外中外各界之前往致祭者，约有四百余起。如交通部许总长代表周宗泽，湘督军代表刘建藩少将等，均由孙文、唐绍仪、李烈钧、柏文蔚、蔡元培、谭人凤诸君分别招待，淞沪杨护军使特派参谋长赵联黄为代表，前往致祭。祭文曰：“维中华民国五年十二月二十一日壬辰，淞沪护军使杨善德特派本署参谋长赵禅代表致祭于黄上将克强先生之灵而言曰：乌乎！谁实爱公，苍苍者天。谁实厄公，我亦呼天。微此之归，将安责焉？公负异禀，弁冕多士。岳麓蜚声，穷治经史。厥志惟弘，渡海而东。首倡革命，喁喁向风。酿于壬寅，成于辛亥。赞助黄陂，奇光异彩。新政推行，留守南京。中山所倚，民族之英。何意宵人，复张帝制。力返共和，甫蒞厥事。万几待举，方藉雄才。斯人不禄，谓之何哉。网绝其纲，星失其斗。无以解之，惟天执咎，椒馨在室，松椒在门。掬诚致奠，以慰幽魂。乌乎哀哉！伏维尚飨。”

各界所赠挽联挽额诔词，约有二千余份。摘录数联如下：（梁任公）道不同，初未相谋。降此百凶，岂料造车终合辙。天下溺，援之以手。歿而犹视，应怜并世几愚公。（孙中山）常恨随陆无武，绛灌无文，纵九等论交到古人，此才不易。试问夷惠谁贤，彭殇谁寿，只十载同盟有今日，后死何堪。（唐少川）奇气满东南，吾道不孤，应为苍生争一息。大名垂宇宙，人心未死，终教青史慰重泉。

《上海日报》载称，东京本乡区漫岛新化町之枪炮火药商仓地铃吉，自十六年前，即与黄克强结有密切关系。现因黄氏忽然逝世，特制成黄氏之半身石像一座，赠其遗族，以报生前之知遇。此像为日本有名之美术学校创立者之一人、日本美术院长藤田文藏所制。参照黄氏生前之照片，并请多人批评，迭加修正，始成此音容如生之半身石像，煞费苦心也。

◎黄灵离沪记

黄公克强之灵柩，于五年十二月廿三日，发引回湘。清晨九时，各界来宾陆续莅止。除黎大总统代表李书城、冯副总统代表师景云、陆军总长代表曲同丰、财政部代表姚家驹、交通部代表周宗泽、参众两院议员林森马君武王湘等五十余人外，上海各官长，文则有沪海道尹徐元诰、外交部特派交涉员杨晟、上海县知事沈宝昌、上海电报局长汪洋，武则有淞沪护军使代表赵禅、淞沪防守司令官何丰林王宾、旅长陈乐三荣道一、临时总指挥军署副官长范毓灵、海容舰长杜锡圭、飞鹰舰长方佑生、海圻舰长汤廷光、同安舰长吴光宗、建康舰长任光宇、舞凤舰长邬宝祥、第一舰队参谋饶鸣銮等，团体则有上海策进地方自治会代表王佑之、南京黄蔡二公追悼会代表王润身雷光华徐功镜陈自新、自由党本部职员王桂国等，绅界则有孙中山、唐少川、梁任公、谭石屏、胡汉民、李烈钧、陈炯明、柏文蔚、章水天、王一亭、虞洽卿、庞青城、伍平一、林松寿等，报界则有邵仲辉、吴稚晖、徐秋澄、黄叔平等，外人则有美国海军参谋长帅佛、军需长柏郎、海军上校安特生、医官魏穗、日本青木中将、海军少佐津田静枝、三菱公司久我贞二郎、大阪朝日新闻记者神尾茂奥村正雄田中收吉、上海日报东亚日报代表井手大喜寺尾亨今井幸加等，皆预焉。统计男女来宾，约达一千余人。除交涉公署派交际科长陈震东、译员杨少堂临场招待外宾外，其男女来宾，则由男女干事数十人分投接待。黄宅大门前，由法捕房派有华法越各捕多名，往来巡察。门口有干事四人，二人接收来宾名刺，二人分发徽章。进内，甬道上有荷枪越捕二十四名，分列两旁。再进为芦席所搭之客厅五间，各干事即于此接待来宾。各款茶点，颇为周到。惟美国海军一排计四十人、法国警队一队、与中国海陆军警、寰球学生会童子军、救火会军乐队等，均各在福开森路旁站队歇息，未至丧所。至十点十五分，家属致祭后，即由主丧友人孙文命各干事按照预定举殡行列，排定执事，指挥身穿黑色白线制帽制服之小工二十四人，徒手将灵柩抬起，放入炮车。柩用红缎棉套，上覆国旗，以六马拖载。由法租界福开森路黄宅启行，经霞飞路敏体尼荫路爱多亚路，沿黄浦滩直达招商局金利源码头，时已午后半钟。因所订装运灵柩之鸿安公司长安商轮，其时尚未进口，故假招商局八号栈房暂行停灵。

发行时之行列，前导为法捕房马巡四名，策马开导。次音乐队一班，次湖南同乡之白旗二面，花牌四扇，花伞一顶，花亭一座，花圈二十个，次闸北惠儿院音乐一班，次松江贫儿院学生廿二人，次普益习艺所音乐十二人，次译志中西日夜馆学生、译志女学校女生全班，次青年益算会会员全班，次商团筹备处会友一百余人，次南洋兄弟烟草公司花素额一方曰“盖世奇勋”，次自由党本部职员十二人，次复旦公学民立中学浦东中学各学生、寰球学生会童子军，次救火会音乐队，次贫儿院学生，次启明学校学生，次竞雄女学校女生，次女子同义义务学校女生，次中国海军军乐队一队，次海容军舰海军一队，次法国武装警队一队约五十人，美国海军一队共四十人，次美国海军各舰官长，次中国海军各舰长，均乘马车随行，次陆军军乐队，次武装陆军一营，次淞沪警察厅军乐队一队，警卫队一队。次骑马宪兵一队，次

花圈一队，次遗容车，用黑马四匹拖载，次送殡亲族马车十余辆，次孝帏，内孝子一欧、一中、一美、一球，惟一球年仅数龄，由女佣携抱，与孝女振华、文华、德华同行。长次两媳，均穿黑色西装，头扎黑纱，垂于背后，有二尺余长。次湖南鼓吹手一队，次即柩车，其前后均由马兵护卫。各界执紼者，俱在柩后，并有干事数人，乘自由车，一路随行，往来照料。经过之处，法捕房加派中西探捕，沿途弹压，码头上另派越捕二十四名。柩至栈房，门口由捕头发令举枪，中外海陆军警，亦各举枪以示敬礼。码头上预由县公署搭有素彩布棚，八号栈房内，用席苇分隔，里面停柩。外置素帏，柩前设灵台一只，上供遗像。祭菜五碟，花瓶二只，插以鲜花。中陈磁香炉一只，烛台一对。台前有花圈二个，其一为绢缎所制，系黎大总统所赠，悬有南木小牌一方，上书“克强先生灵右”，下题“黎元洪”三字，其一为孙文所送，大小式样与黎大总统所送者相仿。左右有大花篮二只，为日本前首相大隈重信及伯爵寺内正毅所送。四周悬张国淦、许世英、卢永祥、李贺宾等所送挽联。中外各界男女送丧来宾，既抵码头，仍由招待员引至对面该局转载处，略为憩歇。俟灵柩停妥，布置就绪，各来宾始行礼分道而散。

◎蔡上将逝世记（蒋震方之通电）

（上略）松公自十月七日，食量渐减，体微肿。本月初，忽转下痢，肿渐消，日益减。医言病菌入肠，危象已现。然尚嘱拟办续假呈文，时精神尚佳也。四日，嘱买西瓜。俟震等至，即强起，约分食之，颇饶兴。震等尼之，乃饮汁少许。当谈及我国现在政策，人民政府，宜同心协力，向有希望之积极方面进行。为民望者，身不道德，何以爱国？各斗意见，实争权利。日昨北京电询奖励在川战役人员，予精神太疲，应由罗戴核实办理。言已，复矍然曰：“予病深矣，万一不起，即将此意电达中央与国人。身为军人，未能死在疆场，必薄葬减我过。”震等再三宽慰，不必计及国事，复曰：“我亦无他言也。”五六两日，痢仍未止。七日早，医行注射，精神犹佳。朝午均进粥一碗，燕窝一钟，及牛乳葛汤等。与震等略说数语，甚快慰，并看窗外飞机，自以为此后将有转机。乃傍晚气促痰涌，至八日一时更剧，二时遂笃，延至四时长逝。窃自松公病初变时，比请章公使代电中央，应派员慰视，借商后事。不意剧变若此，当由震等谨将逝世情形，径电中央。棺木系自长崎选购最上等者，木尚坚。衣衾里中衣，上下均用白绫，着全套黑礼服，被褥白湖绉里，红缎面。棺内安置生前爱用伽楠珠一串，玉鸽一只，大晶章二个。口含金圆，灵柩发停崇福寺。（下略）

◎蔡灵回国记

已故四川督军蔡公松坡灵柩，自东回国，乘新铭商轮抵沪。满船遍悬中日官商投赠挽联唁辞，黄白青绿，五色飞扬，望之烂然。船傍法租界黄浦滩招商局江天码头，承办丧事之蜀商公所各同人，先登轮致祭。蔡公灵柩安置在船上最大之官舱中，前后两端，拦以条凳，恐海行动摇。左右两傍，复以木支撑之。四周遍悬花圈花篮及唁辞挽联，柩前设供案一，上陈蔡公遗容及烛台香炉等具，为途中早晚上香之需。公所同人，即在供案陈列祭品，公同行礼。祭毕，由扛夫十六名，一律白衣，将柩舁出舱面，始用辘轳吊索，将柩自上徐徐下至码头。然后仍由扛夫等舁入炮车，安放稳妥。维时法捕房军乐队首先奏乐，中西各团体军乐队齐起和之。中西各军警一律举枪致敬，招待员按照预定次序，将迎柩团体逐一排定出发。

举行时，汽车一辆首先徐行开道，次英法捕房之马队，英则西捕二名，印捕八名，法则法捕四名，惠儿院音乐队全班学生，省立第一商业学校，南洋商业学校，南洋植商学校，并有素幛上书“恢复共和第一伟人”八字，复旦公学童子军，青年会童子军，工业专门学校童子军，上海贫儿院智仁学校，内有学生六人，背负花圈，江苏省立第一师范学校，市立震华小学校，普益习艺所音乐队，浦东中学校，寰球中国学生会童子军，私立泉漳小学校，中华女子同义义务学校，救火联合会军乐队及全体会员，商团公会筹备处，并素额上书“丰功伟烈”四字，中国妇孺救济会音乐队，各帮商界，执香列队迎送，约有千余人。清音一班，像亭、遗电亭、大总统命令亭、勋章亭、服用亭，计共五亭，周围均扎鲜花圈，并日本带回日人所送纸花篮纸花圈挽联，五光十色，飘扬夺目。次海军军乐队、海圻舰水兵一排，由舰长自行督带，法捕房荷枪法捕一队、护军使署军乐队步兵一营，由使署副官长范悯黔为总指挥。马兵十二名、警察厅军乐队、警卫队一队、驻沪美国海军舰长四人，乘坐马车二辆。孝帋铭旌执紼者，均执帛在柩乍前步行，孙文、唐绍仪均在其内。柩车扎有花罩，驾以六马，御行车前，车后有马兵护卫。近柩之马车汽车，约有一百余辆。灵柩所过处，男女老幼，万头攒动。自英租界棋盘街以迄公共租界铁大桥止，沿途一带大小商店，一律下半旗，并有摆设路祭者。丧仪之隆，参观之众，实为从来所未有云。

停灵之蜀商公所，大门前扎成素彩牌楼，中以黄花缀成“灵归衡岳”四字，为冯副总统所题挽。牌楼上高建长方素旗一，上书“蔡公殡馆”四字。其停灵之大厅，亦均扎素彩，四壁遍悬各界挽联。灵幕上悬有黎大总统挽额一方，文曰“功在国家”。两傍则为梁任公之挽联，其文系集四书成语，上曰“知所恶有甚于死者”，下曰“非夫人之恻而谁为”。幕外供案一，中奉蔡公遗容。厅前戏台，设有清音全堂。台上悬有内阁总理段合肥挽额，文为“河岳精英”四字。柩车莅止，其迎柩之中西海陆军警学商务团体在公所门前，左右分列两行，肃然伫待。迨柩车至，即由中门直达厅前，仍由十六名扛夫将柩舁入大厅。正中幕内，由军队鸣枪三响致敬。奉安既定，中西来宾分班致祭。所定次序，为先西后中，由西首进，东首出，以免纷乱。

。其应需祭席，系上海县公署承办。预祭各来宾，先由招待员在来宾室分别招待，款以茶点。稍事休息，然后由招待员导至灵前，行三鞠躬礼。首为美国海军舰长四员，次法捕房荷枪法捕，由捕头带至灵前举枪致礼。次官界致祭如冯副总统代表军署参谋长王通、齐省长代表沪海道尹徐元诰、淞沪杨护军使代表使署参谋长赵联黄、卢副使代表三十八团团长马鸿烈、外交部特派员杨少川、代理上海县知事景毓华、淞沪警察厅长徐国梁代表总务科长赵殿英，及第四第十两师各旅团长，并海圻等军舰长官，分别行礼。次为公私立男女各学校学生，而以绅商各界男女来宾殿其后。行礼时，均有淞沪护军使署淞沪警察署军乐队在厅前天井内轮流奏乐。礼毕，即由蔡公介弟松垣，带同孝子瑞生（居长十余龄）永宁（居次四五龄）向来宾叩谢，礼成。

◎蔡灵离沪记

蔡公松坡，在日病故。灵榇回沪，驻蜀商公所，旋由沪回湘。上海军警官商学界及各省代表之随榇致送者，仍异常拥挤。兹将关于灵榇运输各情，分志于后。

事前由治丧事务所各执事，将运送蔡公灵榇各手续布置妥贴。所有载榇炮车，经宪兵营张营长预备停妥。其余军乐及夫役人等，亦经齐集所前，各界送榇人等亦先后戾止。钟鸣七下，由送榇者在灵前致祭讫，即由雇定夫役，将蔡公灵榇，抬上炮车，仍用六马驾驶。钟鸣八下，由宝山路蜀商公所起灵，南行至美租界北河南路，转至英租界河南路南端，转东至爱多亚路，至浦滩折而至法界浦滩。至新开河，金利源九号码头，即由夫役十六名，将灵榇抬至利川运舰后舱停驻。

送柩时，柩前有旅沪湖南同乡会军乐队十六名。次松柏牌四面，又松柏伞一顶。次花圈队，次惠儿院军乐队，次警察厅游巡第三队五十名。次护军使署军乐队三十二名，次日本纸扎花一队，次灵位亭，次遗像亭，次第十七团第一营军士一百三十名，次军乐十六名，次马队四十名，次铭旌，次孝帏，次各界执紼者，次炮车所载灵榇。末有马兵八名，随后执紼者所雇马车数十辆。

各省代表之送柩者，如段总理代表袁华选、冯副总统兼苏督军代表师景云、浙江吕督军代表吴钟熔、黔省刘督军代表王文华、前四川将军陈夔龙代表范熙绩、晋省阎督军代表张华辅、及上海军警交涉各官代表等，均在其列。其余商学自治各团体等，亦各派代表参与其间。灵榇由华界宝山路至美租界时，即由英美捕房警卫队六名参列，为之先导。至英法接壤处，即行撤回。迨灵榇入法界，即由法捕房警卫队四名为先导。招商局金利源码头浮桥上，则有越捕二十四名，持枪两旁侍立。迨柩车由岸至码头时，该越捕即举枪鹄立，以致敬礼。灵榇移入利川运舰后，即解缆移泊浦中。其时军乐大作，送柩各兵士，皆一律列队举枪。各界送柩人等，及外人之随同瞻仰者，亦均鹄立码头，遥望利川，脱帽以致敬礼。利川亦下梢旗答礼。

利川系运送舰，吃水仅八尺，载重三百吨。后舱均用白布扎成灵帏，为安置灵榇之所，舰边又遍悬以各色旗章。此次沿途参观者之拥挤，仍不亚于灵榇由日回沪上陆之时。有于灵榇必经地点，向各茶楼包定座位者，各茶肆以地位关系，抬价以谋利益。而来者均不以为贵，足见蔡公感人至深矣。

◎北京追悼黄蔡记（挽词难煞诸大老祭台哭倒沈佩贞）

北京黄蔡追悼会，在中央公园举行，乃国会推定专员特设筹备处，经营日多。自总统以下捐款办者，故为极盛。公园正门，结彩坊一座，白地黄字，曰“黄蔡二公追悼大会”，下有一联：“功盖甫申，中原再造。魂招屈宋，南岳无灵。”左右各有素坊楼，一颜曰“咸有一德”，一颜曰“并足千秋”。联曰：“湘岳之灵，华夏之杰。国民有范，历史有光。”进正门后，又有素坊一座，颜曰修和有夏，系宪法讨论会者。大门以内，二门以外，所有茂林修竹，满悬挽联，似前社会改良会所悬格言。有照壁一，极华丽，上有黄汉湘一联：“沅湘流不尽，天地与俱生。”蓝字硕大无朋。二门匾为“生荣死哀”四字，旁有挽联甚多。惟中国公学一联，字少而大，故最显豁。其词为“一双国土偏凋谢，八个罪魁竟逍遥。”追悼者读此，无不破涕为笑。中国公学好奇语惊人，即特定（副大总统）之名词者也。二门内有小坊一座，有江瀚一联，（苍天变化谁料得，湘水无情吊岂知）。叔海为老名宿，此联殊欠沉挚。正殿前方土台（即救国储金会及筹赈放烟火开彩处），设黄蔡二公神像。正殿灵位及后殿演说台，又各悬二像。正殿前四周墙垣，挽联悬满。朱垣画栋，望去但见一片白色，极为凄惨。正殿设祭台，上有匾曰同声一哭，悬黎总统联曰：“正倚济时唐郭李，竟嗟无命汉关张。”因忆前岁黄陂卸鄂篆，居京韬匿时，人比之小园种菜之刘备，今以黄蔡比关张，颇为巧合。政界大老，下笔最苦。盖挽联不能不恭维死者，恭维死者，即不能不数及老袁。而此则不便处甚多，只可以空洞语恭维，如王士珍之两造共和身不寿，已不可多得。盖虽不骂袁，尚语及制造共和之功也。若吴炳湘之“抱命世奇才，溘然长逝。数先民遗迹，慨当以慷。”真不知所云，以文字论，亦可当渔阳三挝，其鼓声酷似不通不通也。可举一以概其余，名士中有易老五一联：“历万死一生成道，是三湘七泽钟灵。”议员中有参议员新疆何多才联云：“怪上帝吝寿，数莫到不惑之年。”观者曰：好在新疆多才，虽二公不寿，中国亦不绝望云。段廷圭联有“壬父既丧国粹先生又作国殇”之语，壬父殆指王壬秋，玩其词，似国粹丧于壬秋者。蔡公为一代完人，众口一辞，而曹成功独云：“二公为民党中坚，毕竟功过皆居半。九原得内阁消息，彼此喜怒应反常。”殊费解。李六更之挽词，似一段语说，有云：“死于共和已成而实未成之时，可谓不善死。”责备二公，可谓大奇。军界朱某曾某，“回首帝业非，复我共和好大陆。龙蛇公首义，叹息斯人去。萧条沧海空神州，辽鹤众哭君。”出自梁任公之《挽李文忠》。至民党之骂袁，自无所用其顾忌，痛快者甚多。惟黄蔡逝后，报纸上时有谐文，谓二公在阴曹捉袁问罪。本系滑稽笔墨，不意陈丕烈之联，竟云：“只为袁逆奸恶，泉下当兴讨贼师。”其实老猿只能闹天宫，未必能闹地府，二公似无兴师之必要也。联多而好者太少，以上举其有趣足解颐者。惟周宗泽联云：“平生风义兼师友，天下英雄惟使君。”老当浑成，以操比袁，含而不吐，尤饶意味。政界中既多官样文章，惟谢远涵挽蔡曰：“鲁连仗义，不帝嬴秦。悬知东海垂槎，为逃上赏。武乡用兵，亦在巴蜀。试按西川遗垒，同叹奇才。”用笔遒净，有议论，亦得体，可称佼佼。李经义常夸松坡是彼赏识引用之人，故挽联曰：“相与有袍泽之风，真知在神识之表，弥剌果可荐乎？广武消兵，早见中原弭患气。公享盛名而不寿，

我留愧色而徒生，牙琴自此杳矣！大荒披发，更从何处话深心。”上加序云：松坡仆之畏友，尤仆之真友。癸丑国犹可为，而吾策不荐。丙辰事皆待定，而公遽夺年，痛心何极。不知癸丑时，九先生曾有何妙策。所谓留愧色者，又何事耳。杨度挽黄有“一身能敌万人，霸才无命”，挽蔡有“东南民力尽，当时成败已沧桑”之语，会中不许悬也。

中央公园为帝制罪魁朱桂莘所创始经营。开放以来，历办储金会某某义赈筹捐会社会改良会帝制庆祝会，而追悼会则第一次。悬筹备所牌于门者数日，与从前悬大典筹备处牌（此牌闻为美国人作古物买去，价万金）处密迹，令人不胜今昔之感。尤令人感慨者，去年每有会务，无不见社会花朱三小姐，绰约娉婷，点缀其间。今与乃父同在逍遥之列矣。惟余至位前行礼时，众人抬首，看同声一哭之匾，而无一哭者。突闻左侧大放悲声，哀而高，似女子。众拥前争看，几将祭台挤倒。于是招待员及警察等急行拦阻，维持秩序。哭者非他，沈佩贞女士也。自神州讼败后，潦倒不堪，此哭之恸宜矣。后殿演说台，有王某演说云，筹安会请愿团里人，今日亦有来追悼，不要脸不要脸。院之西偏，有人将黄蔡小像印成之邮片一大束，用撒纸钱法（京人出殡，有人沿途撒纸钱，一扬手齐飞至空纷纷下下落称妙技），掷散空中。四面飞落，众争抢之。是日各界来者，拥挤异常，官界女界军学商警界各有定处。军乐队紫衣白带，红盔素纓，整齐好看。惟来今雨轩双扉紧闭，冷寂无人，为不堪回首耳。

◎成都悼蔡记

四川追悼蔡督军地点，在少城公园，十二月一号起至三号止。其追悼场之布置，入公园之签子门，以白布扎牌楼。沿右而左，为纸札“追悼邵阳蔡公大会”八字。门有警察守卫，非持参观券者勿许入。以故环立门外引领而望者，不下数千人，途为之塞。入门数武，又有白布扎牌楼一，横列“民国柱石”四字。两端有栏杆，向西夹成一道。由右而进，有二亭，一系蔡督军所遗之战马，一置蔡督军所遗之肩舆。由左而进，有二亭，一系蔡督军所豢之猎犬，一陈蔡督军所御之马鞍。以上遗物，皆题有赞词。由正中而进，则首为演说台，南北两向，悬有楷书之蔡督军事略二十余幅，又贴有各省吊唁文电，及在东病时情状。台之西南隅，插有杏黄色之令字旗一，大书“蔡”字，旁题“护国军第一军总司令官”，盖蔡督军北征之所遗也。由西进数十武，一六方亭，中陈纸扎之战马，又扎蔡督军像，戎服佩剑，挺身骑于其上，凛然若生。入亭须拾级十数而上，周围满列花盆，层次井然。但有警士守卫，不得上亭。过此左折，南进为公园商品陈列馆之门，亦复扎有牌楼。第一层楼房之前，倚壁扎有一亭，木刻蔡之小像，供于其中，大书“奠”字。至其下者，皆敬礼焉。又陈有蔡公遗印，仍题有赞词，周围列花盆，如六万亭式。而其左之楼房一幢，为招待室，右之楼房一幢，为办事处。沿第一层楼房，所经夹道，悬对联已满。至内则广大场地，满布各花，扎有牌楼栏杆。及门，区场地为若干段，遍悬挽联。正南第二层楼房之前，倚壁扎台，为祭奠之处。中供蔡公肖像一，神位一，向北陈水果诸品，及太牢为祭。游人至此，多脱帽三鞠躬。各军队整列致祭，礼成，复出外听演蔡公事略。与蔡公神像相对，有石碑南向，悬梁任公来电，述蔡公死时情形。北向悬蔡公遗电，所以告政府及国人者。石亭之北，为奏军乐处。军乐队着紫色礼服，颇为庄严。第一层楼房，背面置有风琴，理其事者，为高等师范音乐班生。又各招待室内，皆满悬对联。所扎各种亭台，多缀花为纹，排花作字。陈列馆门首，更有电灯排成之“日月重光”四大字。入夜电灯既发，内外各层，明如不夜，而此四字尤为光辉灿烂。出门北行，满布各花。道左扎有剧台，是日演剧四五幕，皆蔡公生平事迹。与袁世凯相对照，感慨激昂，颇足动人悲愤也。

◎长沙悼黄记

湘省各界全体，假省教育会追悼黄克强先生。军警荷枪林立，气象极为森严。是日晴曦朗畅，观者极多。省教育会在提署后面之又一村内，汤芑铭在湘，自作威福，因恐有人暗杀，遂将又一村塞断，圈入防御线内。平民有两年之久，未尝至又一村一步。汤芑铭所设之天桥（汤氏兼任民政长时，曾造一天桥，由督署以通民政长署，亦在又一村内）及栅栏等件，今日见之，实不胜今昔之感。汤芑铭之威风，今日果何在哉？入场，场内牌坊高耸，国旗飘扬，军乐之声与军警弹压声，互相唱答。其声凄楚，盖心理使然也。头门有一联云：“赤手定神州，卒使日月重光。力毅心雄，首创华夏四千年奇局。大星沉歇浦，正值烽烟甫息。功成身死，泪随洞庭八百里横流。”入门约二十步之遥，有菊花山一座。再过四十步，即为军乐台。台之左右，相隔各百余步之处，各有演说台一所。由军乐台再进，又有一门。门内左右，张有白布帐棚，以达会场门口。此处有一长联，场之正中台上，悬先生遗像，上悬额匾一方，题“革命元勋”四字。两旁灯联，为“大名宇宙遗像清高”八字，台前有白布素彩，其下则为香案。左右设风琴数架，为唱歌处。台之两旁，以白布为幔，为来宾休息处。台之前方，为行礼处。行礼处之左，为新闻记者席。场内挽词极多，琅琳满壁。记数首于下。谭省长挽词云：“当世失斯人，几疑天欲亡中国。遗书犹在篋，此行吾愧负先生。”范代省长挽词云：“千秋功业承黄帝，六轡澄清愧范滂。”省议会挽词云：“请公治湘，曾代表三千万父老。无人护国，竟抛弃四百兆同胞。”此联太无味，不知省议会何以如此没有人才。新闻记者代表联云：“河口硝烟，珠江弹雨，汉皋血渍，金陵劫灰。把帝制推翻，只凭却一片丹心，两双赤手。辽阳鼙鼓，燕塞风尘，渤海狂澜，昆明骇浪，栋摧梁坏。正国步艰难，更谁作中流砥柱，万里长城。”追悼会筹备处联云：“战武汉，守江宁，拼万死以购共和。志决身先，镇南关月黄岗血。逐项城，覆清室，亦一怒而安天下。功成人远，潇湘夜雨洞庭波。”钟鸣八下，即行开祭，由赵代督军范代省长主祭。而献爵帛者，则为赵君。祭时，照上将例，鸣炮十一响。其祭文为古体，各界陪祭者，达数十人。

◎黄花岗上哭英雄（魂兮归来看取人间何世）

民国五年，为滇军及各界人士公祭黄花岗七十二烈士。主祭者则为军长李协和，朱省长等分立左右陪祭，状至肃雍。各滇军将士，且皆臂缠黑纱。计赴会男女，不下十数万人。不特东沙马路为之壅堵，即惠爱街一带亦然。盖因政军警学报商工等界而外，并有港澳以及各埠种种团体，暨海军全体赴会。较诸元年孙中山等公祭时，倍形闹热。以致花圈挽联谏词，如山堆积。摘录数联如下，以见一斑。“死国埋名，公等争先入地。挥戈挽日，余也何敢贪天。”（李烈钧）“石破天惊，几辈捐躯扶国运。风高日薄，三军洒泪吊英魂。”（朱庆澜）“慷慨成仁，千秋永留烈誉。共和无恙，九原应慰英雄。”（萨镇冰）“我辈亦忧患余生，愧乏成功，大雅今犹伤板荡。公等具乾坤正气，使其不死，中原当已赋澄清。”（广东省议会）“河岳仗生辉，死重广州三月。英雄甘下首，冢同民国千秋。”（北洋舰队全体）“七十二士悬首屠肠，光兹青史。四亿人自由平等，视此黄花。”（方声涛）坟场布置，亦甚壮观。场中满布生花盆景，均为农林试验场之物。第一座牌楼上，有生花大横额二，一曰“灵魂不死”，一曰“死士之隴”。旁以生花联二，一曰：“玄黄再奠，俎豆千秋。”一曰：“故老掩涕，秋风生悲。”第二座牌楼上，悬有数丈长生花横额，一文曰“中有碧血”，又生花联云：“励此晚节，鼓其雄风。”过此约进四五丈，即为祭品台，其中供有生猪生羊花斋美饌鲜果等物。过此约二丈，即为坟场之前，高悬五色旗，并以生花围绕丰碑坟莹，四周间以短篱，围绕生花绿叶。坟后搭一阔约四十余丈之棚，满挂挽联谏词。滇军各长官公祭烈士毕，又率同全军将士，在东校场举行战死将士招魂礼。并于演武厅左便搭一招魂塔，高约十数丈，四周围以白布，塔身书有“南护国第二军战死诸将士招魂塔”诸字。塔旁悬有挽联数十对，摘录如下。“流自由血，复共和邦。魂兮归来，看取人间何世。为国诛奸，为民除害。天乎未老，会招黄鹤他年。”（李烈钧）“死有余荣，百战河山豪骨尽。魂归何处，万行涕泪朔风哀。”（朱庆澜）一时观者数万人。致祭既毕，由朱省长发起，与李协和萨镇冰方声涛等六人，在场内手植石栗树一株，以留纪念。种毕，省长命取木牌，亲书某月某日广东省长朱庆澜手植等字样，插于树下。是日到者，滇军步队约三千余人，马队数十名。陆督军武卫军、朱省长游击队、海军练营、陆军第十二团、陆兰清游击队、萨镇冰海军共数千人。余则学校社团各界，如民党公祭团、广东中立救伤队、滇桂粤联军病院、大汉红十字会、粤省商团、广东公立第一学校、广东高等师范学校、南海中学校、番禺中学校、述善中学校、公立第一小学校、大工场全体国事同囚会、真光公司崩牙成纪念团，及宪兵警察等。人山人海，难以数计云。

◎追悼海珠烈士记

民国五年，共和既复，岑梁陈陆朱萨各当道及各界诸君，假坐广州东园，开大会追悼海珠死难诸烈士。正中仪门上，悬“魂兮归来”之生花横额，衬以生花联云：“名高赤县，河岳英灵。日落虞渊，风云惨变。”左右两门亦挂彩，门灯均生花构成，礼坛结构，非常壮观。坛前除悬各种旗帜外，并挂生花横额，文曰：“高山仰止。”又生花联云：“风马云车来去迹，黄蕉丹荔送迎神。”祭台设于正中，台后陈列诸烈士遗像，计有汤觉顿、谭学夔、王广龄、吕仲铭、岑伯着、左雪帆六位。由发起诸君主祭，行礼如仪。后岑西林代表王铁珊、梁任公、陈炯明、陆督军、朱省长、萨巡阅使等，相继演说，词均中肯。祭文挽联诔词，如山堆积。略录如下。黎大总统祭文云：“维中华民国五年十一月二十日，大总统特派秘书郭泰祺，致祭于汤浚谭学夔王广龄三君之灵曰：呜呼！茫茫大陆，孰若神州。蠢生彘息，万派同流。孰执其机，厥为豪杰。烂烂国华，孕于铁血。亦有文坛二三学子，奋身挺出。不顾其死，高会指挥。天清日曜，倏然变作。九蕲腾蹕，流星四裂。血肉横飞，黄农遗祚。蜿蜒来归，灵兮匪遥。相接，祀秘芬。昭此义烈，呜呼哀哉！尚飨。”岑西林联云：“来日甫艰难，何期毕命同时，正气惨遭山鬼劫。临风一凭吊，只剩满腔孤愤，悲歌凄咽海珠潮。”梁任公联云：“夫复何言，公实由我而死。岂谓不朽，民到于今称之。”又云：“仁义岂有常，恨不与臧洪同日而死。江山不改旧，太息微管仲吾谁与归。”陆督军联云：“前席借筹，公在早能平粤祸。水滨莫问，我来何处吊忠魂。”朱省长联云：“渔父有灵，同声一哭。蛻庵逝世，吾道益孤。”又云：“握手言欢，流连京雒。奋身赴难，惨浩风烟。”又云：“念生平排难解纷，乃遭惨变。为乡里御灾捍患，坐失贤豪。”

◎记湘绮老人之丧

五年，湘绮老人仙逝。其公子代功辈，以老人在日，曾以世俗丧葬，多用鼓乐，以及种种缛节繁文。此等热闹，与古礼大相违背。故于前清光绪中叶，因蔡夫人之丧，特遵礼经手订丧礼。兹老人逝世，自未便照世俗办理。爰即搜集遗稿，自始死一切礼仪，均遵照老人所定办法。老人年虽耄耋，而矍铄康强，一如往日。以故所有后事，均未预备。今年虽患胀病，而写字看画，未尝间断。一旦溘逝，所最费踌躇者，厥维葬地。兹闻长沙首富朱乾益之子，因请老人作文甚多，屡谢未受。遂以私有之麓山土地一方奉赠，因而诸多弟子遂拟联名呈请省长，葬老人于麓山。俾百世之后，老人学说大行之时，一般文人学士，得就墓旁建庐讲论云。

老人经学词章，多有超过汉魏诸儒之处。如《诗经笺》包括百家，与毛注不啻霄壤，《公羊笺》独探微旨，迥非前儒所能。其著述三十余种，尚有十余种未及刊行。其他如经史批评答问，与夫手写《十一经》《二十二子》七十余年日记，均希世奇珍也。

四川人士以湘绮旧曾主讲四川尊经书院，现时川中名宿，多出其门，相约追悼于尊经书院旧址。礼仪整肃，非他追悼会可比。其同院中重门庭院，咸饰素采，与祭帐挽联相辉映。堂中奉老人遗像，目光炯炯，生气见于须眉。遗像左右，悬老人生前自挽联，文云：“春秋表未成，幸有佳儿述诗礼。纵横计不就，空余高咏满江山。”中置宣德铜炉，香篆沈寂，古意盎然。四围缀以鲜花，祭品则陈于前席。致奠者均行四叩礼，由执事者引导赞呼，进退雍容。东西两壁悬祭文挽联，宋育仁一联云：“今年岁在辰，哲人云亡，不{敕心}遗一老。本师称曰子，先王制礼，有心丧三年。”谢盛唐一联云：“经术文章，集何郑马班阮谢专长，唐之后，诸儒未有也。嘻笑怒骂，为曾左彭李丁张诤友，袁以下，自郅无讥焉。”李明志明忠一联云：“千秋尊经阁，四海文章湘绮楼。”真足为湘绮写照。自晨十一时展奠，与祭者数十人。省垣各中小学校学生多结队而往，南城小学生，且以歌吊之，叩拜如仪。午后一时，门人合食于厅上，追述先生之嘉言懿行。至暮乃散。

◎李军长之荣誉（崇德报功 当然如此）

民国五年，共和再造，日月重光。滇军第二军军长武宁李公烈钧，转战万里，劳苦功高。既率师入广州，广州市民开大欢迎会于东园门。高搭彩棚一座，方二丈许，四围摆列盆景生花，继以花串。棚顶高悬民国国旗，及周番旗帜。棚口则悬生花结成欢迎二字横额，布置极为夺目。此系演台，以便李公及各政军官长出席。棚口复搭平台一座，以便各界演说。台前直沿二马路之旷地，则四周搭以竹栏，并指定各界应驻地点。中央一处，则摆座位百余，分为议员报界社团代表女界代表各席。两旁另搭平台，系为音乐队地点，其外则男女学界普通界亦均环列。至东园之内，则以大堂正座为政界休憩室，旁座为记者休憩室。楼上洋厅，则为招待李军长及滇军各军官开设茶会地点。其余两旁船厅，则为各社团及男女各界休憩地点，均派招待员，应接极为完备。至其场中地点，则由警厅预派游击到场弹压。故虽是晨各界人士，陆续到场，人山人海，而秩序仍得井然。至十二时许，则各学校各社团各界来宾，鱼贯蝉联，纷纷驰至。及一时，则萨巡阅使陆督军代表雷殷王肇基朱省长先后到场，当由各招待员迳入东茶园话。二时，李军长协和亦已乘舆而至，随行者则有成桃张开儒方闻涛等军官，及军队十余名，则军乐队各学校及商团均奏乐欢迎，音韵悠扬，喧闻耳鼓。李军长向众脱帽，鞠躬致谢礼毕，入园小憩。及至二时，正主席罗晓峰即请李军长朱省长萨巡阅使陆督军之雷王两代表王警察厅长步登演坛，由罗正主席宣布开会理由，容副主席宣读欢迎词。干事长陈罗生宣读各界欢迎词。次第演毕，李军长起立答谢，并述其前此蓄志革命之苦心，现在中国危岌之大势。痛快淋漓，声泪俱下。全场感动，掌声如雷。旋因演说未毕，而过于辛劳，特着钟秘书长代其宣演政治问题四端，及方师长雷代表等相继演说。直至四时许，始行散会。是日到会人数，逾十万人，各社团体则共十四处，而以男女学堂为最踊跃。公医学生担任纠察，岭南童子军担任维持会场，均极得力。故能秩序井然，异常闹热。是日呈递纪念品物，计共八处。岭南学堂本有名誉旗一枝，因赶绣不及，迟日补送。兹将赠品及各团体名称列下。计开写真专门学校送木炭相一座，中华佛教总会广东支部送白宣炉一座，广东东山培正学校送绣屏一座，广东南洋兄弟烟草公司送银爵一座，普育学校十八街自治研究社送银花插一座，南武中学校送图画一张，花地培英学校送银爵一座，广东公医学校送手杖一枝。综观是日市民大会，闹热情形，实为吾粤空前未有之盛举。而滇军转战千里，李军长劳苦功高，亦足以震古铄今，长留纪念矣。

◎东施效颦

湖北王子春督军，居常与幕僚闲谈，极窃慕张南皮之为政，谓其治楚之得力，全在《劝学篇》。吾亦欲着一书，以劝世训俗。惟吾不文，殊属恨事。于是某秘书仰承意旨，特为代编一种解释政令条教之白话浅说，名曰《训俗篇》，期与《劝学篇》并传不朽。其内容大别分十二章，名目如下：（一）尊重师道（二）公民资格（三）自治谈（四）保卫团（五）劝买公债票（六）尊孔说（七）敦孝弟（八）良心解（九）释自由（十）释平等（十一）释自重（十二）说服从。总共万数千言，刊印五万本，颁发各厅道县局所学校军营工厂，广为传播。并由省署训令讲演团各县宣讲员按书讲演。兹将其自序弁言原文，附录于下，阅者即可窥见全书之主旨。（占元少习军旅，未尝学问，粗读诗书，略知大义而已。今日以武人而治文事，若涉大水，其无津涯。顾念为治有根本，正心诚意以至治国。孔子尝以教我，孔子之书，无人不读，然读之辄忘，或不明其义理。忝为一省之长，有教民之责。姑本其所知，以为浅说，文言之则所不敏也。国必有教，孔子之教，无所不包。中国以此立国，自当以孔教为国教，作尊孔说以树人伦之准。人人能亲其亲，能长其长，则天下自平。故曰：敦孝弟，孝弟者，人之本也。本立则道生。传道者师，师不尊则道不重。尊师重道，此天经地义，学者不可不深长思之也。率性之谓道，性即良心。性相近，习相远。作良心解，道也者，不可须臾离也。孔子曰：谁能出不由户，何莫由斯道也。可见自由者，必由于道。释自由，使人遵道而行也。舜人也，我亦人也。人人由道，人人可为圣人。释平等，所以重人格。自重者，为圣为贤，自为之也。圣贤之道，莫不有规矩。政令者，规矩也。说服从，使人遵政令而纳之于规矩，作公民资格自治谈。循乎规矩而后谓之公民，而后谓之自治，要之莫不由于道也。古者守望相助，出入相友。由身而家，由家而乡，皆由自治以推己及人者也。作保卫团说略，明乎自治之一端，劝教子弟，勉为好人。管子所谓为人父者，慈惠以教。为人子者，孝弟以肃。为人兄者，宽裕以诲。为人弟者，比顺以敬。此为自治之根本也。齐家治国，其道本一。爱国心理，人所同具。贫不能自存，买公债为救国之一策，是不可以不劝。欲救国家贫，端在实业。戎马之暇，当分劝农劝工劝商，专着一篇。今兹所着，十二首，名其篇曰训俗。盖不敢高谈法理，略本所知诗书大义，以共相劝勉而已。）

◎有清遗民（人各为其主未可厚非也）

长沙简纯泽，前官山西，颇着政声。民国成立，即埋名隐迹于山东劳山烟霞洞。近忽于月前踏海，尸浮海滨。有见者谓以丝衣敛发，身间系以缟巾，内裹经文数卷，饼洋十枚，并有楷书绝命词云：道德仁人，遇见尸身，即掘土穴，深埋海滨。毋用棺木，藁葬以薪。面朝北阙，志继先臣。经文殉死，愿通万神。马鬣封后，树一墓珉。镌四大字，有清遗民。所余银饼，谢意聊伸。海滨之人，当即禀官勘验。谕令葬以棺木，树以墓珉，以遂其志。其经文书籍名片等，亦均焚化于墓侧云。

◎周公末路（男儿报国争先逃）

帝制余孽洪宪巨子杨度，自从六君子之魁，变为八罪魁之一后，伏居天津德国租界，拥资以雄。以为我国警权不及，可以长托庇于德人保护之下，而莫予毒矣。孰意欧战影响，竟间接又间接，而及于彼之身。我国与德国绝交消息传至天津，杨尚不觉自处之地，即日将由中国政府接收。故绝交之第一日，彼仍优游如故。及第二日，忽恍然大悟，知德租界瞬将回复为中国地。己身为中国政府下令通缉之人，俄顷间即可捉将官里去。遂东西奔走，思于德界外之他国租界中，择一容身之地。孰意他国租界，偏又拥挤非常，竟无空房可住。正在情急之队，幸遇有某君旧住之房屋，在英租界内。某君前因该房年久失修，有倾圮之患，徙而他去。今杨因势迫，亦顾不得压毙危险，因即尽室移居。有遇之者，谓其情状可怜，大类丧家之狗云。

◎狂奴故态

印铸局副局长易顺鼎氏，世所称为龙阳才子者也。近该局局长吴笈孙氏，为易详请给予三等嘉禾章。向例此等公事，从无干驳者。易氏自谓可以垂手而得，不料此项请奖呈文，竟未蒙照准。传闻黎总统阅此呈后，即将易顺鼎三字之旁，加以朱圈，并谓易某每天听鲜灵芝戏，有何劳绩，可得勋章，应不准云云。易氏懊丧万状，语人曰：“吾本不希罕这个三等嘉禾章，但黄陂不准，却是不服。缘从前黄陂继位时，我曾致函劝他谦辞。黄陂怀恨在心，故以此为报服。”云云嗣易氏闻宪法会议，已打消大总统之荣典权，不禁拍掌呵呵曰：“这回也出了吾这口恶气。”又闻喜听梅郎戏之冯某，曾得三等嘉禾章，易氏深为不平云。

◎官场真是戏场（第一出送盒子第二出打皂王）

自帝制发生之后，全国之视线，一律倾注于《大登殿》一剧，而于社会上之奇奇怪怪，遂置诸不议不论之列。继而为西南之风云所阻，方演至老王宴驾一幕即止。社会上又得活剧两出，第一出，好似卖胭脂，实是送盒子。第二出好似刘秀走南阳，实是打皂王。

第一出演于奉天。系奉省某候补道员，为河工保举，在奉候补，将近十年。因官运大坏，并未得差，竟闹得吃饭问题，亦无法解决。适值去冬帝制发生，该道员闻之，不禁官兴大发曰：“此其终南之捷径乎。”于是上书于十三太保中之御儿小段，极力歌功颂德。御儿大悦，当委以某局提调，并密饬其联络官界，上劝进表。该道员喜极，日夜奔走，为皇帝尽唇舌之义务，以为封妻荫子在此一举。不料御儿被逐，皇帝竟化作南柯一梦，而该道员之饭碗，亦失手坠地。两肩一口，妻妾交谪，该道员无可如何，乃一任其妾与外人交结。孰意未及十日，妾竟席卷而去。现在该道员气极而病，外间有知其事者，遂为之语曰：某妙计高天下，赔了夫人又折兵。

第二出演于吉林，其正角亦道员也。该道员本一穷酸出身，既入仕途遂变其本来面目。初则运动外人，为之钻营得一局长，竟认某外人为义父。出洋十三万元，求外人代为运动，实任道员。印把一经到手，遂大刮地皮。刮至三年之久，地皮已刮穿二十四层，该道员居然富家翁矣。惟其所得之款，皆入一己之私囊，分文未寄至家中。恐一寄至家，其兄弟将为沾染也。故其家仍旧四壁萧然，不蔽风雨。今春家中实不能支，有一胞弟至其任所，请解囊五百元，以为全家人之糊口计。该道员不应，且对其弟哭穷。其弟谓兄果一贫至此，何眷恋某妓，一夜之间，竟耗去五百元，岂家人反不如一妓乎？于是大触其怒，当即大使势力，喝令如虎似狼之恶役，将其弟押起。其幕友闻之，齐来解劝。该道员怒仍不息，愤然曰：“吾观汝等之面，从轻惩办。把这种混帐东西，麾诸大门之外就是了。”其弟亦不相让，必欲求其禁押，否则立须分产，非实演打皂王一剧不可。众幕友调停三日，仅予其弟羌洋一百元，使其归家。其弟乃愤愤而去。

◎重婚之法官

鄂省陆军审判处长程某，于黎总统为鄂军二十一混成协统时，即充该协执法官，深得信任。故历任都督将军，以黎故，皆未将程更劝，声势至为显赫。程原有一妻三妾，以妻貌陋，谪居原籍，不常在省。上年程因闻汉口著名药店叶开泰主人有女，美而多金，竟托媒以续弦谎叶家，叶以其为起义伟人，前程远大，果许结婚，于两月前迎娶。嫁妆之丰，一时无两。赤金水烟袋，亦有二支，约共费银三万元。缘叶姓为前清汉阳叶昆臣爵相之后裔，家财本极富厚也。此女入门后约二十日，始知其家尚有豕妇，大为愤懑，即欲以重婚图财起诉。经人说合，以兼祧正室礼相待而止。然叶女终闷闷不乐，日前因遭其第二妾詈辱，以名门淑媛，列此下乘，羞愤无地，遂自缢毙命。现叶姓虽欲提起诉讼，无奈势力不敌也。

◎运动家之如夫人

汉口征收局长某，到差以来，违章苛罚，叠被商民控告有案。而卒能保全位置，未致撤差者，则以其手腕灵敏，运动通神。且在宦途既久，历任差厘，于种种舞弊法门，皆已洞悉。故屡被告发，终能弥缝无事也。然定章任局长者，多只一年，即须瓜代。某在职现已年满，其所入几何，外人固不得而知。然既以填亏空，又复肆挥霍，其暧昧用途，尤不可问。则其以国税收入，挪填亏累，盖意中事。故一闻当轴有委督军公署秘书长前来接办之议，即惶惶然如不可终日。知非出奇计，不足以制胜于入。某有如夫人，向与财政厅之如夫人相识，乃授意令其以接厅长如夫人观剧为名，并具午餐焉。夫人既渡江来汉，为时尚早，戏场犹未开演。某如夫人遂恭约厅长如夫人至某珠宝店，赏鉴珠宝。该店主人接得财神，其喜可知，乃尽出其收藏之珍珠手钏十余副，罗列案头，任听选择。一时光怪陆离，耀人眼目。就中尤以某一副之珠，皆精圆而大者，厅长如夫人爱不释手。询其价，需八千元之巨。欲行购买，则偶尔出游，断不至携带如许巨款。如竟割爱，又觉不舍。当此事处两难之时，某如夫人乃云：“太太既然见爱，尽可携归。此间店东与敝寓向有往来，即令其暂入我帐可也。”言下，店主人诺诺维谨。厅长如夫人，亦竟不谦逊，将此价值八千元之珠钏，轻轻笼入袖中，与某夫人相偕同赴剧场，尽兴而散。次日夫人渡江返厅，又逾日，某遂奉札联任矣。

◎知事施非刑

湖北各县知事之贪劣横暴事实，久矣充塞于吾人耳鼓，言之非片楮所能详尽，兹尽述巴东县知事冯锦文之事。该县有乡民许某，因财产纠葛，在县涉讼，挽乡老周勉之作证。周固年长而多须者也，其言又戇直，大触冯怒。斥之，不服。冯曰：“常言嘴上无毛，说话不牢。尔嘴上固有毛，而且多者也，何说话不牢之甚？应将汝之毛拔去，以后说话不牢可也。”于是唤剃发匠至，当堂剃周之须。乡老甚惜于思，双手扞嘴，伏地大呼冤屈。发音声浪为手所遮，嗡嗡不知何语。冯则喝令速剃，以二人强制之。不刹那间，乃翁嘴上之丰髯，遂为牛山之濯濯矣。观者皆哄堂大笑，冯甚为得意，周则痛惜欲死矣。

◎知事弃发妻

湖北宜城县承审员景晓藩，亦分发湖北之一知事。因在省赋闲，经该县知事朱介曾保充是差，携有产妇往宜。兹省城忽有一张氏妇在各署稟控景灭绝人伦，不认发妻，并刊冤单云：景本江苏一穷措大，前因乏资赴京投考，由氏变卖衣饰，以充旅费，因而取得官吏资格。诟归途道经上海，又以术骗手段，挟得一姘妇，置伊于不顾。今闻其在宜城为官，星夜赶至。景竟阻其登岸，旋经同乡说合，方允收留。氏由本乡带来仆妇一人，景深恶之，不三日即遣去。氏孤立无援，景乃加以种种苛待，甚至毒打，欲置之于死地。氏侦悉其谋，由署后逾垣逃出，匿身于棉花丛中一夕。次日以其谋杀各情，稟控于知事署。朱知事有景先入之言，不问是非，当堂断令离婚，勒逼画押，派差押送出境云云。噫承审亦司法官吏，而敢于非法如此。朱知事即念在同寅，难于处置，亦应善为调护。岂以弱女子为可欺，而可任意蹂躏耶？

◎知事讨没趣

江西永修县知事朱希云，因洋员会勘烟苗，业已抵省。知禁令森严，不容稍懈，亲自轻衣小帽，下乡暗查。日前在北乡某村，约离城五六里，访察该地有无种烟区域。适日光正午，口中极渴，乃往一农家乞茶。当时农夫已均赴田耕种，惟有少妇二人，在室内作女红。朱知事走入柴扉，口称大嫂乞茶解渴。少妇见朱知事衣裳楚楚，器宇轩昂，知系临门贵客，忙斟一杯浓茶，递与朱知事。朱知事作致敬之状而言曰：“不客气，不客气。”少妇误会其言，变羞成怒，立将茶杯掷之于地，口中骂曰：“你还嫌老娘不客气吗？”朱知事大惊失色，急欲剖白，而该妇骂不绝声，不容知事开口。知事知不能与之剖辩，只得大呼罢了罢了，反身而出。

◎知事拿妖怪

吴县知事孙少川，近因劝勘烟苗，舟行至蠡墅镇。见有身穿灰色布奇装异服之人，年约三旬，招摇过市，口中言语不伦。经孙知事飭乡警拘带警局，询问时，视其所服之衣，似军装，又似西装，遍用红绒绣成蝇头小字。外围金线，其数何止千万，目力不易辨认，且均奇体怪书，无一可识。其鞋袜裤上，更有种种似花非花之赤金纹色，另缀丝须，穷极奇异。比孙知事传询其姓，答称百家姓上尽系我姓，名号惟天得知。询其从何到此，答云：“自天上下来。”问其何往，竟称遍历天下。尤有许多不伦之言，口音类似湖广人，闻之咄为活妖。当因观者拥挤，合市尽临。孙知事恐人多滋事，飭警拘押舟中，带还苏州县署该办，因其在乡造作怪言惑众也。

◎知事袒小窃

鲁省齐东县令廖某，东三省籍。前清翰林出身，旧学极富。终日以诗酒消遣，置地方事于不顾。对于人民诉讼，尤好任意戏弄之。乡民某被窃大小牛二只，鸣于案下，并扭获窃贼，求为惩办追赃。廖升堂，两造匍匐。廖询悉颠末，援笔立判曰：着窃贼将所窃大牛，璧还原主，以免损害权利。小牛一只，本应充公。姑念该窃贼深夜奔波，颇不容易。将小牛赏于窃贼，以作资本营生，免致流离无业，以昭公允，仰即遵照云云。事主以所判不合，欲再申诉。廖即呼差役执行，不容分说，拥推下堂。诸如此类之事，不胜枚举。

◎知事闹新房

山西文水县富绅安姓，与儿完婚，该县知事丁常恒前往道喜。安绅设盛筵款待，丁某扬扬自若，巨觥自饮，不觉大醉。口唱淫词，不堪入耳，竟到新娘屋中，逢女人即拉，女宾急趋避之。丁某跻近新娘，将两弓鞋握住。新娘畏其野蛮，退身炕里。丁嫌其不遂，复就抓新娘裤裆处，来宾观者大哗。有某少年气愤不平，见知事如此混蛋，力牵丁出。某老羞变怒，吓令拿人。幸安绅一再谢罪，丁始含恨乘舆而去。一时全城哄动，妇孺皆骂丁官卑鄙不置。

◎知事闹笑话

无锡县知事杨梦龄，自常熟县调任到锡。接任以来，竭意与邑中有力之绅商接洽。其敷衍手段之工，为历任知事所不及。近来该邑绅商，纷纷请杨知事宴会。有雇画舫者，或有另择清闲之处所者。凡席中陪宴之客，带有妓女，杨知事竟能降尊与妓女猜拳行酒。有时醉眼朦胧，将妓女搂在怀中，周身摸索。旁观者见此情状，谓有失行政长官之尊严，目不堪睹。而杨知事方乐不可支，心胸大畅。一日，邑绅杨某邀请西洋人，雇画舫往游太湖，并宴请邑中绅商。是日杨某席中，并未请有县知事在内。诂此日杨知事适赴某师范学校参观纪念会，在途遇某绅，闻杨某在太湖宴客。杨知事因杨某系熟人，坚欲与某绅同去赴宴。某绅无奈，即与杨知事同舟前往。同席在座三人，以今日未请县知事，而知事忽来赴席，莫不匿笑其能到处和调。而杨知事则心中大乐，入席后，连饮白兰地酒十余杯，以中国言语与西人剧谈，西人对之，漠然无语，且颇厌其哓哓不休。惟是时杨知事已大醉，席间语多不伦。不识因何事故，忽起立夺杨某手中切大餐之刀。而杨某正在切食西餐，口舌几为割破。席间陪客见之，莫不哄堂。

◎知事拍马屁

江西临川县知事傅岷孙，对于应酬一道，素极讲究。近因天气炎热，特派干员在本县采买大西瓜一船，另派护兵二人送省。用土车载入城内，分送各当道。计李督军大西瓜三十个，戚省长大西瓜三十个，罗财政厅长二十四个，陈政务厅长二十四个，其余各处或十二个、十个、八个、不等。大要以官位之大小，分西瓜之多少。午间派来之护兵，又将木盒三个，送入公署。表面装璜，极为精致。内中何物，不得而知。闻系送省长寿礼也。

◎袁公子碰碑（故宫禾黍泣残阳）

袁项城秉政数年，积蓄之私产，不下千万。即以新华宫之古玩器皿论之，亦在百万左右。当项城死后，未及百日，诸公子即因争产问题，大起冲突。攘夺不已，继以用武。幸有徐菊人在侧，出其老前辈之面孔，力为排解，始免骨肉相残之祸。然诸公子自项城出殡后，已将府内物件，不论公私，一律运回彰德。且将清室历代珍藏之宝玩，亦搬回原籍。其重大之物，不易搬运者，则捣碎之，以泄其忿。内中有清室所藏之名贤真迹甚多，如三希堂之碑石，亦为某公子打碎。此碑外间不可多得，项城在日，曾刊印数十部，分送各要人。为某氏所把持，暗中扣勒，以致外间流传颇少。遭此不幸，遂令同归于尽。从此遗迹不复留于人间，不亦考古家之伤心事乎？黎总统曾派某某两员至新华宫查勘，该员将此种情形，报告总统。所有从前府内之什物，已被袁家诸公子拆毁一空。惟其二公子袁豹岑所保存书籍，尚不在少，皆经豹岑亲手封藏完好，置于流水轩内。并将公有、私有各种图籍，标识分明，尚有条理。舍此而外，几无一整齐之物。总统据报后，喟然叹息曰：“项城身后，竟致如此。幸而豹岑尚知大体。”言时，叹息不置。

◎省长困于群小

广州省城为通商繁盛地点，殷富固多，而贫寒者亦属不少。加以前年之水灾、去年之兵燹，流离失所，变为乞丐者，所在多有。故沿途乞丐满目，几成为城中一种特别点缀品。丁巳新正六日，晚膳后，朱省长庆澜独自一人出署，徒步闲游。至长堤，有一七十余岁之老乞丐。见省长皮袍小褂，虽不识其为省长，亦知是富贵中人，遂向之求丐。省长悯其年老，惻然动念，解囊给以银毫。各乞丐见之，以为如此阔绰，可望其大发慈悲，以求沾润。一时群乞追随围绕，叩求恩施者，至二三十人。少顷，愈聚愈多。省长窘极，乃就近向街边钱台找换铜元，分给之，始得脱出重围。

◎盛氏之阔绰

常州故绅盛宫保之妻庄太太，近为故夫营奠营斋，颇为忙碌。先在杭州之灵隐寺设水陆道场，超度亡魂，兼自庆五旬寿辰。盛氏族人因之成群结队，联袂赴杭，车乘翹翹，湖山生色。仅仅游资一项，竟有数千之巨，可谓穷奢极欲矣！近又在原籍东门外天宁寺大做水陆，日前为功德圆满之期。庄太太亲自到常，一时亲戚故旧，逢迎恐后。即于翌日下午回沪。因沪上某寺水陆，又须开场故也。

◎镇守使延师条件

江苏某镇守使，欲聘一老师宿儒教读其公子。因念吾国旧社会之习惯，视教读先生为至高无上之位置，莫不竭诚尽敬而崇奉之。该使思得一特别改良之崇奉法，大开私宅会议，规定延师待遇法四条。兹以道路所传，得其条例大纲，亟为披露。俾四海文人学子，咸知该使礼贤下士、尊师重道之高风也。（一）月修四元。（二）每日午后步行到该宅上课，傍晚散课。不供膳宿，并不供点心。（三）居停主人不相见。（四）不用关聘。

◎洪宪遗臣（早应该侍先帝于地下）

筹安会发起人严又陵，以南方要人请办帝制派。知大好京华，无容足地，特萧条补被，匆匆出都。吾人追想严氏当壬寅癸卯之交，中国新学方始萌芽，以其早岁留学外洋，富于译才。如《天演论》《原富》诸书，莫不脍炙人口，称为新学泰斗。乃晚节不终，为袁氏金钱利禄所诱，至列名筹安，遭全国之唾骂，不能存身首善之区。且彼于发起之时，非不明知帝制之违逆人心，必至失败。不过一时为金钱所眩惑，以致铮铮令名，扫地以尽！殊可惜也。

◎稟牒笑柄

扬友某营官，皖人也。目不识丁，一切来往公文，皆由幕友主持。乃前月奉调，移营才毕。忽又撤任，某茫然不知其故。继有知者，传出内容，一时传为笑谈。盖军营惯例，移扎之后，应上一稟于上官，请示期点验。此次某营官稟词云：某自奉札移屯某处，安营筑墙后，即日极力治下部。务使其精强坚卓，光明雄伟，进退呼吸，骨节灵通。于出入起伏，尤为讲究。方圆转折，无不按图办理。幸下部亦仰体某之训练，一遇精力疲弱，即行振刷精神，再接再厉，健锐异常。虽未敢谓百战百胜，亦断不致临阵却退也。某自相随麾下以来，沐恩难报。惟有极力鼓舞下部，使其精壮可用，仰酬万一云云。此稿传出，观者绝倒。闻上官一见此稟，始而大怒，继则大笑。知其于部下二字，一时颠倒误写。然公文至此，实属疏忽太甚，遂下撤任之令。而某营官终不知其何解也。

◎劳乃宣碰钉子

当前岁袁氏帝梦沉酣之时，有自命前清遗老劳乃宣者，以不投机之复辟邪说，进之洪宪皇帝，致被赶出都门，逃回青岛，一时国人无不谓其丧心病狂。及宣统寿辰，劳又潜行来京，托名祝寿。外间鲜有知其踪迹者。据清室内廷消息，劳于清帝寿日，除恭折叩贺外，并另上一奏折，内容甚为离奇。大意以为方今世界各国，德势最为强盛。如帝与德国皇室联婚，并赶德留学，璧还青岛。以德国之力，扶持清帝复掌中国，诚属易如反掌。折末并谓现在领班军机总理大臣庆王业病故，请清帝封伊为总理，以继弈之后。瑾太妃阅折后，面加申斥，原折掷还，并饬此后不准再行妄奏。劳氏遂怏怏捧折出宫而去。

◎总长宴客趣闻

陈澜生尝在德昌饭店，招宴财政会议全体会员。以宾客众多之故，厨司烹调，应接不暇。自八时前后就席，至十一时左右方散。众客闷坐多时，倦容可掬。有某客因久坐席间，阑珊已极，一时误将吃大餐用之白布一方，揣入襟底，而布角则外露。一瞥之间，即可辨认。及酒阑客散，侍役收拾器皿，检点白布，竟缺少一方。旋被其瞥见，即指某客为窃取。而某客于大庭广众之中被役所窘，一面声明误为自己手巾，故尔揣入；一面厉色申斥，责其不应如此无理。事为某次长所闻，即嘱令某庶务送交警厅处罚。嗣经多人缓颊，令侍役向某客谢罪，始得寝事。

◎兔官僚

百顺胡同韵秀堂迟喜者，廿年之老私坊也（即男相公堂子也），故已数年，有子名迟俊者，色艺不佳，因而庸碌无闻。迟俊生二子，长名大盒，次名二盒，在未取消私坊以前，曾在各园唱演花衫戏，艺皆平常，无足道者。惟二盒颇饶姿色，当时甚蒙士大夫之赏识。及至警厅禁止此项营业后，大盒二盒亦不欲操此不堪之业。惟于向日旧客，仍然应酬。迨国体变更，迟家二盒因闻官民平等，无阶级之可言，乃竟异想天开，欲做民国之官吏。因无援引之人，遂忆及与伊情爱最深之乐十三者，为京中有名之大腹贾，且与军政界要人多有来往，做官捷径，无愈于此。主意决定，乃伴乐十三于花天酒地之中，恣情纵欲，无微不至，人皆目为交颈之侣。久之，乐十三遂在某衙门为其谋得一差遣员之位置矣。

◎总统府闹鬼

总统府自由东厂胡同迁至南海后，常发现守卫兵士无故昏仆于地之情事。日前忽闻府中传说，某夜某处灯火辉煌，照耀俨如白昼。及遣人往视，则一无所有。于是府中人相传闹鬼，推测此鬼，非袁世凯厉气未散，有意作祟，即阳夏死义诸将士，在天之灵，见政治毫无进步，国家日现危机，将向总统诉其一死之冤也。

◎雍和宫打鬼

北京雍和宫，向例于阴历正月晦日，有跳步札布之典（俗呼打鬼）。民国而后，该庙庶务得木奇，呈请蒙藏院届期依例举行，业经该院照准矣。

◎信江中学之鬼

江西上饶信江中学校有徐某者，一日晚间十一钟，独坐房内。时夜既深，校中人多入睡乡。忽有人以指弹扉，询以何事，对以乞火。声音颇类某学生，启户视之，则一素不相识之白发老翁。徐向有胆量，严词诘问。老翁亦不之答，但手舞足蹈而已，约数分钟之久。徐自觉魂魄都迷，颠倒不能自主，遂大声呼救。声音一出，老翁忽然不见，徐即吓倒于地。后由校中人灌以姜汤，始苏。然自此之后，昏昏懵懵，时吐鲜血。归家三日，一命呜呼。乃同月二十三日，教员郑某，亦于二漏将残时，兀坐观书。忽有一似鸦而尾长之鸟，自窗棂入，兀立灯前。视之一目流露，颈部如被刀刺，鲜血淋漓。以木尺拨之，不动，至天曙，命校役将鸟付烹，历半小时之久。启鼎视之，鸟忽自鼎中一飞而去。该教员因此邑邑成病，与徐某相同。近世科学昌明，破除迷信一语，几于无人不道。而此等鬼怪新闻，终不免于时或一见。美国某博士且有鬼学之发明，岂鬼神迷信，一时尚未能破除耶？

◎铁算盘

浦东老白渡地方民人张金和，开设豆腐店。历有年所，营业发达，积蓄颇裕。一日上午，忽来江北难民男女老幼二千余人，踵门求乞。中有一年届五旬之老嫗，首先入门，向店主乞得豆腐浆一碗。乘间详询店主姓名年岁，纠缠不清。旋由巡警到来，将若辈驱逐出境。事后检点箱篋，始知内储衣饰不翼而飞。计共失去绸皮衣服三十余件，现洋二百元，钞票二十五元，铜元十一千，金压发金戒等，约值五百余金之谱。当由店主投该管三区一分驻所报请飭缉，孟警佐据报，大为诧异。特亲自前往踏勘，以便设法踪缉。而该处附近居民，僉谓该难民等实为江湖上一种铁算盘者所乔装。以故远近往观者，人山人海，咸称奇事云。

◎狎邪鬼

北京王广福斜街凤楼茶室之排六妓女，某晚接一面貌可异之客。该妓望而生畏，不敢进前。该客慰语曰：“不必害怕，你我系前生夫妻，故来看你。”及至十一钟余，妓在屋与该客对坐。谈笑间，忽见该客颜色惨变，转瞬形影皆没。该妓大骇，惊呼有鬼。茶室中人奔入屋内者，皆有不寒而栗之像。该妓遂亦神经昏乱，或哭或语，如疯癫然。

◎瓦石纷飞

济南南新街女子蚕业讲习所。一日晚间学生就寝后，院内忽淅沥有声，已复瓦砾纷飞，窗上玻璃，为其击碎数处。全校学生埋首屏息，不敢出声，后有女仆开户大呼。于黑暗中见有二人在院内东西奔驰，争掷瓦石，大声诘之，自应为鬼。女仆惶恐退缩，喧扰竟夜，至曙始息。晨起视之，院内瓦石，有数百斤之多，殊咄咄怪事。据一班揣测，多谓系省内无赖，凯觎女生，故深夜入校，为此恶作剧。然闻其所掷者，济上附近并无此项瓦石，亦可怪也。

◎肉金刚

海陵北关外古北山寺，旧有肉佛一尊。宋代时有僧人，修炼多年，不食尘俗烟火，故后，积久尸身不坏。里人为之装金。作一睡佛像，外衣猩红袈裟，至今面气如生。赫然一龛，帟幔深垂。平日卒无人轻于启视，近有香客，匆匆前往焚香，无意牵入佛幔。不觉惊动睡被，肉佛遽尔作坐起状。乡愚一见，不知是人是佛，仓皇无措，心神恍惚，惊吓仆地，已奄奄一息矣。

◎东岳大帝之后

武昌有吴戴氏者，半生守节，抚二子。长曰家亮，次曰家万，现均成立。里人皆嘉其操，呈请黎大总统表其门闾，以为矜式。近日氏忽膺疾，医药无效。有河南人刘某，自称为阴无常，能于阴司设法，免其一死。家人为氏延至，刘云：“氏已为东门外东岳大帝之妻（武昌东门外向有东岳庙一所，每年三月香火极盛），系已为之执柯。氏子亮、万信之不疑，乃率同眷属赴岳庙认亲。一时传为奇谈。呜呼！刘某固属荒谬，而氏子之愚，亦不可及也！”

◎宅怪

厦门禾山下八保某乡黄姓，建筑新屋，一座两进，护房两行。黄仅一妻两子女暨女俾佣媪，计六七人。屋既落成，即移居后进，其前进暂作厨房及婢媪宿舍所，养牲畜亦在前进。其厅堂常于夜间闻多人行走声、哭声、笑声。婢媪从房内隙中窥之，见有男妇十数人，皆着古衣冠，高约二尺许，在地上或立或坐、或哭或歌，千奇百怪。一闻人声，即寂然而渺。又于日间常见大蛇长二丈余，以尾悬之梁上，下垂其首，掉舌吐须，凶恶可畏。屋主患之，延请术士镇压，而扰如故。近更于夜间大烹大享，将牲畜宰杀，围坐畅饮。天明检视，失去鸡鸭七头，其毛骨置诸庭院中，散布满地。次夜又失去毛猪一只，约重百余斤。猪肉吃尽，仅遗猪骨一把。不知为何怪。现屋主不堪其扰，挈眷移避他所，将该屋暂行锁闭。虽许借人居住，不收租金。然闻其种种怪异，无有敢过问者。

◎浊水治病

武进向有所谓刘仙师者，设坛扶乩，病者争向乞方。其因药不对症，误服致命者，时有所闻。而无知者，仍趋之若鹜。不谓日来在青龙桥，更有荒诞之事发生。谓有仙人指点，桥下之水，可以治百病。于是远近争取仙水者，踵趾相接。远道之人，多雇舟聚队而来，俨如天竺之香市矣。不数日，忽又传仙人已迁至北门外某大树乡之井中。于是一般迷信之辈，又群往彼地取仙水。地方官取放任主义，不加禁阻，可笑亦可怜也。

◎旧人魂附新人体（但见新人笑那闻旧人哭怨气所郁当有此变）

江西某处长之眷属，寓观音巷某号门牌。近日发现一种奇事，言之令人骇异。某籍隶巴蜀，宦游燕京。其原配某氏，在京身故。殓殓既毕，停柩于寺。未几，琴弹一曲，复换新弦。过门之后，相安无异。及来赣寓居，亦安静如常。新年，家人皆向某氏之遗像拜叩，独继室以为平等，不欲甘拜下风。孰料某氏灵魂不灭，恶其无礼于己，竟于日前附该氏之体。当发现之始，人咸疑为沾染怪疾。及某察其声音言语，酷似元配，纤毫不爽。其所说者大都怨恨谴责之言，谓尔等在南方享受荣福，苦我于幽燕冷寺，消受许多饥寒。某不胜惶恐，遂托其生前闺友，现寓于松柏巷莱道台之夫人，前往劝慰。彼此言语往来，合则垂头哭泣，不合则厉言以对。某无法，只得祷祝，多请僧道烧钱诵经，希图忏悔，限期着人至京搬柩回籍。某氏云：“僧道之事，尽属子虚，无须破费。至搬家回籍，须请担保，不可违期。”近仍时去时来，继室骨瘦如柴。此真咄咄怪事，怪异之事，子所不语。今所发现者，竟确切不虚，倘亦哲学家所谓灵魂不灭者乎？

◎活鬼

萍乡文景卿家，其元配逝世数年，续弦未几。元配初则在室内不时出现，隐隐约约，不即不离，致令继室无日无时不在恐惶之中。往往夫妇两人熟睡醒来，则见元配亦在同寝。久之司空见惯，畏惧之心，因之稍弛。其神形体态，虽俨然如在，然可望而不可即。至今日犹属如此，不能绝迹。说者谓此系夫妇男女之间，感情团结太甚之所致。然乎？否乎？

◎范郎屡赴天台约

湖北黄冈县周山铺地方，有范生年三十许，馆于近村。前月上浣间，忽有二童子造馆。衣衫甚都，口称随带肩舆，迎生教读。生初以为戏，手携烟管，散步出门，果见扈从煊赫，侍立门外，中置四人肩舆一乘。生辞以有馆，不便赴召。二童子不听，强使登舆，风驶而去。仿佛东行，行近高山，但见山巅洋式楼房，穿心斗角，叠叠重重，虽上海莫能及也。下舆入门，遥见二美女，笑靥嫣嫣，下榻相迎。甫就座，即有妖姬数辈，环立献茶。移时捧肴进饌，山珍海错，罗列席前，俱生平所未睹者。及尝之，异味奇香，清人脏腑。食毕辞归，二女曰：“今日迎君，非有他故，践天台之约耳。愿君勿以葑菲见弃。”生曰：“素乏才能，家中糟糠，尚不能生活。假添卿等，何以供给？”女曰：“痴郎勿惮贫也。我等亦不以身口相累，但五日一见临可也。”判袂时，二女各以掌击生背。生恍然如梦初觉，已在路间，离家不远矣。后五日，二女亲诣其馆，邀以同行。生不得已，就舆而去。行至中途，遇本村人语曰：“范先生何往？”范应曰：“有要事，匆遽未及下舆，勿怪也。”村人归告其邻曰：“范生疯癫耶。予见其独行，渠何言其未下轿也。”群共为笑。明日，范生归。群共问之，范生亦隐约不言，但话前事而已。后至十四日，生又往，迄未返。

◎谈狐一

嘉兴南门外丝行街万生酱园，某日之晚，后埭之空屋，忽而起火。红光满室，颇形危险。幸为时尚早，由五龙坊救火队竭力灌救，始克扑灭。惟此室空阒无人，缘何起火，咸莫得其真相。邻右遂讹传为狐仙作祟，千切不可触犯其怒。讵知翌日晚间，又突然起火。最可奇者，仍在此空屋内起火。待扑救检视，则所焚毁者，并无贵重物品。一时众传狐仙显灵，遂愈深信。园经理盛少泉本系迷信者流，早夕供烛拈香，以求忏悔，两月以来，相安无事。一夜，四鼓时，该园又忽以火警闻。邻右从睡中惊醒，设法救施，得免危险。但两月三火，事出离奇，皆惊骇异常。邻近店铺，将箱笼物件，寄存亲友，以免不测。该园伙友朱某等以扰缠不休，决非佳兆。乃暗约同人深伏暗隅，以窥究有何种动静。迨至三鼓时，果见有一黑影出现。始则东窥西探，继则出火柴擦火。朱为先制计，急上前扭住。及出灯火以视之，则所谓狐仙者，乃邻居沈义顺鞋店之十五龄学徒许和尚也。邻近亦闻声麇集，咸大抱不平。以迭次失火，险肇巨祸，虽云童子无知，然实犯放火、行窃、诈欺三罪之嫌疑。遂联合裕纶（丝行）陈源茂（首饰）赵公昌（提庄）同乐楼（茶室）等十余铺，公禀县署，请求按律判断，一面将该学徒解送警署。移解县署，明日开庭询问。一时传出消息，谓审问活狐仙，观者盈庭。细询之下，该徒仅承认行窃不讳，只偷过小钱四百文，系同店伙友孙雨昌指使。至放火则无此胆量，坚称该园确有狐仙云。

◎谈狐二

汉口长胜街有刘宅者，主人刘星桥，为祥发源报关行执事。略有资产，自造楼房居住，向称相安。乃六年三月二十六日，刘宅忽着人至该管警察第四署报称，上下房屋，忽无形起火，并抛砖遗屎，系狐仙为祟，恳为驱除。署长派巡官涂伯威，率长警驰往查看。报称刘宅起火遗屎，均皆属实。询据该宅婢女荷花（年十三岁），声称有一大仙，年七十八岁，白胡须，身着皮袍，自称广东张国琦，带有老妇一口，随从男女多人，另居楼房一间。由主人备有床帐器具，每日早晚供奉饮食。自己并与大仙言语，宅内诸人则不得见闻。某晚因未进鸡蛋，大仙自将房内被帐放火焚烧。适主人上楼救火，楼下被帐，又被燃烧等语。署长以鬼蜮作祟，尚无关治安，惟放火后患堪虞。除轮派警士在该宅守护外，特飞报警察厅长鉴核。警厅长以事殊诡异，当派司法科长前往查看，并无丝毫形迹。楼上设有大仙牌位，及床铺用物。嗣查得楼后水溜筒内，有蛋膜甚多，则知连日供奉鸡蛋，尽倾于此。至晚仍令警探四名，命其家人暂出，至宅内守候一夜，亦未见有举动。翌日，乃将婢女荷花，带厅多方诳诱，始称看见白胡须老头，是奶奶教我说的。每日供奉大仙的鱼肉，是我吃了。生鸡蛋不能吃，就泼于溜筒内面。抛砖遗屎、放火等事，都是我做的。我也不知奶奶是甚么意思。厅长以事已大明，爰将刘星桥夫妇传案申斥，命将荷花领去。一面据情宣示，以息谣诼。但刘星桥深信其妻不致如此，谓系荷花怕官乱说。个中真相，殊难明了。或云刘妻之闹妖，系欲其夫以五十两元宝一只，供献大仙，而自为贴娘家之用。然荷花何不供出此言，恐亦未可信也。今刘宅已经迁徙，宅内仍有幻境。在门外聚观者甚众，有警察轮班驻守云。

◎谈狐三

北京西园王某，江南籍。以典业兴家，货财颇富。去年六月，祖父剑三暴疾卒。越四日，其父庚生亦无故身亡。不久，其母韦氏又与外祖母同日去世。维时上惟祖母刘氏，中惟幼姑运贞，下惟王某。刘氏见家运如此衰败，愤不欲生，将家堂神主抛弃沟中，自投厨中水缸自尽。幸经其女及使女桂香瞥见，挽救得苏。复要将神主劈碎，以火焚之，怪其不保家中清吉。厨役袁姓见主母忧愤生恨，遂将神主检在箩中，藏于楼上。不数日而祸作矣。一日，运贞失去一鞋，寻之再四，夹在楼板缝中，拔之不下。转眼自落，鞋尖满塞瓜子壳。自后每逢吃饭，肴菜无故不见。家中蓄一黄猫，无故夹在板壁缝内狂号。经桂香向空中请求，始愈。家中整箱衣服，面上如故，底下尽成灰烬。不得已，立一牌位于楼上，每日以荔枝桂圆红枣板栗设供。次日视之，原物未动。以手捻之，尽是空壳。家中所买皮蛋，打开均无蛋黄。每逢宾客至，桂香辄先知之。桂香说后，客果至。盖狐常附桂香体上，为之传语也。一日，请一道士退妖，将香烛牌位立起。道士正在书写文疏，忽然裤裆内火起。道士窘急，将牌位收起遁去。家中水仙花盆中，忽插荷花两朵。种种怪异，不一而足。

惟伊戚张玉田将至，桂香必先告主母，须十分优待。一日，张君谓桂香曰：“尔大姑可以见面否？”桂香曰：“不能，只能摩之。”张曰：“在何处摩？”桂香曰：“在我铺上。”张君至桂香铺前，忽褥子内突起。张君以手按东则走西，按西则走东，连褥揭开，空无一物。张君曰：“敝亲家中无人照料，恐褻大姑。”桂香曰：“大姑要看戏七夜方去。”刘氏乃雇戏班演唱七晚，后遂无怪状发现矣。

◎死而复活

前清光绪二十九年，武进怀南乡张家村有张品大者，佣人为业。子仲华，娶怀北李姓女为媳。女性疏懒，奉事翁姑，未能尽职，以是不得翁姑欢。女以不能见爱于翁姑也，乃故肆流言，诬翁姑以种种虐待行为。未几，女忽失踪，四处探寻，杳无踪迹。于是人言啧啧，有谓因不堪虐待去而之他者，又有谓系被逼自尽者。传说纷纭，莫衷一是。女母闻知，向张姓索女。然事无左证，未便相诬，遂亦置之。嗣女母因附近义冢内，发见无棺女尸，前往察看，神情酷类伊女，遂鸣诸官。时知武进县事者为吴其昌，亲诣勘验，得尸身天灵盖上，有水烫伤痕。探诸舆论，张某确有虐媳之传说，乃将品大父子拘将官去，羁留狱中。寻遇恩赦，于民国元年出狱。品大以惨遭毒逆，心有不甘。出狱后又复托人探访，仍属音信寂然。现在仲华已故，品大夫妇尚存。近忽有人报告，谓伊媳现在江北，业已转嫁某姓，育有二男一女。据谓当时死而复活也。

◎借尸还魂

借尸还魂，见于稗官野史，不一而足。惟女借男尸还魂，只以男身终，男借女尸还魂，亦只以女身终。未闻男借女尸还魂，而以女尸转作男身者。高要鼎湖山后大石背村民聂亚，有女名亚于，年十五未字。今年二月，忽染痘症而死。棺敛已一日两夜，及抬往山间埋葬。忽闻棺里哼声，盖村乡伴工，皆其亲邻，乃共开棺视之。女哼声不歇，村人以其复生，舁归家。女起视四顾曰：“我何故在此？”旋以手摸辫及乳，乃惊叹曰：“大误事，大误事。”父问曰：“汝得复生人世，何云大误？”女怒曰：“我乃广西军人马刚也，为国捐躯。今化作女儿身，与其生，毋宁死。又何不误？”于是不肯饮食，卧床不起者四日，常以手摸其si处。忽呼肚饿，父喜进肴馔。食已曰：“如此方不辱。”数日行动如常人。女素勤耕织，至是不谙工作。呼亚于，则怒。呼亚刚，则应。其母或仍呼亚于，女乃自褪其裤向之，则见其si处居然伟男子矣。今已自剪去辫，日弄拳脚，女伴不敢近其身矣。

◎留美学校闹鬼

开封留美预备学校，于某夜五钟时，有某生与同室三人，均自黑甜乡归来，畅谈甚快。忽闻有叩门者，其声冬冬然。问叩门者为谁，以古之人对。生等闻之，犹以为同学之戏己也，乃戏应曰：“盍请入。”不答。复叩窗，声益厉。生等惧，弗敢言。俄顷又闻女子哭声甚悲，适有校中更夫报时声大作，哭声始止。近时美国文学家有鬼学之发明，该校为留美预校，岂鬼而有知，特显灵异，为该生等预备研究鬼学之资料欤？

◎地藏会

去年，沪城邑庙各会首，举行地藏胜会。傍晚时，排立次序出发。由邑庙起，绕行城厢内外，后至邑坛焚化锭帛，然后回庙。其会中前导，除寻常旗锣伞扇外，有冲风湾号马门枪马对马并马上鼓手。继以各式灯彩，如三十六行渔樵耕读医卜星相，及扮成西游记黑籍冤魂双跑马翠屏山酒色财气十八罗汉大头鬼小头鬼以及各样纸扎台阁。余如阴皂隶花十景大锣班等，均皆彩烈兴高，招摇过市。最可异者，其大锣班中之各会首，身着哆 麻长衫，腰束红带，足穿快靴，头上则戴前清之红缨大帽，昂昂然自鸣得意。会中杂以清客串，锣鼓及逍遥伞等，则不计其数。殿后以僧道各八名，沿途诵经，并以八人抬地藏王菩萨。经过之处，观者人山人海，警察厅亦派游巡队随会保护。中华民国两马路之电车，无不利市三倍。一切开支，约在一二千元之谱。先期在地方上广为劝募，方今时事多艰，商务凋敝，将公众之钱，作媚神之用真无谓之极矣。

◎父入女胎

士人张某者，皖建德人也。娶同邑某氏宿儒之女为妻，生三子。长十八，次十六，俱已教读。未几又生一子，年七岁，不能语，众疑其哑。一日张拟一题，课二子。已则有事外出，二子难其题，构思不就，相与商论作法。其幼子在旁，谓二兄曰：是题扼要在某处，当如何则制胜矣。二兄互相惊叱，幼子曰：“予非妖异，特知前生耳。请赐笔楮，代为成之。”二兄如其言，文思泉涌，颇称佳构。父归读其文而奇之，谓二子曰：“文笔颇锐，类尔外祖某公之作。尔辈之蓝本，果从何处得来？”二子不能隐，以实对。父益奇之，乃呼其幼子，苦诘之。幼子泣曰：“予隐忍数年，兹不得不言矣。予本汝岳，素无疾病。午后倦卧，魂离于壳，自不知其死。信步到汝家看女，不图入门而蹶。即便呼人，觉肢体寒噤，自顾已成婴儿。然心目了了，口不能言，莫解其故。及见女临蓐，始恍然悟其转生，不觉失声。自思生老病死，人之常理，无足为怪。所难堪者女而母父而子也，是天作孽耶，自作孽耶？”言毕大痛。张告其妻，妻回思父没之日，即此儿生之日，不觉亦悲。一堂为之怆然，不忍以为子，送入某寺削发为僧云。

◎卢江烈妇（情之圣者）

卢江南乡天成圩（一名张家圩）农民张永升之妻高氏，于去年绝食殉夫。初张娶高氏，夫耕妻饷，盍，琴瑟静好。事舅姑亦尽礼，里党称贤。去岁水患，圩田被淹。永升忧劳成疾，高氏潜割臂肉和药以进。凡四次，竟不起。高氏誓以身殉，投缳遇救，投水又遇救。遂从容为夫立犹子为嗣，绝食而死。时旧历丙辰七月十二日也。年二十许，遗言薄殓，毋夺舅姑菽水之奉，以厚死者。家人从其志。呜呼！高氏一农家女耳，未尝闻圣贤之训，乃能以义殉夫，守儒者之节。遗言薄葬，得墨氏之旨。语曰：十步之内，必有芳草。不诚然乎？惟烈妇夫之兄弟皆农氓，岁歉家贫，无力报官，为请旌表。不无遗憾耳！

◎马议员之艳史（名士风流）

议员马小进，娶女伶金镶玉为妾。金义父陈某以拐女控马于地方厅，马亦控陈欺诈取财。检察厅开庭预审，马称两次交洋共九百元。检察官询以有何凭据，马不能答。陈则坚不承认。马称分两次交，一次八百元，一次一百元，系金镶玉所眼见。金供亦同。检察官告以无证据，在法律上不生效力，诈欺取财罪不能成立。马亦自认自己办事疏忽。其时检察官遂告之曰：“马君现为立法机关人才，自必深通法律。似此无凭无据，控人以诈欺取财罪，似乎不合。若必深究，恐成诬告罪。公等立法人才，倘于国家重计，亦如是出之，人民何堪设想。听我劝劝，不要再向诈欺一面说了罢。”马为之语塞，但曰：“请公断就是。”至金镶玉上庭，满口称陈某不是伊父，实有取受马小进九百元之事。他有心卖我，现在我嫁与马小进，各报喧传，尽人皆知，亦是我二人心甘意愿之事。因陈某苛索不遂，我始有吞金之举。现在马小进告他诈财，并未诬他。至小女子唱戏营业，已不高尚，何能再配第二人，愿终身从之。法庭亦不欲深究，卒成全其美事。

◎孝姻缘

某邑某氏女，幼孤，依母以居。性纯孝，善体亲心。貌娟秀，年二八，远近争委禽。母亦以女大须嫁，为之妙选东床，俾遂倡随之乐。女闻耗，泣曰：“人生七十古来稀，母老矣。桑榆晚景，风烛残年，儿鲜兄弟，儿嫁，母侍奉无人。愿学北宫女婴儿子，撤其环，终养父母。母弗能强，卒从之。母死，释服后，从叔某谓女养母已终，乌私已遂。哀彼茕独，又欲为之议婚。女仍弗之许，嗣是独居二十余年，里党中称贞孝女焉。近日邑中有黄某者，曾割臂以疗亲，以孝闻于世。年耳顺矣，家贫鰥居无偶。慕女名，遣蹇修往聘，愿赋偕老。女闻之，喜曰：“黄郎，真吾夫也。”其叔曰：“黄年老且贫，婿彼何为？”女曰：“儿年亦大衍之数矣。老女老夫，嘉偶曰配。彼家贫窶，我家独富厚耶？”卒受其聘。归黄后，伉俪甚笃。家人待之，咸敬礼有加云。

◎李郎妙计（居然入我彀中）

武城县李生，年十八。美仪容，好修饰，翩翩佳公子也。某公之女，亦素有艳色，与生为姨姊行。生颇向往，因使人探于父。父素爱生，而未忍拂，竟央媒聘定焉。乙卯八月，涓吉成婚。李固是乡之富者，于时贺客盈门，颇极一时之盛。无何，新人交拜堂前。出水芙蓉，光艳夺目，亲族莫不啧啧称美。人生艳福，春镜无双，生方谓天上人间会相见也。及寝，启衾入内，女竟百端相拒。在生以为稚女，未便过事强暴。次夜入寝，女之相拒如初。生诱说百端，女终弗顾。以手探之，则襦衾百结，牢不可破，且戒备甚严。如是者月余，生迄未曾染指，心殊怏怏。旋以某药暗纳酒中，劝女饮，女弗知也。甫饮一尊，女即弱不胜风，朦胧睡去。生于是随所欲为，如乍膺九锡，愉快之象，匪言可喻。生至是以为既已问津，当不至有意外虞也。次晨女醒，知为玷污，唾骂百端，几无人理。翁姑微闻，心弗善也，然以儿女之情，不便挽言。于是女见生如寇仇，竟至冰炭不相容。虽欲同寝，亦不可得。如是者又月余，生方窘于无术，恒出外游荡。不谓月前女忽翻然改容。一日，生方外出，女急遣人赴市觅归。亲设酒馔，对饮一室，竟反从前之故态。及寝，相语喁喁，狎戏毕至。自是厥后，琴瑟好合，伉俪甚敦。夫夫妇男女，人之大礼存焉。故先王本人情以为治，吾独不解此女之初志果何似。欲保贞欤，似应誓之于不嫁。既嫁矣，拒之于前，而忽纳之于后，是前后判若两人。吾又不解此女之终志，又果何若也。或谓此女有精神病，然欤？否欤？

◎雀屏新例（视金莲五字何如）

湖南某女校校长某女士，北京女子师范毕业。游历长江一带，曾充浙江湖北各女校教员。丽质多才，择婿过酷，以故年逾花信，尚赋B梅。近在长沙，由其戚某介绍聘长某校校务。某君随其戚往谒，见女士秀外慧中，名不虚传。茗谈之余，其戚偶及婚事，谓男女婚媾，均有一定，不宜过执，否则人生几何，青春难再。女士止之曰：“欲予变清洁体为浊秽身，非其人财产在十万元以上，官在荐任以上者，不字。”某笑曰：“先生所言浊身，不像孔子濯缨濯足之意，颇似贾宝玉口吻，盖亦红楼中多于情者。可见中年不嫁，并非寡情。但十万元财产，今日铅铋矿商，不乏此辈。荐任以上官职，丘八队中亦大有人。然矿商惟知穿井，丘八只会放炮，未必能多情。此外政学中固有具备此项资格者，但其年龄定非英造，必在贵庚以上，性质亦未必能多情。鄙见不如改财产在十万元以上为年龄在二十岁以下，改官阶在荐任以上为资格在陈平冠玉间，似较适用也。”女士默然不言，既而曰是。其戚笑而首肯，亦曰是是。遂相别而归。

◎宣南奸杀案

京师内左二区马市住户张姓某甲以经商为生；娶妻某氏，貌颇美，妇德尤足多。寄寓于马市者有年矣，里巷均无间言，伉俪之情亦笃。除妻外别无亲属，偶出外，托其妻子同寓（寓前进）之邱振升。邱固与张有戚谊，以医为业。因张妻貌美，早已垂涎。自甲去后，邱尤无忌。时以言挑之，某氏佯为不知也者。邱复以数十金购得妆饰品相赠，某氏严词拒绝。邱愤甚，且闻甲将返京，情急，于日前某夕直入某氏卧室，明言来意。某氏即恶言骂之，并呼救者屡。以僻处后院，街邻无知者。邱老羞成怒，出而觅短刀（如宰猪者然）。某氏旋即闭门，将睡。邱忽持刀斩关直入，强迫执行。某氏以徒死无益，忍辱从命，时刀仍在邱手也。事毕，邱困甚。以为某氏身已被污，必无他虞，对某氏直言商害甲及己妻之计。某氏因故作媚态，以言乞舌邱曰：“妾身已属君，听君所为。惟刻已更深，君复惫极，盍将刀交妾，而安睡乎？”邱如其言，而嗷呦之声、恨骂之声、刺事刃之声、同时大作。邱家中人前往探视，则邱与某氏均赤身在床，邱胸腹际已成莲蓬之式。于是又杂以号哭声，为巡警所闻，急入查问。某氏乃徐徐穿衣，向警等历历陈述。并云杀人是我，我即到案，警士当即验明死者实受伤三十二刀云。

◎催妆诗（都是个听而不闻枉为了绝妙新词）

武昌某巨绅，生有一女，耳甚聋。现年方二九，字候补知事陈某之子。孰知陈子，耳亦重听。民国六年某月某日，为其合卺之期。大拙山人作诗四首以戏之，诗曰：“花烛双辉照洞房，居然一对小鸳鸯。笑他别有三痴样（鄂谚一聋三痴），万唤千呼始出堂。”“难煞宾筵赞礼生，大庭广众作牛鸣。可怜嗓子呼将破，新贵依然听未清。”（鄂属呼新郎新妇曰新贵人）“喧天鼓乐把妆催，笑彼如闻梦里雷。我有一方须记取，好将社酒作交杯。”（社酒可以治聋）“今朝吉日又良辰，东阁宏开集众宾。待到更深人静后，便宜多少听房人。”（鄂俗新人入房，后来客多倚壁听之，谓之听房，以卜利市闻。新人语者则吉，否则是年之气运必不佳也。）

◎白发红妆（一树梨花压倒双海棠）

红颜配白发，为婚姻中之数奇。如钱牧斋之于柳如是，千古谱为美谈。今有吴江宋翁云间杨氏结婚之事，非特老少悬殊，抑且演一重婚之趣剧也。宋氏先世固窈人子，其祖一日郊游，忽有雌雉导之。至一穴，发之，得白镪万余，遂以起家。人遂称之为宋野鸡，再传至翁。前年续娶沈氏，时翁之高寿已五十四，而沈则芳龄方过花信。有好事者探其闺中，则鸛鸛，其乐甚于画眉。说者谓翁虽年老，而媚术不衰。沈有手帕姊妹杨女士，年亦相若，云间人。以少小相爱，不忍离居，沈杨订交时，本有同嫁一夫之约。今以杨母不允嫁此老翁，故而迟迟。今岁春，杨母死，沈氏乃向亲属白其同嫁之意，咸首肯。乃由沈氏之兄周庄大绅某为媒，说合于翁。于夏历九月二十七日行结婚礼，翁于金珠衣服，一如娶沈氏时，沈氏亦作宣言书以白乡里。当此黄华时候，婚礼将行于姑苏台畔，忽而天不做美，新娘娇病。于是佳期乃展缓一月举行，一时贺客如云，暂时扫兴。说者谓在昔民国初元，京师有伟人胡瑛重婚唱导于先。迄今共和重振，又有宋翁遥应于后。珠联璧合，亦足以为革新后之点缀品也。宋翁字幼琴，吴江桐里人，其结婚地在苏州十梓街彭宅云。

◎杀奸奇计

浙省塘栖镇，有王某者，系前清武举人。娶妻秦氏，年已四十，丰韵犹存。家有桑田甚富，每年收获约有四五千元之谱。雇一家人，名小四子，甚倜傥。秦氏私与通焉，被王窥破。欲举发，恐失面子，于是思得一暗杀法。近当收桑之际，王雇一船，率小四子同往各乡收桑叶钱。乃嘱咐秦氏曰：“我带小四子去，要一礼拜后方归，小心看守家中。”开船行有十余里，忽慌张曰：“忘记带簿来”，命小四子徒步回家取簿，船在此等，速去速来。小四子闻命飞奔而去。行到家中，秦氏曰：“汝胡回来？”小四子以取簿告。秦氏知阔别将有一礼拜，情不自禁，乃与小四子白昼宣淫，尽情而罢。小四子交媾后，恐王久待起疑，携簿赶急而往。奔到船泊之地，王故意手持洋五元，往河畔水中下落，命小四子脱衣入水取之。半日方全数寻获，于是开船往各处。不二日，各桑叶钱均收齐回家。小四子因前日急跑回家，与秦氏行房，行房之后，又急跑而浸在水中半日。忽然精神疲倦，骨节酸痛。王知其必死，连忙将工钱行李，一并送其回去，不半月而小四子竟一命呜呼。临危之际，其父问起病之缘。小四子以实告，其父恨王心太毒，又不能寻王偿命，乃遍发传单，宣布其事。王接阅之下，随即将岳父母接来，命秦氏在厨中杀鸡为黍。王在堂中，将小四子与秦氏通奸情事，大声疾呼，以告岳父母，使秦氏闻知，无面出来见父母。果也，秦氏悄往屋后，自缢而死。岳父母以亲在面前，实系自死，未便与王兴讼，于是草草掩埋。一双奸妇奸夫，不动声色，均被王暗杀尽净。然而王之为人，亦太忍矣。

◎小学生宿娼

湖南岳阳县立学校学生章绣、刘谟群、刘功良、廖贤芝等，因夜不归校，该校校长出外侦察。行经汴河园地方，以该处多营皮肉生涯者，因格外注意。瞥见学生廖贤芝在娼家寻乐，将娼妇抱置膝上，互相亲嘴。并由娼妇手持茶壶，该生以口就饮之。既毕，以票钱一串与之。该校长目击情形，恨恨而归。俟该生等回时，责问上项情事。该生等知不能隐，自认其咎，惟要求从轻惩处。该校长遂将章绣、刘谟群、刘功良等各记大过一次，以廖贤芝年甫十三四，即在外宿娼，乃笞击其臀，免予记过。惟宿娼权利，非臀所享，臀乃尽受笞义务，或谓罚不当其罪云。

◎黑龙江之风流案

黑龙江省广信公司，总握全省金融命脉，势力之大，莫与伦比。董事中有一苏馨远者，其为人也，小有才，颇占权势。养尊处优，生平无他好，除自私自利外，专事渔色。被其奸污之妇女，已难以数计。人或畏其多金，亦或利其多金，以故无过问者。近以贪得无厌，陡然发觉，虽有金钱魔力，运动无灵，终归身败名裂，仍不得了。自作孽，不可追，此之谓也。按此事之远因，系一苏某素识之商人高某，因落拓不堪，羞恶心为饥寒战败，竟甘心与妾牵马，以投苏某所好，居然发生效力。逾三日，高某即得充某厂收费之优差（某厂系该公司之附属机关）。高某患得患失，自知其妾已老大，姿色不佳，爱情决难持久，深以为虑。适值其兄携妾来投（其兄前在奉省历充优差，纳妓为妾后以赃案发觉携妾潜逃，兄弟向来不通闻问），高某本拟拒而不纳，因目逆其小嫂，美而艳，以为奇货可居，遂特别欢迎之。复将发财秘诀，传授其兄，取得同意，立即水到渠成。仅一星期内，高兄即遗其妾于其弟，经苏某荐往呼玛尔河充某金矿局局员。而高某之薪金，亦由每月十二元，不期年即增加至四十元矣。效力之大，为何如也。苏某左右逢源，尚不能饱其馋吻，仍觊觎某女工厂貌美之女生（某女工厂系苏某组设兼充该厂协理）。该厂于去岁十一月间停办，外来之女生，限于资斧，困守厂内者有之，流落厂外者有之。其中姿色稍佳者有二，咸为苏某之目的物。其一为奉天人年某之妾，其一为本省呼兰县柳某之妾。二女生因家中皆有大妇，不愿遄归，遂同租某煤厂之房居之。苏某即屡次相顾，着手成春。后以该院户多人杂，甚为不便，遂商之高妾，拟将年柳二女生接来，归并一处，以免顾此失彼。高妾亦入工厂数月，与年柳二女生最契。又兼正醋其嫂，借此以分宠势，极赞成之。苏某目的已完全达到，周旋四大金刚之间，颇称美满。焉知乐极悲来，不作美的柳某，突然来省。先到工厂寻妾，始知现居高家。柳亦耳有所闻，曾前往暗探数次，未得要领，遂将其妾接寓于某旅馆内，详细研讯。其妾自知愧悔，将高家秘密事，全行告知其夫，并云苏某如何计诱，高妾如何代谋，妾始终坚拒，未被所污。柳疑信参半，遂深恨苏某，思有以报之，故与其妾设计捉奸，以泄此忿。一日，二人同往高家。柳则守候门外，其妾入内窥探。见苏某正与年姓女幽会，已经入港，即向高妾云有遗失物件，匆匆而出，告知其夫。其夫遂闯然入，高妾见之，迎入西屋。柳不理，直抵东屋门外。启帘而门紧闭，并未发言，仅轻轻敲其门（此系高家所用暗号，其妾告知者），即闻屋内细语云，西屋有人来矣。约五分钟，将门暗暗微启，见系外人，急阖之。彼时柳已跨入一足，推门而入，见苏欲逃无路，面责之曰：“汝既系女工厂协理，竟敢诱奸本厂女生，罪有应得，当唤警察来捉将官里去。”苏某再三哀恳，求其保全名誉，言明日必到贵寓从重答谢，此情决不失信。柳竟坠其术中，纵之使去。及次日，柳在寓守候，接得苏某一函，内云：昨日之事，子为政。今日之事，我为政。肯代守秘密固佳，否则随便。至于汝妾，久已属意于我。如经济困难，可以从大多数拟一价值，将汝妾转卖于我，岂不彼此两全其美。汝自酌量办理可也。柳阅之，怒不可遏。立掣其妾，驰往广信公司，当面痛骂苏某，并宣布其丑秘密。苏某无言可对，窘急万分。复经多人解劝，始去。该公司坐办李而斋睹此情形，不成体面，又兼苏某不正行为，久有所闻

，遂借此发表，立时商准魁总办，即日将苏某开除。苏某遂运动陆军师部吴某，转求许师长，出为调停。许师长不知底蕴，极力维持。已经挽回，又被省议会闻知，以为风化攸关，不容缄默。次日即将种种事实报告毕军长，请求提讯。苏某又运动本省最占势力之巨绅某，将柳邀至某家，诱以利害，嘱其如督军提讯时，即云与苏某并不相识，诸事一概不知等语，并代为拟一具结完案之底稿。柳均已认可。是晚毕军长果将柳某夫妾传署，亲自审讯。该夫妾一味支吾，事事不识不知。军长见其形状有异，必有别情，遂将柳妾送交夫人秘密讯问，果然尽吐实情。及军长再三讯问柳某，将判以诈财之罪，柳始将事实供出，并呈上苏某之函，及某绅代拟之结稿。军长遂令柳某夫妾取保，即时释放。彼时又有人报告，谓师部吴某，与苏某有联手不明之事。次早军长派夏副官到公司查帐，吴某个人名下，亏欠公司之款一百余万。苏某见事已败露，不可收拾，即于是午赴齐站乘专车而走。

◎欢喜禅

湘人迷信神权，毫无宗旨。不论何种教旨，但以祈禳为唯一之目的。就中皈依佛法之妇女，尤为不伦不类。盖妇女之崇奉佛教者，多由僧徒之诱引，僧徒则以募化为竹杠。故凡祀佛者，必先拜一僧，名曰拜皈依。僧徒之待拜皈依者，视之为干女。其中暧昧之事，亦时有所闻。然能引诱大家妇女者，又必为某丛林之住持方丈。如上林寺之雪泉、开佛寺之慧修，其干女多至数百，干爹亦时临幸其家，大施其普度一切苦厄之法术。家人以某大方丈，操行清白，不之防也。迨事情发觉，只得暗中叫苦耳。

◎自由结婚之稟

南女学生刘宇歧，数年前，由其父主张招赘某姓为婿。后因夫妇不合，婿遂负气他去。刘女生遂与滇军第四连第三大队长黄临庄结识，且愿与黄自由结婚。女父本为某处女学堂教习，人颇开通。惟对于女生此举，以为大悖伦理，故极力反对。女生无法，日前竟至逃往黄处藏匿，且在滇督府具呈控父，痛肆丑诋，其控词云：都督钧鉴。敬稟者，窃惟我同胞志士，戮力灭满，恢复祖业，宣布共和。人人自由，天下皆知。而婚姻大事，尤应自愿。我父苛待子女，使我大哥烟毒毙命。试观文明国有此暴政乎？今歧受学有年，深明大义，谨守天分。遭此无端锢闭，如同牛马，实一恨事。本欲自由毒毙，以报我父母无端压制之恩而后已。适逢共和机会，文明发启。满奴尚未灭尽，死不瞑目。前与大国民黄君临庄通信多次，自愿结婚。至昨二十六日来一函许可。二十七日，歧恐压制太甚，辜负终身，身自往黄君别墅，以托生死。盖黄君热心国事，同胞皆知。钦慕久殷，死生何计。祸福不问，如此行去，于我父母，亦有光荣，于我平生志愿遂矣。我父倘施以野蛮压制，歧誓以死报，必不生还。我二万万同胞，能有家庭改革及自由主权思想者，必能为伸冤。牺牲一命，千载如生。如蒙批准自由结婚，免得冤死，以维持新政而昭文明，则不胜感激之至。谨此呈明，当奉批词云。查各国通例，男女虽准自由结婚，然亦有须禀承祖父母或父母之条。兹该女生来稟，并未禀承父母，且丑诋其父，深恶而痛绝之，不惟贻笑外人，且为黄裔之羞，方今共和幸达目的，未有不能共和于所生之父母，而能共和四万万人者。该女生既一再以共和为言，着三思之。

◎自由结婚之函

江苏省议员周钺，逼女投江，经苏州高等厅判决有期徒刑四年。女名静娟，曾肄业于上海务本女塾。后在浦东南洲女校充当教习，与校长徐品花自由结婚。因恐遭乃父毒手，致书于伊姑丈刘子瑜，请为和解。书云：姑丈大人尊右，久疏奉候，抱歉殊深。近维起居安燕为颂。侄女在校（浦东鲁家汇镇南洲女校），碌碌如恒，无善足告。惟去秋承南洲办事诸君，推为校长。嫉妒者实不少，其中顾教员（曾与周同学，松江人）为最甚。顾对于教育，亦不热心。故侄女不得其用，即行辞职。彼回松后，诡造侄女与前校长品花先生结识各节，告其群辈。近已传入家庭父母之耳，而家父母信以为实，日内屡有信来，强逼侄女速即回家。侄女深知家父严酷，罪过难逃，故不敢回家。遂将终身面许徐君品花，以保全彼此名誉。徐君初不许诺，以校长与教员，应避嫌疑，再三推托。后由其家属亲族慰劝，今方勉强许诺。定月之十一号举行自由结婚礼，请泰日桥周容夫先生为证婚人，袁达夫先生为介绍人。自是之后，家父母必发愤怒。伏乞大人极力劝慰，无任感盼之至。盖侄女德性，我丈深知之。数年出外求学，未尝违于礼节，此事实由造谣人酿成之也。

◎閹妓離婚案

壬子冬，北京地方审判厅判决程月贞与张静轩离婚一案。程本苏州名妓，张系前清内监，现为东安市场会贤球房主人。太监娶妓，事本离奇。而承审推事，为林君鼎章。其判决理由书，文甚藻丽。词云：此案程月贞提起离婚之诉，根据三种理由，曰太监也，重婚也，虐待不堪也。但使三者有一，已与法理相背。然据趋重家族主义之立法例，配耦者知有离婚原因，逾一年者不得起诉。则前两种之理由已不成立，至其根据第三理由，则须有其他事实上之证明，不能凭空言提诉。但张静轩之辩诉状及口头陈述，均称甘心离婚。可见双方爱情，业已断绝。至张请追还身价并追程所携逃动产等情，查人身不得为所有权目的物，前清之季，已悬厉禁，况在民国？前此身价之款，岂容有要偿权？张又变其主张，谓我乃代彼还债，有字据为凭，并非身价之比等语。夫程因张代还债务，故愿为其使女。是时程之对张，固明明负有债务，而以劳力为辨济。然张既娶程之后，则依中国惯习，夫妇财产，并无区别。婚姻成立之时，债权债务之主体合并，权利即已消灭。从前既无特定契约，事后岂能重新主张？至程随身必需之衣服首饰，按诸法理，亦无褫剥一空以偿债权之办法。张又谓非将随身银元及拐携钱物追缴，实难从其离婚等语。殊不知离婚乃关于公益之事项，还债仅关于私益之事项。若因钱债之故，而遂拘束其离婚之自由，与法理未免径庭。况张蚕室余身，只应雌伏，而鹊桥密誓，竟作雄飞。陈宝得雌，固已一之谓甚。齐人处室，乃欲二者得兼，而如程者，籍隶章台，身非闺媛。桃花轻薄，本逐水而无常。柳絮颠狂，岂沾泥而遽定？在程既下堂求去，不甘鸳谱之虚联。在张自覆水难收，无望鸾胶之再续。倘必作蒹葭倚玉之想，求破镜之重圆，恐复有蒺藜据石之占，叹入宫而不见。所以聚头萍絮，何如池水分流？并命蕙莲，仅许花风吹散。至若玉台下聘，虽有千金，而金屋藏娇，倏将二载，一双绦脱，既经璧合于羊权，十万聘钱，讵望珠还于牛女。是则程固可请从此逝，而张亦无容过事要求者也。虽然事非所天，黄鹄不妨高举。而物各有主，青蚨何可乱飞。同衾人纵许裾分，阿堵物岂容席卷。盖一则监守自盗，未能举证剖明，一则人财两空，亦应原情矜恤。用定期限，勒令偿还。

◎多夫之奇论

广东西樵村张某，有女名月娥。二九妙龄，风姿艳冶。性质灵慧，颇通文翰，张某钟爱如掌上珠。然家法素严，家中妇女，不许出闺门半步。月娥赋性风泣，每遇春风秋月，辄蛾眉深锁，西子含愁，恨不能插翼长飞，一纾幽郁也。未几父死，遂辞母至省，肄业某女校。一吸自由空气，即如羽化而登仙。常与姊妹花数辈，谋扩女权。所发议论，最为奇特，大意谓欧俗一妇多夫，最合天然法则。即以体力论，男子虽强，夜不能御三女。而女体之壮者，虽经三四犹余勇可贾。恨吾中国女人，智识发达，后于男子。故一切权利，被男子占尽，而有一夫多妻之不平制度。今而后当谋反其道而行之，使二万万男子，尽伏于裙下。以供我辈之玩弄，方足泄我女界数千年愤气云云。并拟将种种理由，刊发成册，分送女友。见者莫不掩口葫芦。

◎手足几成伉俪

广东省广宁麦辛，与族兄在腰古开设泥水店，聘就腰古罗明福女为室。吉日，新妇于拜席时，熟视新郎，忽失声大哭。宾客骇然良久，乃谓新郎云：“尔非我胞兄亚辛耶？”辛亦愕然，谛视新妇，确为伊妹亚冬。冬即脱去大红服装，宣布伊系于六岁时被拐至此，罗氏夫妇收为养女等语。众宾以此事幸未成礼，而骨肉团圆。遂劝各破涕为笑，乃将梅酌改作庆筵云。

◎不嫁主义

江阴西门外某女学校，开办迄今，颇形发达。近来有年长之生徒八名，秘密创立一会，曰立志不嫁会。兹录其简章四则于后。

（一）目的 以立志不嫁，终身自主为目的。

（二）义务

凡会员均有劝人立志不嫁之义务，且有保守本会，不使泄漏秘密机关之责任。

（三）入会 凡欲入本会者，宜先申明其理由，并当会众立誓。

（四）出会

既入本会，当不参预人之婚姻事。若私与男子往来，经察觉后，立除其名。

破天荒之立志不嫁会，创立未满二旬，已为校长张女士侦悉。遂召集该会会员，大加诲戒，略谓男大须娶，女大当嫁，此人伦之天职也。若守不嫁主义，则蔑视己身，沦丧人权，不爱国之甚者也。于是该会顿遭取消，而此种新闻，传诸校外，咸议论纷纷云。

◎惩悍术

江西抚外河，有一年约二十余之妇人，鬓发蓬松，嚎啕大哭，由一小屋中奔出，步行河坡，口中大呼曰：“我还活着做甚么？”一望即知系抱厌世主义而欲投水者。路人甚为骇异，因停足以观，窃计定有人追救之也。此时该少妇距水已近，忽易奔为步，步且缓，若深望有人泥其行者。无何，逼临水畔，竟无救者至。旁观急煞，不觉呼曰：“不得了，死矣死矣。”诘妇至此，顿止其步，席诸河滨而坐，从容去鞋，哭泣有声。至是人皆异之，私念凡觅死者，必有万不容生之苦处，但求速死为快，遑顾其他。观妇于区区鞋袜，尚不能舍，其不能舍命投水也必矣。时见小屋中一中年男子，从容而来。行近妇旁，亦不施救，慢声而言曰：“胡不死，胡不死？”言讫，骤以两手掖妇胁，溺其头于水中。一上一下，将妇溺个不死不活，大呼救命。其人曰：“你原来觅死，何必呼救？”妇哀之再四曰：“今后不敢矣。”时邻人亦毕至，其人即妇之夫。妇素刁悍，动辄以死吓人。今日因与夫口角，故又行此故技，初不料夫竟不顾也。路人闻悉后，不禁肚皮为之笑疼。特为志之，以告世之以死吓丈夫者。

◎教员恋爱自由

安庆城内省立师范二所，均以第一名之。其地点男校属西门，女校则近于东门，女东男西，无意中若表示近日女权发达之证。有徐君履卿者，为男师范著名教员。而女师范教员之谢女士，尤为英雌中翘楚。此也求凰，彼则引凤，嗣经身兼男女两师范教员之羊叔子（杨姓教员），奔走撮合，成正式文明结婚礼，一时贺客盈门。目墨镜而口金牙，窄衣短袖者，新娘之伴侣也。峨其冠而昂其首，高谈阔论者，新郎之僚友也。主人饮合欢杯，来宾吸自由钟，济济跽跼，极一时之盛。徐郎之美，谢女之才，指顾问当孕育文明种子，乃皖中学界佳话也。

◎儒夫快举

奇异之事，无过于割势。有清宫监，均罹斯苦。自国体变更，此项灭理损德之稗政，早经革除已久矣。诟知苏州金阊繁华之地，乃发生割势离奇之事，亦社会上所罕闻者。阊门外之三六湾，有居民陈志远者，素为商业中人。平日有季常之惧，琴瑟之间，时有勃。一昨又因家庭细故，致起反目。河东狮吼，陈志远莫之奈何，忍气外出，暗藏利剪子袖中，即在附近空荒之地，遽将yang物剪去，裹于纸中，还家即交付与妻，以示却惧之至意。妻见之乃大惊，察视陈之神色，毫无痛苦之状。惟其根上血管之中，忽然紫殷之血沫。历四小时之久，始觉痛如针刺。有好事者云，须将鹅毛管吸气吹之，然后设法施医，不致毙命。妻竟如法泡制，送往天赐庄博习医院施救，已一息奄奄矣。

◎不良之妇

江北如皋县人沈阿三，性素忠厚。闻在山塘街渡僧桥某 困糕店为伙，迄今已有八年。上年春间，有同乡人季老五，带领邻居奚某之妻徐氏到苏。徐氏因夫死无嗣，家计中落，随季到来，拟帮佣度日。惟因苏地雇工均要切实的保，方敢收用。由季老五请沈阿三代为荐保，不料徐氏心爱沈三，示意于季，商之沈三。涓吉成礼，即以季五为媒，故婚帖均全。后沈阿三经店中辞退，欲还家垦种田亩，预先与徐氏说明。徐氏迫于夫命，未便拗违，其实心所不愿。适有素来认识之拖车某甲来家，沈适他往。徐氏备述心拟不去，无法可想。诂某甲言胥门云安包车公司主李三，现正拟娶室，家中如何富有。如肯从彼，吾来设法，包管与沈脱离无事。徐心为动，垂首似允，不料一席话而发生事情矣。

一日，沈挈徐氏返如皋，行抵胥门外盛家弄口，李三早已邀约地棍流氓十余人。比沈与妻到近身，李三即启口向沈索欠。沈见素不相识，瞠然不解。众流氓乃拖拖拉拉，将沈拥至得意楼茶园内，故意高声讨欠，众口如一。自四时直至七时，临了将沈阿三身上衣服强行剥下，腰囊中欲带还家之洋三十一元数角，亦为众人挖去，然后大众一哄而散。是处并无岗警，沈只一人，难敌众手，茶园内因李三向在胥门开云安公司，均拥护李三方面。故沈被若辈肆意所为，其妻徐氏，早为李三派人领至小石灰桥车夫某甲茅蓬中矣。

沈阿三衣银被抢后，见妻又不在，四处找寻。直至第三日，无意中行抵小园地方（亦在胥门外），听得锣鼓喧天，前往观看。突见己妻徐氏，与抢洋之人，两下满身新衣，若结婚状。心始恍然，退还闾门，将言告之友人黄学阁。黄即偕同沈阿三往小园报告岗警（该处归水仙庙区），警察不管。黄沈只得亲往李家，正值两新人吃饭堂中。水巡队之警察及水仙庙之警察坐满，一若预备打者。黄沈入屋后，先将男女各捉一人，拖往区内。而各长警上前动手，拳足交加，黄沈忍死不放。幸离区不远，到后，禀报巡官。以事关抢劫衣钱妇女，即送一区，移吴县归司法范围讯办。翌日开审，承审员讯问沈阿三时，当将婚帖呈阅，并以原媒季老五证明无讹。继讯李三，供称与徐氏本不认识，因伊看中我，自愿嫁我。所有抢银剥衣夺女殴打各节，绝口不提。承审员讯明后，谕徐氏仍令前夫沈阿三领去。李三亦转行交保，候查明情形，再行判决等情。即行退堂，而一千人亦皆至。外有署警夏某，早得李三之运动，乃出外向沈言，传尔与原媒，将尔妻徐氏，取具切实保人领去。言毕，即带李三徐氏另至他处。旋即再至沈阿三处，言尔回去罢，徐氏为李三领去矣。沈欲问时，夏警掉头不顾而去。沈阿三季老五等如入五里雾中，何以堂谕着前具领，而一转瞬间，反谓仍旧李三带去。官署未能闯进，只得退出，与黄学阁等一番参揣，方知系李三财可通神。沈乃白白被抢三十余元，又遭殴打一顿。堂谕判妻归原，为署警掉弄枪花，依旧未曾到手，人财两空，即欲寻死。经人劝住后，只得将奉谕领妻署警朦蔽，仍将徐氏私给李三领去。是否署警夏某受李之贿，私行舞弊，抑或堂谕反覆，形同儿戏之处。控诉县长，请求立即再传各人，俾明真相，而知内幕。控状

于四时投送，署中接收后，确闻该警立即差心腹人飞告李三，令其速备对付方法。因事关重大，并有密令将徐氏交送该警家中，私行匿藏，以视如何情形，借可谋退步之计。李三得报，即赴署中。此来如何，局外人恐难明知。大抵将控状消灭其效力，故至今日犹未见批。沈阿三终日在署前，如痴如狂，坐待传唤。日以继夜，不离寸步。最可惨者，三十余元款洋，尽为李三抢去，身上已不名一钱。又逢遇富有钱财之包车东李三，交涉自然终难抵敌。以共和时代法治之始，尚有如此黑暗之事发生，而使贫苦之小民遭此冤枉耶？呜呼！吴县之官吏！

◎经理与女工（双双捉将官里去）

湖北省垣各商店，风俗最坏者。一布店对买货之妇女，语言神色，不合规则。一茶店对摘茶之女工，眉来眼去，无所不为。甚至有轻薄之行路人，过必伫窥。近更有横街之精益织袜公司，雇一理线纱之女工，置诸该经理之屋内。屋之楼上，则为吴德元商店之工人住处。该工人等钻板窃窥，见经理果与女工如是云云，不无戏笑。女工恼羞成怒，信口詈骂。因是工人大愤，报由岗警到该公司询问不讳，即将男女一并带往第五警署，重罚而释。

◎淫妇自毙

邹复顺，武昌县属马鞍山人，向开设饭馆。其妻姿色可人，名为饭馆，暗兼提调，远近皆知。与比邻蔡大文之妻黎氏甚善，而大文之妻，亦系淫荡者。前夜有猪贩某，寄宿该饭馆。闻该馆系提调衙门，即请提一姑娘为欢。该馆即将蔡黎氏提来，价钱二千文，提调钱二千文。但该市向设有团防局，各馆寄宿行客，须报明团防，否则即以私藏匪类论。该饭馆是夜只报四名住客，迨至团丁查馆时，查出一男一女。研诘该馆何不报告，该馆无言答对，团丁等即要带案处罚。嗣经设法消灭，奸夫驱逐出境，淫妇私放归家，以全体面。不料事为该淫妇夫查知，痛加斥责。该淫妇因怒成愤，于十四夜悬梁自尽。现该淫妇娘婆二家，共同在武昌地方检察厅起诉，谓系团丁逼奸致命也。

◎刘玉凤之哀史（始乱之终弃之张生母乃不情）

奉天要人某甲，于民国四年秋间，在任师长任内，为大公子完姻。一时军政商警绅学各界重要人物，无不往贺，颇极其盛。甲兴高采烈，将省城以内之著名女大鼓（即说大鼓书的）、耍艺者（即变戏法的）、说相声者暨坤名剧角，全行召至府中，为博贺客之欢。适有女大鼓刘玉凤者（别号老钢错），亦应征至。玉凤年华十六，虽声音洪亮，姿色超群，在社会上初亦无大声色。诂为甲见，即惊为国色天香。迨至下午客散，其他耍艺之人，亦皆领赏而去。甲独留玉凤于内庭，说书竟夕。个中滋味，不言可知。次日甲对吴镇守使声称，不意玉凤一个说书的丫头，竟俨然一处子，殊未料及。于是众为作撮合山，留居府中，充临时之六姨太太。以说书的老钢错，竟一变而为师长之姨太太，荣耀已云极矣。玉凤之生父刘某，亦系以说书为业者，又有阿芙蓉之癖，穷困日甚。今弱息有此佳遇，尤属喜出意外。不索身价，但求月得养膳之资，于愿已足。斯时玉凤则文绣彰身，膏粱适口，深得甲之欢心。更有时乘坐摩托车，归省其父，留赠金钱，为阿翁寿。邻里欣美，意甚相得。并经甲订明每月给玉凤之父优待费一百元，永远照支。刘亦自庆从此面团团，可以作富家翁矣。不意人事无常，命有乖舛。上年四月杪，帝制派段芝贵被逼去奉，甲一跃至掌奉天军民两署大权。诂甲升官之日，即凤厄运之时。甲本爱惜名誉，以骤跻要职，而爱惜名誉尤甚。凡昔日骄上慢下，不正当之行为，悉皆摒除。当由师部迁居荣任之时，独将玉凤留在原住之私第（即某某师师部东院甲之私宅），派人伺候。以玉凤系本省小家女，年龄更稚小，并未正式纳娶，故未携入当时府内。又兼甲之大小姐，人极聪敏，力为阻挠，谓吾父现为一省军民表率，若纳一说书者为妾，未免为人窃笑。不如酬以金帛，使其另嫁之为得计。此言进之甲前，已非一次。甲以事繁，与玉凤亦形疏远矣。嗣于上年旧历十二月间，馈以金钱，派人将玉凤送交伊之生父，另行择配。诂玉凤涕泣从事，决计不再嫁人，以为我既为将军妾，又何屑为他人妻乎？倘将军终无转圜之望，亦惟有削发为尼，以了余生，借以谢将军，借以求忏悔。其父亦为慰解，终未能破其决心也。呜呼！综前后事实而观之，甲负凤耶，凤负甲耶？愿天下有情人一研究之，此亦情天哀史也。

◎金事韵事

国务院秘书厅金事濮彦圭，因疯免职。闻濮致病之原因，有三段风流佳话。聊述之，濮字少戡，人咸呼之为小濮，浙江人。为前清江苏藩司濮子潼之公子，素以风流自赏。前清时在江宁某藩司署中，觊觎某藩司之女，屡托友人为之撮合。某藩司嫌其轻浮，未之允。濮遂迁怒友人，几至挥拳。经旁人劝止，然从此绝交，虽觐面亦不相识。此第一段风流佳话也。

光复后，濮侨寓沪上，无所事事，终朝作寻花问柳之计。偶在某学校门首，见一女学生，濮为之垂涎。后探询该女学生亦系浙人，又托人说项。詎知使君有妇，罗敷有夫，万无撮合之理。濮因之大恚，一病几至不起。此第二段风流佳话也。

本京西城，有所谓某五奶奶者，向营秘密生涯，即南中所谓台基，都中所谓转子房是也。某五奶奶有亲生女二人，次女秀外慧中，娴雅美丽。以曾在某女学堂肄业，中西文均有门径。而眼界一若甚高，盖其手段然也。濮因某友之介绍，得至某五奶奶处。一见倾心，神魂为之颠倒。又以其身价甚高，不易达目的也，乃拜某五奶奶为干娘。执子礼甚恭，以冀发生亲属关系，时相往还，便于进步，用心良苦。有他客或往五奶奶处，猝与濮遇，某五奶奶则殷勤介绍，谓客曰：“此我干儿也。”谓濮曰：“此某干爹也。”濮每加意周旋，若甚荣幸。而客往往承其过礼，局促不安焉。濮在某五奶奶处，往还已有数年。薪津所入及阿翁从前宦囊，多于此中支销。某五奶奶亦常许以次女属之终身，然虽许之不一许，究无实行之诚意。而濮则痴心敬候，故时时以爱子坦腹自居。日月推迁，渐为某五奶奶家所厌弃，思有以断其念头，乃忽于去岁三四月间，宣言次女已许与杨度之子。杨家拿钱令其入学读书，因托辞送在某女校寄宿，原以示绝于濮也。濮忽然受此非常之激刺，而魂灵儿已随阿宝去，神经遂种病根焉。然时时仍至某五奶奶处搅闹，五奶奶苦之。因藉搬家为名，离其故巢，并云送女还乡间某市之老家。濮愤无可泄，而病亦日甚。会濮赴上海养病，五奶奶迁西城，及调查得之，复带病往觐不已，旧腊忽令某金店送金镯四副至某五奶奶家。濮取之，逢人分赠。人咸知其疾，不敢受。次日，濮向囊中取出洋四元赏店伙，及店伙出帐单取价，濮诧曰：“尚要钱耶？彼此有交情，即作为你送他们的可耳。”店伙至是始悟其有心疾，因索还金镯，徒呼晦气，白跑而去。大除日，濮复至某五奶奶处大闹，脱去衣服，持刀弄杖，大有贾宝玉中魔闹大观园情景。惊动邻右岗警，均无可如何。乃送信其家，缚之以去云。癸丑年，有新疆某议员，以在某五奶奶处因挥霍过度，迨议员取消，落魄难归。前尘如梦，因成心疾。今濮氏竟步其后尘，诚未有之奇闻。此第三段之风流佳话也。

◎牡丹花下风流鬼

无锡邑马路上登丰旅馆内，日前晚间，有充地保之邹巧泉，偕一南门外某纱厂之女工至该旅馆住宿。不料至三时后，某女工忽至帐房，声称邹某腹痛，急须延医等语，即匆匆出门而去。有顷，茶房某甲，至邹某房内看视，见邹僵卧被中，业已气绝毙命。时邹身穿短衫，下身并不穿裤。茶房睹此情形，不觉惊骇。随即报告帐房，转报该处警察第五分所，即派人追寻某女工，已杳如黄鹤矣。经第五分所侯巡官到场视察，检得酒瓶等各项证物，以便呈县核办。是时观者纷纷咸集，谓邹之毙命，实系脱阳。当经侯巡官将该栈茶房带区，解送县署核办。后邹之妻及母闻信，一同到栈，与该栈大起交涉。旋经某甲向尸属再三劝说，令该旅馆津贴殡葬费一百二十元，以期和平了结。论者谓该邑马路上一班无赖少年，引诱妇女约期幽会，以旅馆为台基，禁之不可。有此风流命案发生，足为若辈之榜样，以昭炯戒云耳。

◎小儿女之憨情

王某者，在湘南北门外种菜为业。妻周氏，生一子，养一童媳。尚未成婚，时年均十五岁矣。日前因祖父阴寿，杀鸡一，命媳在火炉房煮之。周氏则自往厨房煮饭。其子见父母俱不在前，兴致勃发，在火炉房向其未婚妻接吻。妻拒之，乃大声疾呼曰：“妈妈你快来瞧。”周氏以为其子偷鸡吃，在厨房中大呼曰：“孩子不要吃，还未敬祖宗哩。”其子以为母已知其秘密，吓得不敢归家吃饭。其媳私往园中说明，其子方归。邻居闻之，为之大笑。

◎捉奸案之艳判

王得标，宝应产。向曾从戎，近乃退伍经商。娶妻屈氏，清江人。幼随其姊金姓长成，年华花信，姿首可人。十月间，归宁金家，（兴隆巷内）不甘寂寞。与邻居染工杜鸿和结不解缘，莺莺燕燕，已非一日。乃好事多磨，王忽来浦。秽声充耳，殊觉难堪。于夜分报知警士，自任捉奸。破扉而入，一双野鸳鸯，好梦初浓。王一时忿不可遏，持刀戳伤杜鸿和七处，并将王屈氏肺叶刺出。次日，由淮阴县知事派员检验属实，将杜鸿和暨王屈氏舁送仁慈医院，分别疗治。月余，伤均痊愈。王乃具呈自请和解。赵知事传讯两造同意，爰仍断合，并为骈体判如左。此案王屈氏以新嫁娘作归宁女，流连忘返，居住自由。夫王得标乍释戈矛，初调琴瑟。因结离之爱恋，遂放舸以来寻。囊涩而小作勾留，家贫且顺图营业。虽罹坎运，六韬之略犹娴。思振乾纲，七尺之躯无恙。彼杜鸿和者，居对门阑。业操靛染，设色并耽好色，余资每作游资，慕少艾则相与日成，扳闲花而竞忘指摘。鸳鸯池沼，浪结萍缘。鸚鵡帘栊，风传花信。疑整冠于李下，睹遗袜于床头。氏夫固属耳于垣，怒眦欲裂矣。奈何欲海无边，迷津不渡。仲子勿逾里，树杞下胡妄条攀。罗敷自有夫，卧榻侧岂容鼾睡。小儿女方喁喁私语，缠绵两诉私情。彼丈夫本赳赳武夫，解决一凭武力。曩定格杀勿论之律，今颁防卫不罪之条。又何责焉，时也，月黑飞鸟，宵深警犬。藏兵袖底，狭路相寻。奋足街头，破扉直入。露出并州雪刃，燕尾双分。销残倩女香魂，蛮腰几折。杜鹃真成血染，野鹜若共霞飞。血花与泪絮齐飘，肺叶共口脂一色。兴隆巷猝然兴讼，清江女失此清操。是何露水前缘，结此风流恶果哉。幸焉远来扁鹊，广布仁慈。输入青蚨，匀分药裹。此则创深割臂，彼则痛切镂肝。既续命之汤调，亦返魂之术善。前尘若梦，往事如烟。抚疮痍而知悔，斑斑皆记事之珠。起蓬勃兮生机，历历比回春之草。不以一失足贻千古恨，再回头成百年身。殆哉险矣！方数重之信牒频催，忽两造之誓词上达。借得免究，标题非云蠖屈。誓杜将来和诱，鸣作鸿哀。措颇躁释矜平，前隙似冰消雾散。先尚疑有假托，继乃讯系实情。庭且公开，人争旁听。一则形容觳觫，俯首无词。一则粉黛飘零，低眉欲泣。若必明罚敕法，包孝肃铁面无私。转致怨女旷夫，周文王仁心莫逮。告诉权既经放弃，奸非律何待研求。议既洽乎双方，网合开夫三面。剪刀毁去，休管二月春风。简帖还将，仍是百年嘉耦。修省青年私德，涤除白璧微瑕。口头已训诲谆谆，书面宜吉祥止止。缀以雅话，以遏郑风。此判。

◎南海监狱之黑幕

民国六年，广东南海监狱，忽生闹狱事。闻因第三仓囚犯头牛精月，勒索新进囚徒。时值严寒，各囚家属所送衣食，悉为牛精月截留，与某某均分。新囚乞还粒粟寸缕，皆不可得。邻仓囚犯范云佳，蓄愤已久。特于出作苦工时，检得单髀利剪一枚，暗怀返狱，磨厉以须。是日牛复殴打刘姓新犯，范云佳愤不可遏。持剪奋前，连刺牛腹，洞穿多处，范亦为牛党拳击重伤。时周令下乡未回，当经委员提范审讯。据供称愤牛所为，故杀不讳。但求速将该狱内容整顿，则虽死犹生。委员以该囚虽激于义愤，惟不应擅杀，已重责屁股二百板收押。牛旋即毙命。及周今回署，业将该狱人犯分别发押新建之东监，以便徐图整顿。闻内中人云，狱自民国三年规则一变，腐败之点旋生。其已定案之老囚，遂规复从前笼头人头二手名目，各树党势。至周任则以苏邦牛精月两党为极大，私设种种酷刑，有所谓江外友，吃酱馒头（以秽布塞口）、咬蔗，又名湘子吹箫，（以绳系圆木之两端反缚于脑后发际）、卖剩葱（将囚吊起，斜置其首于秽处），货仓监督（置囚溺桶侧，使监人洩溺，顽悍者竟以溺管注射之），一心敬（暑天置囚密处，使俯其首，焚香一把，薰其口鼻），祭狱神（寒天使囚赤体，伏处凳板。以绳系其四肢，于凳之四足，徐加针刺），同渠过引（以猪鬃毛透入尿管）。更有轻刑数种，如吃大蚊类，有所谓“西老表刺鞑头”之称，则事涉暧昧，非人所忍言。

◎王局赌之黑幕

苏垣赌风素炽，受其害者，不知凡几，而以王局赌（即伪赌）之害人为最甚。此等赌徒之狠心毒手，甚于盗贼。靠此王局赌以骗人金钱者，城厢内外，不乏其人。近日发现一件骇人听闻之王局赌，竟以四千无之巨，为孤注之一掷。阊门外横马路有某元绪公者，平日豪于赌，间亦以王局骗人。有张姓者，不知何许人，与栗子小开等数人同游。该元绪公与之相遇，察悉张某携有巨资，遂诱令入局。初则五十元百无底之麻雀，张均少负，即欲辍赌。该元绪公见其钞票叠叠，银洋累累，垂涎加甚。乃即暗邀同侪到场，改作牌九赌局。先时仅一元二元起手，后张竟大出其资，五百元一千元脱手不吝。无如屡战屡北，直输至三千六百元。张愤甚，卒以四千元之钞票，作孤注一掷。居然获胜，反赢四百元。该元绪公等顿形懊悔，恨不及早收场。迨后少有输赢，遂即停止。然闻张某身畔共有三万元之多，复约于次日雇一画舫，在舟中一决胜负。届时该元绪公邀同著名王局妙手多人，齐在舟中先叉麻雀。各出现洋堆置桌上，八圈毕后，张仍少负。遂又易以牌九，詎桌面木板过厚，所掷骰子，不能得心应手，只得另以手术应之。当为张某窥破，以其掉牌作弊，实为王局，不愿再赌。该元绪公等竟群起而抢夺张之银洋，张亦即于此时逃去。闻当时被抢银洋，仅百数十元。事后同伴互相责言，以如此一桩大好生意，银洋已到手头，竟被轻轻逃过，殊为可惜云。

◎和尚行医之黑幕

洞庭西山，法华寺僧人月峰，曾受业于医生费某，习岐黄术。出而施治，亦偶有见效者，而以妇女疾病为多。近来三指生涯，亦复不恶。惟该僧年尚少壮，颇为一般人所注目。近日忽有旅沪东海氏者，刊发《劝惩歌》十首之传单。兹录如下。

僧人岂可作医生，僧俗溷淆罪不轻。

年少女人来入寺，嫌疑两字不分明。

况且僧人年纪轻，贼头贼脑会调情。

青年妇女时来到，一见欢心笑面迎。

僧人寂寞在山林，曲径禅房花木深。

幸有女人来看病，引他入室起淫心。

女人生病接医生，请个僧人年纪轻。

贼秃任看妇女面，摩他两手尽陶情。

请来贼秃入房帷，患病妇人暗吃亏。

妄说调经能种子，全无廉耻惹相思。

眼前也算是墙门，礼法须知要自尊。

若使和尚房内坐，妇人脸面有无存。

三世医生见识多，百般病痛俱经过。

圣人明训从无错，不听良言莫奈何。

须知家教要分明，不准闺房胡乱行。

和尚如何能治病，招来祸患臭名声。

妇女烧香古所禁，今番和尚作医生。

好官一日来惩办，烧杀此僧亦近情。

惩淫演戏翠屏山，石秀英雄大杀奸。

此事人人皆晓得，男人何故不防闲。

按和尚看病，别处绝无，惟西山有之。爰作《劝惩歌》十首，愿望山人醒悟，禁止妇女不准和尚看病，以整风化。歌词粗俗，以期山人男女易晓也云云。

◎赌徒骗钱之黑幕

宁波人邵某，系前清著名土棍木老头之子。木死六七年，其子好赌，致家产荡尽。贫至澈骨，无以度日。一日，为其妻临盆产儿之期。赤手空拳，资用无着。邵某乃心生一计，径向其姊告贷，伪称其妻因难产伤命，无钱成殓。其姊误信为真，允借洋三十元，并许代办衣衾棺木等物，当即交银洋于其弟。其弟欣然回家，姊乃向宁郡华德茂杂货店，购备衣衾材物，亲自携带至其弟家。甫入门，即放声大哭。邻人不解其故，咸来问讯。始知其弟之说谎骗钱，并非实事。众皆为之捧腹，而其姊亦破涕为笑。旋复大骂其弟不置，遂将材物掷诸门外，用火焚毁。一时传为趣闻云。

◎黄天党之黑幕

自对德抗议以来，德人以种种阴谋，期破坏我地方秩序。受其运动，蠢然思逞者，日有所闻。如山东招远县境潜伏之黄天党，有排外意旨，将兆义和团巨变。该匪党根据地有二处，一在招远县赤村，一在掖县朱桥镇。两处相距不过数十里，故能声气相通，势益浩大。匪首李姓，名桂卿，亦曰秀卿，未知孰确。每逢三六九日，在该境城隍庙开会，集合已达数千人之多。凡妇女在十五岁以上四十岁以下者，亦诱其加入，其行径恰如庚子之义和团。重要匪党，皆聚于匪首本家某巨宅中。盖其本家某，久在哈尔滨经商，资本雄厚，故原籍屋宇宏大，遂供匪党之集合也。刻已为省中大吏所闻，曾飭县查缉。奈声势甚张，决非区区县官能力所能消弭。其隐祸极为足虑，当道非预为严防不可也。

◎谋财害命之黑幕

五年十二月十日，即阴历十一月十六日，南翔镇出有富商周晋笙之八龄独子永暄被人暗杀之奇案。兹详志之。

周晋笙，名廷翼，南翔东市发茂酱园及鼎茂槽坊主人。现年六十一岁，席有先世家业，拥资数万。发妻陆氏，生一女，前卒。其后琴瑟不调，久与分居。而自居鼎茂内宅，迭置姬妾，均未有子。十年前，周私识一甬妇杨氏，遂生永暄（或云私识时已带肚），乳名和官（或云名五官），周甚爱之。今春周与甬妇不睦，以八百金畀之，遣去而留其子，别嘱其妾王氏名阿三（又称三小姐）者抚养之。王先抚一陈姓女，女名莲宝。既得永暄，一子一女，颇如己出，兄妹亦相亲爱。永暄现年八岁，已入私塾读书。性颇敏慧，有老家丁某，谙拳术。永暄喜受其教，能演开四门等术。而与婢女名阿玉者尤昵，非玉，不欢梨枣玩具之属，吝于与他人者，见阿玉必分与之。阿玉亦常与共出入，主婢之相得可知也。阿玉年仅十三，常以窃主人物被惩。某日有一催科吏晤周久谈，比行，吏所携搭连袋中，失银一封，计五十元。以谈顷阿玉曾来，穷诘之，果玉所窃，周因恶玉。会王氏赴申戚家，令挈玉去，拟即赠之戚。戚留之，而永暄失玉，啼哭不食，必欲复得之。周溺爱其子，挈之赴申，仍携玉归。此出案前三日事也。不意至十日上午十时，而永暄被杀之事出现。周素有阿芙蓉癖，宴寝宴起，习以为常。卧室均在楼上，是晨，周酣卧己室，未起。永暄卧王室大床上，晨将起。王以星期无须入塾止之，故亦未起。王及莲宝均已起，在楼下厢房中梳洗食早膳。陡闻永暄呼姆妈声，继又呼阿！阿！者两声。王不意有变，梳洗毕，乃上楼视之（或云上楼时遇阿玉携水烟袋自梯下，王问玉和官何故呼我，玉答不知，而径下，王亦径上）。则见永暄已被杀死，倒卧被窝中，鲜血淋漓。左项受一刀，深三寸许，食管已断，骇极而晕。莲宝在楼下闻有异声，急上楼见此惨状，亦骇极而晕。周亦于梦中警醒，起见状，一恸几绝。家人亲友，闻耗集，均莫测其致死之由。周以阿玉实侍小主，楼中无他人，呼而严诘之。神色颇异，又察验婢裤，则血痕狼藉。乃用刑穷究，阿玉竟自认实为杀死小主之凶手。诘以何人指使，词多游移。忽言系一穿如何如何衣服之人，忽言系其兄小金子，现住杨家弄业拉东洋车者（但访询当地阿玉无兄东洋车夫亦无小金子其人），出银角一枚，铜元四枚，云系指使人之酬金，许以四元，今仅得此。诘以凶器所在，则导众人至后门口垃圾堆中取出，乃一特制之厨刀。此刀较寻常菜刀较狭而长，周平日烹调极讲究，专以此刀切葱类。八日（阴十四日）晨忽失去，遍觅不得。至是方发现，竟成杀人之凶器，刀上血迹固犹未干也。时已报告警所，经石分所长派长警赵福江前往查勘，带阿玉回所拘留。当即飞报县署，周亦赴县报案。十二日，姚知事带同检验吏赴翔莅验，委系被戕致死。惟仅下一刀，而伤口甚深，不似荏弱无力之幼婢所为。当即填明尸格，着即棺殓。时在场候验者，除周晋笙及家人亲戚外，有周慎余名维新者，亦在场。周维新者，晋笙之堂侄。周末有子时，本拟嗣之为子。而维新素无赖，周又得子，遂寝此议。维新益贫窘，故此案之出，一般舆论，几无不目维新为嫌疑犯。姚知事莅验毕，莅警所传讯阿玉，严诘何人教唆，阿玉供系阿连指使。

问阿连何人，则云不知。乃传维新到案，维新至，即问知事传唤生员何事。姚知事问：“尔系周晋笙之侄否？”答是。乃谕之曰：“尔叔家出有命案，尔知踪迹否？”答不知。问尔叔家中平日有往来之人否，答渠家中往来者甚多。又问尔时往叔家否，答时往。问往何事，答：“我将娶亲，贫不能婚。以屋质叔处，值千余金。叔虽允而未付值，乃云无资。实则渠岂无资者，我固时往索资耳。”知事命之退，并云：“日后有事传讯，尔不可畏避。”维新得释，径出，颇露欣喜轻佻之态。知事见而疑之，遂传阿玉再三研究。玉供适来之人，则为阿连。问渠在时，尔何不说。答渠要打我耳光，故不敢说。知事急命警踪迹维新至猗园，得之。复传之至，询以婢语。维新云：“我何尝有阿连之名，请知事察访。”维新并当堂斥婢之妄攀。知事云：“无论是否，尔实为嫌疑人。”维新犹欲出，知事不许。复请一至家而后入城，亦不许。知事乃带阿玉、周维新及周仆名阿大者，回署讯办。此案后由承审员研讯数次，阿玉供词，咬定维新所为，略谓数日前主人主母（指王氏）挈小玉到申之日，阿连曾携我至其家中，出玩好物，问所欲，并强我同睡，而后送归。继而嘱我窃刀，既窃得刀，即嘱以杀和官。我不许，则欲以裁纸刀戳我，我乃许之。及是日晨，阿连清晨至，问主母起否。答以未起，乃去。既而又来，知主母在楼上，乃与我潜踪上楼，开露台门，导入卧室。嘱我挟和官起，阿连即以刀斫之，倒衾中。将刀在衾上揩去渍血，阿连之臂套上，亦染血点。即拖我同下楼，自匿一暗室之橱内。而嘱我坐便桶上，伪为小便然（按此节有研究因与携烟袋下楼说绝异也）。伺众人尽登楼，乃嘱我启后门，取刀置垃圾中而去。临去时，我问人问杀人者奈何。阿连云：“尔但认为已杀者，我给汝十元。”我不可，渠批我颊二下，我乃允之。云云。周维新供则绝不承认，并力言无阿连名，又谓此案与阿三（即王氏）有关云云。又讯阿大，不甚了了，惟据供维新确令婢仆辈呼彼为阿连云。又闻姚知事到翔时，曾访问周维新之邻右，称是日维新清晨七时许，即出门，十二时回家，复卧。又有人言维新是夕曾燃香烛，当庭向天祷告，母子相持而哭。要之，此案情节，变幻复杂，耐人考索。必于周氏财产问题，有绝大关系。蛛丝马迹，不无可寻。全赖检察者之悉心侦察耳。

◎抢匪之黑幕

鄂人王国桢，向在淞沪警厅充当勤务督察员。其妻冯氏，赁居闸北天保里。一日，忽有衣服华丽之匪徒一人，故作仓皇之状，来向冯氏声称，王先生刻因私通革党案发，被徐厅长拘禁，移时即解军署讯办。特命我前来通信，望尔速进城，有要言嘱咐云云。冯氏女流无知，得悉之下，涕泪交流。即随该匪而行。詎该匪将冯氏送登电车，彼又佯作慌张形状，折回天保里王之寓所内，向二房东声言，王姓房内有皮箱一只，内藏手枪二枝，命我移置别处，免遭搜获。二房东信以为真，任其从容雇车，装载而去。迨后觉察，报警飭缉，该匪已杳如黄鹤。闻王督察员半生心血，尽在此箱。损失约计千余金之谱。

◎拐犯之黑幕

苏州胥门内西善长巷杀猪弄二十五号，陈小昆又名沈小，为拐骗妇女之总机关。彼夫妇二人，各有所长。男则专长骗术，女则擅为水贩。常年雇用伙友四名，分发无锡昆山两县，为秘密侦探。上年三月，曾在苏拐得某庵之女尼一人，售与北京，得价三百七十元。旋为苏警厅侦探队长潘秀清得悉，派探侦查，始知陈小昆犯案累累。在武进县曾经被押一年，在琴川亦遭九个月之拘禁，惟拐尼案因证左不全，未便即行拘惩。而陈小昆则故态复萌，近又拐骗苏城汪姓女两名。先领至家中奸宿一宵，翌晨，乘车赴沪售入娼家，得价四百元，逍遥苏沪。汪姓失女而后，以十五六岁之人，断不致迷识路途，显系为人拐逃。汪父亲赶上海各处访寻，果在四马路遇见失女。父女相见，备述杀猪弄陈小昆骗卖得价四百元，售逼为娼之情形。汪某以事在租界，只得稟报捕房。苏警厅得上海捕房来电，声请协捕拐犯陈小昆到案。崔厅即训令潘秀清侦拿，陈犯尚未获也。

苏州喜娘之拐案，远如范李氏之骗取恒孚珠花至一万数千元之巨案，近如小顾客人之拐卖妇女。若辈处心积虑，无非在拐骗两字着想。小顾客人住居干将坊巷，近日串通通关坊某棉花店主妇，以甘愿负保险之责，哄信马护街许姓之处女，卖与奉天人为妾。连夜即令受主动身还籍，计得身价银洋在七百元以外。小顾客人与棉花店妇，两股匀分，逃往上海。十里洋场为安乐窝，为逃遁藪。及失女之家访悉，已鸿飞冥冥矣。

◎恶家庭之黑幕

恶姑虐媳，数见不鲜。民国律所严禁，立法固善，而社会之发生者如故。有司之徇纵者，且较甚于昔焉。居住苏州观前山门巷范姓者，系苏城之大族也（范义庄同族）。家道富有，单生一子。娶得江宁人某姓女为媳，已将数载，育有襁褓之儿矣。平日之侍奉翁姑，类能事事顺从，故亲戚邻里见之，咸啧啧称道。乃姑性情桀骜，凶恶异常，终不直其媳之待养，日以鞭撻从事，致媳之身躯，总无完肤之时。其子又惧母凶，不敢拦阻，一任母之虐待。近日较前更甚，打骂无间，且威迫令死。其媳不堪再受，乃私吞洋火三匣毙命，免得日处火坑之中。当身死之后，范氏竟以病故报其家。比女家父母赶至，知系虐待自尽。范氏知被看破，定难隐瞒，立即挽人通商于女父母，愿出洋一千元，彼此私下了结。女之父母不允，必欲报官伸冤，当场不准收殓尸体，以待验后之解决。岂知财可通神，吴县公署竟派警察至范家，勒令将死尸立即收殓。女宅父母见闻之下，气愤已极，以为虐待毙命，惨无人道如此，乃县中非但不究恶姑，反致押殓死尸。公门黑暗，乃至如此。其中谅系金钱之魔力，致冤枉之难伸。当场忍气返家，决计提起控诉，必欲请县长开棺相验。如果县中再不理睬，当赴高等厅控告，务必昭雪。然范氏得某员之担保，卒无事也。

◎顽民械斗之黑幕

香山黄梁镇，地濒海滨。族悍民强，素为贼藪。加以壤接港澳，输运枪械，尤为便利。因是斗杀掳劫之案，指不胜数。近来最惨者，莫若陈梁邝吴林等姓与黄张殷杨等姓械斗一案。计被陈梁等姓焚去殷杨等姓大小村场共六处，全村尽为灰烬，伤毙不下千人。幸而逃脱者，亦无家可归，甚至有绝食而馁毙者。曾经该县县长带队弹压，诨陈林等姓恃其人众，竟与官军相抗。官军以众寡不敌，莫奈伊何。查械斗地点，其始在南山沙岗，后移向南基及毗连澳门之网夏马山两乡。连日枪声，绵亘不辍。澳门葡官以其逼近本界，深恐斗匪败逃入境，妨碍治安。特在南湾下一带，派出葡兵大队，荷枪巡逻。如有斗匪窜入，即行开枪格杀，当道据报。恐因斗祸惹起交涉，特飭江知事韦帮统等加拨大军，驰往弹压，限三日内将其制止。

各乡绅耆齐集，团保局韦镇守使翟旅长、申帮统江知事陈营长、郑区长及各军营委员、团保局长董均出席会议。江知事宣言，来办械斗案，经已四次。并将各乡绅耆之不能约束子弟，大加申饬。随由郑区长将督军省长来电宣布，韦镇守使深知各乡情形，又将各绅耆申饬一顿，即由各官长责令各乡绅耆，限翌日将所有枪炮收存各族祖祠，听候派队点验，归各绅耆保管。如有各姓子弟持枪出外，定惟各该绅耆是问，并令联具止斗及不助斗甘结。江知事以此等大案，实系各该绅耆不善约束子弟所致。遂在各乡绅耆中择出十余名，带县讯办。计殷炳绪、杨奕樵、杨朝掌、黄坤容、黄宗宪、黄保乐、张汤铭、张椿华、黄绪携、黄茂松、殷统韶、张球容、殷潘端等，及被告陈其澜、陈天佑、林举恩、陈卫尊、梁渭占、梁维诚等共十九名，由江县长交卫队看守。

沙岗等六村前被焚烧，逃出难民一千余人。网山约二百人，虎山约五百人，夏村约一百五十人，斗门墟约二百人，大濠涌约五百人。扶老携幼，拖男带女，终日饥寒。沿途痛哭，目不忍睹。郑区长惻然伤之，即会同该镇士绅，设法办赈。维闻因地方贫瘠，兼以党派甚深，颇难办理云。

省署接香山电 南山马山斗案，商由永隆到镇会县弹压，葆蕃仍分赴各沙巡视。迨永隆抵镇，又值江知事晋省未回。各乡械斗已久，牵动全镇。群情惶骇，是以未敢遽离。查该乡等争斗逾月，兵来斗止，屡结屡翻。自非双方齐下，难免顾此失彼。现与翟旅长江袁统领商议切当办法。荔枝山一带，由翟军镇慑。南山一带，由袁军镇慑。葆蕃则进兵马山陈林两族，永隆则进兵马山张族，均于今日由涌口拔队驰往。陈林与张姓轰击正剧，当即极力制止。入村勒令各将枪枝炮火，缴存本祠，旗帜炮垒一律撤毁。责令具结止斗，听候官厅办结，即日遵令止斗具结和息。适韦统领江知事亦到，与翟旅长办理善后事宜。葆蕃等未便滞留，当经禀奉韦统领面谕，飭令黄营长率兵驻扎黄梁镇及斗门一带。葆蕃等即分赴各沙巡防，以重捕务。帮领申葆蕃江永隆印。

◎翻戏党之黑幕

沪上翻戏党之为害，尽人皆知。此辈神通广大，堕其术中者，无不倾家荡产。种种罪恶，擢发难数。前总统袁世凯之公子某某，于上月间，在三马路新旅社寓次，被着名翻戏党扬州人王某、南京人笪某、镇江人李某、江西人某某等，诱往虹口某旅馆。用秘密手段，第一次翻去三万余元，第二次翻去五万余元。某公子尚不觉悟，以为局运不佳，仍欲凑集款项，再作孤注一掷。嗣经友人竭力劝阻，始寝其议。现某公子虽已他去，而此辈害人翻戏党，分得巨款后，终日在迎春坊一带妓院花天酒地，日无虚夕。爰特表而出之，以免沪上人士，再堕其术中云。

◎讣闻大观

前清侍郎林绍年，于上年阴历九月初六日，死于津门。十月念六日灵柩回闽，十一月初二日在西湖公园开化寺开吊。其讣帖无微不录，诚一至奇之讣闻也。摘录如下。

赐进士出身，诰授光禄大夫，建威将军。赏银五百圆治丧，予谥文直，谕赐祭葬。恩赏头品顶戴，赏穿带素貂褂，赐紫禁城骑马，西苑门内骑马。特赏入座听戏，坤宁宫食肉。颁赏《钦定平定粤匪擒匪方略》、《钦定平定陕西新疆回匪方略》、《钦定平定贵州苗匪方略》。叠蒙孝钦显皇后颁赏御书福寿字，福字，眉寿直幅，寿字直幅，懋官惟德匾方，御画条幅，三镶如意，纱袍褂料，帽纬，石青驼色绛色大卷丝缎，石青大卷实地纱，二蓝麻地纱，西番瑞草漳纱，葛纱，荷包，金银镮，金钱，太平有象花瓶，螺填果盘，手炉，御园牡丹花，冬笋，佛豆，春橘，苹果梨，玫瑰饼，各种暑药。德宗景皇帝颁赏福字，龙字，永绥福履春条，三镶如意，纱袍褂料，紫色青色实地纱，花机纱，深色牙色增成葛，石青茶青库缎，宝蓝灰色江绸各色匹头，貂皮，荷包，金钱镮，大小藏香，绢方，各色春绢，大小湖笔，朱锭，百蝶花瓶，果盘，手炉，燕窝，福元膏，克食神肉，年菜节菜，春菜，攒盒，菜碟，水果，万字河杏桃，西瓜，苹果，大麦，高粱，面粉，豌豆，鲟鲤鱼，野鸡，关东白鱼，汤羊，熏肉，元宵，粽子，腊八粥，粥果，春饼，薄饼，<李页><李页>酥糖，荸荠粉，糖果，金衣祛暑丸，恩赏各色江绸，库纱，蜜桃，元宵，粽子，月饼，腊八粥，汤羊，黄羊，暑药。其余尚有衔名，不及备录。

◎古墓中之宝玉

距江西吉安县城四十里许之北有刘某者，为父营葬于荒郊，掘坑三尺，遽见青石一块，光滑可爱。刘见之，惊为奇货，乃用力揭起。视其下有铁棺焉，锈坏不堪，未知历年几何。以锄敲之，其声轰然。刘某喜不自胜，预揣其中必为窖藏。乃掘土启棺，则见死尸一具，状貌魁伟，冠儒冠，服儒服，俨有生气。惟晨风一吹，衣服粉碎如飞蛾状。旁有白玉一方，中有篆文，不甚明了，细视之有“庆历三年”字样。刘某取其玉，尸具顿呈坏色，迥非本来面目矣。某古玩店见之，竟央人与刘说合，愿以千金购去。刘故难之，卒得千五百金，远近传为奇事。

◎塔顶之宝

南通天宁寺内之支堤塔，系唐时所建，久已失修，势将倾圮。寺邻省立第七中学校，特为之呈请省署，就地拨款修葺。据模范市场监工，估计工料费用需银五千六百余元。除该校逐月节省，所余二千九百九十余元外，不敷之数，尚须筹募。惟值此金融恐慌之秋，殊难着手。适去冬狼山僧海月因奸案连累，愿捐资三千元，修建寺塔以赎罪。张啬老因款既筹集齐全，特于今春开工。将旧有之五级，改为七级。所有塔顶，亦拆下重装。诂塔顶系磁质制成，形似葫芦，内存宝物数百件，皆建塔时善男信女所捐助。相传塔之能垂久远者，皆赖宝物镇定之也。宝物藏诸塔顶之内，均分别列号，详记捐助者之姓氏。如江北狼山镇标游击尹震，右营游击绥德卫，郡人顾楫冯显祖，信女胡金氏张蒋氏，以及阖寺僧人等，皆当时捐助之一分子。兹将宝物胪列于后，谅亦为好古者研究之好资料也。

银佛三尊，《大悲金刚咒》一卷，琥珀珠一串，玉花三朵，元佩玉玛瑙帽结，珊瑚雪珀、沉香红宝石、雄精各数块。赤金如意、玉簪、玉气簪、珊瑚、玉龙头簪各数支。宣铜鎏金杵、伽南香、各一根。巨大之珍珠四百余粒。琥珀珠二粒。玉花鸳鸯、定心玉扣、水晶珠、绿松界、珠银葫芦、川玉、川密蜡双桃、银沙法钩、玉沙法钩各数个。其余宝物甚多，不及备载。

◎明代钞票

山东栖霞县，近有僧人手持明代钞票百余张，到处求售。索值甚昂，谓系重装佛像。此票得之于泥佛腹内，票纸坚厚，制造精致。文云“大明通行宝钞”，下镌细字数行云，户部奏准印造大明宝钞，与铜钱通行使用。伪造者斩，告捕者赏银二百五十两，仍给犯人财产，并有洪武年月字样，中镌一贯二字，正面盖户部印二颗，反面盖所管官司印一颗。计票长工部尺一尺，阔五寸云。

◎古窑

山东德县（即德州）小西门内古二郎庙地方，近顷有人掘土，掘出古磁三彩小人。完全无缺者十数个，残者不计其数。磁瓶十数个，银铃一个，约六七两重。古钱若干，秤铤二个，铜勺一个，经深州之王某出价三四百金收买而去。后有数十人处处挖掘，每日亦有挖出物件者，皆系汉唐宋三朝之物，多有奇形怪状，不知为何名者。考该县县志，在数百年前，原系窑厂。自宋徽宗时，被黄河水淹。至明永乐年水退，始建此城，所以旧窑遗迹在城内。细查掘出之钱，为宋徽宗崇宁政和等年号，亦有在宋徽宗以上之钱，未有宋徽宗以下者。观此则知必是宋徽宗时所遗之物无疑矣。

◎金香炉

宁垣地方审判厅，本系洪杨时之驸马府。当失败时，曾将金器若干，窖诸花园荷花池内。有蔡绥年其人者，云其祖某曾充藏埋之工人。特具图说，及保证金五千元，稟请军民两署，准其开挖。当奉督军省长批准，限期十日竣事。期满卒未见效，惟忽发现金质香炉一只，重十二两。已由监视员某送诸省库存亦当时所藏之物也。

◎三十万金之石棺

胡石生者，自流井上五当井主也。因开新井，挖至二丈七尺三寸之处，发现四方无字之石棺。棺内贮有百两赤金七十四锭，百两四方形之白银二百七十六锭，五十两四方形之银七百八十锭，十两广西官银一千六百二十四锭。

合计约值三十万有奇。按自流井产盐既富，火井亦多，为地球上特别地质之区，自无奇不有。窖金巨木，殆属常事。西人每谓中国遍地皆金，然欤？否欤？

◎棺中小鱼

奉省北寺大校场，前清时以备阅兵大臣校阅全省营兵以及考试跑马射箭并斩决囚犯等之用。光复后，无所需用，故弃置不顾。占地号称有五百余亩，上年由营地局禀奉督军署核准，得价售卖与夏明山，据闻即张鉴堂之化名。业经夏明山特雇集小工厂数十人，从事工作，将地开垦，拟遍植桑秧以溥利源。及各小工开垦至校场中心点，瞥见古柩一具。启盖视之，满棺皆是清水，并有小鱼数尾，游泳其中，不移时均毙。又敌楼之前，照墙旁侧，亦经开出小石桥一座。所奇者，古柩中骸骨毫无，乃有清水，亦有小鱼。不卜是何兆验，还质诸素谙地理学家研究焉。

◎鳊鱼与苔菜

黎大总统于阳历新年，赏各京官以故乡物品。查武昌本为产鱼之区，梁子湖金口樊口所产鳊鱼（俗名鳊鱼），味极肥美。省垣洪山所种芸苔菜（俗名菜苔。昔李文忠督鄂，以芸菜易地种植不佳，曾挖洪山之土数船运皖），柔滑可口，均属鄂州特产，燕都殊不易得。由庶务司派员回鄂，采每尾二斤以上之鳊鱼三千斤，芸菜四十担运京。此二物市价遂突涨云。

◎兽性人

苏乡陆墓镇地方，某农民有耕田雌牛一头。被该处称周先生者，与之通奸。周先生每日下午，必至放牛场内，将牛牵至住宅围墙内，行不端之事。该乡民得悉，不动声色，侦察周之动静。一日下午，果然见周前往，将雌牛牵去。一般好事之徒，从后跟踪而往。概在围墙外面，挖洞窃窥，见周先用右手，在牛屁股上连拍数下，牛尾渐向上翘。周即将裤解开，现出丑态。约有数分钟之久，始罢。观者愈聚愈众，途为之塞。乡民入内质问，周无言可答。旋经鲁仲连从中公断，嘱周出洋数十元，将牛买去，作娶牛之聘金。俟牛生产时，无论产出是牛，抑系他物，即送往上海新世界陈列，以博看资必得巨利云。

◎公鸡生卵

枕垣荐桥路七十六号门牌，向为布业之王鹤林家。于客岁留得雄鸡一只，甚为肥大。权之，重约五斤以上。平素以其善啼，甚厌恶之。此次预备烹宰，留作清明祭祀之用。乃不料连产二卵，其形式与母鸡所生无异。或谓当出雏凤，或谓不祥之兆。瑞征欤？恶兆欤？恐皆迷信之谈也。

◎腹中花蛇

江西上饶县郑家坞地方，有刘某者。一子，名歪头，父子务农为业。娶媳王氏，年二十余。入门一年，腹中膨胀。家人咸疑为有孕，乃迄兹三年，腹日渐大，而仍未临盆。但腹中屡觉蠕蠕然动，如有物出。旧岁六月间，该氏沐浴，俯首见一花蛇伸头自产门出而饮水。头大如拳，吸水有声，一时惊骇莫名。该氏以事属罕见，恐人知之，愈增羞惭，竟不声张。自此以后，瘦骨如柴，忧闷欲绝，自分决死，亦不与夫同寝，盖恐祸及良人也。久之，蛇在腹中搅动，痛如刀刺。必日日沐浴，令蛇伸头出而吸水，始得稍安。其夫歪头见妻不憚寒冷，日必沐浴，甚怪异之。上月某日，适妻关房沐浴。歪头则自门缝中窃窥其异，即见蛇自产门出饮水，大骇。破扉而入，重责妻云，既有此等怪异，早何不言？乃商议明日沐浴时，如蛇头伸出，即用铁钻钉住蛇头拖出之。明日，蛇又出饮，如法将蛇身拖出，长可三尺许。该氏一时手足麻木，晕绝于地。约三句钟之久，始渐有气息。乃灌以姜汤及丸子，始苏醒。三日后，始能语言，至是始为夫详述一切。一时邻里传遍，莫不诧为罕有之怪事，诚异闻也。

◎金匱石室

金匱石室，袁世凱所創之制，聞名久矣。過豐澤園，出石洞芳華樓之前，有石室巍然。四周圍以短石欄，此即歷史上所遺留最有趣之物。石室方廣約一丈，高約一丈二尺，室有鐵門，入門則金匱在焉。金匱之制，僅為一外國銀行所用之大保險櫃。外塗金色，內塗黃色。啟鐵門，內分三層。中層為二屉，屉各置一匣，上層置鐵匣一。所謂候補總統三人，即每匣所書之名。有人論此事，謂以候補總統之人名，置此外國保險櫃內，殊不稱制，終須廢除。殆亦一種預兆焉。

◎袁帝之龙袍

帝制发生后，军人派主张从速。曾由某上将在上海制就龙袍一袭，值洋五百元，预备阅兵时仿陈桥之故事。不料袁世凯以此等办法，太觉草率，非采用顾老二之转弯抹角办法不可。于是所制之龙袍，暂行收存。及大典筹备处成立，更于瑞蚨祥定制值洋四十万元之龙袍一件。五百元之龙袍，遂相形见绌，弃置无用矣。至帝制取消，袁氏既死，瑞蚨祥之龙袍，将珍珠宝石等拆卸变卖，至龙袍则不知归于何处。上将所制者，则由名伶王蕙芳，赶赴津演剧之机会，向上将说项。以此项龙袍，现弃置无用，殊为可惜。不如将该袍赐与刘鸿升演戏时穿用，甚足为大帅留纪念云云。上将大喜，即将该龙袍赐给刘伶矣。谚云一啄一饮，莫非前定。何况此值洋数百元之龙袍，袁世凯不能穿，刘鸿升反得穿，谓非前定而何？

◎洪宪家臣之墨宝

都中春藕斋，在袁世凯时代，尝为国务重要会议之所。今尚有若干遗物，最刺目者，则为东屋之条屏数种（裱糊于壁上者）。有一屏，署款为臣郑沅敬书。郑沅者，袁世凯之内史也。其联语为七绝诗一首，录如下：“阊阖重重夜不扃，琼楼十二敞银屏。东风一曲升平乐，此夜都人尽可听。”更有内史夏寿田、王寿彭二人所书之横屏数种，署款为内史某某奉命敬书。未称臣，想是帝制时代以前所书者。

◎国旗绣鞋

上海某鞋铺所售女鞋，绣有三娘教子等字样，见者已嗤之。乃北京隆福寺某家，专售女鞋，鞋面竟有绣国旗者，可谓愈出愈奇。以尊严之国旗，作妇女鞋面之新花样，且发现于首善之区，而不以为褻，真奇之又奇矣。

◎大牡丹

南昌进贤门外，距城十五里许，有青云谱者，江城之名胜也。该谱位处山麓，田亩环围，石桥水池，开门即见。谱内植有奇花异树，每届春季百花开放之时，艳景宜人，清香扑鼻，洵可乐也。该谱住持道人徐云岩，常请长官前往游览。兹值该谱各种牡丹开放之时，较常年更觉奇特。中有一朵，花开似锦，大如车轮。以是哄动远近士女，前往赏玩者更多。住持等以此牡丹为民国之祥瑞，乃格外凑趣，结红绿彩球数十，点缀其间，并备具素酌，邀请名人韵士题咏，以纪其盛。

◎男子之尾

上海白克路宝隆医院头等病房中，近到有年约二十岁左右之张姓男子。其人生有一尾，长不及一尺，形似猪尾，皮色与人身皮肤为异。经德医克利医生摄影后，用利剪剪去，将此尾浸入药水中。此人剪尾后亦无他异，惟素患有神经病，与之言语，不甚明了。吾国人素有豚尾之号，今则实有其事矣。

◎人妖

厦埠有一种男人女态者，俗谓之雌形。其声音笑貌，行动举止，悉如妇人。禾山双涵街黄某，晚年得一子，爱如掌上珠，故命名曰掌珠。生长十六岁，其容貌举动，绝似怀春女子，不染一毫丈夫气。珠性好修饰，留蓄全发，学女子打辮。每日早起，即对镜理发，必一丝不乱，而后心安。又复涂脂抹粉，花插盈头。见者皆误为平头美婢，而不知固系翩翩美男子也。珠少时，住居大走马路街常与和凤宫口卖水果某，如形影之不相离。去年秋间，珠忽谓某曰：“与君聚久，今觉腹中震动，似怀胎然。”某亦一笑置之。不意近日珠竟腹中大震，晕去复苏。由谷道生下一卵，较鹅卵加大一倍。落地时，卵固含有生气，栩栩欲活。约半点钟，始冷如冰。某与珠均讶为不祥，密裹以败絮投江中。珠年已二十二矣，尚住双涵街。过其门者，无不识其人。此亦世界人类中之绝无仅有者。

◎造像石幢

河南伊阳县下堡庄，东虎头山腰，旧有清凉寺，创建于宋熙宁初年。形势爽峻，风景清幽。山门西开，视伊流若匹练，西岩如列屏。北足延揽龙门风月，南可收罗九皋烟雨。寺外有摩天岭、明心泉、凝碧池、萱花溪诸胜。寺产百余亩，已提作该庄两等小学校常经费。清季迭遭兵燹，寺僧散去。改革以来，凋敝甚益。寺中古迹最多，有魏正始造像，前被奸商盗去，售于某当道。该庄绅董，迭次控诉，迄未璧还。又有石幢一，亦系魏晋石刻，半为风霜剥蚀。宋元以来碑碣，多埋没于苍苔蔓草之中。惜哉！现时该庄绅学两界，拟将该寺重加修葺，并建存古室数间。所有石刻一概储藏其中，以备稽考云。

◎古钱铜印

安徽凤台县城西，有村曰廖家村，距城三里许。昔为苗家村，苗沛霖难作，村人虑祸，更今名。村附近之洒金台，雨后土溢，辄有碎金及铜印古钱出现。印大小不一，皆古篆。钱三角形，仿佛一元字。质非铜非锡，莫审其名。村人多拾得，甚或恃以为生。今雨后但涌钱及铜印，碎金不复多见。宰是邑者，每敛铜印古钱为长官寿。第溢金涌钱之故，颇不可解。相传南唐都寿春，寿春距凤台三十里许。唐社将覆，遂卷所有藏之。数百年来，历受雨水之冲激，泥土渐薄，故溢金而涌钱也。

◎篆书墓砖

嘉兴东栅镇牛场滨，向有荒地一段，为王姓产业。近因雇工开垦，发现墓砖数块，上有篆书大明隆庆二年道路将军李维字样。最奇者，砖上有当时堪舆家白鹤仙人所志数语，大略谓若干年后此茔当被发掘云云。屈指计算，适为今年，其理殊不可解。镇人闻之，咸嘱王姓停止开垦，以存古迹云。

◎洪宪皇子之真迹

洪宪皇子袁抱存，夙以名流自称，尝喜与文人学士相往还。自回彰德后，即挈眷寓居上海。因慕无锡山水之胜，特由邑人钱保奇引导至锡。因嫌马路旅馆之尘嚣，遂假寓西门外振新纱厂。先期由小万柳堂主人廉泉致函邑中诸名宿，为作东道主。抵锡后，即雇乘蒋氏书舫，由汽油船拖载前往惠泉。且复选色征歌，流连忘返。袁少负文名，其冒雨游太湖之万顷堂时，曾题一联曰：“几席三山，万顶波涛疑海上。湖天一阁，重阳风雨是江南。”吐属名隽，书法亦劲遒有致。吾读其词，吾见其人，不禁有卿本佳人之叹。

◎梅郎惨死之记载（一则曰呜呼梅郎再则曰呜呼梅郎）

丙辰年，名伶梅兰芳，自京来沪。隶天蟾舞台，座客常满。乃十四日《北京亚细亚报》，竟误传死耗，谓昨晚（指十三言）得沪电，梅郎惨死于暗杀，且详载其原因。一再呜呼，深致悼惜。一若梅郎之死，业已千真万确者，宁非至怪之事。考是晚梅郎正演《佳期拷红》一剧，刚报挨棒，又传饮弹。不知梅郎见之，将何以为情也。该报之记载曰：暗杀乃最不道德之行为。世界各国，虽时有所闻，甚为社会上所不许也。中国近年以来，此风甚炽。且均发现于沪上，如宋教仁、郑汝成暨陈其美等各暗杀案，均属惨无人道。然犹曰伊等为一时政客军人，因忌生妒，尚有致死之由。若梅兰芳者，不过一着名伶人，虽曰姿容绝世，技艺超群，尚无遭人暗杀之价值。今亦被人狙击，惨死于沪。虽道途传说，系由某媛爱情不达，遂至出此无情手段。然据情度理，必出于忌者为多。以一伶人之优胜，尚足以因忌致死。则稍有能力者，安往不遭人所忌，咸将有不知死所之感矣。此风一倡，适足为人心世道之忧。故特详叙其事于左，非为梅郎惜，实为人道危也。

又曰：久享剧界大名之梅兰芳，惨死于沪上。昨晚（十四号）京中已得有沪电，各园散发传单，其死之非伪，无可疑矣。呜呼梅郎！以绝顶之聪明，又有盖世之丰姿。其对于旧剧，能各得其神，新剧亦能曲尽其妙。且于人情世故，莫不形容异致。虽云优伶小技，然有关于人心世故，实非鲜浅。今竟以死于非命，彼苍者何其忌才之甚。至其致死之原因，闻系沪上某贵媛（闻不仅一人）看梅郎之剧，情往神驰，欲得一面为欢，屡以柬招梅郎。在一般轻薄者，固为极好之机缘，无上之艳福。乃梅郎均行拒绝，其洁身自好，由来久矣。不知梅郎致死之祸胎，即伏在是。盖某贵媛等以招之不来，因爱生嫉，遂卖通奸徒，用枪狙击。而绝顶聪明盖世丰姿之梅郎，遂吞弹而与世长辞。呜呼！亦云惨矣。方梅郎初莅沪时，沪上剧界因竞争而生嫉忌，散布种种谣言，将予以不利，梅郎不为动，而仍演剧如故。诎如既得容于前，卒不免于后。因此而戕身，尤为可哀。虽然梅郎此死，亦足以千古。但不知素爱聆梅郎之剧者，此后到歌舞场中，应作如何之感想耶？更不知都中文人墨士，素与梅郎厚者，得梅郎之凶耗后，应费多少之心思，发诸诗歌，以达其惋惜之忧耶？

◎名伶之寿险费

上海天蟾舞台，由北京聘到名伶梅兰芳、王凤卿，订立合同，每月包银一万八千元。满期后，补演十天。及登台演唱，大有人满之患。该舞台经理许少卿，查悉有人妒忌，在市遍发传单，大致谓诸君如往该舞台观看梅兰芳、王凤卿演戏者，务须谨防危险赠品，于十天内留意等情。虽此等举动，不值一笑。惟既希图谣惑，当即据情报告老闸捕房，立派包探前往保护，而资镇静。闻梅王二伶，近日曾向华安保险公司保险。梅保一万两，王保五千两，以备不虞云。

◎翰墨姻缘

丙辰冬，福州南台大火，延烧数千家，灾情极重。旅京闽省人士，思有以救济之。乃援前次江皖筹赈办法，邀集京师名伶，演义务剧一日。以所得剧资，汇济灾黎。即在吉祥园开演，其中主要角色，为谭鑫培、梅兰芳。谭梅二人之艺，皆一时无两。而兰芳色艺双佳，近皈依来尤众。提调兹事之人，拟俟演剧过后，以百金为酬。先以此意婉告兰芳，兰芳辞而不受。惟托人言于林畏庐老人，拟乞得画扇一柄，以为光宠。畏庐老人闻而嘉其义，立绘一团扇赠之，且题一绝云：“自写冰纨赠畹华，盈盈比玉更无瑕。最怜宝月珠灯下，吹彻银笙演葬花。”兰芳得扇，异常珍爱。知者皆传为佳话云。

◎圆光奇闻

锡邑县立第二高等学校，因校中须教员在卧室失去银洋三十余元，四处搜寻，毫无影踪。初疑校内听差窃去，继疑及寄宿之学生。遂商之该校校长辛某，于当晚即请精圆光术者到校。在该校东偏杨龟山先生祠，内取供设香案搬置校中，令寄宿生当案叩首，察其面色，以明心迹。不意圆光之术，不甚灵验，喧嚷半夜，毫无结果。此事为学生之家属蒋某所悉（因蒋某之子，当日亦在跪拜之中），大为愤怒。谓儿童入校肄业，为之父兄者，希望陶冶品性，开通智识，增长学问，养成完全之人格。该校竟以世俗之迷信邪妄之术，令儿童实地演习，尚复成何学校。即具函向辛校长质问，闻该校校长接函后，殊觉忸怩，未敢覆蒋某也。

◎新舞台之名角（一则曰板门模样再则曰其丑如鬼三则曰声如破锣四则曰终不开口）

江西新舞台，近因生意冷淡，急欲添聘一二名角，以期兜揽生意。日前有一不知姓名之某甲，向充兵士。因不守军纪，被革出营，无计谋生，遂欲于舞台上占一席之地。以乡谊与刘凤海、张庆和等拉拢，屡在后台指摘要李吉才水仙花之谬误。或戏之曰：“汝能唱否？”甲慨然曰：“吾名小珠芬，六岁拜师，实系科班出身。南北剧界，无不知名，宁只能唱而已。”事为刘凤海所闻，即欣然问其肯帮忙否。甲曰：“固所愿也。”于是订定工价，择吉登台，并一面张贴斗大金字广告，大吹特吹，谓为超等名角小珠芬，嗣又由其自行排定第一日唱《玉堂春》，第二日演《新安驿》。

届时座客如云，咸欲一瞻此驰名之超等旦角。后台向例，前剧扮演不及一半，演下剧者即须梳装，以便赓续出台。乃小珠芬于嘉兴府出台时，即向张庆和曰：“吾恐不能出台。”张问故，答曰：“虽系吾拿手戏，然隔了多年，强半遗忘。”张犹恐其系谦辞，促令速装。又以梳头亦已忘记为辞，张遂嘱李吉才为之代梳。及至嘉兴府唱完，尚云青去王三公子，李小铃去布政使，刘凤海去按察使。参堂既毕，解差张公道上堂报到，布按同唤将犯妇苏三带上堂来。时一般座客之视线，均直射台后门帘。诂小珠芬此时竟如板门模样，挺身直出，面目黧黑，其丑如鬼。内台白口（苦呀）两字，既未曾唱，而出台几句西皮摇板，亦全行抹煞，径至案前跪下。观者已大为骇怪，及至问供时，仅仅唱得大人容禀四字，则已不能赓续唱去，且声如破锣，台下乃为之哄然，倒好之声，不绝于耳。斯时刘凤海大为发急，乃拍案喝曰：“好好供来”，盖欲藉此引其开腔也。诂彼仍默不作声，胡琴过板，已接四度，终不开口。张庆和见事不佳，乃从旁插嘴曰：“算了罢。”于是刘凤海只得故作精神，向衙役道曰：“今天晚了，将犯妇带下去，明日再审罢。”始得勉强下台。此诚剧园中所未有之奇闻也。

◎议会门前新绷儿

湖北省议会前，一日清晨九时，有应山县人李某，素充汉口刘园优伶。因其妻身怀六甲，行将分娩，带令渡鄂，租屋居住。夫妇二人，乘车至阅马厂。甫一登车，该妇胞胎已动。及抵省议会门首，呼痛甚惨。急令停车，就地产生一男。衣包齐下，血流如注。该妇之弟现充省议会某议员，比由议会取出被褥一床，就地盘桓，并雨伞一柄，以遮天日。一时附近男女，传为异事，往观者数百人。时有星士天一居士推其生庚，谓五行洽合，实出人头地之八字。复观该孩面相，谓其面孔亦甚奇特。观者因附会其说，谓蛇山下乃省龙正脉，省议会又为人文萃会之区，该孩独产于此，殆彼苍别有用意，当为拔类超群之好男儿云。或谓此迷信语，不值一笑。使果有凭，此儿将来必为社会所轻鄙，何也？以省议会之议员卜之也。

◎泰伯之荣典（是岂足为泰伯荣哉）

泰伯三让高风，肇启三吴，立庙于无锡梅里。平墟附近之虹山，泰伯墓在焉。民国光复，祀典废而不举。近来有泰伯后裔赣北镇守使吴金彪，吴请中央，令行地方官，切实保护庙墓，并由冯副总统制“端委高风”之匾，江西李督军制“至德无称”之匾，淞沪镇守使卢永祥制“至德莫名”之匾，颁给泰伯庙，令无锡县知事杨梦龄，赴庙敬谨悬挂。先期由后裔吴金彪、吴达盈，柬邀邑中军政商绅各界人士，赴庙观礼，并邀请吴姓同人，作招待员。兹将悬匾及致祭仪式汇志之。

悬匾之礼节（一）择定四月十日上午，悬匾致祭。（二）来宾及主人，均于先时到泰伯祠齐集。（三）送匾官下船时，主人及来宾均至河岸恭迓匾官行一鞠躬，放炮作乐。（四）匾额请至殿内，主人请来宾陪从送匾官入休息室。（五）主人率同执事人等，敬谨作乐悬匾。（六）悬匾主人，恭请送匾官及来宾入殿致祭。（七）致祭时，升炮作乐。行三鞠躬礼。（八）礼毕，主人向送匾官行一鞠躬，致谢。（九）来宾向主人行一鞠躬，致贺。（十）主人向来宾行一鞠躬礼，答谢。（十一）礼毕，退席。（十二）摄影。（十三）筵宴。闻此此种礼节系吴达盈一人拟定，并未与人商酌。且于悬匾致祭时，身挂徽章，自称泰伯祠祠长吴。识者见之，莫不哑然失笑云。

祭员之名单 主祭官为副总统代表七十四旅旅长兼副总统府咨议官赵俊卿，陪祭官为第二师师长朱申甫。第十九师师长杨春普，副总统府咨议官方更生，第四旅旅长苏谦，水警厅长赵会鹏，及邑中绅商各界诸君，踉踉跄跄，入泰伯殿内。赞礼员吴达盈已拟定礼节，大呼行迎神礼。三咨议官呼主祭官诣香案前三上香，行鞠躬礼。复位，又呼主祭官赴香案前。行献礼，初献爵，亚献爵，三献爵，奠帛，读祭文，升炮，作乐，更呼行送神礼，三鞠躬，又赞礼时，不用官音，致主祭官不知所措，见者莫不笑为儿戏。礼毕后，主祭陪祭官及绅商后裔，排列在殿前摄影。忽令泰伯庙道士三人，亦同摄在影中，不识是何用意。又宴会时分官席与来宾席，明分阶级，致与祭之绅士，大不满意云。

上祭之秩序 是日天气晴和。梅里附近，闻泰伯庙举行悬匾典礼。赴庙观礼者万人空巷，人山人海。至悬匾致祭时，泰伯殿内男女嘈杂，拥挤不堪，秩序大乱。吴达盈等见秩序无法维持，即请军队驱逐来宾，用藤鞭乱打，有敲破头者。来宾或谓泰伯庙有军队来悬副总统之匾额，莫不啧啧称□则谓泰伯三让高踪，孔子尚以至德无名称之。历代帝王无以复加，是岂足为泰伯荣哉？

知事之祭文 维中华民国六年四月初十日，即夏历岁次丁巳闰二月甲子朔，越十有九日，壬午，无锡县知事杨梦龄，谨致祭于至德三让王之神曰：猗欤泰伯，德绍陶唐。善承先志，迹迹遐荒。肇基梅里，历久弥光。闻风被泽，忝宰此邦。骏奔在庙，俎豆煌煌。用循祢 龠祭，肃展馨香。尚飨。

◎女生之悲剧（约指一枚性命一条）

鄂省女子师范学校三年级乙班师范生陈毓龄，系黄冈县人。年念岁，勤苦求学，素为同校所敬仰。日前忽在校中后园水池内溺毙，闻其致死原因，因有同班生李芳素与陈相善。某日轮李值日，例应与校监共桌饮膳。李惧见其金戒指，被责奢华。乃脱下托陈代存，戴于食指之上。嗣以洗衣不合，复取下匡于头耳针上。迨李至夜向索，忽失所在，遍觅无踪。李以陈有意藏匿，坚索其赔。陈家本寒，亲长又不在省，无力认赔。争吵再三，同学排解，公敛钱七串。李以不足半数，鸣之校监李稚云，仍责令代赔。李芳日夕追索，肆意羞辱。一日晨，并夺陈之裙及衣，阻其上课，经众排解始已。陈受辱不堪，乃萌死志。盥洗毕，遂投水自尽。迨上课后，遍觅堂室不见。幸日光映照池底，发见尸身。捞出时，已僵矣。计其投水至捞出时，不过两小时。该校遭此变故，各生惊惶无似。当由校长石世英报请警察厅，派员前来查验。云系染神经病所致，将与李生纠葛事，一字不题。一面专人往黄，告其亲属。嗣悉其家仅一母，年逾五旬，而素患漏腮症。兄毓英，又游学他乡。校长乃公同醮资一百二十串，代为棺殓。越三日，其母与叔得耗到校。以棺未钉盖，故得抚尸大恸，并拟向法庭起诉。校长以陈李虽有失物口角，然实系伊自寻死。力劝其和平了息，书领棺掩葬切结。其叔坚执不允，校长无法，只得将棺移于城外滋善善堂暂厝，仍令其同乡调解。李芳于事后，本在校中行若无事。嗣闻陈母将以逼毙伊女控官，自知不了，亦欲投水，幸经人赶救得免。校长惧再酿命祸，已召其亲属来，交其领归，并与陈母磋商和息办法，由三方议定如下：（一）李芳除名。责其出资延僧，诵经五日。（二）全校学生开追悼会，酌送赙仪。（三）由校雇船送柩回籍，此事遂得解决。惟论者以该校既有禁戴华丽饰物之规则，李生之失金戒，诉之校监，即应斥其违章。不能瞻顾物值，破坏校规。乃该校监不惟不罚其违章，反责令陈生赔偿，坐视其日夕争哄，酿此悲剧。又阻止陈之亲属起诉，诚不知其是何居心也。该校诸生之亲长，见该校管理不善，多令女生退学。过其门者，有顿形冷落之叹。

◎长醉不醒之学生

苏州第一师范三年级生，借口采集标本，远足至天平。以非正式旅行，故未有教员同往。诸生于隔日自备干粮。有任生者，购牛肉枣子等物。远足既回，见有酒家即饮，同饮者三人。饮至五六家之多，而更佐以牛肉枣子，于是祸作矣。行至狮子出畔，四人皆不能行。三人跌于田中，任其一也。一人尚能支持，乃叫山轿四顶，言明每顶二元。是时任已昏迷不醒，在轿中跌出三次，既至校中，每顶轿洋仅与一元二角。乡人敢怒而不敢言，行稍远，大呼抬棺材抬棺材不止。当时立即招校医，而校医适在大太平巷猜拳饮酒，甚有醉意，至校中一视，即云不死个，不死个，死得吾偿命。稍用药即返。至明日午时，任生鼻口流血，两眼上翻，筋肉跃动。乃又招校医至，校医始言中毒，不可回生。校长闻之，大起恐怖。乃开职员临时会议，一面报告家族，一面购办衣服，共费洋三十余元。职员同级生一齐伴灵，家长至，无可奈何，惟有长叹一声而已。入棺时，用得鼓手，大吹大擂。出棺时，学生一齐送行。棺既出门，校长乃将同饮之三人各记大过一次，开追悼会以志哀云。

◎投海请愿之异闻

近日众议院收到请愿书一件，请愿人姓王，名昭箴，自称系江西九江县人。特将家藏之古磁屏对字画，送请众议院，为之挂于会场，以为纪念。并谓拟即日赴津投海，请众院届时为之表扬云云。其措词错乱无章，大似神经病之人所为。请愿书并物件送到该院时，院中以请愿书无人介绍，不合格式，特由号房问其由何处送来。送信人自称住在东四牌楼明德堂古玩铺，不待书给收条，狂奔而去。该院立即派丁役送到该处，退还原人，乃据丁役还称，遍觅不得明德堂古玩铺。问诸附近巡警，亦无知者。兹闻院中无法办理，拟即日发交警区，寻觅发还。如寻觅不得，则拟在各报遍登广告。凡有识王昭箴为谁者，可到院报告。或王之亲属，能说明送来之件形式及款识如何者，即交其代领亦可。该请愿书原文如下。文曰：众议院执事诸公钧鉴。窃思公民辛亥之役，供差江防，为国奔走。暗中冒险，运动共和。数年以来，破产亡家，几番死里逃生。隐功甚伟，历有根据，并未邀求保奖。迨因帝制发生，公民改业为商。虽然不敢预闻国政，当是时亦曾确采舆情，痛陈利害。暗阻筹备皇室经费之进行，出力者莫过于公民之孤心苦意也。去春，公民由籍来京，带有康熙古磁屏对字画三件出售。当中挂屏格言曰：“泰山乔岳以立身，青天白日以居心。流水行云以应事，光风霁月以待人。”写法颇佳。虽有外人许以重价，公民不愿出售，而欲贱价售与本国当道，希望以此格言行事，足能救国救民也。蒙前大总统曾阅此件照片，用意之深。自知事处进退维艰，误国殃民之罪，而愧死矣。比时此件竟被权奸托人介绍购买，拖累骗价，暴贪行为，不堪言状。公民死里求生，始将原物追回。而被损坏多处，黑暗之冤，难以昭雪。伏思吾国全体内外之病，久患暴弱。难医之决症，治之不善，立见危殆。仅所恃者贵院诸公，宜同心同德。代表真正民意，化除自私自利之见。统筹全局，俯顺舆情，或可转弱为强。公民谨将此件古玩，呈送贵院，挂于议事会场，留为纪念，以遂初愿。总之，公民久抱厌世之心，而存尽忠报国之志，兹决赴津登轮投海。彼时另有遗书，务乞代为表扬。以张公道，而挽人心。则使四万万同胞，人人猛省，救国即如救身，似此始免亡国为牛为马之痛苦。则公民虽死犹生，余容续详云云。

观右之请愿书，其措词半通不通。似其人亦曾奔走于革命者，又似夙有神经病者。记者阅之，忽起好奇心，特向各方面探访，终无识王昭箴之人。但有某君谓当帝制时代，袁公子抱存氏喜古玩，极力罗致，而又不肯多出价金。凡业古玩商者，每受势力之压迫，而致亏累。其中闻有王某者，受累尤深，但不知王某是否即王昭箴其人耳。记者按请愿书中有被权奸托人介绍购买拖累骗价等语，则王昭箴或即当日被迫之一人。且因被迫受累，积忧成病，亦未可知。果尔，公子真害人不浅矣。

◎麻袋中之女尸

上海某晚八时许，有一身穿短衣年约三四十岁之某甲，雇坐黄包车。车中随带麻袋一只，分量极重。由老北门进城，声称往关帝庙地方。迨行至红栏杆桥堍，甲命停车，付给车资。当将麻袋取下，放在该处电杆木下。詎甲四顾无人，即弃之而逸。事为该处某铜作伙瞥见，留心察观良久，不见有人来取。时交二鼓，巡更者亦至。乃报告岗巡，协同念二铺地甲金茂，将麻袋拆开。见系用破帐子包裹，内衬破席一条，并破单被一方。被之内，乃女尸，头旁尚有西式枕头一个。因死后多日，尸已发变，臭气四播。尸之手足，均用麻绳扎成，如馄饨式，不觉大骇。巡警以案关人命，立报二区第一分驻所，由杜金钊警佐谕飭该地甲投报地方厅稟请相验。明日旁午，由林厅长委派楼检察官沈检验员等前往该处尸场相验。楼君莅场后，当在四面参观一周，然后升坐。由该地甲与巡警稟诉前情，楼君谕飭将该女尸取出。先命解缚，而后如法检验。良久，验得该女年约十六七岁。上身虽则露体，然有白洋纱衫，套在身上，下着黑洋纱裤。秃头赤足，头发蓬松，足长约四五寸。当因死后多日，尸已变为青紫色，且已腐烂，秽气薰蒸。周身并无别故，实系受伤后因病而死，大约尸属有意使人将尸抛弃所致。楼君亲视无讹，填明尸格，判令由堂棺殓。遗下麻袋等件，一并入棺。楼君验毕，立即返厅，据情面林君，请示办理。林君据报后，以其中情节大有可疑，因加派法警协同该地甲等四出侦查，务得真相。楼检察官等未莅尸场检验之前，有一妇人奔至尸场，自称陈姓，家住南市董家渡地方，生有一女，现年十七岁，忽于四日前走失。当时四处找寻无着，曾投报警局，仍无影响。今晨得悉此处有一女尸发现，据人述及年岁相仿，为此前来认领等语。看守女尸二十二铺地甲金茂之伙，诘其尔女之足，是大脚，抑是小脚。该妇称我女之足是天足。甲伙曰：“照此不对。此女尸之足，为五六寸之小脚。尔若不信，将所盖席片揭开一看便知。”经该妇细察之下，确非伊女，乃扬长而去。但此案现在检察厅与警察厅，各派探警分投侦查，必须水落石出。据外间传述，沪北鸡鸭弄某花烟间，数日前曾有一年已及笄之妓女，因患病卧在披屋之中。近数日内不见该妓下落，或云该女尸即此妓也。

◎大风冻死新嫁娘

东海县乡间，风俗极陋。婚嫁不用车轿，以新嫁娘坐围桶（农具）中，扎以竹竿，缠以红绿，四人抬之，即为花轿。热季则科头于烈日之中，冬季则畏慑于寒风之下，殊属野蛮。去岁有某村刘姓者，嫁女于嵇姓家。两家相距约十余里，又值岁寒风厉，行至中途，肩舆者送亲者皆冻欲僵，遂小憩，向人索茶汤取暖，并送至新嫁娘前曰：“天冷甚，其需此乎？”新娘垂头闭目，不发一言。人皆以为含羞不语也，亦不置论，仍抬向前进。迨至目的地，请新娘出桶。视之，则僵已久矣。于是咸错愕莫知所措，有怪同行者之不小心者，有怪择日不佳者，有怪新郎星命太恶者，有怪新娘命该如此者。若天气之寒冷，其风俗之鄙陋，则未尝一计及焉。殊可笑也。

◎闻所未闻之死法（死得好快）

有客自无锡来者，言该邑毙命案两则。事属罕闻，因亟录之。

（一）无锡有许佩仙者，年四十许。体甚肥胖，向在沪教读。去年冬因事回锡，在沪宁火车内购食茶叶蛋二枚，甫下咽，气忽绝。及经同乡陈君觉察，早已长辞人世矣。

（二）又顾某者，亦无锡人，年方而立。平日精神虽不甚佳，然却无大病。当兹岁首，乘兴与友人作叶子戏。甫半局，适一中风牌堕地，顾某即俯而拾之，历久不起。及同人趋视，已面无人色，生息全无矣，咸谓系中风毙命云。

◎假疯子饱尝异味

安徽人王新林（又名王威之），佯作哑子，迭在上海犯攫窃等案。由捕五次获解公堂，讯明判令逐出租界。詎王近复潜回，施其故技。在福建路九江路附近摸窃行人陈芝山身畔皮夹，被老闸捕房八十号西捕与四百八十一号华捕查获拘押，解公堂请究。乃王又装作疯人模样，以所戴之瓜皮小帽，翻作大帽，口内喃喃乱语，大声吵闹，手中不知何来粪秽一团，当堂大嚼。堂上恶其狡诈，喝巡捕上前阻止。詎王竟将粪渣向捕乱掷，包探姚锡卿与中西探捕身上衣服均遭污秽。旋由捕头禀明被告历来犯案情形，中西官以其殊属可恶，且敢当堂装疯作痴，施其秽亵行动，极应严办。因判王押西牢二年，期满再驱逐出境。判毕，犹敢倔强，乃由中西探捕撵之而出，仍胡闹不绝云。

◎林黛玉之劫运（以金刚不坏之身罚罗汉满堂之数）

金阊新舞台聘请来苏之著名女伶林黛玉，在人和栈私吸鸦片被获脱身，由吴县公署将李代桃僵到案之假林黛玉林孙氏，送还警厅。崔厅长严飭阊区署长刘承恩将人和栈主严梅峰、新舞台主王善卿及林黛玉之妹林彩娥等拘署管押，勒令交出真林黛玉，方可脱然无累。严王等乃具限十天，一准寻交，一面专人到申促驾，否则即须将住址说出，请官移提。林黛玉被逼无奈，自知丑媳妇终不免见公婆，遂亲自到苏，然犹不敢轻入重地，特函托其交好之某达官为之先容，必须随到随罚随放，达官含糊应之。黛玉至此，始放心大胆，亲身下降矣。旧历（丙辰年）腊月初一晚一句钟时，由沪开宁之夜班车，过苏暂停。汽笛呜呜中，乘客纷纷上下。时正北风怒号，天寒欲裂，忽有美一人，姗姗而下，身穿狐皮紧身，项围骆驼绒巾，外披大衣，后随一姬、一中年之男子，亟呼黄包车三乘，飞驰向阊门马路而去。有识者曰：“此粲者即鼎鼎大名之林黛玉。姬则其假母，男子不知谁何。”或云系熊文通之子，不知然否。翌日下午，县署开庭。林黛玉果然投到，娇的的无异一出玉堂春。当据周承审员庆镐鞠讯，诘其不应逃避。黛玉供实系因病赴沪就医，并非私逃。现病尚未愈，请求从宽发落。问官谓私吸，照刑律须处一千元以下之罚金。黛玉一再求减，卒科定五百元之数。喝令具结，退庭取保释放，此案遂结。说者谓林黛玉以金刚不坏之身，适罚此罗汉满堂之数。周承审员可谓罚得其当，广结佛缘矣。